

৮১-৮২ দুই খণ্ড একত্রে

বাংলাপিডিএফ



জীবন্ত কঙ্কাল + প্লাবন

রোমেনা আফাজ



রুনি

দস্যু বনহর সিরিজ
দুই খণ্ড একত্রে

প্রাবন-৮১ জীবন্ত কঙ্কাল-৮২

রোমেনা আফাজ



সালমা বুক ডিপো

৩৮/২ বাংলাবাজার, ঢাকা-১১০০



প্রকাশক :

মোঃ মোকসেদ আলী

সালমা বুক ডিপো

৩৮/২ বাংলাবাজার,

ঢাকা-১১০০

গ্রন্থস্বত্ব সংরক্ষণে প্রকাশক

প্রচ্ছদ : সুখেন দাস

নতুন সংস্করণ : আগস্ট ১৯৯৮ ইং

পরিবেশনায় :

বাদল ব্রাদার্স

৩৮/২ বাংলাবাজার

ঢাকা-১১০০

কম্পিউটার কম্পোজ :

বিশ্বাস কম্পিউটার্স

৩৮/২-খ, বাংলাবাজার,

ঢাকা-১১০০

মুদ্রণে :

সালমা আর্ট প্রেস

৭১/১ বি. কে. দাস রোড

ফরাশগঞ্জ, ঢাকা-১১০০

দাম : ত্রিশ টাকা মাত্র

উৎসর্গ

আমার প্রাণ প্রিয় স্বামী, যিনি আমার লেখনীর উৎসাহ ও
প্রেরণা জুগিয়েছেন আব্বাহ রাকিবুল আলামিনের কাছে
তার রুহের মাগফেরাত কামনা করছি।

রোমেনা আফাজ
জলেশ্বরী তলা
বগুড়া

সত্য ও ন্যায়ের প্রতীক
দস্যু বনহর



ভোর হলো।

আজানের ধ্বনির সঙ্গে সঙ্গে ফিরে গেলো গ্রামবাসী যে যার ঘরে। ক'দিন আগেই ডাকাত পড়েছিলো ইকরাম আলী সাহেবের বাড়িতে, পুনরায় আজও সেই ডাকাতের আবির্ভাব সবাইকে ভাবিয়ে তুলেছে।

ভোর হবার সঙ্গেই ইকরাম আলীর রূপ পাল্টে গেলো। সে তার সমকক্ষ ব্যক্তিদের নিয়ে বেশ করে আবার গোপন আলোচনায় মেতে উঠলো, রাতে ডাকাত এসে তাকে এবং নৌকার মহাজনকে শাসিয়ে যে কথা বলে গেছে সে কথা সম্পূর্ণ গোপন করে গেলো সে।

মহাজনরা নৌকা বোঝাই চালের বস্তা নিয়ে ইরামতিতে নৌকা ভাসালো।

ইকরাম আলী তার চালের মূল্য বুঝে নিয়ে লোহার সিন্দুকে তুলে রাখলো এবং বাড়িতে দু'জন চৌকিদারের পাহারার ব্যবস্থা করলো। সে মালেক মিয়াকে ডেকে কঠিন কণ্ঠে বলে দিলো, এরপর যদি সে নাকে তেল দিয়ে ঘুমায় তাহলে তাকে সেদিনই বিদায় করে দেওয়া হবে।

মালেক মিয়া মাথা নেড়ে বললো—আর এমন হবে না মালিক, এবারের মত মাফ করে দিন।

নানারকম গালমন্দ করার পর ইকরাম আলী ও ইকরাম গৃহিনী স্বস্তির নিঃশ্বাস ফেললো।

গোলাপীর মনটা ব্যথায় জর্জরিত হলো, কারণ মালেক মিয়া বুড়োমানুষ, তাকে এমনভাবে গালমন্দ করাটা যেন বড় অশোভন লাগছিলো তার কাছে।

রাতে আঁচলের নিচে ভাতের থালা লুকিয়ে এনে হাজির হলো গোলাপী। মুখোভাব তার মলিন বিষণ্ণ। ভাতের থালা নামিয়ে রেখে বললো—মালেক ভাই, এই নাও। সারাদিন কত বকুনি খেয়েছো, সব আমি শুনেছি।

হাসে মালেক মিয়া, তারপর খেতে বসে সে নিশ্চিন্ত মনে।

বাইরে কারও পদশব্দ শোনা গেলো।

গোলাপী বেরিয়ে গেলো আলগোছে। সে যখন বেরিয়ে যায় তখন ইকরাম আলী তাকে দেখে ফেলে। অবাক হয়ে বলে সে—হাবলু বৌ, তুমি এখানে কেন?

হাবলুর বৌ কিছু না বলে চলে যায়।

ইকরাম আলী কক্ষমধ্যে প্রবেশ করে রাগে ফেটে পড়ে—বুঝেছি লুকিয়ে লুকিয়ে ভাত দিয়ে যাওয়া হয়েছে.....একগাদা ভাত নষ্ট করবে অথচ ঠিকমত পাহারা দিতে পারবে না। এক্ষুণি খেয়ে নিয়ে লাঠি হাতে দরজায় বসে যাও।

মালেক মিয়ার ততক্ষণে খাওয়া হয়ে গিয়েছিলো, সে হাত মুখ ধুয়ে লাঠি হাতে বেরিয়ে আসে, তারপর দরজার একপাশে বসে পড়ে দক্ষ প্রহরীর মত।

একসময় বাড়ির সবাই ঘুমিয়ে পড়ে, এমন কি ইকরাম আলীও। আলগোছে সরে পড়ে মালেক মিয়া। সে জানতো পাড়ার হবি মোল্লার একটি ঘোড়া ছিলো। মাঝে মাঝে হবি মোল্লা তার ঘোড়া নিয়ে ইকরাম আলীর বাড়িতে আসতো, তখন মালেক মিয়া কখনও কখনও ঘোড়াটার পাশে গিয়ে দাঁড়াতো এবং ওর শরীরে হাত বুলিয়ে দিতো। ঘোড়াটা বেশ বড়সড় ছিলো। মালেক মিয়া ভালবাসতো ঘোড়াটাকে। একদিন মালেক মিয়া হবি মোল্লাকে জিজ্ঞাসা করেছিলো, এ ঘোড়ায় তুমি কি করো?

হবি মোল্লা জবাব দিয়েছিলো—ঘোড়াটা আমার বড় প্রিয়। ওর পিঠে চড়ে আমি দূরে শহরে বন্দরে যাই। ওতে চড়ে আমি মাঠে দৌড়াই তাতে আমি আনন্দ পাই। মালেক মিয়া নিজ হাতে কয়েকদিন ছোলাও খাইয়ে দিয়েছিলো ঘোড়াটাকে।

রাত বেড়ে আসছে।

মালেক মিয়া কক্ষমধ্যে প্রবেশ করে পাল্টে নেয় তার ড্রেস। জমকালো পোশাকে সজ্জিত হয়ে বেরিয়ে আসে সে বাইরে।

ইকরাম আলীর বাড়ি হতে সামান্য দূরে ছিলো হবি মোল্লার বাড়ি। বাড়ির উঠানের একপাশেই ছিলো তার ঘোড়াশালা। নিকষ অন্ধকারে ঘোড়াশালা থেকে হবি মোল্লার ঘোড়াটা বের করে আনলো মালেক মিয়া,

তারপর পিঠে হাত বুলিয়ে চেপে বসলো। উচ্চাবেগে ছুটে চললো এবার হবি মোল্লার ঘোড়াটা।

ইরামতির তীর ধরে ছুটলো মালেক মিয়া।

সমস্ত দিনে ইকরাম আলীর চালের বস্তাসহ মহাজনের নৌকা সবেমাত্র হাজরার বাঁক ঘুরে এসেছে। হাজরা বাঁক অনেক বড়, এই বাঁক ঘুরে আসতে প্রায় একদিন সময় লেগে যায়। সমস্ত দিন ধরে যে পথ এগিয়ে এসেছিলো নৌকাখানা, মালেক মিয়া সেই পথ মাত্র দেড় ঘন্টায় অতিক্রম করে পৌছে গেলো নৌকাখানার পাশে।

তীর ছেড়ে মাত্র কয়েক হাত দূরে নদীবক্ষে নৌকাখানা এগিয়ে চলেছে।

মালেক মিয়া তীর থেকে কঠিন কণ্ঠে বললো—মাঝি, নৌকা ভিড়াও...নৌকা ভিড়াও.....

মাঝিরা নিশ্চিত মনে দাঁড় টেনে এগিয়ে যাচ্ছিলো। গভীর নিস্তন্ধ রাতের অন্ধকারে বনহরের কণ্ঠস্বর স্পষ্ট এবং গুরুগভীর শোনা গেলো। মাঝিরা সচকিত হয়ে উঠলো, ভয়ও হলো তাদের মনে। একজন বললো—হজুর, হজুর, তীর থেকে কে যেন নৌকা ভিড়ানোর জন্য হুকুম করছে।

মহাজনদ্বয় নৌকার মধ্যে শুয়েছিলো নরম গদি বিছানো বিছানায়। যদিও তারা নিদ্রায় মগ্ন ছিলো তবু তাদের সুখনিদ্রা ছুটে গিয়েছিলো, এতরাতে নির্জন হাজরা বাঁকে কে তাদের নৌকা ভিড়ানোর জন্য নির্দেশ দিচ্ছে? তাঁরা কান পেতে শুনতে চেষ্টা করছিলো।

এমন সময় মাঝিদের ভয়বিহ্বল কণ্ঠস্বর শোনা গেলো—হজুর, কি করবো?

প্রথম মহাজন চাপাকণ্ঠে বললো—তোমরা দাঁড় টেনে যাও।

ততক্ষণে পুনরায় শোনা গেলো—মাঝি, যদি বাঁচতে চাও নৌকা ভিড়াও.....

দ্বিতীয় মহাজন তখন প্রায় কঁদে ফেলেছে। সে বললো—নৌকা ভিড়াতে বলা, নইলে হয়তো কোনো বিপদে পড়বো।

প্রথম মহাজন বললো—কিছুতেই নৌকা ভিড়ানো চলবে না। মাঝি, তোমরা জোরে জোরে দাঁড় টেনে চলো।

মাঝিরা কার কথা শুনবে, তাঁরা মহাজনের কথামত দাঁড় টেনে চললো।

নৌকার মধ্যে বসে মহাজনদ্বয় তখন এ ওর মুখ চাওয়া চাওয়ি করছে। হঠাৎ একটা গুলী তাদের মাথার পাশ কেটে চলে গেলো।

আঁতকে উঠলো মহাজনদ্বয়, ভয়ে তারা কাঁপতে শুরু করলো। হাজারা বাঁকে নদীর প্রশস্ততা অত্যন্ত সংকীর্ণ ছিলো, তাই নৌকা মাঝনদীতে চলেও রক্ষা পেলো না বনহুরের শক্তিশালী রিভলবারের গুলী থেকে।

সাঁ করে আরও একটা গুলী নৌকার ছেঁ ভেদ করে বেরিয়ে গেলো ওপাশে।

দ্বিতীয় মহাজন জড়িয়ে ধরলো প্রথম মহাজনকে, তারপর দু'জনে গড়াগড়ি দিতে শুরু করলো। শুধু প্রাণের ভয় নয়, ভয় এক লক্ষ টাকার চালের বস্তাগুলোর জন্যও।

অবিরত গুলী ছুটে আসছে।

মাঝিরা ভীষণ ভয় পেয়ে গেলো, তারা বললো—হজুর, আমাদের প্রাণ যাবে—আপনারাও মরবেন, তার চেয়ে নৌকা তীরে ভিড়ানো ভাল।

প্রথম মহাজন বললো—তাই করো, তাই করো, নাহলে রক্ষা নেই। গুলী তো নয় যেন বৃষ্টি.....

নৌকা নিয়ে মাঝিরা তীরের দিকে এগুতে লাগলো।

এবার বন্ধ হয়ে গেলো গুলী বর্ষণের পালা।

বনহুর কিন্তু তখনও অশ্বপৃষ্ঠে বসে আছে। অশ্বপৃষ্ঠে থেকেই সে অবিরত গুলী বর্ষণ করে চলেছিলো।

নৌকা তীরে ভিড়তেই মহাজনদ্বয় নৌকার ফাঁক দিয়ে তীরের দিকে দৃষ্টি নিক্ষেপ করলো। ভয়ে হৃদকম্প শুরু হলো তাদের। তারা দেখলো, তীরে অশ্বপৃষ্ঠে বসে আছে সেই জমকালো মূর্তি যে বলেছিলো—তোমরা এ চাল ক্রয় করো না। তোমাদের অর্থগুলো বিলিয়ে দাও হাজারার দুঃস্থ অসহায় জনগণের মধ্যে, কারণ তোমাদের এ অর্থ সদুপায়ে উপার্জিত অর্থ নয়.....কিন্তু মহাজনদ্বয় তার কোনো কথা শোনেনি। তারা ইকরাম আলীর ওদামের সব চাল কিনে নিয়েছিলো যা চালের মূল্য তার পাঁচগুণ বেশি মূল্যে। ভয়ে ঠক্ ঠক্ করে কাঁপছে তারা।

মাঝিরা নৌকার ভিতরে প্রবেশ করতে যাচ্ছিলো, তারাও ভীষণ ভয় পেয়ে গেছে। গরিব মানুষ তারা, দুটো পয়সার জন্য নৌকা বায়, এবার তাদের মৃত্যু সুনিশ্চিত।

বনহর অশ্বপৃষ্ঠ থেকে নেমে পড়লো, তারপর নৌকার ধারে গিয়ে গম্বীর এবং দৃঢ়কণ্ঠে বললো—বেরিয়ে এসো, বেরিয়ে এসো বলছি.....

মহাজনদ্বয় বলির পাঠার মত কাঁপছিলো, এবার বেরিয়ে এলো ছৈয়ের বাইরে।

বনহর বললো—নেমে এসো নিচে।

অগত্যা মহাজনদ্বয় নেমে এলো নৌকা থেকে। মাঝিরাও নেমে আসতে বাধ্য হলো।

বনহর এগিয়ে এলো মহাজনদ্বয়ের পাশে।

রিভলবারটা প্রথম মহাজনের বুকে চেপে ধরে বললো—কি ব্যাপার, আমার কথা অবহেলা করে নিশ্চিত মনে চালের বস্তাগুলো নিয়ে নিজেরা পাচার হয়ে যাচ্ছিলে দেখছি? সুন্দর বন্দোবস্ত, তাই না?

নীরব হয়ে গেছে মহাজনদ্বয়। তাঁদের দাঁতগুলো ঠক্ ঠক্ শব্দ শুরু করে দিয়েছিলো। চোয়ালটা অব্যাহত মত খুব জোরে জোরে কাঁপছিলো কিনা, তাই দাঁতগুলো লাঠিবাড়ি খেলছিলো যেন।

বনহর বললো—গাদা, গাদা কাগজের বিনিময়ে এ দেশ থেকে তোমরা অসহায় মানুষের মুখের গ্রাস কেড়ে নিয়ে যাচ্ছে, জানো এর শাস্তি কি?

প্রথম মহাজন ঢোক গিলে বললো—কাগজের বিনিময়ে এসব নেবো কেন? আমরা নগদ টাকার বিনিময়ে এসব নিয়েছি...

বনহর অট্টহাসিতে ফেটে পড়লো। হাজরা বাঁকের নির্জন প্রান্তর কেঁপে উঠলো সে হাসির শব্দে। মহাজনদ্বয়ের আত্মরাম খাঁচাছাড়া হবার উপক্রম হলো। মাঝিরা তো তখন ভয়ে আতঙ্কে ঠক্ ঠক্ করে কাঁপছে। তারা বহু হাসি দেখেছে কিন্তু এমন হাসি তারা দেখেনি কোনোদিন। হাসির প্রতিধ্বনি যেন কেঁপে কেঁপে ভেসে বেড়াচ্ছে। হাসির রেশ মুখে যেতে না যেতেই বললো বনহর—নগদ টাকা! কোন্‌গুলো তোমাদের নগদ টাকা। এ কাগজের বাড়িলগুলো? হাঁ, এ দেশে ওগুলো টাকাই বটে তবে তোমাদের দেশে ওগুলো টাকা নয়—ওগুলো টাকার আকারে তৈরি কাগজের স্থূপ। নরপত্তর দল, তোমরা তোমাদের দেশে তৈরি টাকার আকারে কাগজের বাড়িলগুলো এনে আমাদের দেশের অর্থলোভী জানোয়ারদের চোখে ধাঁধা লাগিয়ে তাদের মাথায় ঘোল ঢেলে তাদেরই সর্বনাশ করে যাচ্ছে? জিনিসের যা মূল্য তার

দশগুণ বেশি দিলেও লোকসান হচ্ছে না, কারণ তোমরা তো তোমাদের কোনো বস্তু দিচ্ছে না, দিচ্ছে গাদা কাগজ—যার মূল্য নেই এক পয়সা। সেই কাগজের বিনিময়ে পাচ্ছে মূল্যবান সামগ্রী, লুটে নিচ্ছে এ দেশের হাজার হাজার অসহায় মানুষের গ্রাস। শুধু তোমরাই নও, তোমাদের মত বহু নরপশুর দল সাধারণ জনগণ সেজে গোপনে এ দেশেরই কিছু সংখ্যক স্বার্থান্বেষীদের উদর পূরণ করার সুযোগ করে দিচ্ছে।

না না, আমরা নই.....আমরা নই.....হাত জুড়ে বলে মহাজনদ্বয়ের প্রথম জন।

বনহর বললো—জানি, আমি একা তোমাদের সবাইকে শায়েস্তা করতে পারবো না কিন্তু মনে রেখো শয়তান, দেশের লাখো লাখো মানুষ তোমাদের ক্ষমা করবে না। তোমাদের মাংস তারা জীবন্ত অবস্থায় টুকরো টুকরো করে ছিঁড়ে শিয়াল কুকুরকে দিয়ে ভক্ষণ করাবে...যাও, নৌকা নিয়ে তোমরা হাজারা গ্রামে ফিরে যাও। সমস্ত চাল হাজারা গ্রামের দুঃস্থ মানুষদের মধ্যে বিলিয়ে দাও, নইলে হাজারা বাঁক তোমরা অতিক্রম করতে পারবে না। যাও, নৌকা নিয়ে তোমরা হাজারা গ্রামে ফিরে যাও.....

বাধ্য সন্তানের মত নৌকায় উঠে বসলো মহাজনদ্বয়। তারা মনে মনে আল্লাহর নাম জপতে শুরু করে দিয়েছে।

মাঝিরা দাঁড়িয়ে দাঁড়িয়ে কাঁপছিলো, বনহর তাদের ধমক দিতেই তারাও নৌকায় উঠে পড়লো।

নৌকার মুখ হাজারা গ্রাম অভিমুখে ফিরিয়ে নিতেই বনহর ঘোড়ার পিঠে চেপে বসলো।



লাঠি হাতে মালেক মিয়া টুলটার উপরে বসে বসে ঘুমাচ্ছিলো। তার অদূরে দু'জন চৌকিদার—তারা চট বিছিয়ে নাক ডাকছিলো।

ওদিকে বেলা উঠে গেছে কখন।

ইকরাম আলী শয্যা ত্যাগ করে আনন্দ বিগলিতভাবে হাই তুলে শুভ রাত্রিকে অভিনন্দন জানালো। তারপর বেরিয়ে এলো বাইরে, খুশিতে উচ্ছল তার মুখমণ্ডল, কারণ সে গোটারাত নিশ্চিত মনে ঘুমিয়েছে।

বাইরে এসে দেখে নাক ডাকিয়ে ঘুমাচ্ছে মালেক মিয়া আর চৌকিদারদ্বয়। রাগে ফেটে পড়লেন—এটাই বুঝি তোমাদের পাহারা দেবার ঢং, তাইনা?

ধড়মড় করে উঠে দাঁড়ায় মালেক মিয়া।

চৌকিদারদ্বয় গোটারাত নাক ডাকিয়ে ঘুমিয়েছে, কাজেই তারা আরামে গা মোড়া দিয়ে উঠে বসলো। মালেক মিয়া সন্ধ্যা রাতে দুটো বিড়ি দিয়েছিলো তার পুঁটলি থেকে বের করে ওদের হাতে। ওরা বিড়ি দুটো খেয়ে আরামে ঘুমিয়ে পড়েছিলো, ঘুম ভাঙলো সবমাত্র।

ইকরাম আলী বললো—এমন করে রোজ পাহারা দিবি যাতে কোনো ডাকাত বা ডাকাতের বেটা আমার বাড়ির আশেপাশে আসতে না পারে। কথা শেষ করে যেমনি ইকরাম আলী উঠানের দিকে পা বাড়াতে যাচ্ছিলো, ঠিক ঐ মুহূর্তে মহাজনদ্বয় এলোমেলো ছনুছাড়া অবস্থায় এসে দাঁড়ালো।

চমকে ফিরে তাকালো ইকরাম আলী, অবাক কণ্ঠে বললো—আপনারা?

উভয় মহাজনের মুখমণ্ডল বিবর্ণ ফ্যাকাশে। তাদের অবস্থা দেখে মনে হচ্ছে তারা এইমাত্র কোনো মৃতদেহ অগ্নিদগ্ধ করে শ্মশান থেকে ফিরে আসছে।

ইকরাম আলী বললো—কি ব্যাপার, আপনারা?

প্রায় কেঁদে ফেললো মহাজনদ্বয়।

মালেক মিয়াও কম অবাক হয়নি, সে বলে উঠলো—আপনার ফিরে এলেন কেন? চালগুলো কি মালিক সাহেবকে ফেরত দিতে এসেছেন?

মহাজনদ্বয়ের মুখে কথা বের হচ্ছে না যেন, ঢোক গিলে বললো প্রথম জন—সর্বনাশ হয়েছে.....সর্বনাশ হয়েছে.....

সর্বনাশ? কি সর্বনাশ হয়েছে আপনাদের মহাজন সাহেব? বললো মালেক মিয়া।

ততক্ষণে আরও লোকজন জুটে গেছে সেখানে, কারণ মহাজনদ্বয় কাল সকালে বিদায় নিয়ে চলে গেছেন। তাঁরা সীমান্তের ওপারের লোক

এসেছিলেন গোপনে, চলে গেছেন সাবধানে অথচ আবার তাঁরা কেন ফিরে এলেন ভাববার বিষয়।

মালেক মিয়ার কথায় বললেন ইকরাম আলী—তুই চুপ কর্ মালেক, আমাকে বলতে দে।

হাঁ, বলুন মালিক বলুন—আমরা তো ছোটলোক, কি বুঝবো এ সবে, কিন্তু.....

বল্ কিন্তু কি, থামলি কেন?

আপনি যে চুপ করতে বললেন তাই...

যা, তুই এখান থেকে যা দিকি।

আমাকে গুনতে দিবেন না মালিক, যদি আমার দরকার হয়, কারণ লাঠিতো আমার হাতে।

হাঁ, তুই থাক। আচ্ছা বলুন কি সর্বনাশ হয়েছে? নৌকা ডুবে গেছে বুঝি? বললো ইকরাম আলী মিয়া।

না, নৌকা ডোবেনি।

তবে চুরি হয়েছে, না কেউ লুট করে নিয়েছে?

না।

তবে কি হয়েছে?

ঘরের ভিতরে চলুন, সব বলছি।

ইকরাম আলী সহ মহাজনদ্বয় ইকরাম আলীর বৈঠকখানায় প্রবেশ করলেন।

রাতের ঘটনা তারা সব বললো ইকরাম আলীর কাছে। তারা চাল দুঃস্থ জনগণের মধ্যে বিতরণ করে না দিয়ে হাজরা বাঁক তাদের নৌকা পার হতে পারবে না। আরও বললো—ডাকাত তাদের ঐ মুহূর্তে হত্যা করতে পারতো শুধু তা করেনি চালগুলোর জন্য.....

ইকরাম আলী আকাশ থেকে পড়ার ভান করলেও একেবারে হকচকিয়ে গেলো না, কারণ টাকাপয়সা তার নেওয়া হয়ে গেছে, এখন মহাজনদের চাল তারা যা খুশি করতে পারে। নদীর পানিতে ফেলুক আর দুঃস্থ জনগণের মধ্যে বিলিয়ে দিক, ক্ষতি নেই কিছু তার।

মহাজনদ্বয় এবার গ্রামের দুঃস্থ লোকদের জানাবার জন্য ইকরাম আলীকে অনুরোধ করলেন। ইকরাম আলী আদেশ দিলেন মারেক মিয়ার উপর—যাও মালেক মিয়া, তুমি গ্রামের দুঃস্থ লোকদের সংবাদ দাওগে, তারা যেন নদীর ঘাটে সমবেত হয়। আর শোনো, সবাইকে যেন বলোনা, কিছু চাল বিতরণ করবে আর কিছু গোপনে আমার গুদামে এনে রাখবে।

মালেক মিয়া বললো—আচ্ছা মালিক, তাই করবো.....চলে গেলো মালেক মিয়া।

ইকরাম আলী এবার মহাজনদ্বয়কে বললো—আপনারা সামান্য কিছু চাল বিতরণ করে সব চাল আমার গুদামে রেখে যান, ডাকাত বেটা টেরও পাবে না।

মহাজনদ্বয়ের পিলে কেঁপে উঠলো, তারা ভীষণ ভয় পেয়ে গিয়েছিলো তাই রাজি হলো না কিছুতেই।

মালেক মিয়া প্রথমেই হবি মোল্লার কাছে গেলো, বললো—আমাকে তোমার ঘোড়াটা কিছুক্ষণের জন্য দাও, আমি গ্রামের দুঃস্থ জনগণকে খবর দিয়ে আসি তারা যেন ইরামতির তীরে যায়। সেখানে দু'জন হৃদয়বান মহৎ মহাজন এসেছেন, তাঁরা তাঁদের চালগুলো বিতরণ করে দেবেন দুঃস্থ জনগণের মধ্যে।

হবি মোল্লা কিছুতেই ঘোড়া দেবে না।

হাসলো মালেক মিয়া, বললো—রাতে তোমার ঘোড়া কোথায় ছিলো ভাই, মাঠে ছুটে গিয়েছিলো, আমি তো এনে বেঁধে রেখে গেছি।

হবি মোল্লা ওর কথা বিশ্বাস না করে পারলো না, সে ঘোড়াটা ছেড়ে দিলো মালেক মিয়ার হাতে। মালেক মিয়া ঘোড়া পেয়ে খুব খুশি হয়ে গ্রামের দুঃস্থ অসহায় যারা, তাদের সবাইকে এক জায়গায় জড়ো করে জানিয়ে দিলো ইরামতি তীরে যাওয়ার কথা।

দুঃস্থ জনগণ খুশি হয়ে ছুটলো মালেক মিয়ার কথা শোনার সঙ্গে সঙ্গে।

অল্পক্ষণেই ইরামতি তীরে মহাজনের নৌকার পাশে অগণিত দুঃস্থ অসহায় জনগণের ভিড় জমে গেলো।

মহাজনদ্বয়ের মুখ মড়ার মুখের মত ফ্যাকাশে দেখাচ্ছে, তারা মনের ব্যথা মনে চেপে নৌকার পাশে দন্ডায়মান রইলো। মালেক মিয়ার কিন্তু

আনন্দ আজ ধরছে না, সে নৌকার মধ্য থেকে মাঝিদের সহায়তায় চালের বস্তা বের করে এনে নিজের হাতে চাল মেপে দিতে শুরু করে দিলো।

দুঃস্থ জনগণ যারা ইকরাম আলীর কাছে টাকা এনেও চাল পায়নি, তারা বিনা পয়সায় তাদের প্রয়োজন মত চাল পেয়ে হাসিতে ভরে উঠলো তাদের মুখ। তারা মহাজনদ্বয়ের প্রশংসায় পঞ্চমুখ হয়ে উঠলো।

মালেক মিয়া চাল মেপে দিচ্ছে আর গলা ফাটিয়ে মহাজনদ্বয়ের মহৎ হৃদয়ের কথা শোনাচ্ছে। সে বলছে— ভাই সকল, তোমরা খোদাতা'লার কাছে মোনাজাত করো তোমাদের পরম বন্ধু বিদেশী মহাজনদ্বয় যেন দীর্ঘজীবী হোন...তারা যেন বারবার এদেশে আসেন এবং তোমাদের মধ্যে এভাবে খাদদ্রব্য বিতরণ করেন।

মালেক মিয়ার কথায় মহাজনদ্বয়ের মুখ আরও কালো হয়ে উঠছে, তারা শুধু অধর দংশন করছে কিন্তু কোনো উক্তি উচ্চারণ করতে সক্ষম হচ্ছে না। তাদের গলা যেন শুকিয়ে গেছে, চোখ দুটো দু'আংগুল বসে গেছে, চুলগুলো রক্ষ—শ্রীহীন চেহারায় দাঁড়িয়ে আছে, যেন এক একটি কাঠের পুতুল।

মালেক মিয়া তার সঙ্গী-সাথীদের নিয়ে এক এক বস্তা চাল নৌকার খোল থেকে বের করে আনছে আর বস্তার মুখ খুলে নিয়ে তুলে দিচ্ছে গরিবদের থলেতে।

থলে ভর্তি হলে তারা সরে যাচ্ছে।

হাজারার মেঠো পথে লাইন ধরে এগিয়ে যাচ্ছে একদল খালি থলে হাতে নৌকার দিকে, আর একদল পূর্ণ থলে হাতে বাড়ির পথে ফিরে যাচ্ছে। সবার চোখে আনন্দের উচ্ছলতা, কতদিন পর তারা পেট পুরে দু'টি খেতে পাবে!

ইকরাম আলীও মহাজনদ্বয়ের পাশে দাঁড়িয়েছিলো, এত চাল বিনা পয়সায় লোককে দিতে হচ্ছে, এটা কম যন্ত্রণাদায়ক দৃশ্য নয়। তবু তিনি নীরব দর্শক হিসেবে দাঁড়িয়ে আছেন থ' হয়ে।

কিছুক্ষণের মধ্যেই বিরাট নৌকাখানার খোল শূন্য হয়ে গেলো, পড়ে রইলো শুধু খালি বস্তাগুলো।

মহাজনদ্বয় মাথায় হাত দিয়ে নদীতীরে ধুলোবালির মধ্যে বসে পড়লো, তাদের মুখে কোনো কথা নেই।

মালেক মিয়া চাল বিতরণ শেষ করে নেমে পড়লো নৌকা থেকে। হাতের মধ্যে হাত কচলে বললো—হুজুর, আপনারা যে মহৎ কাজ করলেন তার তুলনা হয় না। হাজারা গ্রামের দুঃস্থ জনগণ ক্ষুধার জ্বালায় মরিয়া হয়ে উঠেছিলো, তারা আপনাদের আশীর্বাদ করছে। আপনারা এবার ফিরে যান যেখান থেকে এসেছিলেন সেখানে।

ইকরাম আলী বললো—আপনারা দুঃখ করবেন না। যতদিন আমরা জীবিত আছি ব্যবস্থা আমাদের চলবেই, নদী পথে না হয় স্থলপথে—তাও যদি না হয় আকাশপথে.....হেঁ হেঁ হেঁ, একটু হেসে বললো—ডাকাত কেন, ডাকাতের বাবা পুলিশ মহল আমাদের কাজে বাধা দিতে পারেনি, পারবেও না। কি বলিস্ মালেক, তাই না?

হাঁ হাঁ মালিক, ঠিক বলেছেন, কারও বাবার সাধ্য নেই আপনাদের মত জীবন্ত শয়তানদের.....

কি, কি বললি?

না না.....জিভ কামড়ে বলে মালেক মিয়া—আপনাদের মত জীবন্ত ফেরেস্তাদের কাজে কেউ কোনোদিন বাধা দিতে পারবে না। আপনারা হলেন কিনা দেশ ও দেশের জনদরদী বন্ধু—শুধু বন্ধু নন, আপনারা দেশের হিতকাজী। আপনারা সদাসর্বদা দেশ ও দেশের মঙ্গল নিয়ে ভাবছেন।

হাঁ, ঠিক বলছিস মালেক, আমরা যত দেশ ও দেশের জন্য ভাবি এমন আর কে আছে যারা দেশের জন্য ভাবে? হাঁ, অচিরেই একটা জনসভা দেবো—দুঃস্থ জনগণকে এতগুলো চাল দেওয়া হলো বিনা পয়সায়, কাজেই এ সময়ে তারা সবাই খুশি আছে আমাদের উপর।

মালেক মিয়া বলে উঠে—মালিক, অচিরে কেন, আজই একটা সভা দিন, সে সভায় থাকবেন বিদেশী মহাজনদ্বয়। তাঁরা নিজেদের স্বার্থ ত্যাগ করে হাজার হাজার টাকার চাল জনগণের মধ্যে বিতরণ করে দিলেন, আর জনগণ তাঁদের ধন্যবাদ জানাবার সুযোগ পাবে না?

ঠিক কথা। মালেক, তুই দেখছি বেশ বুদ্ধি নিয়ে কথা বার্তা বলিস্। হাঁ, মহাজনদ্বয় থাকতেই আমি গ্রামে জনসভা করবো, তবে আজ নয় দু'একদিন যাক।

কিন্তু মহাজনরা কি থাকবেন?

বললে না থেকে পারবেন না। তা ছাড়া মহাজনরা তো আমাদেরই পরম বন্ধু, তবে আমাদের ছোঁয়া খান না, এই যা অসুবিধা...

হাঁ, ওটুকুই অসুবিধা উনারের, আমাদের ছোঁয়া কিছু খান না.....মালিক, তাহলে কি উপায় হবে? হাঁ, একটা বুদ্ধি আমার মাথায় এসেছে। উনারা সেন্দ্র খান না কাঁচা খান? কাঁচা চাল ডাল মাছ মাংস ডিম দুধ সব দিলেই উনারা নৌকায় পাক করে খাবেন। মালেক মিয়া এবার মহাজনদ্বয়ের পাশে গিয়ে বললো—একেবারে নিশ্চুপ হয়ে গেছেন কেন—কথা বলুন, কাঁচা মাল খাবেন তো?

মহাজনদ্বয়ের মুখে কে যেন কালি মাখিয়ে দিয়েছিলো, তারা বলির পাঁঠার মত মুখ গোমড়া করে দাঁড়িয়েছিলো এতক্ষণ, এবার বললো—না খেয়ে উপায় কি?

তা ঠিক, স্থান-কাল-পাত্র বিশেষ কাঁচা-পাকা সবই চলে, তাই না হজুর...?...বললো মালেক।

ইকরাম আলী ধমকে উঠেন—মালেক, তুই দেখেছি বড় বড় বুলি আওড়াতে শিখছিস! পাকা পাকা কথা শিখলি কোথায়?

মালিক, শিখতে হয় না, আজকাল হা করলেই গলা দিয়ে বেরিয়ে আসে।

তাই বলে যা খুশি বলবি?

না না, তা কি আর বলা যায়, যা দেখবো যা শুনবো নীরবে হজম করতে হবে। হঠাৎ দু'একটা মুখ দিয়ে বেরিয়ে যায় এই যা.....

যখন এসব আলোচনা চলছিলো, ঠিক ঐ সময় একটা জীপগাড়ি এসে দাঁড়ালো ইকরাম আলীর বৈঠকখানার সম্মুখে। গাড়ি থেকে নামলেন দু'জন সরকারি পোশাকধারী লোক।

ইকরাম আলী তাঁদের দেখামাত্র আনন্দে উৎফুল্ল হয়ে উঠলো, তাড়াতাড়ি অভিনন্দন জানিয়ে তাঁদের বৈঠকখানায় নিয়ে গিয়ে বসালো। মহাজনদ্বয় তখন সরে পড়তে যাচ্ছিলো, ইকরাম আলী তাদেরও ডেকে বসালো এবং পরিচয় করে দিলো সরকারি ভদ্রলোক দু'জনার সঙ্গে।

মালেক মিয়াও ওদের সঙ্গে প্রবেশ করেছিলো বৈঠকখানায়, তার কানে এলো ইকরাম আলীর কণ্ঠস্বর—স্যার, হঠাৎ সংবাদ না দিয়ে কেন এসেছেন জানতে পারি কি?

প্রথম ব্যক্তি সিগারেটে অগ্নিসংযোগ করে বললেন—যে কারণে এসেছি তা শুনলে আপনি দুঃখ পাবেন ইকরাম আলী সাহেব, তবু না বলে পারছি না, কারণ আমরা আপনার সম্বন্ধে রিপোর্ট পেয়েছি যে, আপনি দেশের পণ্যদ্রব্য পাচার করে যাচ্ছেন.....প্রথম ব্যক্তি পরিস্কার বাংলায় কথা বললেন। বহুদিন যাবৎ এদেশে চাকরি করেন, তাই ভাল বাংলা বলতে পারেন।

দ্বিতীয় ব্যক্তি বললেন—ভয় পাবার কিছু নেই জনাব, কারণ অমন রিপোর্ট আমরা পেয়েই থাকি কিন্তু আসলে আপনাদের কাজে সহায়তা করাই আমাদের উদ্দেশ্য।

ইকরাম আলীর মুখে এবার হাসি ফুটলো, সে হাত বাড়িয়ে সরকারি ব্যক্তিদ্বয়ের সঙ্গে করমর্দন করলো। হঠাৎ তার দৃষ্টি চলে গেলো দরজার দিকে, দেখলো সেখানে দাঁড়িয়ে আছে মালেক মিয়া।

ইকরাম আলী বললো—কিরে, এখানে কি করতে এলি?

মালেক মিয়া হাতের মধ্যে হাত কচলে বললো—মালিক, মেহমান এসেছে কখন কি দরকার তাই এখানে দাঁড়িয়ে আছি। তামাক আনবো কি?

তামাক তোকে আনতে হবে না, দেখছিস না সিগারেট পান করছেন ইনারা?

মালিক, আপনি সিগারেট পান করেন না কিনা তাই.....

কে বললো সিগারেট পান করি না? যা, এখান থেকে চলে যা বলছি।

আচ্ছা যাচ্ছি। বেরিয়ে যায় মালেক মিয়া।

বৈঠকখানা থেকে বেরিয়ে আসতেই নজরে পড়লো হাবলু মোটরখানার দিকে হা করে তাকিয়ে দাঁড়িয়ে আছে।

মালেক মিয়া গিয়ে ওর কাঁধে হাত রাখলো—হাবলু ভাই কি দেখছো?

হাবলু ইশরা করে দেখিয়ে দিলো গাড়িখানা।

মালেক মিয়া বললো—গাড়িতে চড়বে?

হাবলু মাথা নেড়ে সায় দিলো সে চড়বে। আধপাগলা হাবলুর চোখমুখে ফুটে উঠেছে আনন্দোচ্ছ্বাস। গাড়িখানা নেড়েচেড়ে দেখছে সে ব্যাকুল আগ্রহ নিয়ে।

এমন সময় ভিতর থেকে ডাক এলো, ইকরাম আলীর গলা—মালেক, আমার জন্য তামাক নিয়ে আয়।

মালেক খুশি হয়ে বললো—আসছি মালিক। সে ঐ কক্ষে প্রবেশের জন্যই উৎসুক ছিলো। তাড়াতাড়ি তামাক আনার জন্য ভিতরে প্রবেশ করলো। একটু পরেই তামাক হাতে প্রবেশ করলো বৈঠকখানায়।

এখন ওরা তিনজন নিজেদের আলাপ-আলোচনায় গভীরভাবে তলিয়ে গেছে। একপাশে বসেছিলো মহাজনদ্বয়, তারা একেবারে নিশ্চুপ কোনো কথা বলছে না।

মালেক মিয়া তামাক হাতে একপাশে এসে দাঁড়ায়। তাকে ওরা লক্ষ্য করে না, যেমন কথাবার্তা বলছিলো তেমনি বলতে থাকে।

ইকরাম আলী বলে—দেখুন মিঃ বার্নার, আপনারা যদি সহায় থাকেন এবং সাহায্য করেন তবে কোনো অসুবিধা হবো না। দেশে এবার যা খাদ্যশস্য ফলেছে তা প্রচুর। প্রতি হাটে আমি দু’শ’ মণ থেকে পাঁচ শ’ মণ চাল খরিদ করি এবং তা...মহাজনদ্বয়কে দেখিয়ে বলে—এদের হাতে তুলে দেই! থামলো ইকরাম আলী।

মিঃ বার্নার বললেন—আপনার সহায়তা আমাদের কাম্য মিঃ আলী, কারণ আপনি যে খাদ্যশস্য সংগ্রহ করেন এর জন্য আপনি নিজেও মোটা অংক লাভে লাভবান হন, আর ইনারাও লাভবান হন। মাঝখানে বকশিস স্বরূপ আমরা সামান্য দু’চার হাজার পাই এই যা। মিঃ ইকরাম আলী, আমি কেন এসেছি এবার আসল কথাটা বলি? আমাদের কর্মকর্তা মহল এবার সজাগ হয়েছেন, তাঁরা প্রকাশ্যে আপনাদের সহায়তা করতে পারবেন না, তাঁরা গোপনে কাজ করবেন যেন একটি পিঁপড়াও জানতে না পারে।

হাঁ, আমরাও তাই চাই। দেশের যে শোচনীয় অবস্থা তাতে মানুষগুলো যেন উন্মাদ হয়ে উঠেছে। হা খাদ্য হা খাদ্য করে মরছে। আমাদের কত সাবধানে যে কাজ করতে হচ্ছে তা কি বলবো.....

ইকরাম আলীর কথা শেষ হয় না, পিছন থেকে মালেক মিয়া বলে উঠে—মালিক, তবু তো রেহাই পেলেন না। সেই উন্মাদ মানুষগুলোর হাতে তুলে দিতে হলো হাজার হাজার মণ চাল.....

• কে মালেক—তুই কখন এলি এখানে?

মালিক, যখন আপনি তামাক চেয়েছিলেন তখন। এই নিন তামাক.....

ইকরাম আলী বহুক্ষণ তামাক সেবন না করায় বেশ হাঁপিয়ে উঠেছিলো, সে হাত বাড়িয়ে হুকোটা মালেকের হাত থেকে নিয়ে বললো—যা এখান থেকে, আর যেন আসবি না।

আচ্ছা মালেক। কথাটা বলে মালেক মিয়া বেরিয়ে যায় কিন্তু সে একেবারে চলে যায় না, দরজার আড়ালে আত্মগোপন করে।

মহাজনদ্বয় এতক্ষণ নিশ্চুপ বসেছিলো, তাদের মুখে কোনো কথা ছিলো না, এবার তারা যেন মুখর হয়ে উঠে।

প্রথম ব্যক্তি বললো—ইকরাম আলী সাহেব, সাবধানে কাজ করেও তো রেহাই পেলাম না। আমাদের সমস্ত খরিদ করা মাল ডাকুর ভয়ে দুঃস্থ জনগণের মধ্যে বিলিয়ে দিতে বাধ্য হলাম।

আগন্তুকদ্বয় বিস্ময় নিয়ে তাকালেন মহাজনটির মুখের দিকে এবং পরক্ষণে ইকরাম আলীকে লক্ষ্য করে প্রশ্ন করলেন—ব্যাপার কি মিঃ আলী, আমি ঠিক বুঝতে পারছি না?

ইকরাম আলী এক নিঃশ্বাসে কিছুক্ষণ হুকো থেকে ধূম্রনির্গত করে বললো—মিঃ বার্নার, বড় দুঃখের কথা ইদানীং নতুন এক বিপদ দেখা দিয়েছে।

কি রকম? অবাক কণ্ঠে বললেন মিঃ বার্নার। আগন্তুকদ্বয়ের মধ্যে তিনিই বেশি বুদ্ধিমান বলে মনে হচ্ছিলো।

মিঃ বার্নারের কথায় বললো ইকরাম আলী—বহুদিন ধরে আমি ব্যবসা করে আসছি কিন্তু কোনোদিন এমন বিপদে পড়িনি। এবার নতুন এক বিপদ দেখা দিয়েছে—সে হলো এক অদ্ভুত ধরনের ডাকাত।

ডাকাত!

হাঁ, বড় দুর্ধর্ষ সে ডাকাত।

হাজরা গ্রামে ডাকাত এ কথা তো আমরা কোনোদিন শুনিনি?

শোনেনি এবার শুনুন এবং এই ভয়ঙ্কর ডাকাতির আতঙ্কে আতঙ্কিত হয়ে আমরা দিশেহারা হয়ে পড়েছি.....থামলো ইকরাম আলী, তারপর আবার বলতে শুরু করলো, প্রায় রাতেই এই দুর্ধর্ষ ডাকাতির আবির্ভাব ঘটে এবং সে গতরাতে মহাজনদ্বয়ের নৌকায় হানা দিয়ে সব চাল.....বেশ কয়েক হাজার টাকা মূল্যের চাল.....

কি বললেন, বেশ কয়েক হাজার মূল্যের চাল সে ছিনিয়ে নিয়েছে?

ঠিক ছিনিয়ে না নিলেও সর্বনাশ সে করেছে। বিশ্বয়কর তার কার্যকলাপ। সে নৌকায় হানা দিয়ে মহাজনদ্বয়কে সাবধান করে দিয়ে বলেছে, যদি নৌকার সমস্ত চাল হাজারার দুঃস্থ জনগণের মধ্যে বিলিয়ে না দেয় তাহলে হাজারার বঁকে তাদের হত্যা করা হবে.....

হো হো করে হেসে উঠে বললেন মিঃ বার্নার—আর সেই হত্যার ভয়ে আপনারা নৌকার সমস্ত চাল দুঃস্থ জনগণের মধ্যে বিলিয়ে দিলেন, তাই না?

এ ছাড়া আর কোনো উপায় ছিলোনা মিঃ বার্নার।

কেন আপনারা শহরে সংবাদ পাঠাননি? কেন আপনারা নীরবে ডাকুর আদেশ পালন করেছেন? শহরে সংবাদ পাঠানোর সঙ্গে সঙ্গে পুলিশ ফোর্স চলে আসতো এবং আপনাদের বিপদমুক্ত করতো।

কিন্তু ডাকু রিভলবারের মুখে আমাদের শাসিয়ে দিয়েছিলো যদি আমরা পুলিশের সাহায্য গ্রহণ করি তাহলে হাজারার বঁক কোনোদিনের জন্য অতিক্রম করতে পারবে না, তাই আমরা.....কথাটা বলতে গিয়ে থেমে পড়লেন মহাজনদ্বয়ের প্রথম জন।

সরকারি লোক মিঃ বার্নার এবং মিঃ হার্ডিং—তারা ডাকুর স্পর্ধার কথা শুনে ত্রুদ্ব হয়ে উঠলেন—কে সে ডাকু যার দৌরাত্ম্য এমনভাবে বেড়ে গেছে? বললেন মিঃ হার্ডিং।

ইকরাম আলী হুকোটা দেয়ালে ঠেঁশ দিয়ে রেখে বললো—সে এক অদ্ভুত ডাকু...দেখতেও যেমন ভয়ঙ্কর তেমনি দুর্ধর্ষ...একবার নয়, কয়েকবার সে আমার বাড়িতে হানা দিয়েছে কিন্তু সে কিছু নিতে বা করতে সাহস পায়নি। জানে আমার ক্ষতি করলে সে রেহাই পাবে না, তাই তো যেমন এসেছে তেমনি পালাতে বাধ্য হয়েছে.....একটু থেমে বললো—শেষ

পর্যন্ত মহৎ ব্যক্তি মহাজনদ্বয়কে সে কাবু করতে সক্ষম হয়েছে ...এবার হাসলো ইকরাম আলী—আপনারা ঘাবড়াবেন না, শয়তান ডাকাতটাকে এবার পেলে আমি নিজে তাকে হত্যা করবো। সুযোগ পেয়েও আমি তাকে ক্ষমা করেছি কয়েকবার কিন্তু আর নয়.....যাক, ওসব কথা, মিঃ বার্নার আপনি যে কারণে এসেছেন এবার তা নিয়ে আলোচনা করতে চাই।

মিঃ বার্নার বললেন—হাঁ, তবে শুনুন। এবার হাজার দুষ্ট জনগণের জন্য আসছে হাজার হাজার বাস্তব রিলিফদ্রব্য। যা শুধু আপনার সৌভাগ্যই খুলে দেবে না, খুলে দেবে আমাদের সকলের অদৃষ্ট। কিন্তু অতি সাবধানে কাজ করতে হবে।

হাঁ, আপনি যা বলেছেন সত্য, সাবধানতা ছাড়া উপায় নেই। কিন্তু...

বলুন কিন্তু কি?

যে রিলিফদ্রব্য হাজার দুষ্ট জনগণের জন্য এসেছে তা যদি সেই দুষ্টরা জানতে পারে?

যাতে জানতে না পারে সেই ব্যবস্থাই করতে হবে মিঃ ইকরাম।

ইকরাম আলী বললো—আচ্ছা মিঃ বার্নার আমি যথাসম্ভব আপনার আদেশ এবং নির্দেশ মেনে চলতে চেষ্টা করবো। কবে পর্যন্ত মাল এসে পৌছবে মিঃ বার্নার?

আপনি প্রস্তুত থাকবেন, কেননা মাল রাজধানীতে পৌছে গেছে, এখন দেশের বিভিন্ন এলাকার জন্য বরাদ্দ করা বাকি। তবে কর্মকর্তারা হাজার দুষ্টদের জন্য সব জায়গার চেয়ে বেশি রিলিফদ্রব্য বরাদ্দ করেছেন.....গলার স্বর খাটো করে নিয়ে বললেন মিঃ বার্নার—শুধু বরাদ্দ নয়, হাজার মাল পাঠানো ব্যাপারে সব ঠিক হয়ে গেছে। কৌশলে কাজ করতে হবে—হুশিয়ার, যেন কেউ টের না পায়। যদি আপনি ঠিকমত কাজ সমাধা করতে পারেন তাহলে পাবেন মোটা অঙ্ক।

ইকরাম আলী বললো—সে ব্যাপারে কোনো ক্রটি হবে না মিঃ বার্নার।

জানি আপনি কাজের লোক এবং সে কারণেই আপনাকে আমাদের এত প্রয়োজন।

ইকরাম আলীর মুখখানা যেন খুশিতে ঝলমল করে উঠলো, হাতের মধ্যে হাত কচলে বললো—সবই আপনাদের অনুগ্রহ...হেঁ হেঁ হেঁ, হাসলো

ইকরাম আলী, তারপর বললো—এতদিন ধরে ইরামতি নদীপথে আমার কারবার বেশ চলছিলো, এ ছাড়াও সীমান্তের ওপার থেকে বহু কারবারী মহাজন গোপনে আসা-যাওয়া করতেন। এখন নতুন এক বিপদ দেখা দিয়েছে...

মিঃ বার্নার বললেন—কিন্তু সে বিপদ দেখে ভয়ে কুঁকড়ে গেলে চলবে না।

ঠিক বলেছেন মিঃ বার্নার, যত বিপদ আসুক উপড়ে ফেলতেই হবে। ডাকাতের ভয়ে ব্যবসা ছেড়ে দেবো, এমন বান্দা ইকরাম আলী মিয়া নয়। মহাজনদ্বয়কে লক্ষ্য করে বলে সে—এমন কৌশলে কাজ করবো ডাকাত বেটা টেরই পাবে না।

আমরা জানি মিঃ ইকরাম, আপনি কাজের লোক, তাইতো আপনার এত কদর আমাদের কাছে। যে রিলিফ দ্রব্যগুলো ইদানীং এসে পৌঁছেছে, ঐগুলো ছাড়াও আরও বহু মালামাল বিদেশ থেকে আসছে। মিঃ ইকরাম আলী, আপনি শুনে খুশি হবেন ইদানীং বহু চাল, গম ও বস্ত্র আসছে আমাদের দেশের দুঃস্থ জনগণের জন্য.....

বলেন কি স্যার?

হাঁ মিঃ ইকরাম এবং; সে মালামাল অচিরেই এসে পৌঁছবে।

এত সাহায্য হঠাৎ কেন বিদেশ দিচ্ছে?

আপনি এ সংবাদ জানেন না বুঝি?

না তো?

এবারের প্লাবন, সে এক মহাপ্লাবন মিঃ ইকরাম, হাজার হাজার কয়েকটা জায়গা ছাড়া এবার যে ভয়ঙ্কর প্লাবন দেখা দিয়েছে তাতে হাজার হাজার গ্রাম ভেসে গেছে। আমি অবাক হচ্ছি আপনি এ সংবাদ এখনও জানেন না?

মিঃ বার্নার আমার নিজের কাজ আর নিজের গ্রাম ছাড়া আমার কিছু জানার নেই তবে এখন জানার জন্য আগ্রহী হলাম, কারণ প্লাবন আমার গ্রামে আসবে না তো?

অসম্ভব কিছু নেই মিঃ ইকরাম যে প্লাবন আসছে তাতে এ দেশের কোনো জায়গা রেহাই পাবে না। জলপ্লাবনে না হোক দ্রব্যমূলের অগ্নিপ্লাবনে মানুষ মরণমুখী হয়ে উঠবে.....

মিঃ হার্ডিং এবার কথা বললেন—উঠবে নয়, হয়ে উঠেছে...

ইকরাম আলী বলে উঠে—দ্রব্যমূল্য যত অগ্নিমূল্য হবে তাতে আমাদের মঙ্গল সাধনই হবে—তাই নয় কি মিঃ বার্নার?

ঠিক বলেছেন, প্লাবন না হলে এসব রিলিফদ্রব্য আসতো না, আমাদের বরাং খুলে যেতো না। শুনুন মিঃ ইকরাম, শুধু রিলিফদ্রব্য নয়, দেশের বিভিন্ন অঞ্চল থেকে যে মোটা অঙ্ক সাহায্য সংগ্রহ হয়েছে, তা শুধু লক্ষ লক্ষ, কোটি কোটি টাকা! জানেন মিঃ ইকরাম.....

ঐ সময় মালেক মিয়া তামাক হাতে এসে দাঁড়ায়, বলে উঠে সে মিঃ বার্নারের কথার মাঝখানে—কোটি কোটি টাকা যখন সাহায্য সংগ্রহ হয়েছে তাহলে আমাদের মত গরিব-দুঃখীর বরাং খুলে যাবে এবার।

সবাই যেন চমকে উঠলো মালেক মিয়ার কথায়। বলে উঠেন মিঃ বার্নার—তুমি কোন্ সাহসে আবার এসেছো এখানে?

হুজুর সাহস নয়, দয়ায়.....

কি বললি, দয়ায়? কিসের দয়া, কার জন্য দয়া, রাগত কণ্ঠে বললো ইকরাম আলী।

মালেক মিয়া মুখ কাঁচুমাচু করে বললো—মালিক, আপনি অনেক্ষণ থেকে তামাক পান করেন না কিনা, তাই গলাটা হয়তো শুকিয়ে গেছে, এই ভেবে.....

তামাক নিয়ে এলি, তাই না?

হাঁ মালিক।

মিঃ হার্ডিং বললেন—পুরোন ভৃত্য কিনা তাই।

এবার ইকরাম আলী হাত বাড়িয়ে তামাকের কলকেটা নিয়ে হুঁকোর উপর বসালো। সত্যিই সে বহুক্ষণ তামাক পান না করে হাঁপিয়ে উঠেছিলো। মনে মনে মালেক মিয়ার তারিফ না করে পারে না।

ঘরটায় বেশ গরম বোধ হচ্ছিলো।

মালেক মিয়া বললো—মালিক, যদি বলেন হাতপাখা নিয়ে বাতাস করি, যা গরম পড়েছে!

খুশিভরা কণ্ঠে বললেন মিঃ বার্নার—নিশ্চয়ই, নিশ্চয়ই, করো বখশীস দেবো।

ইকরাম আলী কিছু বলবার পূর্বেই মালেক মিয়া দ্রুত বেরিয়ে গেলো এবং পাখা হাতে ফিরে এসে শুনতে পেলো ইকরাম আলী বলছে—এটা তো শহর নয় যে, বৈদ্যুতিক পাখা আর আলো থাকবে, তাই আপনাদের কষ্ট হচ্ছে, তাই না?

না না, কষ্ট কি, এসব আমাদের অভ্যাস আছে। মহাজনদ্বয়ের মুখের দিকে তাকিয়ে একটু হাসলেন মিঃ বার্গার।

মহাজনদ্বয়ের মনের অবস্থা ভাল ছিলো না, তারা মনমরা হয়ে বসেছিলো, শুধু মাথা নেড়ে একটু সম্মতি জানালো।

মালেক মিয়া সবাইকে পাখা দিয়ে বাতাস করতে লাগলো, কান কিন্তু রইলো আলাপ-আলোচনার দিকে।

মিঃ হার্ডিং বললেন—মিঃ ইকরাম, লোকটা তো বিশ্বাসী?

হাঁ স্যার খুব বিশ্বাসী, ও আছে বলেই তো ডাকাত বেটা এত ভয় পায়। বলুন, আপনারা নিঃসন্দেহে কথাবার্তা বলুন? কথাগুলো বলে থামলো ইকরাম আলী।

বাতাস করতে করতেই বলে মালেক মিয়া—আমরা বড় গরিব মানুষ, যদি কিছু সাহায্য পাই.....

চুপ, কথা বলবি না। বললো ইকরাম আলী।

মিঃ বার্গার বললেন—ঠিক বলেছিস, তোকে আমরা মোটা বখশিস দেবো, তুই হাওয়া কর্ বেটা।

করছি মালিক।

মালেক কিরে; উনাদের স্যার বলতে পারিস্ না? বললো ইকরাম আলী।

মিঃ বার্গার বললেন—ওরা বলতে চাইলেও মুখে আসবে না.....

ঠিক বলেছেন মালিক, ওসব সাহেবী বুলি আমাদের এই নোংরা মুখে আসবে না। মালেক মিয়া বাতাস করতে করতেই কথাটা বললো।

মিঃ হার্ডিং বললেন—স্যার বলতে শেষে ঘাঁড় না বলে ফেলে। বলে তিনি সশব্দে হেসে উঠলেন।

যাক্ এবার কাজের কথায় আসা যাক্। শুনুন মিঃ ইকরাম, বন্য বা প্লাবনে ভেসে যাওয়া মানুষগুলোর জন্য যে সাহায্য অর্থ সকারের তহবিলে

জমা হয়েছে তার কিছু কিছু অর্থ বন্যা প্লাবিত অঞ্চলগুলোতে প্রেরণ করা হয়েছে.....

মালেক মিয়া বলে উঠে—বলেন কি মালিক, তবুও শহরের পথেঘাটে এত বন্যাপীড়িত দুঃস্থ মানুষগুলোর কঙ্কাল সার দেহগুলো পড়ে থাকতে দেখা যায় কেন?

ইকরাম আলী বলে উঠে— চুপ্, তুই এসব বুঝবি না।

বুঝবো না কেন মালিক সব বুঝি, গরিব বলে আমরা কি মানুষ নই যে, বুঝবো না? এই তো কিছুদিন আগে রাজধানীতে গিয়েছিলাম, যে দৃশ্য দেখলাম কি করে আপনাদের বুঝিয়ে বলবো!

তুই চুপ কর্ তোকে কিছু বুঝিয়ে বলতে হবে না।

একটু বলতে দেন মালিক, দেখলাম রাজধানীর পথেঘাটে পড়ে আছে কত মানুষ...হাড় বের করা কঙ্কালসার শরীর। লজ্জাস্থানে এক টুকরা কাপড় আছে কিনা সন্দেহ, কথা বলার শক্তিটুকু নেই তাদের। জানেন মালিক, এরা কিছু চেয়ে নেবে তাও পারে না, গলা দিয়ে কথা বের হয় না। কেউ কেউ হা করে পড়ে আছে, তাদের মুখের মধ্যে মাছি ঢুকছে, আবার বের হয়ে আসছে। আমি মনে করেছিলাম বুঝি মরে গেছে কিন্তু আসলে তারা মরেনি মালিক, জীবিত আছে। শুনলাম, প্লাবনে যে সব জায়গা বা অঞ্চল তালিয়ে গেছে যে সব জায়গা থেকে এরা পালিয়ে এসেছে বাঁচবে বলে, কিন্তু...বাষ্পরুদ্ধ হয়ে আসে মালেক মিয়ার গলা।

ক্রুদ্ধকণ্ঠে বলে ইকরাম আলী—ওসব কথা তোর কাছে কে শুনতে চাইছে বল তো?

গামছায় চোখ মুছে বলে মালেক মিয়া—কেউ আপনারা শুনতে চাইবেন না জানি, তবু আমাকে বলতে হবে মালিক....কারণ আমিও তো ওদেরই একজন কিনা।

মিঃ বার্নার বললেন—বলুক, মুখ দিয়ে ও বলবে তাতে আমাদের কি?

মালেক মিয়া খুশি হয়ে বলতে শুরু করে—শুধু একজন দু'জন নয় মালিক, অমন কত মানুষ রাজধানীর রাজপথে পড়ে আছে তার হিসাব কে রাখে বলুন? আমি দেখেছি ফুটপাথের ধারে, দেখেছি গাছের তলায়, দেখেছি আবর্জনার স্তুপের পাশে, দেখেছি নর্দমার ধারে। নর্দমায় গড়িয়ে পড়া পচা

ফেন তুলে নিয়ে তারা খাচ্ছে, আবর্জনার মধ্যে হাতড়াচ্ছে এক টুকরো রুটি.....মালিক, এরা সেই প্লাবনে ভেসে যাওয়া অঞ্চলেরই মানুষ কিন্তু কই, আপনারা যে কোটি কোটি টাকা এদের দুর্দশা দূর করবার জন্য জনসাধারণের কাছ থেকে সাহায্য হিসেবে পেয়েছেন বলছেন, কই সে টাকা? কি করছেন সেই টাকা?

দেওয়া হয়েছে এবং হচ্ছে। বললেন মিঃ বার্নার।

মালেক মিয়া বলে উঠে—তাহলে হাজার হাজার লোক ফুটপাথের ধারে ধুঁকে ধুঁকে মরতো না।

ফুটপাথের ধারে ওরা তো ভিখারী। বললেন পুনরায় বার্নার।

মালেক মিয়াও চুপ রইলো না, বললো সে—ভিখারী কারা, তারা কি মানুষ নয় মালিক? আর ভিখারী তারা হলো কেমন করে? ঐ প্লাবনে ভেসে যাওয়া অঞ্চল থেকেই তারা এসেছিলো শহরে কাজ করে খাবে বলে, কিন্তু কাজ তারা পায়নি আর কেই বা তাদের কাজ দেবে, তাই তো তারা ভিক্ষার জন্য হাত পেতেছিলো.....খামলো মালেক মিয়া।

ইকরাম আলী বললো—মালেক, তোর স্পর্ধা দেখে আমি অবাক হচ্ছি, কে এসব শুনতে চাচ্ছে তোর কাছে?

আপনারা কেউ না শুনলেও আমি বলবো, কারণ বলেছিতো আমিও তাদেরই একজন। আমি মানুষ, তাই মানুষের দুঃখ আমাকে বড় কষ্ট দেয় মালিক। আপনারা বড়লোক কিনা, তাই গরিবদের কথা শুনতে আপনাদের ভাল লাগে না—কেমন যেন যেনর যেনর মনে হয়, তাই না মালিক?

চুপ কর্ অমন অনেক দেখেছি, অনেক শুনেছি। গরিব আর দুঃস্থ লোকদের নাকিকান্না শুনে শুনে জানটা যেন যাই যাই করছে। রেখে দে তোর কাহিনী।

না, আজ আমি আরও কিছু বলবো—আপনাকে শোনার জন্য নয়, ঐ যে যারা শহর থেকে এসেছেন, শুনেছি উনারা নাকি সরকারের লোক, উনাদের কাছে বললে যদি একটু দেশের উপকার হয়.....

তার মানে?

মানে দেশের জনগণের যদি একটু মঙ্গল হয়।

তুই উপদেশ দিবি সরকারের লোককে? মালেক, তোর ছোট মুখে বড় কথা! ইকরাম আলীর চোখ দিয়ে যেন আগুন ঠিকরে বের হয়।

মালেক মিয়া নরম গলায় বলে—মালিক, এক সিংহ একবার ফাঁদে পড়েছিলো, তখন একটা ইঁদুর তার ফাঁদের দড়ি দাঁতে কেটে কেটে সিংহকে উদ্ধার করেছিলো। দেখুন ইঁদুর একটি ক্ষুদ্র জীব তবু সে পশুরাজ সিংহের কতবড় উপকার করলো। তেমনি আমি নগণ্য এক চাকর যদি একটু উপকার করতে পারি আপনাদের...কাজ না পেয়ে ভিক্ষার জন্য হাত পেতেছিলো ওরা, কিন্তু দেশের যে অবস্থা তাতে জনসাধারণের জীবন যাপন দুর্বিসহ—নিজেদের পেট চালাবে কি করে, কি করে নিজেদের জীবন রক্ষা করবে, তাই ভেবে তারা অস্থির ভিখারীকে ভিক্ষা দেবে তারা কোথা থেকে? তবে হ্যাঁ, যাদের দেবার মত ক্ষমতা আছে তাদের কাছে এরা ভিড়তেও পারবে না, কারণ লোহার ফটক পেরিয়ে কোনো রকমেই তারা ঢুকতে পারবে না ভিতরে, তা ছাড়া আছে বন্দুক ধারী পাহারাদার। একটু থেমে বললো মালেক মিয়া—কাজেই যারা ভিক্ষা দিতে সমর্থ তারা দুঃস্থ জনগণ থেকে অনেক দূরের মানুষ যেমন ধরুন আপনারা মালিক, আপনাদের নাগাল যেমন আমরা সহজে পাই না। একটু থেমে আবার বললো মালেক মিয়া—মালিক আমি আরও দেখেছি পথের ধারে অর্ধউলঙ্গ মেয়েমানুষ, কোলে তার কঙ্কালসার ছেলে ক্ষুধার জ্বালায় মায়ের শুকনো চুপষে যাওয়া স্তন কামড়াচ্ছে.....মাথার চুল জটা ধরে গেছে, কত যুগ সে মাথায় তেল পড়েনি। একটুকরো কাপড়ে লজ্জা ঢাকবার চেষ্টা করছে বটে কিন্তু তাতে কোনো লাভ হচ্ছে না, সমস্ত লজ্জা তার ঢাকা পড়ে গেছে যেন ক্ষুধার কাছে। জানেন মালিক, এরা কোথাকার মানুষ? ঐ প্লাবনে ভেসে যাওয়া অঞ্চলের। একটু আগে বললেন, আপনাদের তহবিলে প্রচুর অর্থ সংগ্রহ হয়েছে এদের জন্য। লক্ষ লক্ষ নয়, কোটি কোটি.....মালিক, তবু কেন এদের এমন অবস্থা? বলুন জবাব দিন?

মিঃ বার্নার রাগত কণ্ঠে বললেন—তুই চাকর হয়ে এসেছিস আমাদের কাছে কৈফিয়ত তলব করতে?

ইকরাম আলীও বোমার মত ফেটে পড়লো—বেরিয়ে যা, বেরিয়ে যা এখান থেকে। শয়তান, বেঈমান কোথাকার.....

হাঁ, আমরা বেঈমানই বটে, আর আপনারা ঈমানদার ব্যক্তি...

আবার মুখের উপর কথা বলছিস?

না বলে পারছি না মালিক, কারণ আপনারা সৎ মহৎ ঈমানদার মানুষ আর আমরা যারা সাতদিন পর একদিন পেট পুরে খেতে পাই না, আমরা বেঈমান। কিন্তু মালিক, প্লাবন দুর্গত মানুষের জন্য যে অর্থ আপনাদের তহবিলে জমা হয়েছে, আর বিদেশ থেকে যে সাহায্যদ্রব্য আসছে তা যদি টিক ঠিক মত জায়গায় গিয়ে না পৌঁছে তাহলে বেঈমান জানোয়ারগুলো আপনাদের মত ঈমানদার মানুষগুলোকে ক্ষমা করবে না। ক্ষুধার জ্বালায় তারা এমন হিংস্র হয়ে উঠেছে, তারা এখন মানুষের কাঁচামাংস খেতেও দ্বিধা বোধ করবে না। সাবধান মালিক সাবধান, যত গোপনেই আপনারা কাজ করুন দেয়ালের কান আছে, চোখও আছে মালিক, কাজেই রেহাই আপনারা কেউ পাবেন না.....

মালেক, তুই...তুই...ইকরাম আলী রাগে ক্রোধে বাকশক্তি যেন হারিয়ে ফেলে।

মিঃ বার্নার্ডও ভীষণ ক্রুদ্ধ হয়ে উঠেছিলেন, তিনি বললেন—প্রচুর সাহায্যদ্রব্য প্লাবিত অঞ্চলে দেওয়া হয়েছে এবং হচ্ছে। বহু অর্থ ওদের মধ্যে বিলিয়ে দেওয়া হয়েছে। জানিস বেটা, ওরা যতই পাক তবু ওদের ঐ স্বভাব যাবে না। শহরে যাদের কথা বললি তারা তো এক নম্বর বদমাইশ, রিলিফের দ্রব্য দিলে ওরা বিক্রি করে দেয়.....

তা সত্য কিন্তু কেন তারা ঐসব দ্রব্য বিক্রি করে মালিক?

তা অতো কে খোঁজ রাখে!

হাসে মালেক মিয়া—তা ঠিক, কে অতো খোঁজ রাখে আর ওসব শয়তান লোকগুলোর খোঁজ রেখেই বা কি হবে—ওরা তো মানুষ নয় পশু, তাই না মালিক?

হাঁ, ঠিক বলেছিস তুই, ওরা মানুষ নয় পশুই বটে, না হলে যা তা খেতে পারে। ঐ তো তুই বললি ডাষ্টবিনের মধ্য থেকে খাবার খুঁজে নিচ্ছে। বললি না নর্দমা থেকে পচা ফেন তুলে নিয়ে আরামে খাচ্ছে?

হাঁ, বলেছি মালিক, আরামে ওরা ঐ পচা আর নোংরা জিনিস খাচ্ছে কিন্তু কেন খাচ্ছে বলুন তো? দু'দিন না খেয়ে দেখুন কেন ওরা ঐ পচা

জিনিস খায়। পারবেন মালিক দু'দিন অনাহারে থাকতে? জানি পারবেন না—সময় মত স্নানাহার না করলে আপনাদের শরীরে খারাপ হবে, অসুস্থ হয়ে পড়বেন, কাজেই অনাহারের কথা আপনার চিন্তাই করতে পারেন না।

মিঃ বার্নারের সুর একটু নরম হয়ে এলো, তিনি বললেন—দেশের জনগণকে বাঁচানোর জন্যই তো আমাদের এত প্রচেষ্টা। প্লাবিত অঞ্চলের দুঃস্থ জনগণের সাহায্যার্থে আমরা শহরে ত্রাণশিবির স্থাপন করেছি এবং সেইসব ত্রাণশিবিরে তাদের থাকা-খাওয়া আর ওষুধাদির ব্যবস্থা করেছি। তা ছাড়াও যে অর্থ আমাদের ত্রাণ তহবিলে জমা হয়েছে, ঐ অর্থ আর রিলিফদ্রব্য প্লাবিত অঞ্চলগুলোতে পাঠানো হচ্ছে.....কথাগুলো বলতে বলতে বারবার মিঃ বার্নার তাকান ইকরাম আলীর মুখের দিকে।

ইকরাম আলী এবার তাঁর কথার রেশ টেনে বলেন—দেশ রক্ষা অভিযানে আমরা আত্মত্যাগ করেছি। তুই মুর্থ, তাই এসেছিস আমাদের কথায় বাদ সাধতে। বেরিয়ে যা এখন থেকে.....

বলতে যখন সুযোগ দিয়েছেন মালিক তখন আর একটু বলতে দেন। আপনারা দেশ আর দেশবাসীকে রক্ষার জন্য অভিযান চালিয়েছেন সত্য কিন্তু দেশ আর দেশবাসী যে গেলো মালিক? এত সাহায্যদ্রব্য দিচ্ছে, এত অর্থ দিচ্ছে তবু পথেঘাটে, গ্রামে গ্রামে হাজার হাজার উলঙ্গ কঙ্কালসার মানুষ ক্ষুধার জ্বালায় ধুঁকে ধুঁকে মরছে কেন বুঝতে পারি না। কই মালিক, একটি অসহায় পরিবারকেও তো দেখলাম না তার সুখে-স্বাস্থ্যে কাটছে?

ঐ তো বলেছি তোরা বেঈমান, হাজার দিলেও তোদের মন পাওয়া যায় না। এত দেওয়া হচ্ছে তবু তোদের মুখে হা হা রব।

তা সত্যি হুজুর, এত দিচ্ছেন তবু আমাদের মুখে হা হা রব। এত পেয়েও আমরা উলঙ্গ হয়ে থাকি, এত পেয়েও আমরা না খেয়ে মরি, তাই না?.....

হাঁ, তোদের উদর পূরণ করার সাধ্য কারও নেই।

আর আপনাদের উদর সামান্যতেই বুঝি পূর্ণ হয় হুজুর?

ভীষণভাবে রেগে উঠেন মিঃ বার্নার, তিনি ইকরাম আলীর মুখের দিকে তাকিয়ে বলেন—আপনার চাকরের স্পর্ধা দেখে আমি বিস্মিত হচ্ছি মিঃ ইকরাম, এমন চাকরকে আপনি বাড়িতে স্থান দিয়েছেন?

ইকরাম আলী কঠিন কণ্ঠে বলে উঠে—বেরিয়ে যা এই মুহূর্তে বেরিয়ে যা বলছি.....যা, এক মুহূর্ত আর তোকে রাখতে চাই না।

মালেক মিয়া এবার পাখা রেখে বলে—বেশ, আমি চলে যাচ্ছি কিন্তু মনে রাখবেন রাত কাল ভীষণ কাল, তখন যেন আমাকে ডাকবেন না মালিক।

না, তোর আর দরকার হবে না, তুই চলে যা।

মালেক মিয়া বেরিয়ে যায়।

মিঃ বার্নারের সঙ্গে আরও কিছুক্ষণ গোপনে আলোচনা চলে, তারপর সেদিনের মত বিদায় নেন তাঁরা।



মালেক মিয়া পুঁটলি বাঁধছিলো। সে আজই চলে যাবে, কারণ মালিক তাকে বিদায় দিয়েছেন।

এমন সময় কক্ষে প্রবেশ করে গোলাপী। আঁচলের নিচে লুকিয়ে এনেছে সে কয়েকটা পাকা পেয়ারা। মালেক মিয়াকে পুঁটলি বাঁধতে দেখে গোলাপী অবাক হয়ে যায়, বলে সে—একি মালেক ভাই, তুমি ওসব গুছিয়ে নিচ্ছে কেন?

চলে যাবো বলে।

সেকি!

হাঁ, মালিক আমাকে বিদায় করে দিয়েছেন।

মালেক ভাই, তুমি চলে যাবে? বাষ্পরুদ্ধ হয়ে আসে গোলাপীর গলা। চোখ দুটো তার জলে ভরে আসে।

মালেক মিয়া পুঁটলি বাঁধা শেষ করে সরে আসে, গোলাপীর কাঁধে হাত রেখে বলে—গোলাপী, তুমি মিছামিছি দুঃখ করছো, আমি তো চিরকাল এখানে থাকতে আসিনি।

তবে কেন এসেছিলে? বলো মালেক ভাই, তবে কেন এসেছিলে সেদিন তুমি? জানো মালেক ভাই, এ পৃথিবীতে আমার কেউ নেই.....কিছু

নেই..... মেয়েদের স্বামী বড় আপন জন, আমার তাও নেই। মালেক ভাই, তুমি এ বাড়িতে আসার পর জানি না, কেন তোমাকে আমার এত ভাল লাগে—তোমার স্নেহ, তোমার ভালবাসা আমার শূন্য হৃদয়ে এনে দিয়েছে এক অফুরন্ত আনন্দ। মালেক ভাই, তুমি চলে যেও না, আমি তোমাকে চলে যেতে দেবো না।

গোলাপী মালেকের হাতখানা মুঠায় চেপে ধরে বাষ্পরুদ্ধ কণ্ঠে কথাগুলো বললো। তার কথাগুলো বড় করুণ ব্যথাভরা ছিলো, মালেকের চোখ দুটো ছল ছল করে উঠলো।

ঐ সময় বাইরে শোনা গেলো ইকরাম আলীর গলা—মালেক, মালেক কোথায় তুই?

গোলাপী বেরিয়ে গেলো পিছন দরজা দিয়ে।

মালেক মিয়া জবাব দিলো—এখানে আমি।

ইকরাম আলী কক্ষমধ্যে প্রবেশ করতেই বলে উঠে মালেক মিয়া—চলে যাচ্ছি মালিক...তবে একটা চিঠি পেলাম এই ঘরের মেঝেতে, দেখুন তো মালিক এতে কি লেখা আছে।

মালেক মিয়া একখানা ভাঁজকরা কাগজ তার বালিশের তলা থেকে বের করে ইকরাম আলীর দিকে বাড়িয়ে ধরে বলে—এই দেখুন মালিক?

ইকরাম আলী চিঠিখানা নিয়ে দ্রুত পড়তে শুরু করলো—

“মালেক মিয়া, তুমি চলে যাও, তোমাকে
সাবধান করে দিচ্ছি আর যেন ফিরে
এসো না। আমি গভীর রাতে আসবো,
ইকরাম আলীর সঙ্গে প্রয়োজন আছে।

—ডাকাত

ডাকাত! ডাকাতির চিঠি এটা? অস্ফুট কণ্ঠে বলেন ইকরাম আলী।

মালেক মিয়া ভীতকণ্ঠে বললো—কি বললেন মালিক, ডাকাতির চিঠি ওটা?

হাঁ হাঁরে—না না, ডাকাতির নয়, ও আমার এক বন্ধুর চিঠি।

কি লিখেছেন বন্ধু ওতে?

লিখেছেন মালেক মিয়াকে যেন বিদায় না করি। মানে তুই যেন না যাস, বুঝলি?

বুঝেছি, কিন্তু আপনি ডাকাতের চিঠি বললেন আমি যেন তাই গুনলাম। ও কিছু না, আমার মুখ দিয়ে হঠাৎ বেরিয়ে এসেছে ডাকাত শব্দটা।

কিন্তু মালিক, আপনার মুখ দেখে মনে হচ্ছে আপনি ভীষণ ভয় পেয়ে গেছেন একেবারে?

না না, ভয় পাবো কেন, ভয় পাবো কেন? মালেক মিয়া, একটা কথা বলবো তোকে?

বলুন মালিক?

কথা রাখবি তো?

রাখবো।

তোকে আমি তখন মিছামিছি তাড়িয়ে দেবার ভান করেছিলাম। জানিস্ তো ওরা সাহেব সুবার দল কিনা!

কিন্তু আমি যে যাওয়ার জন্য তৈরি হয়ে নিয়েছি মালিক?

না, যাওয়া তোর হবে না। শোন মালেক, এক্ষুণি শহরে রওয়ানা দেবো। আমাদের গরু গাড়িখানা বের করে নেতো?

হঠাৎ শহরে যাবেন কেন মালিক? বন্ধু বুঝি শহরে যাওয়ার জন্য চিঠিখানা দিয়েছেন?

হাঁ—হাঁরে, তাই লিখা আছে, আজই—এক্ষুণি শহরে রওয়ানা দেবো। হাতঘড়ির দিকে তাকিয়ে বলে ইকরাম আলী—ব্যাঙ্ক বন্ধ হবার আগেই আমাকে শহরে পৌছতে হবে।

ব্যাঙ্কে বুঝি কাজ করেন আপনার বন্ধু?

হাঁ, তুই যা গাড়ি বের কর, ওসব শুনে তোর কোনো লাভ হবে না।

মালেক মিয়া বেরিয়ে যায়।

গরু দুটোকে ভাল করে খাইয়ে নিয়ে গাড়ি জুড়ে নেয় মালেক মিয়া।

ততক্ষণে ইকরাম আলী খেয়েদেয়ে ব্যাগ হাতে গাড়ির পাশে এসে দাঁড়ায়। বারবার সে হাতঘড়িটা দেখছে। আপন মনেই বলে ইকরাম আলী—কাল যদি ও চিঠিটা পেতাম তা হলে মিঃ বার্নারের মোটরেই চলে যেতাম শহরে। আজ গরুগাড়িতে পৌছতে বেলা গড়িয়ে যায় কিনা কে জানে।

মালেক মিয়া বললো—উঠেন মালিক, বেলা তো এখানেই গড়িয়ে এলো।

ইকরাম আলী গাড়িতে চড়ে বসলো, ব্যাগটা কিন্তু সে সব সময় কোলের মধ্যে রেখে দিয়েছে।

গাড়ি চলেছে।

নিজের গরুগাড়ি, কাজেই কোনো অসুবিধা নেই ইকরাম আলীর। গাড়ির মধ্যে নরম গদি আছে, আর আছে দুটো বালিশ। তাকে প্রায়ই শহরে যেতে হয় কিনা, তাই গাড়িতে কোনো অসুবিধা না হয়, সে জন্য সব আছে তার। পানি খাবার জগ গেলাস ইত্যাদি অনেক কিছু।

আজ কিন্তু ইকরাম আলী বালিশে মাথা রাখলো না, সে ব্যাগটা বুকে আঁকড়ে ধরে বসে রইলো। গাড়ি চলেছে।

গ্রাম্য মেঠো পথ। গাছ-গাছড়ার ভিড় দু'পাশে, মাঝে মাঝে পথে দু'একটা লোক চলছিলো। গাড়ি দেখেই তারা চিনতে পারে এ গাড়ি কার। গাড়িখানা যেমন বড় তেমনি উচু। গরুর গলায় ঘন্টা বাঁধা আছে এক সারি নয়, দু' সারি ঘন্টা—তাই গরু দুটো যখন গাড়ি টানছিলো তখন অনেক দূর থেকে শোনা যাচ্ছিলো সেই ঘন্টাগুলোর আওয়াজ।

এ গ্রাম সে গ্রাম ছেড়ে নদীতীর ধরে গাড়ি চললো কিছুদূর গিয়ে বেশ জঙ্গল। এ পথটা বেশ নির্জন তাই ইকরাম আলী বললো—মালেক, বাবা তুই গরু দুটোকে তাড়া করে নিয়ে চল।

কেন মালিক?

দেখছিস না সামনে জঙ্গলের পথ, তাছাড়া এ পথে তেমন লোকজন নেই কিনা।

কিন্তু আমার যে পায়খানা চাপলো মালিক।

এই সেরেছিস তুই।

বড্ড পেট ব্যথা করছে মালিক, দেরী করলে কাপড় চোপড় নষ্ট হতে পারে। একটুখানি গাড়িতে বসুন, আমি জঙ্গলের মধ্যে পায়খানা করেই চলে আসবো।

একটু কষ্ট করে থাক বাবা।

না মালিক, পারছি না.....মালেক মিয়া জঙ্গলের মাঝা মাঝি এসে গাড়ি থেকে নেমে পড়লো, বললো— গরু দুটোর দড়ি ধরে একটু বসুন, আমি এফুনি আসছি.....পিছন থেকে ছোটো পুঁটলিটা বগলে নিয়ে নেমে যায় মালেক মিয়া।

মালেক জঙ্গলে প্রবেশ করলে ইকরাম আলী মনে মনে খোদাকে স্মরণ করতে থাকে। ডান হাতে গরুর দড়ি, বাম হাতের মুঠায় ব্যাগটা এঁটে ধরে তাকায় এদিক ওদিকে।

হঠাৎ পিছনে ঠান্ডা কি যেন ঠেকলো।

আঁতকে উঠে ফিরে তাকাতাই জমে গেলো তার শরীরের রক্ত, অস্ফুট কণ্ঠে বললো—এঁ্যা, ডাকাত!

হাঁ, চিনতে পেরেছেন তাহলে? কোথায় যাচ্ছেন গাড়ি নিয়ে মৌলবী সাহেব?

শহরে।

কেন?

এমনি বেড়াতে।

হঠাৎ বেড়াতে যাবার এত আগ্রহ কেন?

তোমাকে সবকিছু জানতে হবে নাকি? এক বন্ধুর চিঠি পেয়ে আমি শহরে যাচ্ছি.....

সেই বন্ধু আমি, ইকরাম আলী সাহেব। যে কারণে আপনি শহরে যাচ্ছেন তা আর প্রয়োজন হবে না। আমি সে ব্যবস্থা করছি। দিন, আপনার এটাচী ব্যাগটা আমার হাতে দিন—আমি শহরে যাচ্ছি, আপনার কাজটা আমিই সেরে আসবো।

না না.....মালেক.....মালেক.....ডাকাত... ডাকাত এসেছে.....চিৎকার শুরু করে দেন ইকরাম আলী। গলা ফাটিয়ে তিনি চৈতান কিন্তু কোথায় মালেক মিয়া।

অট্টহাসিতে ফেটে পড়ে ডাকাত, বলে সে—মালেক মিয়া আসবে না, জানে এখানে আমি আছি—কাজেই চুপচাপ বসে থাকুন। দিন ব্যাগটা.....ডান হাতে পিস্তল ঠিক রেখে বাম হস্ত বাড়িয়ে ধরে ডাকাত তার দিকে।

ইকরাম আলী ঢোক গিলে বললো—না না, এ ব্যাগ আমি দিতে পারি না। এ ব্যাগে কিছু নেই, শুধু আমার জামা কাপড় রয়েছে.....

জামাকাপড় থাকুক আর যাই থাকুক ব্যাগ দিতেই হবে আমাকে, নইলে এফুগি আপনার রক্তাক্ত দেহ এই গাড়িতে লুটোপুটি খাবে।

সত্যি তুমি আমাকে হত্যা করবে?

যদি ব্যাগ না দেন করতে বাধ্য হবো।

ইকরাম আলীর মুখ মড়ার মুখের মত হয়ে উঠলো, সে শুষ্ক গলায় বললো—ব্যাগে আমার তিন লক্ষ টাকা আছে.....

এই তো একটু পূর্বে বললেন ব্যাগে শুধু আপনার জামা কাপড় আছে? তিন লক্ষ টাকা আপনি পেলেন কোথায় শুনি?

না, আমি বলবো না।

না বললেও আমি জানি ইকরাম আলী, ও টাকা আপনি কোথায় পেয়েছেন। হাজার হাজার মানুষের মুখের আহার কেড়ে নিয়ে আপনি বিদেশী মহাজনদের কাছে বিক্রি করে টাকা সংগ্রহ করেছেন.....

কি করে...কি করে জানলে তুমি?

সব জানি, আরও জানি আপনি কি করে কোটি কোটি টাকার মালিক হলেন। দিন, ব্যাগ দিন আমার হাতে, নইলে মালেক এসে যেতে পারে এবং সে এসে গেলে আমাকে দ্রুত কাজ করতে হবে। তখন আপনাকে হত্যা করা ছাড়া আর কোনো উপায় থাকবে না। তাছাড়া আপনার প্রিয় চাকরটিও হয়তো প্রাণ হারাবে.....

ইকরাম আলী এবার বাধ্য হলো তার টাকা সহ ব্যাগটা ডাকাতির হাতে তুলে দিতে, কারণ না দিয়ে কোনো উপায় ছিলো না। ডাকাতির অর্থ আচ্ছাদিত মুখমণ্ডল আর ঐ পিস্তলখানা তাকে ভীষণ ভীত করে তুলেছিলো।

ব্যাগ নিয়ে নির্বিঘ্নে চলে যায় ডাকাত।

ইকরাম আলী প্রাণহীনের মত নিষ্পন্দ হয়ে গেছে, শুষ্ক হতাশ গলায় ডাকে—মালেক, ওরে মালেক...ফিরে আয়, ডাকাত চলে গেছে.....

ভীত-কম্পিত পদক্ষেপে মালেক মিয়া ফিরে এলো, আলগোছে বগলের পুঁটলিখানা লুকিয়ে রাখলো গরুগাড়ির পিছন দিকে, তারপর সম্মুখে এসে বললো—মালিক.....

এসেছিচ্ ওরে হতভাগা, সব গেছে আমার ...সব গেছে আমার.....মাথায় করাঘাত করে ইকরাম আলী।

মালেক কাঁদো কাঁদো সুরে বলে—মালিক, আমি আড়াল থেকে সব দেখেছি। কি সাংঘাতিক ডাকাত.....

আর এক মুহূর্ত বিলম্ব নয়, গাড়ি নিয়ে চল.....

কোন দিকে যাবো মালিক?

বাড়ির দিকে গাড়ির মুখ ফিরিয়ে নে।

কেনো মালিক, শহরে যাবেন না?

গিয়ে আর কি হবে, সব গেছে আমার!

কি গেছে মালিক...কি সব গেছে বলছেন? ঐ ব্যাগের মধ্যে কি ছিলো?

টাকা, টাকা ছিলো। আমি মহাজনের কাছে যে চাল বিক্রি করে টাকা পেয়েছিলাম, সেই টাকা ছিলো ব্যাগের মধ্যে। মালেক, তুই জানিস্ না ঐ টাকা রাখতেই আমি ব্যাঙ্কে যাচ্ছিলাম।

তাহলে তো বড় ভয়ঙ্কর কথা মালিক। মহাজন বেচারীদের চালও গেলো আপনার টাকাও গেলো। সব যে শূন্য হয়ে গেলো! তবু গাড়ি নিয়ে ফিরে যাবেন মালিক?

না গিয়ে কি করবো?

ঐ যে পচা পুকুর আছে, আমি হলে ঐ পুকুরে ডুবে আত্মহত্যা করতাম মালিক.....

কি বললি?

মালিক এতগুলো টাকা হারিয়ে জীবনে বেঁচে থাকতে পারতাম না। জানেন তো দুটো টাকাই আমাদের কাছে কত মূল্যবান। আর আপনি কত লক্ষ মণ চাল বিক্রি করেছেন—এ টাকা যে জীবনের চেয়ে দামী.....

চল্ অত কথা তোকে বলতে হবে না।

মালেক গাড়িতে উঠে বসে গরুকে লক্ষ্য করে বললো—চল্ বাবা চল্ ফিরে চল্ বাড়ির দিকে.....



দু'দিন পরের কথা।

মালেক মিয়া গরু নিয়ে বাইরে যাচ্ছিলো, হঠাৎ তার কানে ভেসে আসে ইকরাম আলীর পরম কোনো আত্মীয়দের গলার আওয়াজ—যা গেছে তা নিয়ে ভেবে কোনো লাভ হবে না আলী সাহেব, প্রাবিত অঞ্চলের জন্য যেসব সাহায্যদ্রব্য আসছে তা থেকেই আপনার এ ক্ষতিপূরণ হয়ে যাবে দেখবেন।

ইকরাম আলীর গলা—আমার অঞ্চলে তো আর প্রাবন আসেনি, কি করে আমি প্রাবিত অঞ্চলের সাহায্যদ্রব্য পেতে পারি বলুন চাচাজান?

পাবেন, পাবেন, হাজারার এ অঞ্চলে বন্যা আসেনি কিন্তু হাজারার আশেপাশের গ্রামগুলো তো বন্যায় ভেসে গেছে। আপনি হলেন কিনা এ গ্রামের হর্তাকর্তা, আপনি যা করবেন তাই হবে। মিছামিছি সামান্য ক'টা টাকার জন্য এত হা-হুতাশ করবেন না.....

মালেক মিয়া গরু নিয়ে চলে গেলো মাঠে, আর কোনো কথা তার কানে এলো না।

মাঠে গেলে এবং নির্জন জায়গা পেলে মালেক মিয়া তার দাড়িগোঁফ খুলে ফেলে, নাহলে বড় অসহ্য লাগে তার কাছে। গরুগুলো মাঠে চরছে। বনহর ভাবছে তার আস্তানার কথা, ভাবছে দিপালীর কথা, স্বর্ণগুহায় বন্দী কান্দাই রিলিফ প্রধানের কথা। এ ছাড়াও ভাবছে নূরের কথা, এ মাসেই নূর বিলেত যাবে। যদিও নূরের তেমন বয়স হয়নি তবু তাকে বিদেশ পাঠাতে হচ্ছে, নাহলে অসুবিধা আছে—হঠাৎ একদিন জেনে ফেলতে পারে তার পিতা একজন দস্যু.....না না, তা হয় না। নূর লেখাপড়া শিখে মানুষ হবে, এটাই তার এবং মনিরার বাসনা। কাজেই নূর বিলেত যাবার পূর্বে তাকে একবার যেতে হবে কান্দাই। নূরকে বিলেত পাঠাতে মন তার ব্যথাকাতর হবে সত্য কিন্তু উপায় নেই। নূরী আর জাবেদ—তারা আস্তানায় রয়েছে, যদিও তাদের জন্য ভাবনার কিছু নেই, কারণ রহমান কায়েস এরা আছে। রহমান জম্মু থেকে ফিরে এসেছে, জম্মুর সমস্ত দায়িত্বভার রয়েছে এখন রাম

সিং আর সাধন সিংয়ের উপর। হাঁ, তার একটা বিরাট কাজ আছে—জম্বুর রত্নাগারে আটক আছে কয়েকজন জম্বু নেতা। তাদের জীবিত রাখার জন্য রামসিংয়ের উপর নির্দেশ আছে তারা যেন প্রাণত্যাগ না করে—দিনান্তে একটি রুটি আর এক কাপ পানি তাদের জন্য বরাদ্দ করে এসেছে। লক্ষ লক্ষ মানুষের মুখের গ্রাস নিয়ে যারা ছিনিমিনি খেলে তাদের হত্যা করা মোটেই উচিত নয়। মৃত্যু মানুষের জীবনে পরম এক পরিত্রাণ। মহাবিপদ থেকে মানুষ পরিত্রাণ পায় কখন যখন তাদের মৃত্যু হয়, কাজেই হত্যা করে ঐসব নরপশুকে পরিত্রাণ দেওয়া উচিত নয়। দেশের সর্বনাশের মূলে যারা তাদের উপযুক্ত সাজা হওয়া দরকার। দুঃস্থ মানুষের কি অবস্থা তা অনুধাবন করার জন্য তাদের ব্যবস্থা হওয়া প্রয়োজন, হত্যা নয়.....

হঠাৎ বনহরের চিন্তাধারা বিচ্ছিন্ন হয়ে যায়, তার সম্মুখে এসে দাঁড়িয়েছে গোলাপী।

লজ্জাজড়িত চোখে তার দিকে তাকিয়ে বলে উঠে—আপনি আবার এসেছেন, কই, গেলেন নাতো আমাদের বাড়িতে?

বনহর দ্রুত নিজকে সংযত করে নিয়ে বলে—ও, তুমি...

হাঁ আমি, আমার নাম গোলাপী।

সুন্দর নাম তোমার।

কই, যাবেন বলেছিলেন, গেলেন নাতো?

শুনলাম ওটা তোমার শ্বশুরবাড়ি। আমি অচেনা অজানা মানুষ, হঠাৎ করে যদি সেখানে যাই তাহলে নিশ্চয়ই তোমার শ্বশুর তোমার স্বামী ত্রুঙ্ক হবেন।

গোলাপী বললো—শ্বশুর হয়তো কিছু মনে করতে পারেন কিন্তু আমার স্বামী.....একটা দীর্ঘশ্বাস ত্যাগ করে বলে—আমার স্বামী, সে পাগল বোবা.....আমি তার স্ত্রী সে হয়তো জানেই না। গলাটা ধরে আসে গোলাপীর।

বনহর বললো—হাঁ, মালেক মিয়া একদিন তোমার সম্বন্ধে সব কথা বলেছিলো।

তাহলে আপনি সব জানেন?

হাঁ, সত্যি তোমার জন্য আমার দুঃখ হয়। এত সুন্দর তুমি আর তোমার পাশে একটি বোবা কালা পাগল ছেলে.....না না, বড় বেখাপ্লা এটা।

আপনি শুধু একদিন আমাকে দেখেছিলেন, আর আজ আমাকে দেখলেন তাতেই আপনি আমার জন্য দুঃখ করেন। জানেন আর একজন আমার দুঃখ দেখে দুঃখ পায়, সে হলো আমাদের বাড়ির চাকর মালেক ভাই।

হাঁ, তাও আমি জানি, মালেক মিয়া আমাকে বলেছিলো গোলাপীর দুঃখ আমাকে খুব ব্যথা দেয়, কিন্তু তার কোনো উপকার আমি করতে পারি না।

আপনার বাড়ি কতদূর?

বলেছি তো অনেক দূরে।

আপনি বুঝি এই পথে ফিরে যাচ্ছেন নিজের দেশে?

হাঁ, ফিরবার পথে এখানে বিশ্রাম করছি, ভেবেছিলাম যদি মালেক মিয়ার সঙ্গে দেখা হয়। গোলাপী, একটু ডেকে দেবে তাকে?

গোলাপী এদিক ওদিক ভালভাবে লক্ষ্য করে বলে—মালেক ভাই তো এদিকেই এসেছিলো গরু নিয়ে। গরুগুলো তো মাঠেই চরছে কিন্তু মালেক ভাইকে দেখছি না কেন?

হয়তো আবার সে বাড়ি ফিরে গেছে, তুমি বাড়ি গিয়ে তাকে পাঠিয়ে দাওগে।

আপনি যাবেন না?

না। আচ্ছা গোলাপী, একটা কথা সত্যি করে বলবে আমাকে?

বলুন বলবো?

এ দু'দিনেই আমি তোমাকে যতটুকু বুঝেছি তাতে বুঝতে পেরেছি তুমি সুখী নও। আচ্ছা গোলাপী, তুমি কি কাউকে ভালবাসতে কোনোদিন?

না, তবে এখন বাসি।

বলো তুমি কাকে ভালবাসো, আমি চেষ্টা করবো তোমাকে যেন তার হাতে তুলে দিতে পারি।

লজ্জায় রাঙা হয়ে উঠে গোলাপীর মুখখানা। না করে বলে—বলবো কিন্তু এখন না। আমি মালেক ভাইকে বলবো, সে আপনাকে বলবে। কিন্তু.....না থাক, আমি যাই, মালেক ভাইকে পাঠিয়ে দিইগে। আপনি যেন চলে যাবেন না।

আচ্ছা।

গোলাপী কলসী কাঁখে চলে যায়।

বনহর দ্রুত তার গৌফদাড়ি লাগিয়ে দিব্যি মালেক মিয়া বনে যায়।

প্রায় অর্ধঘন্টা পর ফিরে আসে গোলাপী।

মালেক তখন গরুগুলো এ মাঠ থেকে পাশের মাঠে তাড়া করে নিচ্ছে।

গোলাপী গাছটার দিকে তাকিয়ে বিমর্ষ মুখে দাঁড়িয়ে থাকে, চোখ দুটো তার ছলছল করছে। চারদিকে তাকিয়ে ব্যাকুলভাবে কাকে যেন খুঁজছে সে।

মালেক মিয়া গরুগুলো পাশের মাঠে দিয়ে এসে দাঁড়ায় গোলাপীর কাছে, বলে—এখানে কেন গোলাপী, কাকে খুঁজছো তুমি?

মালেক ভাই, তোমাকে খুঁজতে গিয়ে তাকে হারিয়ে ফেলেছি আমি।

কাকে, কাকে হারিয়ে ফেলেছো?

ঐ সেদিন যে এসেছিলো। তোমার সঙ্গে নাকি অনেক কথা হয়েছিলো। যাকে আমি দাওয়াত করেছিলাম আমাদের বাড়িতে, কিন্তু সে যায়নি। কেন যায়নি জানো মালেক ভাই—বাড়িতে আমার শ্বশুর আছে, আমার স্বামী আছে, তাই যায়নি, যদি তারা কিছু বলে। মনে পড়েছে এবার তোমার?

খুব একটা মনে পড়েছে না।

শোনো কথা! সেই সুন্দর সুপুরুষ লোকটি, যাকে তুমি তোমার সব বলেছিলে.....

ও মনে পড়েছে, সেই ভদ্রলোকটি আজ আবার এসেছিলো নাকি?

হ্যাঁ, এই গাছটার নিচে বসেছিলো।

তাই নাকি?

আমাকে সে বললো, মালেক ভাইকে ডেকে আনোগে, আমি তার জন্য অপেক্ষা করবো। কিন্তু হঠাৎ কিছু না বলে চলে গেলো.....গোলাপীর চোখ দুটো ঝাপসা হয়ে আসে।

মালেক মিয়া বলে—একটা অজানা অচেনা লোকের জন্য এত ভাবো কেন বলো তো? চলে গেছে, আবার যদি কোনোদিন আসতে মন চায় আসবে।

মালেক ভাই, তোমার সঙ্গে কিছু কথা আছে, শুনবে?

বেশ বলো?

এই মাঠে দাঁড়িয়ে কথা বলতে গেলে কেউ যদি দেখে ফেলে?
চলো তবে ঐ গাছটার আড়ালে গিয়ে বসি।

• তাই চলো।

মালেক মিয়া আর গোলাপী বটগাছটার নিচে এসে বসলো। মালেকের কাছে গোলাপীর কোনো দ্বিধা বা সঙ্কোচ ছিলো না, সে বেশ ঘনিষ্ঠ হয়ে বসলো।

মালেক মিয়া বললো—বলো?

গোলাপীর মুখখানা আপনা আপনি রক্তাভ হয়ে উঠলো, উদাস চোখে তাকালো সামনের দিকে, তারপর বললো—মালেক ভাই, সে জিজ্ঞাসা করেছিলো আমি কাউকে ভালবাসতাম কি না?

তুমি কি জবাব দিয়েছিলে তার কথায়?

জবাব দিয়েছিলাম, আমি আগে কোনোদিন কাউকে ভাল বাসিনি তবে এখন বাসি। জানো মালেক ভাই, সে কি বলেছিলো?

কি বলেছিলো সে?

বলেছিলো, বলো তুমি কাকে ভালবাসো, আমি চেষ্টা করবো তোমাকে যেন তার হাতে তুলে দিতে পারি..... খামলো গোলাপী। লজ্জাভরা কণ্ঠে বললো আবার—আমি বলেছিলাম, বলবো কিন্তু এখন নয়। আমি মালেক ভাইকে বলবো, সে আপনাকে বলবে.....তারপর আমি চলে গিয়েছিলাম তোমার খোঁজে। হয়তো ফিরতে আমার দেরী দেখে সে চলে গেছে মালেক ভাই। গলাটা ধরে আসে তার।

মালেক মিয়া বলে—হয়তো আবার আসবে, তাই আজ চলে গেছে। কিন্তু তুমি যা আমাকে বলতে চেয়েছিলে বলো? তুমি কাকে ভালবাসো যদি তাকে বললে সে কোনো উপকার করতে পারে। ভদ্রলোককে দেখে মনে হয়েছিলো সে তোমার কোনো অসুবিধা হলে দূর করতে পারবে।

কিন্তু আমার যে বিয়ে হয়েছে মালেক ভাই, আমি কি করে বলবো সে কথা?

কোনো সঙ্কোচ করো না, আমার কাছে বলে ফেলো দেখি যদি পারি আমিও সহায়তা করবো তুমি যাকে ভালবাসো তাকে পাইয়ে দিতে।

এটা তো শহর নয়—গ্রাম, একবার বিয়ে হলে তার আর বিয়ে হয় না।

তোমার বিয়ে সে তো বিয়েই নয়। একটা পাগল বোবা কালা তোমার স্বামী হতেই পারে না। তা ছাড়া তুমি কোনোদিন তার সংস্পর্শেই যাওনি। কি করে তোমার স্বামী হয়? ন্যূ না, ও বিয়ে তোমার বিয়ে নয়, বলো কাকে তুমি ভালবাসো—কে সে?

মালেক ভাই, আমি তোমাকে সেদিন বলেছিলাম মনে নেই তোমার? আমি ওকে ভালবেসে ফেলেছি।

ওকে.....

হাঁ, সেই অচেনা অজানা বন্ধুটিকে।

গোলাপী! অস্ফুট ধ্বনি করে উঠে মালেক মিয়া।

হাঁ মালেক ভাই তুমি বিশ্বাস করো। বিশ্বাস করো মালেক ভাই, আমি যে কিছুতেই তাকে ভুলতে পারছি না।

কিন্তু জানো না গোলাপী সে কে, কি তার পরিচয়, কেমন ধরনের লোক সে—সে কোনো অসৎ ব্যক্তি কিনা কিছুই তুমি জানো না, এমন লোককে বিশ্বাস করতে নেই কিছুতেই।

না না মালেক ভাই, আমি যে তাকে কিছুতেই ভুলতে পারছি না। তার সঙ্গে দেখা হলে বলো আমার কথা—যদি সে আমার মঙ্গল চায় তাহলে সে যেন আমাকে গ্রহণ করে...মালেক ভাই, তুমি অমন নিশ্চুপ হয়ে গেলে কেন? কথা বলো—কথা বলো মালেক ভাই? জানো মালেক ভাই, এ পৃথিবীতে আমার কেউ নেই। শুধু তুমি যা আমাকে ভালবাসো, আমার ভাল চাও। সব জানো তুমি, আমার আর এ বাড়িতে একটুও ভাল লাগেনা, মনে হয় চলে যাই যদিকে দু'চোখ যায়। আবার ভাবি কোথায় যাবো—কে দেবে আমাকে আশ্রয়, কে দেবে আমাকে খেতে.....ফুঁপিয়ে কাঁদে গোলাপী। ওর গন্ড দু'টি আপেলের মত লাল হয়ে উঠে।

বড় মায়া হয় মালেক মিয়ার, কেন সে এমন ভুল করেছিলো? কেন সে নিজের ছদ্মবেশ পরিত্যাগ করেছিলো। গোলাপী যদি তার আসল চেহারা না দেখতো তাহলে তো তার মনে এমন প্রতিক্রিয়া হতো না। নিজের উপর রাগ হয় মালেক মিয়ার।

গোলাপী আঁচলে চোখ মুছে বলে—মালেক ভাই, তুমি অমন নীরব হয়ে গেলে কেন? গোলাপী মালেক মিয়ার বুকে মাথা রেখে আকুলভাবে কেঁদে উঠে—পারবে না তুমি এই সামান্য কাজটুকু করতে? তুমি যদি আমার মঙ্গল কামনা করো তাহলে আমাকে নিয়ে চলো তার কাছে.....

সে কোথায় থাকে আমি কেমন করে বলবো। আমি কেমন করে জানাবো গোলাপী, সে কোথায় থাকে।

নিশ্চয়ই সে আবার আসবে, নিশ্চয়ই সে আবার আসছে—আমার মন বলছে সে আসবে। আমি রোজ ঠিক এমনি সময় এখানে আসবো যেন সে ফিরে না যায়। গোলাপী আঁচলে চোখ মুছে উঠে দাঁড়ায়।

চলে যায় গোলাপী।

মালেক মিয়া নিশ্চল পাথরের মূর্তির মত ওর চলে যাওয়া পথের দিকে তাকিয়ে বসে থাকে। গোলাপীর কথাগুলো প্রতিধ্বনিত হতে থাকে তার কানের কাছে.....জানো মালেক ভাই, এ পৃথিবীতে আমার কেউ নেই, শুধু তুমি যা আমাকে ভালবাসো, আমার ভাল চাও.....সব জানো তুমি, আমার এ বাড়িতে একটুও ভাল লাগে না...মনে হয় চলে যাই, যে দিকে চোখ যায়.....পারবে না তুমি এই সামান্য কাজটুকু করতে.....তুমি যদি আমার মঙ্গল কামনা করো, তাহলে আমাকে নিয়ে চলো তার কাছে.....নিয়ে চলো তার কাছে.....

মালেক মিয়ার মন ব্যথাকাতর হয়ে উঠে অসহায় গোলাপীর কথা ভেবে। কিন্তু কি করবে সে? গোলাপী যদি হাজারার যে কোনো একজনকে ভালবাসতো, সে যেমন করেই হোক তার সঙ্গে ওর মিলন ঘটিয়ে দিতো। বড় অনাথা, বড় হতভাগিনী মেয়ে সে। সারাটা দিন ও বাড়িতে সে ঝি—চাকরাণীর চেয়ে বেশি কাজ করে তবু তাকে চারটি পেট পুরে খেতে দেয় না। তাকে ভাল জামাকাপড় দেয় না, চুলে তেল দেয় না, মাথাটা সব সময় রুক্ষ শুষ্ক যেন শ্যাম্পু করা চুল, ওকে—আরও সুন্দর লাগে ওর এলোমেলো চুলগুলো যখন ছড়িয়ে থাকে ওর চোখেমুখে। বেচারী সারাদিন হাড়ভাঙ্গা পরিশ্রম করে তবু প্রায়ই ইকরাম গৃহিণীর গালমন্দ তাকে খেতে হয়। শুধু কি গালমন্দ, মাঝে মাঝেই মারধর চলে তার উপর, সেকি নির্যম অত্যাচার.....ভাবতে বড় কষ্ট হয় মালেক মিয়ার কিন্তু কি করবে, কোনো উপায় খুঁজে পায় না যেন সে ঐ মুহূর্তে।

এমন সময় কয়েকটা ছেলে একটি নৌকার মাঝিকে ধরে বেদম প্রহার করছে দেখতে পায় সে। কিছু বুঝতে না পেরে উঠে দাঁড়ায়, গোলাপীর কথা ঐ সময় সম্পূর্ণরূপে ভুলে যায় মালেক মিয়া, এগিয়ে যায় সে ঐদিকে।

নৌকার নিকটবর্তী হতেই নজরে পড়ে নৌকার ছেয়ের মধ্যে বস্তা বোঝাই কিছু রয়েছে। ছেলেগুলোর বয়স বেশি নয়, কিশোর তারা; তবু তাদের দেখে মনে হচ্ছে এক একজন তেজোদীপ্ত আর অসীম সাহসী।

মালেক মিয়া নদীতীরে পৌঁছে তাদের জিজ্ঞাসা করলো—কি হয়েছে ভাইরা, তোমরা, কেন ওকে মারছো?

মালেক মিয়ার কথা কেউ প্রথমে কানেই নিতে চায় না, রাগে স্ফোভে তাদের শরীর যেন কাঁপছে। ক্রুদ্ধভাবে সবাই লোকটাকে ঘিরে ধরে আছে। একজন তখনও তাকে কিল-ঘুষি মেরে চলেছে।

মালেক মিয়া দু'তিনবার জিজ্ঞাসা করায় একজন বললো—এ বেটা মাঝি নয়, চোরাচালানী। মাঝির বেশ ধরে চাল বোঝাই নৌকা নিয়ে পালাচ্ছিলো.....

মালেক মিয়া এতক্ষণে বুঝতে পারে ব্যাপারখানা— সে বলে, ওভাবে মেরে কোনো ফল হবে না, ওকে বেঁধে নিয়ে যাও...

একজন বলে উঠে—কোথায় নিয়ে যাবো, থানায়? থানায় নিয়ে গেলে এফুগি ছাড়া পেয়ে যাবে।

এক ছেলে, নাম তার ঠান্ডা সে এগিয়ে এসে বললো—কে, মালেক ভাই?

হাঁ দাদু, তোমরা এসব কি করছো?

করবো না? দেশটাকে, এরা ধ্বংস করে দিলো—বেটা এক নম্বর চোরাচালানী, এর নাম ইউনুছ ব্যাপারী। পাটের ব্যাপার করতে, ঐ দেখছো না পাটের গাইটের তলায় চালের বস্তা লুকিয়ে সীমান্তের ওপারে নিয়ে যাচ্ছিলো। মালেক ভাই, তুমি ওকে থানায় দিতে বলছো, কিন্তু কিছু হবে না। থানায় দিলে এর কোনো শাস্তি হবে না, ছাড়া পেয়ে যাবে এফুগি। জানো তো পুলিশ এদের হাতের মুঠায়.....

জানি ঠান্ডা ভাই জানি, আমি ওকে থানায় দিতে বলছি না, বলছি তোমরা ওকে ধরে নিয়ে যাও, তারপর.....

কি বলছো মালেক ভাই তারপর গ্রামের মাতাকবরের কাছে বিচার দাও, এই বলছো তো? জানো গ্রামের মাতাকবর ইকরাম আলী সাহেব নিজেই একজন বড় চোর.....তুমি তার বাড়ির চাকর বলে আমরা তোমাকে ভয় করবো না। এভাবে দেশে অন্যায় হবে, সহ্য করবো না আমরা—বুঝলে?

মালেক মিয়া বললো—আমি তা বলছি না, বলছি ওকে ধরে নিয়ে যাও, তারপর তোমরা নিজেরাই ওর বিচার করো—হত্যা না করে হাতের আংগুলগুলো কেটে দাও, তারপর মাথা নেড়ে করে মুখে চুনকালি মাখিয়ে সমস্ত গ্রামে ঘুরিয়ে নিয়ে বেড়াও। তাতে ওর শাস্তিও হবে এবং যারা অসৎ ব্যবসায়ী—এই ধরো চোরাকারবারী, মুনাফাখোর, এরাও কিছুটা ভড়কে যাবে।

মালেক মিয়ার কথা শুনে সবাই প্রহার থেকে ক্ষান্ত হলো এবং মাঝিবেশী চোরাচালানীকে দড়ি দিয়ে মজবুত করে বেঁধে ফেললো।

ঠান্ডা ডাকলো—মখলেছুর ভাই, মালেক ভাই কি বলছে শোনো। এই সেই মালেক ভাইয়ার কথা বলেছিলাম।

মখলেছুর নিজে চোরাচালানীকে বাঁধছিলো, এবার সে সরে এলো মালেক মিয়ার পাশে, রাগে তার মুখমণ্ডল কঠিন হয়ে উঠেছে।

মখলেছুরকে সরে আসতে দেখে তার সঙ্গীরা চোরাচালানীসহ এসে দাঁড়ালো মালেক মিয়ার চারপাশে।

এ গ্রামে যদিও মালেক মিয়া বেশীদিন হলো আসেনি তবু সবাই তাকে ভালবাসতো, সমীহ করতো। মালেক মিয়ার প্রতি সবার ছিলো গভীর একটা আকর্ষণ। সে যে কথাগুলো বলে তা অতি গুরুত্বপূর্ণ, তাই কেউ ফেলতে পারতো না তার কথা। অবশ্য একদল ছিলো যারা মালেক মিয়াকে ভাল নজরে দেখতো না। তারা হলো ইকরাম আলীর সহকারী এবং বন্ধু—বান্ধবের দল কারণ মালেক মিয়া মাঝে মাঝে তাদের লক্ষ্য করে এমন কথা বলতো যা কোনোদিন কোনো চাকর তাদের মুখের উপর বলতে সাহস হয়নি বা বলতেও পারেনি।

মালেক মিয়া এদের শুনিয়ে শুনিয়ে কথা বলতো, যেন ওদের দিব্যদৃষ্টি খুলে যায়। কিন্তু ‘চোর নাহি শোনে ধর্মের কাহিনী’ মালেক মিয়ার কথায় তাদের কোনো চেতনা হতো না।

মখলেছুর, ঠান্ডা, শাহীনুর, সুজা, ইকবাল আর জোবায়েদ এরা কয়েকজন বড় ভাল ছেলে। দেশের যখন চরম অবস্থা, দিন দিন দ্রব্যমূল্য যখন ঘোড়ার মত লাফিয়ে লাফিয়ে উপরে উঠছে তখন এরা চুপ থাকতে পারলো না। এরা ঝাঁপিয়ে পড়েছে দেশরক্ষা বা দেশগড়ার ব্যাপারে। শুধু

এই ক'জনাই নয় এদের সঙ্গে আরও কয়েকজন মহৎ ছেলে এবং মেয়ে যোগ দিয়েছে কাজে। যদি তাদের প্রচেষ্টা সার্থক হয় তবু কিছুটা দেশগড়ার কাজে সহায়তা হবে।

একদিন দেখা হয়েছিলো মালেক মিয়ার সঙ্গে ঠান্ডার, তখন অনেক কথা হয়েছিলো। বলেছিলো মালেক মিয়া, তোমরা যখন দেশের দুঃস্থ জনগণের মঙ্গল চাও, তোমরা দেশকে সুষ্ঠু সুন্দর করে গড়ে তুলতে চাও, দেশের জনগণকে বাঁচাতে চাও, তাহলে তোমরা খুজে বের করো কারা তারা, যারা দেশের এ অবস্থার জন্য দায়ী। প্রথমে চোরাচালানী এবং অসৎ উপায়ে যারা ব্যবসা চালিয়ে যাচ্ছে, তাদের খুঁজে বের করো। দেশের সর্বনাশের মূলে রয়েছে তারা, তাদের শায়েস্তা করতে না পারলে দেশে শান্তি কোনোদিন আসবে না।

মালেক মিয়ার কথাগুলো মনে দাগ কেটেছিলো সেদিন। সে ঐ কথাগুলো বলেছিলো নিজেদের দলের মধ্যে গিয়ে।

ঠান্ডার কথায় তাদের দল সজাগ হয়ে উঠেছিলো। ভেবেছিলো, তাই তো, তারা যদি নিজেরাই গ্রামকে সুন্দর করে গড়ে তুলতে চায়, তাহলে গ্রামে যারা অসৎ ব্যক্তি আছে তাদের শায়েস্তা করতে হবে। তাই ওরা নেমে গেছে কাজে এবং চোরাকারবারী ইউনুস আলীকে ধরে ফেলেছে হাতেনাতে। মালেক মিয়ার কথায় সবাই খুশি হলো।

মখলেছুর বললো—মালেক ভাই, তুমি যা বলেছো সত্য। ইউনুস আলীকে আমরা আমাদের সমিতি কক্ষে প্রথমে আটক করে রাখবো, তারপর হবে তার বিচার। কিন্তু তোমাকে আসতে হবে, আমাদের বিচারে অংশ নেবে তুমি।

হাসলো মালেক মিয়া, তারপর বললো—আমি চাকর মানুষ তোমাদের বিচারে আমার যাওয়া উচিত হবে না ভাই। তোমরা কাজ করো, যদি কোনো দরকার মনে করো আমার কাছে এসো।

ইকবাল ইউনুস আলীর কোমরে বাধা রশিটা ধরে দাঁড়িয়ে ছিলো, সে বললো—আচ্ছা মালেক ভাই, তুমিও এসো না আমাদের দলে। তোমাকে পেলে আমরা আরও শক্তিশালী হবো।

একসঙ্গে বলে উঠে ঠাড়া, জোবায়েদ, সুজা—হাঁ, আমরা সবাই মিলে তোমাকে চাই।

তৃপ্তি আর আনন্দের হাসি হাসে মালেক মিয়া, বলে সে—বেশ, আমিও আছি তোমাদের দলে, কিন্তু সব সময় যেতে পারবো না হয়তো, পরের বাড়ি কাজ করি কিনা.....

আচ্ছা তাই হবে, যখন সময় পাও এসো আমাদের সমিতিতে, কেমন? বললো মখলেছুর।

মালেক মিয়া চলে যাচ্ছিলো; শাহীনুর বললো—আচ্ছা মারেক ভাই, এই নৌকার চালগুলো এখন কি করবো বলতে পারো?

হেসে বলে মালেক মিয়া—আমার চেয়ে তোমরা কত জ্ঞানবান, বুদ্ধিমান—আমি তো মুর্থ মানুষ।

তবু তুমি অনেক বুদ্ধিমান, তাছাড়া তুমিও যখন আমাদের দলে যোগ দিলে তখন তোমাকে জিজ্ঞাসা করা দরকার। কথাটা বললো ঠাড়া।

মালেক মিয়া বললো—যদি আমার কাছে শুনতেই চাও তবে শোনো, যে চাল তোমরা আজ আটক করেছে এ চাউল হাজার হাটে নিয়ে যাবার ব্যবস্থা করো এবং এ চাল সেখানে নিয়ে গিয়ে তোমরা সবাই মিলে উচিৎ মূল্যে, মানে যা সম্ভব আর যে মূল্যে হলে জনগণের কোনো অসুবিধা হবে না সেই মূল্যে বিক্রি করে দাও। টাকাগুলো তোমাদের সমিতিতে জমা রাখো। যখন দেখবে কেউ অনাহারে মরছে বা কেউ ভীষণ অসুখে পড়েছে কিংবা কোনো পরিবারের উপার্জনক্ষম ব্যক্তি মারা গেছে, তখন ঐ টাকা দিয়ে তোমরা সেই সব পরিবারকে সাহায্য করবে।

মারহাবা, মারহাবা, মালেক ভাই জিন্দাবাদ। সবাই মিলে মালেকের জয়ধ্বনি করে উঠলো, তারপর চোরাচালানী ইউনুস আলীকে বেঁধে নিয়ে চললো।

এসব কান্ড দূর থেকে দেখছিলো হবি মোল্লা। সে ইকরাম আলীর একজন মঙ্গলকামী বন্ধু। সংবাদটা সে সঙ্গে সঙ্গে গিয়ে জানালো ইকরাম আলীকে।

ইকরাম আলীর সহকারী হলো ইউনুস ব্যাপারী। বহুকাল ধরে সে পাটের ব্যবসা করে। পাটের ব্যবসার সঙ্গে চলে তার চোরাকারবার। ইদানীং

তার চোরা কারবারী ভীষণভাবে ফেঁপে উঠেছে। ইকরাম আলী ও গ্রামের আরও কয়েকজনের সহায়তায় তার সাহস বেড়ে গেছে ভীষণভাবে।

তবে ইকরাম আলী যেমন প্রকাশ্যে চোরা কারবার চালিয়ে যায়, কেউ তার বিরুদ্ধে কথা বলতে পারে না—ইউনুস ব্যাপারী ঠিক তা নয়, সে গোপনে তার পাট ব্যবসার আড়ালে করে চোরা কারবার।

হাজার হাজার মানুষের মুখের গ্রাস গোপনে নিয়ে যায় সে পাটের গাইটের তলায় করে সীমান্তের ওপারে, নিয়ে আসে গাদা গাদা টাকার আকারে ছাপানো কাগজে স্থূপ আর সেই মূল্যহীন কাগজের স্থূপগুলো দিয়ে খরিদ করে সে একগুণ মূল্যের দ্রব্য দশগুণ মূল্য দিয়ে। দেশের সম্পদে আগুন ধরে যায়। যারা কালোবাজারী মুনাফাকারী, তারা এক টাকার জিনিস দশ টাকায় খরিদ করে, আর যারা সভ্য—শান্ত সব মানুষ তারা দিশে হারার মত তাকিয়ে দেখে, ভাবে—কি ভাবে বাঁচবো বাঁচাবো সন্তানদের।

ইকরাম আলী প্রকাশ্যে চোরা কারবারি করতে ভয় পায় না, তার কারণ আছে। কারণ হলো সে নিজেই গ্রামের মাতব্বর, তাছাড়া সরকারের লোক সবাই তার বন্ধু স্থানীয় এবং তাদের সহায়তা লাভ করে থাকে। কাজেই ইকরাম আলীর দুর্জয় সাহস, কেউ তার কোনো ক্ষতি সাধন করতে সাহস পাবে না।

মালেক মিয়া সবে ভাত খেতে বসেছে, এমন সময় ইকরাম আলী এসে দাঁড়ায় তার সম্মুখে। গম্ভীর কণ্ঠে বলে—মালেক, শুনলাম তুই নাকি গ্রামের যুবক ছেলেদের উৎসাহ দিয়েছিস ইউনুস ব্যাপারীকে শায়েস্তা করতে? দিন দিন তোর স্পর্ধা বেড়ে যাচ্ছে, জানিস ইউনুস ব্যাপারী কার লোক?

নাতো মালিক আমি কিছু জানিনা।

জানিস না। প্রচণ্ডভাবে ধমকে উঠে ইকরাম আলী। ওর সম্মুখ থেকে ভাতের থালা নিয়ে ছুঁড়ে ফেলে দেয় উঠানে—যা, তাকে আজ খেতে দেবো না। গ্রামের ছেলেদেরকে তুই নষ্ট করে দিচ্ছিস। খরবদার, আর কোনোদিন অমন কাজ করবি না!

মালেক মিয়ার মনে পড়ে একটু আগেই উঠান থেকে বেরিয়ে গেছে হবি মোল্লা। বুঝতে পারে সে—ই সব কথা বলে দিয়েছে।

ইকরাম আলী চলে যায় সেখান থেকে।

মালেক মিয়া গেলাসের পানিটুকু এক নিঃশ্বাসে পান করে উঠে দাঁড়ায়। হঠাৎ মালেক মিয়ার দৃষ্টি চলে যায় উঠানের একপাশে। গোলাপী দাঁড়িয়ে আছে, তার চোখ দিয়ে গড়িয়ে পড়ছে অশ্রুধারা।

মালেক মিয়া ঘরে গিয়ে বিছানায় লম্বা হয়ে শুয়ে পড়লো। ভাবছে সে অনেক কথা—যদিও ক্ষুধায় পেট চো চো করছে, তবু তার কষ্ট হচ্ছে না, কারণ ক্ষুধা সহ্য করার অভ্যাস তার আছে। ভাবছে, গতদিন ইকরাম আলীর কাছ থেকে নেওয়া টাকাগুলো পুঁটলিটার মধ্যে আছে। ঐ টাকাগুলো তার বিলিয়ে দিতে হবে দুঃস্থ গ্রামবাসীদের মধ্যে। কিভাবে ঐ টাকা সে সৎ কাজে লাগাবে, এই চিন্তাই করছিলো মালেক মিয়া।

হঠাৎ চুড়ির রিমঝিম শব্দ কানে গেলো তার।

বুঝতে পারলো গোলাপী এসেছে, তাই চুপচাপ শুয়ে রইলো সে।

গোলাপী ছাড়া কেই নয়, সে এসে দাঁড়ালো ওর শিয়রে, কোমলকণ্ঠে ডাকলো—মালেক ভাই, মালেক ভাই,...আমি সব শুনেছি, সব দেখেছি। আমার শ্বশুর মানুষ নয়, পশু.....তোমার মুখের খাবার ছুঁড়ে ফেলে দিয়েছে। কি অন্যায় তুমি করেছো মালেক ভাই?

এবার মালেক মিয়া উঠে বসলো, ম্লান মুখে বললো—আমি নাকি হাজার যুবক ছেলেদেরকে নষ্ট করে দিচ্ছি!

কি করেছিলে তুমি তাদের—? কি করে নষ্ট করে দিয়েছো তুমি মালেক ভাই?

সৎপরামর্শ দিয়ে.....

সৎপরামর্শ দিলে মানুষ নষ্ট হয়, এটা তো আমি কোনোদিন শুনি নি মালেক ভাই?

হাঁ, যারা অসৎ ব্যক্তি তারা তাই মনে করে। সৎ কাজ বা সৎ কথা তাদের কাছে মন্দ, বুঝলে?

আমি জানি মালেক ভাই, তুমি কোনোদিন মানুষকে নষ্ট করতে পারো না। তুমি নিজে একজন মহৎ লোক।

তা বলুক, তুমি তাতে রাগ করো না। এই দেখো আমি তোমার খাবার এনেছি। আঁচলের তলা থেকে খাবারের থালা বের করে সম্মুখে রাখে গোলাপী।

মালেক মিয়া বলে উঠে—একি করেছে, তোমার সব খাবার নিয়ে এসেছো আমার জন্য?

খাও মালেক ভাই, তুমি খাও। সারাদিন কত পরিশ্রম করো, নাও, দেরী করো না।

আর তুমি?

আমার খাবার আছে।

তা হয় না, কিছুটা তুমি খাও, তারপর আমি খাবো।

না, তুমি আগে খাও, আমি পরে খাবো।

অগত্যা মালেক মিয়া খেলো, বাকিটুকু আঁচলে ঢেকে নিয়ে গেলো গোলাপী অন্তঃপুরে।

মালেক মিয়া ভাবে, কত মহৎ নারী এই গোলাপী। প্রাণ ভরা দয়াময় স্নেহ। প্রাণভরা প্রেম—ভালবাসা কিন্তু সে আজ অসহায়া। স্বামীর প্রেম সে কোনোদিন পায়নি, পাবেও না। একটি জীবন এমনি করে নিঃশেষ হয়ে যাবে! যদি সে এই হাজারা গ্রামে না আসতো, না পরিচয় হতো ওর সঙ্গে তাহলে হয়তো ওর জন্য আজ তার কোনো কিছু ভাবতে হতো না। আজ তার মস্তবড় চিন্তা, গোলাপীকে রাহমুক্ত করা।

সন্ধ্যায় নদীতীরে বসেছিলো মালেক মিয়া, হঠাৎ পিছন থেকে কে যেন ডাকলো—মালেক ভাই!

ফিরে তাকালো মালেক মিয়া, সে দেখতে পেলো মখলেছুর আর ঠান্ডা এগিয়ে আসছে তার দিকে। ওদের সঙ্গে একটি মেয়েও আছে।

ওরা মালেকের সম্মুখে এসে দাঁড়ালো।

মখলেছুর বললো—মালেক ভাই, তুমি এখানে বসে আছো আর আমরা তোমাকে আলী সাহেবের বাড়িতে খুঁজতে গিয়েছিলাম।

মালেক মিয়া মৃদু হেসে বললো—সন্ধ্যাবেলায় কোনো কাজ হাতে ছিলো না, তাই নদীতীরে এসে বসেছি। তোমরাও বসো আমার পাশে।

ঠান্ডা বললো—আমরা তোমার কাছে এলাম কয়েকটা কথা বলতে।

বেশ বলো।

ওরা তিনজন বসলো মালেক মিয়ার পাশে ঘাসের উপর।

ঠান্ডা বললো—মালেক ভাই এ আমার বোন, এর নাম শিরীন।

বেশ নামতো তোমার বোনের! তুমিও বুঝি কাজ করছো ভাইদের সঙ্গে?

শিরীন লজ্জাভরা অথচ দীপ্তকণ্ঠে বললো—হাঁ মালেক ভাই, আমি ওদের সঙ্গে কাজ করছি। আমি ছাড়া আরও কয়েকটি মেয়ে আছে। তুমি একদিন আমাদের সমিতি কক্ষে এসো, আমি ওদের সঙ্গে তোমার পরিচয় করিয়ে দেবো।

নিশ্চয়ই যাবো বোন। শুনে খুশি হলাম তোমরা সবাই মিলে দেশ গড়ার কাজে আত্মনিয়োগ করছো জেনে। আচ্ছা এবার বলো দেখি, কি কথা আছে তোমাদের?

মখলেছুর বললো—সেদিন আমরা নৌকার সমস্ত চাল হাজার হাটে তুলেছিলাম। যা মানুষের কিনবার ক্ষমতার মধ্যে, সেই দরে আমরা সব চাল বিক্রি করে দিয়েছি।

বেশ করেছে, শুনে খুশি হলাম।

টাকাগুলো সমিতির ফান্ডে জমা রেখেছি। মালেক ভাই—টাকাটা কি করা যায়, এ নিয়েই তোমার সঙ্গে আলাপ করতে চাই।

মালেক মিয়া তাকিয়ে আছে সম্মুখে ইরামতী নদীর বুকে। কল কল, ছল ছল করে ইরামতীর পানি ছুটে চলেছে। বন্যায় ভরে উঠেছে নদীর পানি, ভেসে গেছে এ—কূল ও—কূল। হাজার গ্রামটা বেশ উঁচু জায়গায়, তাই গ্রামে বন্যার পানি প্রবেশ করেনি। নদীর আশেপাশে প্রচুর শস্যক্ষেত। যদিও এখন মাঠে তেমন কোনো শস্য নেই তবু মাঝে মাঝে দেখা যায় সবুজ রংয়ের গালিচার মত ধানের ছোট চারা গাছ।

নদীর বুকে কচুরিপানাগুলো তীরবেগে ছুটে চলেছে কোন্ অজানার পথে কে জানে।

মালেক মিয়া সেইদিকে তাকিয়ে বললো—শোনো ভাইরা—যে টাকা তোমরা মজুত রেখেছো ঐ টাকা দেশগড়ার কাজে ব্যয় করো।

হাঁ, আমরা তাই করতে চাই। আমাদের উদ্দেশ্য দেশের দুঃস্থ অসহায় জনগণকে রক্ষা করা। এমন অনেক পরিবার আছে যাদের সংসার চালানো দুর্বিষহ হয়ে উঠেছে।

আমি তোমাদের উদ্দেশ্য বুঝতে পেরেছি ভাই। ঐ টাকা যদি তোমরা দুঃস্থ জনগণের মধ্যে বিলিয়ে দাও, তাহলে তারা হয়তো দু'চারদিন পেটপুরে খেতে পারবে তারপর আবার তাদের অবস্থা সঙ্কটময় হয়ে পড়বে।

মালেক ভাই, এমন একটা বুদ্ধি দাও যাতে আমরা দেশের জনগণকে বাঁচাবার মত কিছু করতে পারি।

হাঁ, তাই করতে হবে যাতে দেশবাসী বাঁচতে পারে। তোমাদের যা টাকা মজুত আছে তা দিয়ে তোমাদের সমিতি প্রাঙ্গণে বা কোনো উপযুক্ত জায়গায় একটি কারখানা খুলে দাও যেখানে তৈরি হবে কাঠের জিনিস, তৈরি হবে বেতের জিনিস, তৈরি হবে বাঁশের জিনিস। সেই কারখানায় কাজ করবে দেশের জনগণ—যারা কোথাও চাকরি পায়নি বা কাজ পায়নি তারা কাজ পাবে এই কারখানায়.....

মারহাবা মালেক ভাই..চমৎকার এক বুদ্ধি বাতলে দিয়েছো। এই সামান্য বুদ্ধিটুকু আমাদের মাথায় আসছিলো না। কথাগুলো এক নিঃশ্বাসে বললো মখলেছুর।

ঠান্ডাও করতালি দিয়ে উঠলো—ঠিক বলেছো মালেক ভাই, এইতো কাজের মত কথা। শিরীনের চোখ দুটো খুশিতে দীপ্ত হয়ে উঠলো, সে বললো—আমরা নিজেরাও তো কাজ শিখতে পারবো সেখানে?

হাঁ বোন, তোমরা সবাই কাজ শিখতে পারবে। শহর থেকে বা দূর কোনো জায়গা থেকে এসব যারা জানেন, সেই সব শিক্ষক জোগাড় করে আনতে হবে। মাইনে দিতে হবে, অবশ্য তোমাদের কারখানা থেকেই এসব শিক্ষকের মাইনে হয়ে যাবে। জানো, আজকাল কাঠের জিনিসের কত প্রয়োজন, বেতের তৈরি বহু জিনিস আজ শহরের ঘরে ঘরে শোভা পাচ্ছে, বাঁশের তৈরি জিনিসের তো কথাই নেই। বাঁশ তো আমাদের দেশেই প্রচুর জন্মে, কোনো অভাব হবে না, বাঁশ, কাঠ, বেঁত সংগ্রহ করতে। বাঁশের তৈরি ফুলদানী, গ্যাসট্রে, নানাবিধ খেলনা এবং মেয়েদের হাতের চুড়িও তৈরি হয়। দেশে তোমাদের কত সম্পদ, শুধু পরিশ্রম করে তা থেকে পয়সা উপার্জন করা।

সত্যি মালেক ভাই, তুমি যে কি বুঝিয়ে বলতে পারবো না। আমাদের গ্রামে-গঞ্জে এ ধরনের প্রতিষ্ঠান গড়ে তোলা সবার জন্য কর্তব্য। দেশের হাজার হাজার মানুষ না খেয়ে মরছে—তারা খেটে খাবে তারও কোনো উপায় নেই। কারণ কাজ কোথায় পাবে, কে দেবে কাজ।

সেজন্যই তো আমাদের এভাবে দেশকে গড়ে তুলতে হবে, যেন দেশের মানুষ অনাহারে না মরে। তারা যেন খেটে খেতে পারে।

এখন থেকে তোমরা সতর্ক এবং সজাগ হয়ে যাও, কোনোক্রমে কোন ব্যক্তি যেন দেশের সম্পদ বাইরে পাচার করতে না পারে। আর কোনো মাল যেন বেশি মুনাফার লোভে গুদামজাত করতে না সক্ষম হয়, দেখবে ধীরে ধীরে দেশে শান্তি ফিরে আসছে।

ঠিক তোমার কথা মতই কাজ করবো আমরা মালেক ভাই।

আমি মূর্খ মানুষ, আর তোমরা জ্ঞানী বুদ্ধিমান। একটু থেমে বললো মালেক মিয়া—সরকারের ত্রাণ তহবিলে প্লাবন দুর্গতদের সাহায্যার্থে যে লক্ষ লক্ষ টাকা জমা হয়েছে, ঐ টাকা কিছু কিছু দুর্গতদের খাবারের জন্য দান করার পর সরকার যদি ঐ টাকায় গ্রামে-গঞ্জে, শহরে-বন্দরে এক একটি সাধারণ কল—কারখানা কিংবা কুটিরশিল্প প্রতিষ্ঠান গড়ে তোলেন তাহলে ঐ সব অসহায় মানুষ হয়তো বাঁচার আশ্বাস পেতো।

মালেক ভাই তুমি যা বলছো খাঁটি সত্য। নাহলে লক্ষ লক্ষ কেন, কোটি কোটি টাকা দিয়েও ঐ সব দুঃস্থ অসহায় মানুষকে বাঁচানো সম্ভব হবে না। আমার মনে হয়, সরকারের ত্রাণ তহবিল থেকে টাকাগুলো যখন বেরিয়ে আসবে তখন গুরু হবে লুকোচুরি অভিযান। প্রথম স্তরে যাবে কিছু, তারপর দ্বিতীয় স্তর, দ্বিতীয় স্তর থেকে তৃতীয় স্তর এমনি করে লুকোচুরি খেলা চলবে পঞ্চম স্তর পর্যন্ত। তারপর ষষ্ঠ স্তরে গিয়ে যখন সেই দুর্গত মানুষদের হাতে পৌঁছবে তখন দেখা যাবে এক সঙ্ক্যার মত খাবার বা পয়সা তাদের ভাগ্যে জুটেছে, হয়তো বা তাও কারও হাতে গিয়ে পৌঁছায়নি।

মালেক মিয়া অস্ফুটধ্বনি করে উঠে—মখলেছুর ভাই, তুমি ঠিক বলেছো। সরকারের ত্রাণ তহবিলে যে সাহায্য অর্থ সংগ্রহ হয়েছে, ঐ অর্থে দেশের দুঃস্থ জনগণের জন্য মহান মহৎ কাজ করা যায়, ইচ্ছা করলে সরকার এইসব অসহায় মানুষগুলোকে বাঁচাতে পারেন কিন্তু সরকারকে

অত্যন্ত সজাগভাবে কাজ করতে হবে। ঐ অর্থের একটি কানাকড়িও যদি কোনো মহান নেতার পকেটে হঠাৎ প্রবেশ করে তাহলে তাকে হয় চাকরি থেকে বরখাস্ত, নয় চুল, কান কেটে শহর প্রদক্ষিণ করানো.....কিন্তু কে করবে ভাই, সরকার যে তারাই যাদের পকেটে লাফিয়ে প্রবেশ করে কানাকড়িগুলো.....একটা ব্যথা-করণ হাসি ফুঠে উঠে মালেক মিয়ার মুখমণ্ডলে।

ঠান্ডা বলে উঠলো—সরকার যদি নিজেদের লোকজনকে শায়েস্তা করতে না পারে তাহলে জনগণ আছে। মালেক ভাই, জনগণ ক্ষুধার জ্বালায় শুধু উন্মাদ হয়নি, তারা প্রতিদিন হাজার হাজার মরছে কিন্তু মরলেও সবাই মরবে না—যারা তাদের এই মৃত্যুযজ্ঞ সৃষ্টি করার মূলে তাদের রক্ত শুষে নেবে, সেদিন বেশি দূরে নেই.....

বললো মালেক মিয়া—শুনলাম বিদেশ থেকে আমাদের দেশের সাহায্যার্থে প্রচুর পরিমাণ চাল এবং অন্যান্য খাদ্যদ্রব্য এসেছে। তোমাদের এই হাজার গ্রামের জন্যও আসবে কিন্তু তোমরা সাবধানে সজাগ দৃষ্টি নিয়ে লক্ষ্য রাখবে এই সাহায্যদ্রব্য বা চালের এক ছটাক যেন কেউ আত্মসাৎ করতে না পারে।

হাঁ, আমরা যুব সমাজ শপথ গ্রহণ করেছি—আবার করলাম, দেশের এই অনাচার আর দুর্নীতি কিছুতেই বরদাস্ত করবো না। বরদাস্ত করবো না চোরাচালানি, মজুতদারি। দেশের হাজার হাজার জনগণের মুখের গ্রাস কেড়ে নিয়ে আমরা আর ইমারত গড়তে দেবে না। দাঁতে দাঁত পিষে কথাগুলো বললো মুখলেছুর।

দীপ্ত উজ্জ্বল হয়ে উঠলো মালেক মিয়ার চোখ দুটো, বললো সে—উদ্দেশ্য যাদের মহৎ খোদা তাদের সহায়। তোমরা প্রতিটি যুবক প্রতিটি গ্রামে গঞ্জে শহরে বন্দরে দেশগড়ার শপথ নিয়ে কাজে ঝাঁপিয়ে পড়ো। খুঁজে বের করো কার ঘরে মজুত আছে খাদ্যদ্রব্য। কে বা কারা অসৎ ব্যবসায়ে লিপ্ত আছে কিংবা চোরাচালান করে যাচ্ছে। তাদের খুঁজে বের করে প্রকাশ্য দিনের আলোতে শায়েস্তা করো। যদি কেউ প্রতিবাদ করে বা পুলিশের সহায়তা গ্রহণ করে তাহলে.....

বলো মালেক ভাই, থামলে কেন?

হয়তো তোমাদের উপর আসবে অত্যাচার, হয়তো নির্মমভাবে হত্যা করবে সৈন্যবাহিনী বা পুলিশের লোক কিংবা ধরে নিয়ে যাবে কারাগারে.....

আমরা ভয় করি না আর! মালেক ভাই, কতজনকে ওরা হত্যা করবে, কতজনকে ওরা বন্দী করবে, আমরা কোটি কোটি যুবসমাজ দেশগড়ার কাজে ঝাঁপিয়ে পড়েছি। মৃত্যুকে আমরা ভয় করি না, মৃত্যুকে জয় করতে শিখেছি আমরা..মখলেছুর কথাগুলো বলে থামলো।

মালেক মিয়া উচ্ছ্বসিত আনন্দে বললো—সাবাস!

আজ তাহলে চলি মালেক ভাই?

ঠান্ডা এবং শিরীনও বলে উঠে—মালেক ভাই, দোয়া করো আমরা যেন কাজে সফলতা লাভ করি।

নিশ্চয়ই তোমরা জয়ী হয়ে, অন্যায় কোনোদিন চিরস্থায়ী হয় না। তোমাদের অভিযান অন্যায়-অনাচারের বিরুদ্ধে, কাজেই জয় তোমাদের সুনিশ্চিত।

ওরা চলে গেলো।

উঠে দাঁড়ালো মালেক মিয়া।

বাড়ির দরজায় পা দিতেই কানে এলো কান্নার শব্দ, তার সঙ্গে গালমন্দার ঝঙ্কার। গোলাপীর কান্নার শব্দ বেশ বুঝতে পারলো মালেক মিয়া। বোবা হাবলুর হাউমাউ করে গলার আওয়াজও শোনা যাচ্ছে।

ইকরাম গৃহিণীর গলা—আমরা দয়া করে তোমার মত অলক্ষুণে মেয়েকে ঘরে স্থান দিয়েছি, না হলে কবে ঝেঁটিয়ে বের করে দিতাম। এতবড় স্পর্ধা। তুমি স্বামীর অবাধ্য হয়েছে! ও যা বলতে তাই শুনতে হবে তোমাকে। যদি আমার ছেলের কথা না শোনো তাহলে তোমার এ বাড়িতে স্থান নেই মনে রেখো.....

গোলাপীর গলা—আমি পারবো না, ওর পায়ে তেল মাখতে আমি পারবো না।

সমস্ত রাত বসে বসে আমার ছেলের পায়ে তেল মাখতে হবে তোমাকে, নইলে আরও মারবে ও.....

না, পারবো না।

সঙ্গে সঙ্গে ধুপধাপ শব্দ। ইকরাম গৃহিণীর ইঙ্গিতে বোবা কালা হাবলু বেদম প্রহার শুরু করে দেয় গোলাপীকে।

মালেক মিয়া সহ্য করতে পারে না, সে উঠানে প্রবেশ করে সোজা বারান্দায় উঠে যায় এবং প্রচণ্ড এক ধাক্কা হাবলুকে সরিয়ে দিয়ে বলে— এসব কি করছেন বেগম সাহেবা, এমনভাবে প্রহার করতে দিচ্ছেন আপনার ছেলেকে?

দেবো না মানে একশ' বার ও মারবে। ওর বৌও যা ইচ্ছা করবে, তোমার তাতে কি? যাও তুমি বেরিয়ে যাও উঠান থেকে, নইলে সাহেবকে ডাকবো। যাও বলছি...

যাচ্ছি কিন্তু মনে রাখবেন এরপর যেন আর একটা আঘাতও না পড়ে গোলাপীর উপর।

কি, কি বললে...এতবড় সাহস তোমার! আমার যা খুশি করিনা কেন, তাতে তোমার কি? একবার নয়, হাজারবার হাবলু ওর বৌয়ের উপর আঘাত করবে তাতে তোমার কি? বেরিয়ে যাও উঠান থেকে যদি ভাল চাও।

মালেক মিয়া ধীর মন্তুর পদক্ষেপে বেরিয়ে গেলো তখনকার মত। নিজের ঘরে গিয়ে জামাটা খুলে শুয়ে পড়লো বিছানায়....ভাবছে, সারাটা দিন গোলাপী কত না পরিশ্রম করে, হাড় ভাঙ্গা খাটুনি করে সে, তবু তার উপর চলে অকথ্য অত্যাচার...যেমন করে হোক ওকে এ বাড়ি থেকে সরানো ছাড়া উপায় নেই। একটি সুন্দর ফুলের মত জীবন এভাবে বিনষ্ট হতে দেবে না সে। গোলাপীর উপযোগি একটি ছেলে তাকে খুঁজে বের করতে হবে। যতদিন না গোলাপীর একটা ব্যবস্থা হয়েছে ততদিন সে নিশ্চিত হতে পারবে না।



আরও কিছুদিন কেটে গেলো।

মখলেছুর ও তার সঙ্গীরা সমিতি প্রাঙ্গণে বড় বড় তিনটি কক্ষ তৈরি করে নিয়েছে; এক একটি কক্ষে এক এক রকম জিনিস তৈরির সরঞ্জাম রাখা হয়েছে। প্রাঙ্গণে কাজ হয়—সকাল থেকে বেলা দুটো পর্যন্ত কাজ চলে।

মখলেছুর একদিন নিজে গিয়ে হাজির হলো। মালেক মিয়া তখন মাঠে কাজ করছিলো। এসে দাঁড়ালো মখলেছুর—মালেক ভাই, তোমাকে যেতে হবে।

কোথায়?

আমাদের সমিতি প্রাপ্তগে। দেখবে চলো আমরা কিভাবে কাজ করছি।

হাঁ, চলো যাই।

মালেক মিয়া মখলেছুরের সঙ্গে চলে এলো সমিতি প্রাপ্তগে, সে দেখতে পেলো বিরাট আকারের লম্বা ঘর, তাতে নানারকম যন্ত্রপাতি আর বিভিন্ন জিনিস তৈরির সরঞ্জাম সুন্দরভাবে স্থান লাভ করেছে। বহু দুঃস্থ লোক সমিতি প্রাপ্তগে জমায়েত হয়ে যে যার কাজ করে চলেছে। একদিকে চলছে বেতের কাজ, একদিকে বাঁশের, অপর দিকে চলছে কাঠের কাজ। অনেক পশু লোককেও কাজ করতে দেখা যাচ্ছে।

মালেক মিয়ার দু'চোখ আনন্দে ভরে উঠলো, একজন শিক্ষক এক এক দলকে কাজ শেখাচ্ছে।

মখলেছুর বললো—মালেক ভাই, এরা যখন নিজেরা কাজ শিখে নেবে তখন আর শিক্ষকের প্রয়োজন হবে না। এই দেখো এরা কেউ কেউ অন্ধ, কেউ কেউ পশু খোঁড়া, তবু এরা কাজ করছে—বেতের কাজ।

হাঁ, খুব সুন্দর হচ্ছে। এই তো ক'দিন আগেও এরা কাজ না পেয়ে পথে পথে হাত পেতে বেড়াতো, অনাহারে—উপবাসে ধুঁকে ধুঁকে মরতো, আর আজ ওরা কাজ পেয়েছে—আর ওরা ক্ষুধায় মরবে না।

এই দেখো মালেক ভাই, এরা বাঁশের কাজ করছে। এগুলো ফুলদানি, এ্যাসট্রে.....

চার, পাঁচজন মেয়ে একপাশে বসে বাঁশের ফুলদানি আর এ্যাসট্রেগুলোতে নানারকম রঙের আঁচড় টেনে চলেছে।

মালেক মিয়া একটা ফুলদানি হাতে নিয়ে নেড়েচেড়ে দেখে বললো—ভারী সুন্দর হচ্ছে!

জানো মালেক ভাই, এরা কারা? এরা আমাদেরই বোন—লাকী, লেবু, শিরীন, সাহরাবানু, পারভীন, লায়লা, পারুল। এদের সহযোগিতায় আমরা যথেষ্ট উপকার পাচ্ছি।

মালেক মিয়া বললো—খুব আনন্দ লাগছে বোন, তোমরাও এসেছো দেশগড়ার কাজে সহায়তা করতে। নিশ্চয়ই দেশের সব পরিস্থিতি মঙ্গলময় হয়ে উঠবে। তোমাদের দেখে পাশের গ্রাম শিখবে, তারপর শিখবে অপর

গ্রাম, এমনি করে সমস্ত দেশে শুরু হবে দেশগড়ার কাজ। আমি বলছি তোমাদের সমিতি কক্ষগুলো অচিরে দালানে পরিণত হবে।

সত্যি হবে মালেক ভাই? বললো শিরীন।

মালেক মিয়া বললো—হবেই।

পরদিন দেখা গেলো গাড়ি ইট আর সিমেন্ট আসছে। এলো মিস্ত্রি, পুরাদমে কাজ শুরু হলো।

বহু টাকা খরচ হতে লাগলো সমিতির কাজে। অবাক হয়ে গেলো মখলেছুর ও তার দলবল। তারা ভেবে পাচ্ছে না কে এসব দিচ্ছে।

ছেলেদের উৎসাহ ধরে না, তারা উচ্ছাসিতভাবে কাজ করতে লাগলো।

ইকরাম আলীর কানে গিয়ে পৌঁছলো এ সংবাদ। সে রাগে জ্বলে উঠলো—কার এমন সাহস, আমার বিনা হুকুমে সমিতি প্রাঙ্গনে ইটের দালান তৈরি করে, তারপর দেশের মানুষদের কাজে লাগিয়ে দেশটাকে রসাতলে দিচ্ছে।

সমস্ত ছেলেদের ডেকে পাঠালো ইকরাম আলী।

ছেলেরা এলে তাদের সম্মুখে এসে দাঁড়ালো এবং ভীষণভাবে রেগে বললো—কার আদেশে তোমরা সমিতি করেছো এবং সেখানে দুঃস্থ জনগণকে কাজ দিয়েছে?

একসঙ্গে এসেছিলো সমিতির কয়েকজন ছেলে—শাহীনুর, ঠাভা, ইকবাল, সুজা, জোবায়েদ আর মখলেছুর। সবার সামনে এগিয়ে এলো মখলেছুর, দৃঢ়কণ্ঠে জবাব দিলো—জনহিতকর কাজে কারও মতামতের প্রয়োজন আমরা বোধ করিনি, তাই.....

তোমাদের সমিতি আমি বন্ধ করে দেবো!

না, পারবেন না, ও সমিতি আমরা নষ্ট করতে দেবো না। ঐ সমিতিতে প্রতিদিন শত শত দুঃস্থ গ্রামবাসী কাজ করে আহারের সংস্থান করছে। ঐ সমিতিতে ওরা কাজ না করলে মারা পড়বে।

মারা পড়ুক। ওদের বেঁচে থেকে কোনো ফল হবে না, ওরা দেশের জঞ্জাল।

আর আপনারা যারা দেশকে রসাতলে নিয়ে যাচ্ছেন আপনারা বুঝি দেশের সম্পদ?

কি, আমার মুখের উপর এতবড় কথা বলতে সাহস পেলে? শুনেছি সেদিন তোমরা ইউনুস আলী ব্যাপারীকে অপমান করেছো, তার চুল কেটে মুখে চুনকালি মাখিয়ে তাকে নিয়ে গ্রামময় ঘুরিয়ে বেড়িয়েছো?

হাঁ, তবু তাকে ক্ষমা করেছি, তার হাতের সবগুলো আঙ্গুল কেটে দেওয়ার কথা ছিলো, তা করিনি আমরা।

একজন সম্মানিত ব্যক্তির সম্মানহানি করার কি অধিকার আছে তোমাদের? জানো আমি পুলিশকে সংবাদ দিয়েছি।

হেসে উঠলো মখলেছুর—পুলিশ! পুলিশ এসে কি করবে? আমরা চোরাচালানী হিসেবে তাকে আটক করেছিলাম, তার সমস্ত মাল আমরা আটক করেছি এবং তা বিক্রি করে সমিতির কাজ করছি। আমরা এমন কোনো দোষ বা অপরাধ করিনি যে পুলিশ আমাদের গ্রেপ্তার করতে পারে।

তোমাদের কোনো কথা আমি শুনবো না বা শুনতে চাই না। পুলিশ এলে তাদের সম্মুখে জবাবদিহি করতে হবে তোমাদের।

সে দেখা যাবে। রাগতভাবে কথাটা বলে দলবল নিয়ে চলে গেলো মখলেছুর।

ইকরাম আলী রাগেক্ষোভে বোমার মত ফেটে পড়লো। হবি মোল্লাকে ঘোড়া দিয়ে শহরে পাঠিয়েছে সে পুলিশকে সংবাদ দিতে।

গ্রামের ছেলেদের এমন দুর্জয় সাহস হলো কি করে। তারা সম্মানী লোকের সম্মানহানি করতে পিছপা হচ্ছে না...রাগে দুঃখে পায়চারী করে চলে ইকরাম আলী।

বেলা গড়িয়ে যেতে না' যেতেই হাজরা থানার পুলিশ অফিসার সহ কয়েকজন পুলিশ এলো। গাড়ি এসে থামতেই ইকরাম আলী শশব্যস্তে গাড়ির পাশে এসে পুলিশ অফিসারকে অভ্যর্থনা জানালো।

ইকরাম আলীকে লক্ষ্য করে বললেন পুলিশ অফিসার—কোথায় সেই দুষ্টিকারী দল, যারা দিনদুপুরে গ্রামের লোকদের উপর হামলা চালিয়ে সব লুটপাট করে নিচ্ছে? চলুন দেখিয়ে দিন।

না স্যার, যেতে হবে না, আমি তাদের ডেকে পাঠাচ্ছি।

সেকি, যারা দিনদুপুরে লুটপাট করে, লোকের সর্বনাশ করে, তারা ডাকলে আসবে তো?

আসতে বাধ্য স্যার।

বেশ, ডেকে পাঠান।

চলুন, বৈঠকখানায় গিয়ে আমরা বসি।

চলুন।

হবি মোল্লা সেখানেই ছিলো, তাকেই পাঠালেন ইকরাম আলী সাহেব মখলেছুরের দলকে ডাকতে। কিন্তু কিছুক্ষণ পর ফিরে এলো হবি মোল্লা, বললো—তারা কেউ নেই বাড়িতে।

কোথায় গেছে?

তাদের বাবা বললো তারা নাকি কাজে বেরিয়ে গেছে।

দেখলেন স্যার, এক মুহূর্ত তারা বাড়িতে থাকে না, সব সময় কার সর্বনাশ করবে এজন্য ঘুরে বেড়ায়। স্যার, এখন কি করা যায় বলুন?

যতক্ষণ তারা ফিরে না আসে ততক্ষণ বিশ্রাম করুন স্যার? বললো হবি মোল্লা।

পুলিশ অফিসার ধমক দিয়ে বললেন—আপনারা সঠিক কোনো কিছু না করে কেন আমাদের ডেকে পাঠিয়েছিলেন? তবে যে হবি মোল্লা বললো এলেই তাদের হাতেনাতে পাকড়াও করতে পারবো আমরা?

হবি মোল্লা হাতের মধ্যে হাত কচলে বললো—স্যার, ভেবেছিলাম এলেই পাবেন কিন্তু দেখছি ওরা বিচ্ছু নয় পাকাল মাছ, ধরতে গেলেই পিছলে পালায়।

ইকরাম আলী বলে—যাও, পাকাল মাছদের না পেলে তাদের বাপদের ডেকে আনো। স্যার, দু'জন পুলিশ দিয়ে দেননা, নাহলে হয়তো সহজে আসতে চাইবে না।

চলে যায় হবি মোল্লা দু'জন পুলিশ সহ।

কিছু পরে মখলেছুরের বাবাকে সঙ্গে করে নিয়ে আসে তারা। বেচারী হাসান সাহেব সাদাসিদা মানুষ, তিনি কিছু বুঝতে না পেরে হতভম্ব হয়ে গেছেন।

ইকরাম আলীর বৈঠকখানায় প্রবেশ করবার পূর্বেই বুঝতে পারেন, সব ইকরাম আলীর চক্রান্ত। ভিতরে প্রবেশ করে দেখতে পান চেয়ারে বসে আছেন পুলিশ অফিসার এবং ইকরাম আলী।

হাসান সাহেব ছালাম দিতেই বলে উঠে ইকরাম আলী—আপনার ছেলে মখলেছুরকে কোথায় সরিয়ে দিয়েছেন? বলুন, জবাব দিন?

অবাক কণ্ঠে বলেন হাসান সাহেব—আমার ছেলে মখলেছুরের কথা বলছেন?

হাঁ, কোথায় সে? এবার কঠিন এবং গম্ভীর কণ্ঠে বললেন পুলিশ অফিসারটি।

হাসান সাহেব বললেন—সে সমিতির কাজে বাইরে কোথাও গেছে।

বিস্ময় নিয়ে বললেন পুলিশ অফিসারটি—সমিতির কাজে! কিসের সমিতি?

ইকরাম আলী হাসান সাহেবকে কোনোরকম জবাব দিতে না দিয়ে বলে উঠে—সমিতির নামে ওরা ব্যবসা শুরু করে দিয়েছে। লুট করা টাকা—পয়সা দিয়ে.....

হাসান সাহেব রাগত কণ্ঠে বলে উঠেন—লুট করা মানে—আমার ছেলেরা লুট করেছে, বলেন কি ইকরাম আলী সাহেব?

তা নয় তো কি, ইউনুস ব্যাপারীর একনৌকা চাল ওরা লুটে নেয়নি? ঐ চাল লুট এবং আরও অনেক কিছু দুর্কর্ম ব্যাপারে আপনার ছেলে এবং তার সঙ্গীদের গ্রেপ্তার করতেই ইনারা এসেছেন।

কি আশ্চর্য, ইউনুস আলী পাটের গাইটের তলায় হাজার হাজার মন চাল পাচার করতে যাচ্ছিলো তখন তারা তার নৌকা আটক করে.....

স্যার, দেখুন সত্যি কিনা। ওরা দিনের বেলায় লুটতরাজ শুরু করে দিয়েছে। বলে কি জানেন স্যার, আমরা দুঃস্থ জনগণের সেবা করছি। তার মানে দেশবাসীকে লুটতরাজ করা শিক্ষা দিচ্ছে ওরা এবং লুটতরাজ শিখাবার জন্যই সমিতি খুলেছে। হাসান সাহেব ছেলের অপরাধ ঢাকবার চেষ্টা করছেন। আপনি কোনো কথা শুনবেন না যেন।

পুলিশ অফিসারটি বলে উঠেন—না, আমি কারও কথাই শুনবো না। আমি নিজে গিয়ে দেখতে চাই সমিতিটিতে সত্যি লুটতরাজ শেখানো হচ্ছে কিনা। উঠে দাঁড়ান পুলিশ অফিসার—চলুন এখনই যাবো।

হাসান সাহেব খুশিভরা কণ্ঠে বলেন—হাঁ স্যার, চলুন।

মখলেছুর রহমান তার সঙ্গীদের নিয়ে সমিতির কাজে শহরে গিয়েছিলো, সমিতি কক্ষে ছিলো মেয়েরা। শিরীন, লায়লা, সাহেরাবানু, পারুল, লাকী, রেবু আর পারভীন—এরা সমিতি প্রাপ্তি যারা যারা কাজ করে চলেছে, তাদেরকে সহযোগিতা করছিলো।

এমন সময় এসে হাজির হলো ইকরাম আলী ও পুলিশ অফিসারটি এবং পুলিশদ্বয়।

ইকরাম আলীর সঙ্গে পুলিশের পোশাকপরা লোকদের দেখে মেয়েরা বেশ চিন্তিত হলো, কারণ তারা জানে এই মাতব্বর কতখানি বদ এবং শয়তান। মনে মনে ভড়কে গেলেও মুখে সাহস টেনে উঠে দাঁড়ালো শিরীন।

অন্যান্য মেয়ে কাজ করে চললো আপন মনে।

শিরীনকে উঠে দাঁড়াতে দেখে এগিয়ে এলেন পুলিশ অফিসারটি, তার মুখোভাব দেখে মনে হচ্ছিলো তিনি সমিতি এবং সমিতির কাজ দেখে খুশি হয়েছেন। পুলিশ অফিসার শিরীনকে লক্ষ্য করে বললেন—আপনি বুঝি এ সমিতির কর্মী?

জী হাঁ, আমিও এ সমিতির একজন।

শুনুন, আমি আপনাকে কয়েকটি প্রশ্ন করবো?

বেশ করুন। সচ্ছভাবে জবাব দিলো শিরীন।

পুলিশ অফিসার কিছু জিজ্ঞাসা করবার পূর্বেই বলে উঠে ইকরাম আলী—স্যার, ওকে আবার কি জিজ্ঞাসা করবেন, ও তো মেয়েমানুষ।

হোক, তবুও জবাব দিতে পারবে বলে মনে করি। আচ্ছা বলুন, আপনাদের এ সমিতির উদ্দেশ্য কি? সংক্ষেপে জবাব দিন।

তাই দেবো। শিরীন একটু চুপ করে থেকে বললো—গ্রামের দুঃস্থ জনগণকে সাহায্য করা আমাদের সমিতির উদ্দেশ্য।

কিভাবে এবং কি ধরনের দুঃস্থ জনগণকে আপনারা সাহায্য করছেন?

ধরুন আমাদের গ্রামে যেসব গরিব অসহায় মানুষ আছে এবং যারা পঙ্গু—কোনো কিছু করতে পারে না, তাদের আমরা আমাদের সমিতিতে নানাভাবে, নানা কাজে সুযোগ দিয়ে থাকি। আসুন আমার সঙ্গে, আপনাকে দেখাচ্ছি।

ইকরাম আলী বলে উঠে—না না, ওসব আবার ঘুরেফিরে কি দেখবেন, যা বলেছি তাই সত্য.....

পুলিশ অফিসার কান দিলেন না, তিনি শিরীনের সঙ্গে এগিয়ে চললেন।

শিরীন নিয়ে গেলো যেখানে বেতের কাজ হচ্ছিলো সেখানে। পুলিশ অফিসার অবাক হয়ে দেখছেন ভারী সুন্দর সুন্দর বুড়ি ফুলের সাজি, চেয়ার, টেবিল, বেতের বাস্র আরও বহু জিনিস তৈরি হচ্ছে।

শিরীন বললো—এরা সবাই পশু—কারও পা খোঁড়া, কারও হাত ছোটো বা খোঁড়া, কারও চোখ নেই অন্ধ, এমনি নানা ধরনের পশু লোক এখানে আছে। এরা পূর্বে শিক্ষা করতো। দেশে যে অবস্থা শিক্ষাও পেতো না, তখন না খেয়ে সবাই মরতে বসেছিলো। এদের মধ্যে অনেকেই আছে বন্যা প্রাণিত অঞ্চলের লোক। বাড়িঘর সব বন্যার পানিতে ভেসে যাওয়ায় যারা দিশেহারা হয়ে শহরে গ্রামে বন্দরে ছড়িয়ে পড়েছিলো, ক্ষুধার জ্বালায় পথে পথে ধুঁকে মরছিলো আমরা তাদের এনে এখানে খেতে দিয়েছি। প্রথমে ক’দিন শুধু খেতে দিয়ে দুর্বল মানুষগুলোকে কিছুটা সবল করে তুলেছি, তারপর কাজ দিয়েছি। এখন যেসব বেতের কাজ হচ্ছে তা বিক্রি করেই এই অসহায়দের ভরণ-পোষণ চলছে। স্যার, আপনি কিছু কিনলে খুশি হবো।

ইকরাম আলীর দু’চোখে আগুন ঠিকরে বের হতে লাগলো, সে বলে উঠলো—না, উনি এসব কিনবেন কোন্‌ দুঃখে, জানো উনারা কেন এসেছেন?

অফিসার শান্ত গলায় বললেন—আপনি চুপ করুন ইকরাম আলী সাহেব। যা প্রশ্ন করার আমাকে করতে দিন। চলুন ওদিকে দেখি?

চলুন।

যেখানে বাঁশের কাজ হচ্ছিলো সেখানেও নারীপুরুষ সবাই মিলে কাজ করছে। সুন্দর সুন্দর ডালা, বুড়ি, ফুলদানি, এ্যাসট্রে অনেক কিছু। পুলিশ অফিসার ভদ্রলোক হাতে তুলে নিয়ে দেখতে লাগলেন। বললেন তিনি—ভারী সুন্দর.....এবার পুলিশ অফিসারটি দুঃস্থ জনগণ যারা বাঁশের কাজ করছিলো তাদেরকে লক্ষ্য করে বললেন—তোমরা এর পূর্বে কি করত?

একজন জবাব দিলো—হুজুর শিক্ষা করতাম কিন্তু দ্যাশের অবস্থা খারাব, শিক্ষা আর দেয় না কেউ, তাই না খাইয়া মরতি বস্যাছিনু—

ভাগিস এই কাজ পাইছি, তা না অইলে ছালা ম্যাইয়া নিয়া এতদিন কবরখানায় যাওন লাগতো।

অপর একজনকে জিজ্ঞাসা করলেন পুলিশ অফিসার—তুমি কি করতে?

আমি, আমি ভিক্ষা করতে পারিনা হজুর। আগে জমি জায়গা ছিলো চাষ আবাদ করেছি কিন্তু দ্যাশ ডুইব্যা যাওয়ায় কাজের লাইগ্যা আইস্যা ছিলাম কিন্তু দ্যাশে কাম কই হজুর, কত জায়গায় কাম খুঁজলাম কোথাও কাম পাইল্যাম না। পাঁচটি ছালা ম্যাইয়া নিয়া মরতে বইস্যাছিনু শুনতি পাইল্যাছিনু শুনতি পাইল্যাম হাজরা গাঁয়ে একটা সমিতি খুলছে দ্যাশের ছেলেরা, তাই শুইন্যা আইস্যা ছিলাম। হজুর আপনারে কি কমু, এহন খাইতে পাই বৌ ছাালেরে খাইতে দিতে পারি। ঐতো আমার বৌ হজুর এহানে আমার বৌও কাম করে।

একটা রুগ্ন মেয়েমানুষ ঘোমটা টেনে দিয়ে ছালাম করে পুলিশ অফিসারটিকে।

তারপর শিরীন পুলিশ অফিসারটিকে নিয়ে যায় যে কক্ষে কাঠের কাজ হচ্ছিলো সেখানে।

বহুলোক কাঠের জিনিস তৈরি করছে। কেউ আর বসে নেই। বহু চেয়ার টেবিল বেঞ্চ ইত্যাদি সুন্দর সুন্দর কাঠের জিনিস থরে থরে সাজিয়ে রাখা হয়েছে। পুলিশ অফিসার সব দেখে সন্তুষ্ট হলেন এবং বললেন—দুঃস্থ জনগণকে এভাবে কাজে লাগিয়ে আপনারা যে মহত্ত্বের পরিচয় দিয়েছেন সেজন্য আমি আপনাদেরকে ধন্যবাদ জানাচ্ছি।

পুলিশ অফিসারের কথা শুনে ইকরাম আলীর দু'চোখ দিয়ে আগুন টিকরে বের হতে লাগলো। সে পুলিশ অফিসারকে নিয়ে এসেছে গ্রামের কয়েকজন ছেলেকে শায়েস্তা করার জন্য কিন্তু পুলিশ অফিসার স্বয়ং সমিতির প্রশংসায় পঞ্চমুখ হয়ে উঠলেন, এটা একেবারে অসহ্য ব্যাপার।

ইকরাম আলী রাগেক্ষোভে ফোঁস ফোঁস করতে লাগলো।

পুলিশ অফিসার বললেন—আপনারা সমিতি প্রতিষ্ঠা করে খুব ভাল কাজ করেছেন। এমন প্রতিষ্ঠান আমাদের গ্রামে গ্রামে, শহরে বন্দরে হওয়া উচিত। সত্যি আপনারা প্রশংসার যোগ্য।

শিরীন বললো—স্যার, আসলে মখলেছুর ভাই ও তার সঙ্গীরা এই সমিতি গড়ে তুলেছে। আমরা মেয়েরাও তাদের সহযোগিতা করেছি মাত্র। আর একজন—আর একজন আমাদের বুদ্ধি পরামর্শ দিয়ে উৎসাহিত করেছে, সে হলো.....ইকরাম আলীকে আংগুল দিয়ে দেখিয়ে দিলো—উনার বাড়ির চাকর মালেক মিয়া।

বিস্ময়ে দু'চোখ কপালে তুলে বলেন পুলিশ অফিসার ভদ্রলোক—ইকরাম আলী সাহেব, আপনার বাড়ির চাকর সে পর্যন্ত এই সমিতির কাজে সহায়তা করেছে, অথচ আপনি কিনা সমিতির বিরুদ্ধে নালিশ জানিয়েছেন। বুঝতে পারছি না একটা সৎ মহৎ প্রতিষ্ঠানের বিরুদ্ধে আপনার এত অভিযোগ কেন?

পুলিশ অফিসার সমিতি থেকে কিছু বেতের এবং বাঁধের সুন্দর সুন্দর জিনিস কিনে নিয়ে বিদায় গ্রহণ করলেন। তিনি বিদায়কালে ইকরাম আলীকে সালামটাও করলেন না।



ইকরাম আলীর ধমনিতে যেন আগুন জ্বলে উঠলো, সে বাড়ি ফিরেই ডেকে পাঠালো মালেক মিয়াকে।

মালেক মিয়া কিন্তু সমিতির পাশে পাশেই ছিলো এতক্ষণ। সে সবকিছু লক্ষ্য করছিলো: 'দূর থেকে। পুলিশ অফিসার চলে যেতেই শিরীনের পাশে গিয়ে দাঁড়িয়েছিলো এবং এতক্ষণ তাদের মধ্যে কি কথাবার্তা হচ্ছিলো সব শুনে নিয়েছিলো।

বাড়ির উঠানে পা দিতেই হাঁকালো ইকরাম আলী—মালেক শোন।

আসছি মালিক। বলে এসে দাঁড়ালো মালেক মিয়া।

ইকরাম আলী ত্রুদ্রভাবে হৃষ্কার ছাড়লো—তুই নিজে বলেছিলি ওদের কোনো সহযোগিতা করছিস না, তবে যে বললো?

কে কি বললো মালিক, আমি ঠিক বুঝতে পারছি না।

তা পারবি কেন? শয়তানি করার জায়গা পাচ্ছনা—ঐ সমিতি নাকি তোমার পরামর্শেই ওরা করেছে?

সে কি মালিক, আমি হলাম মূর্খ মানুষ, আমি পরামর্শ দেবো সমিতি করার—বলেন কি মালিক!

তবে যে সমিতির একটি মেয়ে বললো?

বললো, হয়তো পুলিশ দেখে ভীষণ ভয় পেয়ে গেছে মালিক। ভেবেছিলো আপনার বাড়ির চাকরের কথা বললে.....

চুপ কর, বল কি পরামর্শ তুই দিয়েছিলি?

পরামর্শ আমি নিজেই জানি না, পরামর্শ দেবো এখনকার শিক্ষিত ছেলেমেয়েদের? মালিক, ওদের কারও কথা শুনবেন না। ওরা যা ভাল মনে করেছে তাই করুক, আপনি নিজের চিন্তা করেন।

জানিস্ তোকে কেন বের করে দেই না?

জানি মালিক, ডাকাতির ভয়ে।

হাঁ, শুধু ঐ ডাকাতির উপদ্রবে আমি তোকে তাড়াতে পারছি না, নাহলে কবে বের করে দিতাম.....

মালিক, তাহলে থাকবো না চলে যাবো?

থাকবি নাতো যাবি কোথায়? শোন, ভাল করে পাহারা দিবি যেন রাতে ডাকাত বেটা সোজা এসে হাজির না হয়। তোরা কেউ জানিস্ না সে আমার কি সর্বনাশটাই না করেছে—আমাকে সে ফকির বানিয়ে ছেড়েছে।

মালেক বলে উঠে—একবার যদি ওকে পাই আমি, মাথাটা ওর নিয়ে তবে ছাড়বো।

হাঁ, প্রস্তুত থাকবি। আচ্ছা মালেক বলতে পারিস্, ঐ মখলেছুরের দল সমিতি করার জন্য এত টাকা পেলো কোথায়?

টাকা। মালিক, লোকে বলে উদ্দেশ্য যার মহৎ খোদা তার সহায়। হয়তো তাই কোনো অভাব হচ্ছে না...

কিন্তু আসলে তা নয়।

তবে কি মালিক?

ওরা গোপনে লুটতরাজ করছে।

না মালিক, লুটতরাজ করতে পারে না।

সেদিন ইউনুস ব্যাপারীর একনৌকা চাল লুট করে নিলো আর তুই বলছিঁস্ কিনা তারা লুট করে না।

ওটা ঠিক লুট নয় মালিক, মানুষ লুট করে গোপনে আর তারা সবার সামনে নৌকা আটক করেছিলো, তারপর নৌকার চাল তারা নিজেরা একমুঠো কেউ নেয়নি, গরিব-দুঃখীদের মধ্যে বিতরণ করে দিয়েছে, আর বাকি হাটে বিক্রি করে সেই টাকায় সমিতি খুলেছে। মালিক, আপনি কিছু সাহায্য করুন, নামও হবে নেকিও হবে।

অমন নাম আমি চাই না, তুই যা, এখন বক্বক্ করিস্ না।

আচ্ছা যাচ্ছি মালিক।

শোন, হবি মোল্লাকে একটু সন্ধ্যার পর ডেকে আনবি, বুঝলি?

আচ্ছা।

চলে যায় মালেক মিয়া নিজের ঘরে। সন্ধ্যার অন্ধকার এখনও ঘনীভূত হয়ে আসেনি, মালেক মিয়া ঘরে প্রবেশ করে দাড়িগোঁফ খুলে ফেলে, জানে সে এ সময় কেউ আসবে না সেখানে।

হঠাৎ দরজায় মৃদু পদশব্দ শোনা গেলো।

মালেক দ্রুত চাদরখানা টেনে নিয়ে শুয়ে পড়লো বিছানায়। পাশে এসে দাঁড়ালো গোলাপী, চাপাকণ্ঠে ডাকলো—মালেক ভাই!

বলো। চাদরের তলা থেকে জবাব দিলো মালেক মিয়া। ভাবছে হঠাৎ যদি গোলাপী চাদর সরিয়ে ফেলে তাহলে কোনোরকমে আত্মগোপন করা সহজ হবে না। চাদরখানা সে আরও ঐটে ধরে রাখলো।

গোলাপী বললো—মালেক ভাই, আমি আর পারছি না। আমাকে নিয়ে চলো সেখানে, যেখানে সে আছে।

তার তো আমি ঠিকানা জানি না, তোমাকে কোথায় নিয়ে যাবো?

মালেক ভাই, সে বলেছিলো আমি আবার আসবো। কই, এলোনা তো? আমি যে তার প্রতীক্ষায় প্রহর গুণছি। মালেক ভাই, উঠো, ভাল করে কথা বলো আমার সঙ্গে।

বড্ড অসুস্থ লাগছে আমার। তুমি এখন যাও...আমি একটু ঘুমাবো.....

তোমার কি মাথা ধরেছে, আমি একটু হাত বুলিয়ে দিই?

না, দরকার হবে না গোলাপী।

যেতে বললেও আমি যাবো না; কারণ জানো ঐ পাগলটা আমার পিছু নিয়েছে। আমি আর পারছি না.....বাস্পরুদ্ধ হয়ে এলো গোলাপীর গলা।

মালেক মিয়া ভীষণ বিপদে পড়লো—এ মুহূর্তে তার মুখে দাড়িগোঁফ কিছু নেই—হঠাৎ যদি তার আসল রূপ ধরা পড়ে যায় তাহলে গোলাপীর কাছ থেকে নিজেকে সে কিছুতেই সরিয়ে নিতে পারবে না...না, তা হয় না, গোলাপীর কাছে সে কিছুতেই ধরা দেবে না। বললো—গোলাপী, আমার বড্ড ঘুম পাচ্ছে—তুমি যাও, কেমন?

গোলাপী তবু মালেকের মাথায় হাত স্পর্শ করে বললো—দেখি তোমার জ্বর আসেনি তো?

না। মালেক মিয়ার চোখ দুটো পানিতে ভরে উঠলো, কত দয়া গোলাপীর, এতটুকু স্নেহ-ভালবাসার কাস্তাল সে।

গোলাপী বেরিয়ে গেলো, একটা দীর্ঘশ্বাস ত্যাগ করলো মালেক মিয়া।



অনেক রাত।

সমিতি কক্ষে বসে বসে আলোচনা চলছিলো—মখলেছুর, ঠাভা, শাহীনুর, সুজা, জোবায়েদ ও আরও দু'তিনজন ছেলে। সেদিন শহর থেকে ইকরাম আলী হবি মোল্লাকে পাঠিয়ে পুলিশ অফিসার ও দু'জন পুলিশ আনিয়েছিলো, যেন পুলিশ এসে তাদের সমিতি নষ্ট করে দেয় এবং তাদেরকে লুটতরাজের নাম করে গ্রেপ্তার করে, কিন্তু পুলিশ মহলের লোক সমিতি দর্শন করে খুশি হয়েছেন।

এসব নিয়েই আলোচনা চলছিলো, এমন সময় হঠাৎ দরজা খুলে যায়, সমিতি কক্ষে প্রবেশ করে এক জমকালো মূর্তি, হাতে তার পিস্তল।

মখলেছুর ও তার সঙ্গীরা ভীতভাবে উঠে দাঁড়ায়, বলে উঠে মখলেছুর—কে তুমি, কি চাও?

জমকালো মূর্তির মুখের অর্ধেক ঢাকা ছিলো কালো রুমালে, বললো সে গম্ভীর কণ্ঠে—আমি ডাকাত!

ডাকাত! কম্পিত গলায় উচ্চারণ করলো ঠাণ্ডা। তার দলবলও ভয়লি গলায় বললো—ডাকাত!

ডাকাত তখন শান্তকণ্ঠে বললো—ভয় নেই, আমি তোমাদের কাছে কিছু নিতে আসিনি, দিতে এসেছি.....

দিতে এসেছো? বললো মখলেছুর।

ডাকাত বললো—হাঁ, আজ তোমরা কেন শাহানশা গ্রামে গিয়েছিলে—অর্থের প্রয়োজনে নয় কি?

হাঁ, তুমি সেকথা জানলে কি করে? বললো ইকবাল।

ডাকাত বললো—জানি, আমি সব খবর জানি। যাক, বেশিক্ষণ দেৱী করতে পারবো না। এই নাও টাকা— কাল ব্যাঙ্কে গিয়ে সমিতির ফান্ডে রেখে আসবে। প্রয়োজনমত খরচ করবে, কোনোদিন সমিতি নষ্ট করো না। শোনো, যখনই সমিতির জন্য অর্থের প্রয়োজন মনে করবে তখনই পাবে.....টাকার বান্ডিলগুলো পকেট থেকে বের করে টেবিলে রাখলো।

মখলেছুর ও তার দলবলের দু'চোখে বিস্ময়, এত টাকা তারা একযোগে কোনোদিন দেখেনি। তাছাড়া ডাকাত সে নিজে এসেছে তাদের সমিতির জন্য টাকা দিতে, কি অদ্ভুত কাণ্ড!

মখলেছুরের দলের কারও মুখে কোনো কথা নেই, সবাই যেন আড়ষ্ট হয়ে গেছে।

ততক্ষণে বেরিয়ে গেছে জমকালো মূর্তি।

মখলেছুর বেরিয়ে আসে পিছনে পিছনে, কিন্তু জমাট অন্ধকারে কাউকে সে দেখতে পায় না।

মখলেছুর ফিরে আসতেই ঠাণ্ডা বলে উঠলো—আশ্চর্য মখলেছুর ভাই, ডাকাত নিজে এসে সমিতির জন্য এত টাকা দিয়ে গেলো!

শুধু আশ্চর্য নয়, বিস্ময়ভরা কাণ্ড—ডাকাত টাকা দিয়ে গেলো, এটা স্বপ্ন নয় তো? কথাটা বললো সুজা।

জোবায়েদ বললো—নিশ্চয় এই ডাকাতই আমাদের সমিতি দালানে পরিণত করার জন্য গোপনে চুন, সিমেন্ট, ইট, বালি দিয়েছে।

ঠিক বলেছি শাহীনুর, এবার আমরা বুঝতে পেরেছি কে ঐ সব জিনিস আমাদের সমিতির জন্য পাঠাতো। কথাটা বললো ইকবাল।

ঠাণ্ডা বললো—আর বিলম্ব করা উচিত নয়। টাকাগুলো তাড়াতাড়ি ভালভাবে উঠিয়ে রাখা দরকার। টাকাগুলো আমাদের সমিতির দুঃস্থ জনগণের ভাগ্যেই এসেছে, কাজেই বলতে হবে খোদার রহমত।

হাঁ, ঠিক, তা না হলে ডাকাত আসে কেড়ে নিতে, ডাকাত যে দিয়ে যায় ত'তো জানতাম না। নে, তাড়াতাড়ি টাকাগুলো উঠিয়ে রাখা হোক, নাহলে ডাকাতের উপর ডাকাত আছে ইকরাম আলী, সে যদি জানতে পারে তাহলে সর্বনাশ হবে। কথাগুলো বলে মখলেছুর টাকাগুলো তুলে রাখার জন্য প্রস্তুত হলো।



পরদিন ভোর বেলা মখলেছুর এসে হাজির হলো মালেক মিয়া'র কাছে। মালেক মিয়া তখন গরুগুলোকে গোয়াল থেকে বের করে ঘাস খেতে দিচ্ছিলো।

মখলেছুরকে দেখে বললো মালেক মিয়া—মখলেছুর ভাই যে, কি খবর?

এসো কথা আছে তোমার সঙ্গে। বললো মখলেছুর।

মালেক মিয়া গরুকে ঘাস খেতে দিয়ে বললো—চলো।

ইকরাম আলীর বাড়ির অদূরে একটা গাছের নিচে এসে দাঁড়ালো মালেক মিয়া আর মখলেছুর। ততক্ষণে আরও কয়েকজন যুবক এসে পড়েছে—তারা হলো ঠাণ্ডা, শাহীনুর, জোবায়েদ। মখলেছুরকে লক্ষ্য করে বললো মালেক মিয়া—বলো কি খবর?

খবর অতি শুভ মালেক ভাই। আমাদের আর কোনো চিন্তা নেই। সমিতি আমরা দালানে পরিণত করতে পারবো এবং আমাদের সমিতির কাজে যেসব জিনিষের অভাব ছিলো তা এবার পূরণ হবে।

এসব কি বলছো মখলেছুর, হঠাৎ যে একেবারে.....

হাঁ, একেবারে মূলধন পেয়ে গেছি।

ব্যাপার কি বলো?

ডাকাত.....

ডাকাত, বলো কি মখলেছুর ভাই!

হাঁ, ডাকাত এসেছিলো গত রাতে.....

সর্বনাশ, তাহলে সব নিয়ে গেছে.....

নিয়ে না, দিয়ে গেছে।

এ তুমি কি বলছো?

হাঁ, সত্যি ডাকাত আমাদের সমিতিতে এসে বহু টাকা সমিতির জন্য দিয়ে গেছে।

একি অদ্ভুত কথা বলছো মখলেছুর ভাই?

অদ্ভুত হলেও সত্য। এত টাকা সমিতিকক্ষে রাখা ঠিক নয়, তাই আমরা তোমার কাছে এসেছি পরামর্শ নিতে।

মালেক মিয়া চিন্তিতভাবে মাথা চুলকে বলে—হাঁ, ও টাকা সমিতিকক্ষে রাখা মোটেই উচিত হবে না। তোমরা বেশি জানাজানি না করে শহরে গিয়ে ব্যাঙ্কে রেখে এসো এবং যখন যা সমিতির কাজে প্রয়োজন ব্যাঙ্ক থেকে তুলে এনে খরচ করো।

ঠান্ডা বলে উঠলো—ডাকাত টাকা দিয়ে গেছে, আবার আজ রাতে হানা দিয়ে নিয়ে যাবে না তাই বা কেমন করে বলবে। হয়তো আজ রাতে এসে টাকা ফেরতও চাইতে পারে।

হেসে বললো মালেক মিয়া—যা দিয়ে গেছে তা ফেরত নিতে আসবে কে তোমাদের এমন কথা বললো? জানো, ডাকাত হলেও তার প্রাণ মন হৃদয় আছে—সেও মানুষ, কাজেই মানুষ হয়ে অমানুষী কাজ সে করবে না।

কি জানি ভয় হচ্ছে, যদি কোনো উদ্দেশ্য নিয়ে সে টাকাগুলো দিয়ে গিয়ে থাকে? বললো শাহীনুর।

না, ভয়ের কোনো কারণ নেই, বরং সে তোমাদের সমিতিকে সাহায্য করতে পেরে নিজকে ধন্য মনে করেছে.....কথাগুলো বলে মালেক মিয়া বললো—যাই, এখন অনেক কাজ আছে। হাঁ, আর একটা কথা শোনো। তোমরা গ্রামে যেমন কাজ করছো তেমনি শহরেও করতে হবে। শহরের পথেঘাটে অগণিত মানুষকে আমি উলঙ্গ দেখেছি—দেখেছি জীবন্ত কঙ্কালের মত এক একটা মানুষ, যারা ক্ষুধার জ্বালায় ধুঁকে ধুঁকে মরছে।

মালেক ভাই, শহরে যারা আছে তারা ই শহরের দুর্গত মানুষদের জন্য ভাববে, আমরা গ্রাম থেকে গিয়ে কতটুকু করতে পারবো, বলো?

করতে হবে মখলেছুর ভাই, তোমরা যেমন গ্রামাঞ্চলে দেশ গড়ার কাজে এগিয়ে এসেছো, তেমনি শহরে—বন্দরে সব জায়গায় এগিয়ে যেতে হবে। দেশ তোমাদের শুধু এই হাজরা গ্রামটিই নয়, সমস্ত পৃথিবী তোমাদের দেশ। মখলেছুর ভাই, মনে করো শহরের দুঃস্থ অসহায় মানুষগুলোকে বাঁচানোর দায়িত্বও তোমাদের আছে। অবশ্য শহরের যুবসমাজের কর্তব্য এটা, তবু যদি তারা এ কাজে এগিয়ে না আসে, শহরের মানুষের চোখে যদি না পড়ে তবে তোমরা গিয়ে কাজ করো। তোমাদের দেখেই শিখবে তারা। জানো, শহরে কত মানুষ আজ খেতে না পেয়ে পথের ধারে পড়ে মৃত্যুর সঙ্গে লড়াই করছে—অচিরে এদের বাঁচাবার জন্য সচেষ্ট হওয়া দরকার, কিন্তু.....না, এখন থাক, পরে বলবো।

চলে যায় মালেক মিয়া।

মখলেছুর নিশ্চলভাবে দাঁড়িয়ে তাকিয়ে থাকে মালেকের চলে যাওয়া পথের দিকে। অস্ফুট কণ্ঠে বলে—একটা মূর্খ মানুষ মালেক ভাই, তার মধ্যে কত জ্ঞান!

ওরা সেখান থেকে বিদায় নিয়ে চলে যায়। আজই তাদের শহরে যেতে হবে।

মালেক ফিরে আসে, নিজের কাজে মনোযোগ দেয় সে। কাজ শেষ করে ফিরে আসে ঘরে। বৈঠকখানার পাশেই তার ঘরখানা। বিছানায় বসে গামছায় হাওয়া খেতে থাকে। ইঠাৎ তার কানে ভেসে আসে পাশের ঘর যেটা ইকরাম আলীর বৈঠকখানা, সেইঘর থেকে হবিমোল্লার গলা।

হবিমোল্লা বলে—আপনি নিজে যান আলী সাহেব, কাজ ভাল হবে। আপনি যেখানে যেতে পারবেন আমি কি পারবো সেখানে যেতে? তাছাড়া আপনি এ গ্রামের হর্তা-কর্তা-বিধাতা, আপনি গিয়ে সব বুঝিয়ে বলুন।

আমিই যাবো, তাহলে তোমাকে ডাকলাম কেন? তুমি বড্ড অকেজো।

যা বলেন আলী সাহেব। জানেন তো লেখাপড়া বেশি জানি না, কার সঙ্গে কেমন করে কথা বলতে হয় তেমন করে বলতে পারি না। হর্তাকর্তারা যদি ইংরেজি বলে তখন আমি সম্পূর্ণ হাবা বনে যাই.....তাই বলছিলাম কি, যদি পারেন তবে আপনি নিজে চলে যান। গিয়ে বলুন সব কথা। কয়েকটি ছেলে মিলে গ্রামে যা-তা শুরু করে দিয়েছে.....

তোমাকে আর শেখাতে হবে না, আমি যদি যাই তবে কি বলতে হয় জানি। হাঁ, দেখে নেবো ছোকরার দল আমাকে কি করে। শয়তানরা পুলিশকে হাত করে নিলো, আমাকে অপমান করলো।

শুধু ছেলেরাই নয়, আপনার বাড়ির চাকর বেটাও আছে ওদের দলে। প্রায়ই দেখি ওদের সঙ্গে মালেক মিয়া কথা বলছে।

কি করবো বলো তো? ওর উপর আমার কম রাগ নেই। মনে হয় এফুগি তাড়িয়ে দেই, কিন্তু তাড়াতে পারছি না। বুড়ো হলেও ওকে দেখলে কেউ বুড়ো বলতে পারবে না। যা দরাজ চেহারা, মনে হয় ও একাই সাত জোয়ানের বল রাখে। যা ডাকাতের উপদ্রব শুরু হয়েছে, মালেককে দেখলে সাহস হয়.....

আপনি শুধু শুধু ওর প্রশংসা করছেন। সেদিন ও সঙ্গে ছিলো, তবু তো ডাকাত আপনার সর্বস্ব নিয়ে গেলো?

তা সত্য হবি তা সত্য কিন্তু কেন যেন ওকে তাড়াতে পারছি না। হবি, টাকাগুলো হারিয়ে আমি দিশেহারা হরে পড়েছিলাম, ঐ মালেক আমার মনে সান্ত্বনা যুগিয়েছে। মূর্থ হলেও ওর মাথায় বুদ্ধি আছে। আমাকে ও বলেছিলো, মালিক, টাকার জন্য ভাববেন না। টাকা তো হাতের ময়লা, এই গেলো আর এই আসবে। ধরুন যে মাল আবার আসছে ঐ মাল দেশের বাইরে পাচার করলেই পেয়ে যাচ্ছেন যা হারিয়েছেন তার দ্বিগুণ..... ভাবলাম, তাইতো, যা গিয়েছে তার চেয়ে অনেক বেশি উপার্জন করতে পারবো যদি সুযোগ আসে। হবি, ভাই আমি আফসোস করি না।

তাহলে চলে যান, শুধু সমিতি সম্বন্ধেই বলবেন না, বললেন আমাদের গ্রামে মোটা রিলিফ দরকার। তারপর.....হাঁ, বুঝলেন কিনা।

ঠিক বুঝেছি।

আচ্ছা তাহলে আসি?

এসো।

মালেক মিয়া কান পেতে শুনছিলো কথাগুলো, এমন সময় গোলাপী এসে দাঁড়ায়—মালেক ভাই, তুমি এখানে আর আমি তোমাকে গোয়ালে খুঁজছিলাম! শোনো মালেক ভাই, কথা আছে তোমার সঙ্গে?

কথা, বেশ বলো?

এখানে নয়।

তবে কোথায়?

নদীর ধারে চলো।

কিন্তু এই অসময়ে?

চলো, আমি কলসী নিয়ে পানি আনতে যাবো আর তুমি যাবে মাঠে গরু আনতে।

চলো।

মালেক মিয়া উঠে দাঁড়ালো।

বেরিয়ে গেলো গোলাপী।

নদীর তীরে এসে মিলিত হলো ওরা দু'জন। এখনও বেলা ডুবে যায়নি, সন্ধ্যার অন্ধকার ধীরে ধীরে পৃথিবীর বুকে নেমে আসছে। ঝাঁকে ঝাঁকে বুনা হাঁস উড়ে যাচ্ছে মাথার উপর দিয়ে।

ইরামতি নদী ভরে উঠেছে কানায় কানায়। কচুরিপানাগুলো তীরবেগে ছুটে চলেছে যেন দিশেহারা অজানার পথে।

বললো মালেক মিয়া—বলো কেন ডেকেছিলে?

হাঁ বললো.... শোনো মালেক ভাই, আজ অনেক কথা আছে তোমার সঙ্গে। আমি আর বাঁচতে চাই না, আমার জীবন আর রাখবো না, তোমাকে বলে রাখলাম যদি সে আসে বলো গোলাপী তোমাকেই ভালবেসেছিলো, তোমাকে কোনোদিন সে পাবে না জেনে মৃত্যুবরণ করেছে। বলো, বলো মালেক ভাই, বলবে আমার শেষ কথাগুলো তাকে?

গোলাপীর কথাগুলো মালেক মিয়ার হৃদয় স্পর্শ করে। সে নিশ্চুপ শুনে যাচ্ছিলো তার কথাগুলো। কি জবাব দেবে ভেবে পাচ্ছিলো না, এবার সে বললো—এ তুমি কি বলছো গোলাপী?

হাঁ, যা সত্যি তাই বলছি। মালেক ভাই, আমি জানি সে আর কোনোদিন আসবে না। আজ কতদিন হলো নিশ্চয়ই সে আসতো কিন্তু...না না পুরুষ মানুষ বড় নির্ভর, বড় হৃদয়হীন। জানো মালেক ভাই, আমি তাকে আমার সব কথা বলেছিলাম, তবু কই, তার তো এতটুকু দয়া হলো না? সে কি ইচ্ছা করলে আমার মত একজন অসহায়া মেয়েকে রক্ষা করতে পারতো না? বলো, বলো মালেক ভাই? অমন নিশ্চুপ থেকো না, কথা বলো?

গোলাপীর কোমল মুখখানা তার হৃদয়ে দারুণভাবে আঘাত করলো, বাষ্পরুদ্ধ কণ্ঠে বললো—গোলাপী তুমি তাকে ভুল বুঝছো, হয়তো তার কোনো বাধা আছে তাই সে তোমাকে গ্রহণ করতে পারেনি বা পারছে না।

না না, সে কথা সত্য নয়, আমি জানি আমার মন বলছে তার কোনো বাধা নেই। যাক্, শোনো মালেক ভাই, আজ আমার এই শেষ কথা। যদি কোনোদিন সে আসে তবে দেখা হলে বলো আমার কথাগুলো.....গোলাপী কলসী কাঁখে তুলে নিয়ে দ্রুত বাড়ির দিকে চলে যায়।

মালেক মিয়া কিছুক্ষণ আরষ্ট হয়ে দাঁড়িয়ে থাকে, তারপর গরু নিয়ে ফিরে আসে বাড়িতে। বাড়ি ফিরে এলেও মনের মধ্যে তার ঝড় বইছে। গোলাপী কি সত্যিই কোনো অঘটন ঘটিয়ে বসবে? না না, তা হতে দেবে না মালেক মিয়া। একটা সুন্দর নিষ্পাপ জীবন এভাবে বিনষ্ট হতে দেবে না সে, কিন্তু কি করে ওকে বাঁচানো যায়?



গভীর রাত।

বাড়ির দরজার আড়ালে বসে লক্ষ্য রেখেছিলো মালেক মিয়া কেউ যদি রাতে এ বাড়ি থেকে বেরিয়ে আসে, তাহলে তার দৃষ্টি যেন এড়াতে না পারে। বসে বসে ভাবছিলো মালেক মিয়া, আপাততঃ যেমন করে হোক বাঁচাতে হবে গোলাপীকে। হঠাৎ যদি সে আত্মহত্যা করে বসে তাহলে তার জন্য দায়ী হবে সে, কারণ সে জানে গোলাপী নিজের অজান্তে কাকে ভালবেসেছে, কাকে সে চায়.....

হঠাৎ দরজার ওপাশে শব্দ হলো, দরজা খুলে বেরিয়ে এলো ঘোমটায় আবৃত এক নারীমূর্তি।

মালেক মিয়া সরে দাঁড়ালো।

জমাট অন্ধকারে এদিক ওদিক তাকিয়ে দ্রুত পদক্ষেপে এগিয়ে চললো নারীমূর্তি সোজা নদীর দিকে।

মালেক মিয়াও পিছু অনুসরণ করলো।

আকাশে মেঘ করে এসেছে।

মাঝে মাঝে বিদ্যুৎ চমকাচ্ছে। নারীমূর্তি অন্য কেউ নয় গোলাপী বুঝতে বাকি রইলো না মালেক মিয়ার। সেও আত্মগোপন করে দ্রুত এগিয়ে চললো।

ক্ষেতের মধ্য দিয়ে, আইলের উপর দিয়ে চলেছে গোলাপী, কখনও হেঁচট খেয়ে পড়ে যাচ্ছে আইলের ধারে।

দূর থেকে মালেক মিয়া ওকে অনুসরণ করে চলেছে।

বৃষ্টি না থাকলেও মেঘের গর্জনের সঙ্গে সঙ্গে বিদ্যুৎ চমকাচ্ছিলো। সেই আলোতে স্পষ্ট সব দেখতে পাচ্ছিলো গোলাপী। সে জানে না একজন তাকে অনুসরণ করছে। গোলাপী আজ ভুলে গেছে তার অভিশপ্ত জীবনের কথা ভুলে গেলো তার শ্বশুর-শাশুড়ি আর বোবা-কাল-পাগল স্বামীর কথা, ভুলে গেছে বৃদ্ধ মালেক ভাইয়ের কথা। এ মুহূর্তে সে শুধু ভাবছে ঐ একটি মানুষের কথা, সেই একটি মুখ ভাসছে তার চোখের সামনে। সেই শান্ত গম্ভীর স্থির কণ্ঠস্বরের প্রতিধ্বনি। গোলাপী তাকে ভালবেসে ফেলেছিলো মনপ্রাণ দিয়ে, কিন্তু সে বুঝতে পেরেছে ও কোনোদিন আর আসবে না, তাই সে আত্মহত্যা করবে তার প্রতিচ্ছবি বুকে নিয়ে.....

নদীর তীরে এসে দাঁড়ালো গোলাপী।

শান্ত ইরামতি আজ ভয়ঙ্কর রূপ ধারণ করেছে। মেঘের গর্জনের সঙ্গে গর্জন করে চলেছে ইরামতীর পানি। অন্ধকারে কচুরিপানাগুলোকে ইরামতির বুকে ভয়ঙ্কর লাগছে।

গোলাপী নদীর কিনারে এসে দাঁড়ায়। এখন তার মাথায় ঘোমটা নেই। চুলগুলো ছড়িয়ে আছে পিঠে কাঁধে। আঁচলখানা বাতাসে পত্ পত্ করে উড়ছে। বিদ্যুতের আলোতে তাকে অদ্ভুত এক নারী বলে মনে হচ্ছে।

ঠিক তার পিছনে অন্ধকারে দাঁড়িয়ে আছে বনহর। এ মুহূর্তে তার মুখে দাড়িগোঁফ কিছু নেই। বলিষ্ঠ বাহু দুটি বাড়িয়ে আছে সে গোলাপীর দিকে।

গোলাপী দু'হাতে মুখ ঢেকে ঝাঁপিয়ে পড়লো ইরামতির বুকে, কিন্তু নদী বক্ষে পড়ে যাবার পূর্বেই দুটি বাহু তাকে ধরে ফেললো।

গোলাপী চমকে উঠলো, বললো—কে? কে তুমি আমাকে ধরলে? মালেক ভাই.....ফিরে তাকাতেই বিদ্যুৎ চমকে উঠলো, সঙ্গে সঙ্গে গোলাপী অস্টুত ধ্বনি করে উঠলো—তুমি.....তুমি এসেছো।

হাঁ হাঁ গোলাপী, আমি এসেছি:.....কিন্তু কেন তুমি আত্মহত্যা করতে যাচ্ছিলে, বলো তো?

গোলাপী বনহরের বুকে মুখ গুঁজে বলে—শুধু তোমাকে না পেয়ে।

ছিঃ ছিঃ তুমি যা করতে যাচ্ছিলো তা বড় মন্দ কাজ গোলাপী.....

জানি, কিন্তু এ ছাড়া আমার কোনো উপায় ছিলো না। জানো তো আমার জীবন কত বিপন্ন। কিসের জন্য আমি বাঁচবো, কোন্ আশা নিয়ে আমি বাঁচবো বলো?

কিন্তু আত্মহত্যা করা যে মহাপাপ তা তো জানো?

জানি।

তবু তুমি.....

হাঁ, তোমাকে না পেলে আমি কিছুতেই বাঁচবো না। বলো কি করে তুমি বুঝতে পারলে, আর কেমন করেই বা তুমি এলে?

মালেক মিয়র সঙ্গে দেখা করতে গিয়েছিলাম, সেই বলেছে তোমার কথা। সে-ই তো দেখিয়ে দিলো নদীর পথ।

আশ্চর্য, মালেক ভাই তাহলে জানতো আমি নদীর দিকে এসেছি?

হয়তো জানতো, নাহলে সে কি করে বললো তুমি নদীর দিকে এসেছো।

কিন্তু এত রাতে তুমি কোথা থেকে এলে?

সে অনেক কথা...পরে বলবো, চলো তোমাকে পৌঁছে দিয়ে আসি।

আর তুমি?

চলে যাবো।

না, তা হয় না, তুমি আমাকে নিয়ে চলো।

কোথায়?

যেখানে তুমি থাকো।

তাকি সম্ভব গোলাপী?

কেন সম্ভব নয়?

জানো বাড়িতে আমার কে কে আছে, জানলে তুমি এ কথা বলতে না।

আমি তোমার কোনো কথা শুনতে চাই না। তবে কেন আমাকে মরতে

না?

বসো, শান্ত হও, আমি কয়েকটা কথা বলবো তোমাকে।

কিন্তু আমাকে তুমি ছেড়ে চলে যেতে পারবে না। তুমি একদিন বলেছিলে আমি যাকে চাইবো তাকেই তুমি এনে দেবে কিংবা আমাকে তুলে দেবে তার হাতে?

হাঁ, বলেছিলাম।

যদি তুমি সত্যি করে বলে থাকো, তবে শোনো আমি তোমাকে পাবো বলে বেঁচে আছি আর বেঁচে থাকবো।

গোলাপী শোনো আমি যা বলি.....

গোলাপী ওর নরম হাতখানা তুলে চাপা দেয় বনহরের মুখে—না না, কোনো কথা আমি শুনতে চাই না। আমার এ পৃথিবীতে কেউ নেই—কেউ নেই.....

বনহরের বলা হয় না কোনো কথা, সে নিশ্চুপ ভেবে চলে, এ মুহূর্তে গোলাপী, কোনো কথা না বলাই ভাল। হয়তো হিতে বিপরীত হবে। এখন সে সম্পূর্ণ উন্মাদিনীর মত হয়ে উঠেছে। প্রাণের উপর তার কোনো মায়া—মমতা, নেই। এখন সে যে কোনো সময় আত্মহত্যা করতে পারে। সব সময় তো ওকে পাহারা দিয়ে রাখা সম্ভব হবে না। ওকে রক্ষা করা তার কর্তব্য। আর রক্ষা করতে হলে চাই ধৈর্য। অসীম ধৈর্য সহকারে গোলাপীর সঙ্গে তাকে অভিনয় করে যেতে হবে, যতদিন না তার মন সংযত হয়।

মনকে স্থির করে নিলো বনহর। এখনও তার বুকে মুখ লুকিয়ে রেখেছে গোলাপী বিদ্যুত চমকাচ্ছে। সেই আলোতে দেখলো বনহর গোলাপীর অশ্রুসিক্ত মুখখানা, বললো—বেশ, তুমি যা চাও পাবে—চলো এবার.....

বনহর গোলাপীসহ পা বাড়ায় বাড়ির দিকে। বলে গোলাপী—আবার কখন কবে দেখা হবে তোমার সঙ্গে?

যখন তুমি মনে করবে আমার কথা।

সত্যি বলছো?

হাঁ।

কিন্তু.....

কোনো কিন্ত নেই, যখন আমাকে দেখতে ইচ্ছে করবে তখন তোমার মালেক ভাইকে বলো সে আমাকে জানাবে।

উঃ কি আনন্দ হচ্ছে আমার! সত্যি আমি তোমাকে পাবো?
বনহর নীরব।

আরও কিছুক্ষণ চলার পর বললো বনহর—এবার যাও।

আর তুমি?

আমিও ফিরে যাবো আমার গন্তব্যস্থানে। যাও গোলাপী—
গোলাপী কম্পিত পায়ে অন্তঃপুরের দিকে পা বাড়ায়।



মালেক, তুই যাবি আমার সঙ্গে?

কোথায়?

শহরে।

আমি চাকর আর আপনি মালিক, কেন যাবো না?

তবে তৈরি হয়ে নে।

কিন্তু আজ যদি আবার ডাকাত হামলা চালায়?

না চালাবে না।

আপনি জানেন মালিক? তবে সেদিন কেন জানলেন না ডাকাত
আসবে?

সে তুই বুঝবি না, যা গাড়ি বের কর্গে।

মালেক মিয়া চলে যায়।

গাড়ি বের করে নিয়ে গরুর গলায় দড়ি পরাচ্ছিলো, ঠিক ঐ সময়
গোলাপী এসে দাঁড়ায়, এদিক ওদিক তাকিয়ে দেখে নিয়ে বলে—মালেক
ভাই.....

কে গোলাপী? ফিরে তাকায় মালেক মিয়া। হাসিখুশিভরা একখানা
মুখ, আনন্দ উজ্জ্বল দু'টি চোখ। বলে সে—মালেক ভাই, তুমি শহরে
যাচ্ছে?

হাঁ। কথাটা বলে মালেক মিয়া সোজা হয়ে দাঁড়ায়, এ বাড়িতে আসার
পথ গোলাপীর এমন হাসিভরা মুখ মালেক মিয়া কোনোদিন দেখেনি। আজ

নতুন একরূপে দেখলো সে ওকে। বললো মালেক মিয়া—কিছু আনতে হবে নাকি তোমার জন্য?

ব্যথাকরুণ হয়ে উঠলো গোলাপীর মুখখানা, বললো সে—পয়সা কোথায় পাবো যে তোমাকে কিছু আনতে দেবো?

তা পয়সার জন্য ভাবতে হবে না, বলো কি দরকার তোমার?

চাপা গলায় বললো গোলাপী—এক শিশি আলতা আনবে আমার জন্য, পরে তোমাকে পয়সা দিয়ে দেবো।

তা হবে আর কি নেবে বলো?

আর কিছু না, শুধু এক শিশি আলতা।

বেশ আনবো।

গোলাপী চলে যায়, হাসে মালেক মিয়া—ম্নান—করুণ সে হাসি।

এমন সময় ইকরাম আলী এসে দাঁড়ায়—কি মালেক, হলো?

হাঁ, হয়েছে আমার।

গাড়িতে তোষক তুলেছি?

সব তুলেছি মালিক, এবার আপনি উঠুন।

ইকরাম আলী গাড়িতে উঠে বসলো।

মালেক মিয়া গাড়িতে গরু জুড়ে দিলো, তারপর সেও উঠে বসলো গাড়ির সম্মুখভাগে।

শহরের পথ ধরে এগিয়ে চললো গাড়িখানা। আজ মালেকের বুকটা অনেকখানি হাল্কা মনে হচ্ছে, কারণ গোলাপীর মুখে সে হাসি দেখতে পেয়েছে। আহা বেচারী গোলাপী কত অসহায়া, কিভু.....

হঠাৎ মালেকের চিন্তাজাল বিচ্ছিন্ন হয়ে গেলো, বললো ইকরাম আলী—মালেক, দেশে প্লাবন এসেছে জানিস?

জানি মালিক, প্লাবন শুধু নদী-নালা গ্রামে-গঞ্জে নয়, প্লাবন এসেছে সমস্ত দেশে। কিসের প্লাবন জানেন মালিক—অন্যায় অনাচার আর দুর্নীতির প্লাবন.....

পরবর্তী বই
জীবন্ত কঙ্কাল

ଜୀବନ୍ତ କଳ୍ପାଳ— ୪୨

সত্য ও ন্যায়ের প্রতীক
দস্যু বনহর



বনহরের ভারী বুটের শব্দে পাষাণ প্রাচীর যেন থর থর করে কেঁপে উঠলো। এগিয়ে চলেছে বনহর, তার দু'পাশে দু'জন অনুচর রহমান আর রাম সিং। তিন জনার দেহেই জমকালো পোশাক। জমকালো সুড়ঙ্গ পথ অতিক্রম করে এসে দাঁড়ালো বনহর স্বর্ণগুহার সম্মুখে।

সঙ্গে সঙ্গে স্বর্ণগুহার দরজা খুলে গেলো।

ভিতরে দৃষ্টি নিষ্ক্ষেপ করতেই দেখতে পেলো স্তূপাকার স্বর্ণের উপরে পড়ে আছে একটি কঙ্কাল। হয়তো বা কয়েক দিন পূর্বে তার মৃত্যু ঘটেছে।

বনহর বললো—নিয়ে যাও রিলিফ প্রধানের দেহটা, প্রকাশ্য রাজপথে রেখে এসো। ওর মুখের গহ্বরে কিছু স্বর্ণগুঁজে দিও তারপর লিখে রেখো একটি চিঠি।

রহমান বললো—চিঠিতে কি লিখা থাকবে সর্দার?

লিখো, স্বর্ণভক্ষণ আশায় আমি দুঃস্থ জনগণের মুখের গ্রাস ভক্ষণ করেছি তাই আমার স্বর্ণভক্ষণে মৃত্যু.....ইতি কান্দাই রিলিফ প্রধান! কথাটা শেষ করে অট্টহাসিতে ফেটে পড়লো বনহর তারপর হাসি থামিয়ে বললো, যারা জনগণের মুখের গ্রাস নিয়ে ছিনি মিনি খেলছে তাদের প্রতিটি ব্যক্তির এই অবস্থা হবে। মানুষের দৃষ্টির অন্তরালে হয়তো এরা বেঁচে যাবে কিন্তু খোদার বিচারে এদের পরিত্রাণ নাই! হাঁ, তারপর জম্বুর রত্নাগারে যে সব হর্তাকর্তা বিধাতাদের আশ্রয় দিয়েছিলো তাদের সংবাদ কি রহমান?

রহমান বললো—রামসিং জানে সব।

রামসিং?

সর্দার জম্বুর রত্নাগারে যাদের আটক করে রাখা হয়েছে তাদের কেউ এখনও জীবন হারায়নি, কারণ আপনার আদেশ অনুযায়ী তাদের প্রত্যেক কে প্রতিদিন এককাপ পানি আর একটি গুকনো রুটি দেওয়া হয়।

চমৎকার! তাদের জন্য এই চরম শাস্তি। ক্ষুধার জ্বালা কেমন তারা নিশ্চয়ই আঁচ করতে পারছেন এখন।

সর্দার তাদের দেখলে চির্মবার উপায় নাই। এক একটি জীবন্ত কঙ্কাল বনে গেছে। তারা একদিন পেট পুরে খেতে চায় কিন্তু আপনার আদেশ না পেলে আমরা.....

রামসিং-এর কথার মাঝখানে বলে উঠে বনহর—না, পেট পুরে আর ওরা কোনদিন খেতে পাবেনা। হাঃ হাঃ হাঃ কি চমৎকার ব্যবস্থা আমি তাদের জন্য করেছি। এবার তাঁরা বুঝতে পেরেছেন অসহায় মানুষের খাদ্য নিয়ে উদর পূরণের কি জ্বালা। রামসিং তোমরা কি দেখেছো পথে-ঘাটে অসহায় মানুষের সে কি করুণ অবস্থা?

রামসিং আর রহমান মাথা নিচু করে থাকে।

বনহর বলে চলে—পথের দু'ধারে উলঙ্গ অর্ধ উলঙ্গ কঙ্কাল আর কত মানুষ পড়ে পড়ে ধুকছে, ওরা মৃত্যুর সঙ্গে যুদ্ধ করছে। কেনো আজ এদের এ অবস্থা কেনো! এদের এ অবস্থার জন্য দায়ী কারা?

রহমান আর রামসিং-এর মুখের দিকে তাকায় বনহর। তারা নীরব, কোন জবাব দিতে পারে না। বনহর বলে—এইজন্য দায়ী এ দেশের মানুষ! যারা দেশটাকে পঙ্গু করে দিয়েছে আর দিচ্ছে। কিন্তু এরা কারা জানো—তোমরা? জবাব তোমরা দিতে পারলেও দিবেনা, কারণ কারা সেই নর শয়তান যাদের কথা তোমরাও জানো আমিও জানি, দেশের সবাই জানে কিন্তু বলতে কেউ সাহসী হয় না। আমি বহুবার বলেছি, এরা যারাই হোক না কেন রেহাই পাবে না। জনগণের হিসাবের খাতায় এদের নাম লিখা হয়ে গেছে, মুক্তি পাবে না। ক্ষমা নেই এদের জন্য। একটু থেমে বলে বনহর—হত্যা এদের করা হবে না। হত্যা করলে ওদের শাস্তি দেওয়া হলো না। মৃত্যু ওদের বাঁচিয়ে নেবে কাজেই এদের শাস্তি স্বর্ণভক্ষণ করানো.....স্বর্ণ এরা ভক্ষণ করবে, স্বর্ণকক্ষে এরা শয়ন করবে, স্বর্ণরথে এরা ভ্রমণ করবে। যারা দুর্বল অসহায় তাদের কে পিষে মারবে স্বর্ণরথের চাকার তলায়।

বলে উঠে রহমান—সর্দার দিন দিন এরা আরও ফেঁপে উঠছে। বিদেশ থেকে যে সব সাহায্য দ্রব্য আসছে তার কিঞ্চিৎ মাত্র এরা সামান্য দু'চার জনের মধ্যে বিলিয়ে দিচ্ছে আর সব এরা আত্মসাৎ করছে.....

জানি রহমান সব জানি। অচিরে বহু খাদ্যশস্য এসেছিলো যা নিয়ে এখন চলেছে ছিনিমিনি খেলা। রিলিফ মানে কি রহমান? ভিক্ষার এক নাম রিলিফ যে দেশের-মানুষ ভিক্ষার জিনিস নিয়ে আত্মসাৎ করে, সে দেশ কোনদিন টিকে থাকতে পারে না। এ দেশের ভবিষ্যৎ অন্ধকারাচ্ছন্ন হয়ে এসেছে। আর বেশিদিন নয়রহমান?

বলুন সর্দার?

সন্ধান লাভ এবং লিষ্ট করো, কারা জনগণের মুখের গ্রাস এখন আত্মসাৎ করছে। আমি হাজরা থেকে ফিরে এসে এদের চরম শাস্তির ব্যবস্থা করবো।

সর্দার আপনি আবার হাজরায় যাবেন?

হাঁ রামসিং, হাজরায় এখনও আমার কিছু কাজ বাকি আছে। একটু থেমে বলে—আমি আশ্চর্য হয়ে যাই এমন দেশও আছে যেখানে ভাই হয়ে ভাইয়ের মুখের আহার নিয়ে ছিনিমিনি খেলে। শুধু এক জায়গার নয়, সমস্ত দেশ জুড়ে আজ দুর্নীতি অনাচার চলেছে। এই দুর্নীতি আর অনাচার বন্ধ না হলে দেশে শান্তি ফিরে আসবে না।

কিন্তু এই দুর্নীতি আর অনাচার কি রোধ করা সম্ভব হবে সর্দার?

হয়তো হবে না, কারণ দেশে এখন এমনভাবে অনাচার চলেছে যে অনাচার বন্ধ করতে হলে দেশের শাসক-গোষ্ঠিকে আগে দমন করতে হবে.....যারা অনাচারের মূল স্তম্ভ।

সর্দার আমারও তাই মনে হয়। ধরুন যদি কোন সাধারণ লোক দুর্নীতি বা অনাচার করে তাদের সায়েস্তা করা অত্যন্ত সহজ হয়, কিন্তু যারা জ্ঞানী, বুদ্ধিমান, যারা দেশের রক্ষক তারা যদি ভক্ষক হয় তা হলে তাদের বিরুদ্ধে কেউ টু শব্দ করতে পারেনা, সায়েস্তা করা তো দূরের কথা।

হাঁ ঠিক বলেছো রহমান, দেশকে পঙ্গু করে দিচ্ছে ঐ শ্রেণীর লোক যাদের বিরুদ্ধে কেউ টু শব্দ উচ্চারণ করতে সাহসী নয়।

কিন্তু বিচার এদেরও হবে সেদিন বেশিদূরে নয়। যাও রহমান, তুমি কান্দাই আস্তানায় যাও। রামসিং তুমি ফিরে যাও জন্ম আস্তানায়। জন্মুর যারা হর্তা-কর্তা-বিধাতা, যাদের রত্নাগারে ঘনী করে রেখেছো তাদের দিকে লক্ষ্য রেখো যেন তারা মরে বেঁচে না যায়। আমি ফিরে এসে এদের ব্যবস্থা করবো।

আচ্ছা সর্দার। রামসিংহ বললো।

রহমান বললো—আপনি হাজরায় যাবার পূর্বে একবার বৌরাণীর সঙ্গে দেখা করে যাবেন। কারণ নূর-এর বিলাত যাবার দিন নিকটস্থ হয়ে এসেছে।
আম্বা তাই করবো।

রহমান ও রামসিং কুর্নিশ জানালো। বনহর বিদায় নিলো সেখান থেকে। এবার রহমান আর রামসিং স্বর্ণগুহার মধ্যে দৃষ্টি নিক্ষেপ করলো।

রিলিফ প্রধানের মৃত দেহটা পড়ে আছে স্বর্ণস্তূপ-এর উপরে। একটি কঙ্কাল। হঠাৎ দেখলে কেউ চিনতেই পারবে না এটা কার মৃতদেহ।

রহমান আর রামসিং যখন রিলিফ প্রধানের কঙ্কালসার মৃত দেহটা নিয়ে ভাবছে তখন বনহর তার বিশ্রামাগারে এসে পৌছে গেছে।

শয্যায় অর্ধশায়িত অবস্থায় দেহটা এলিয়ে দিতেই দরজার পর্দা ঠেলে কক্ষে প্রবেশ করলো দিপালী।

বনহর মুখ তুলে বললো—তুমি!

হাঁ আমি এলাম। রাজকুমার এতোদিন তুমি কোথায় ছিলে বলো? কেনো আসনি?

কাজ নিয়ে বাহিরে ছিলাম।

সত্যি আমি বড় হাঁপিয়ে পড়েছিলাম। রাজকুমার কতদিন তোমাকে দেখিনি.....দিপালী বনহরের পাশে ঘনিষ্ঠ হয়ে বসে।

বনহর একটা সিগারেট বের করে তাতে অগ্নিসংযোগ করে।

দিপালী বলে—আমি যে দিন দিন হাঁপিয়ে উঠেছি—রাজকুমার?

কি চাও বলো?

যা চাহিবো তা কোনোদিন পাবো না জানি। তবু তো আমাকে বাঁচতে হবে। আমাকে কাজ দাও? আমি কাজের মধ্যে হারিয়ে যেতে চাই।

কাজ!

হাঁ কাজ করতে চাই আমি।

একদিন বলেছিলাম তোমাকে আমাদের প্রয়োজন।

হাঁ, বলেছিলে।

কিন্তু কোন প্রয়োজনে তোমাকে কাজে লাগাইনি। শোন দিপালী—আমি তোমাকে আমার কান্দাই জঙ্গলের আস্তানায় নিয়ে যাবো—আমার আস্তানায় বহু কাজ আছে যা তুমি ভাল মনে করো তাই তুমি করতে পারবে।

সবচেয়ে বেশি খুশি হবো তোমায় সহায়তা করতে পারলে, আমি সব সময় তোমার পাশে থাকতে চাই রাজকুমার।

দিপালী ।

হাঁ রাজকুমার, তুমি তো জানো এ দেশে আমার কেউ আপনজন নাই.....

থাকলে তো আমি বেঁচে যেতাম দিপালী । তোমাকে তোমার আত্মীয়-স্বজনের কাছে পৌঁছে দিয়ে নিষ্কৃতি পেতাম কিন্তু তা হলো না ।

জড়িয়ে পড়েছি তোমার পায়ে শিকলের মত তাই না?

আচ্ছা দিপালী?

বলো?

মোহসিনকে তোমার কেমন লাগে?

হঠাৎ আজ এ প্রশ্ন কেনো?

তুমি হয়তো জানো না, মোহসিন তোমাকে ভালবাসে । সে সুন্দর সু-পুরুষ, তার মধ্যে মহত্বের কোন অভাব নেই -----

যা বলতে চাইছো তা আমি বেশ বুঝতে পেরেছি । কিন্তু তা হয় না । তোমাকে পাবো না জানি তবু আমি আমার সমস্ত মন-প্রাণ যে তোমার চরণে উৎসর্গ করেছি রাজকুমার ।

দিপালী তুমি অন্যান্য মেয়েদের মত অবুঝ নও তাই ...

কিন্তু আমি যে পারি না রাজকুমার তোমাকে ভুলতে । জানো তোমাকে না দেখলে আমার কত কষ্ট হয় । বুক ভেসে যায় আমার অশ্রুজলে, কত আশা নিয়ে আমি পথ চেয়ে থাকি তোমার দিপালী বনহরের একখানা হাত মুঠায় চেপে ধরে । তার গণ্ড বেয়ে গড়িয়ে পড়ে ফোঁটা ফোঁটা অশ্রু ।

বনহর কিছুক্ষণ স্তব্ধ হয়ে বসে থাকে, তার আঙুলের ফাঁকে সিগারেটটা থেকে অনর্গল ধূম নির্গত হয়ে ধীরে ধীরে নিঃশেষ হয়ে যাচ্ছে । তখন তার মন চলে গেছে দূরে অনেক দূরে সেই হিম্মৎ খাঁর জীবন কাহিনীর একটি খণ্ডে । একটি বলিষ্ঠ চেহারার লোক এগিয়ে গেলো, সে পথ থেকে তুলে নিলো কোলে একটি ছোট্ট মেয়েকে তারপর চোরের মত এদিক-সেদিক তাকিয়ে দেখতে দেখতে পালিয়ে গেলো---- বনহর দাঁতে দাঁত পিষে বললো— হিম্মৎ খাঁ? দিপালী তোমার জীবনের জন্য দায়ী সেই-নরপশু হিম্মৎ খাঁ । ওর মৃত্যু হয়েছে কিন্তু ও রেহাই পাবে না । তোমার জীবনের জন্য সে পরকালেও রেহাই পাবে না । ফুলের মত নিষ্পাপ একটি মেয়ে, তোমাকে সে নিয়ে এসেছিলো তার ব্যবসায় সামগ্রি হিসাবে ব্যবহার করতে ।শয়তানটাকে হত্যা করে আমি ভুল করেছি— না হলে আমি এখন ওর শরীরের চামড়া খুলে লবণ মাখিয়ে তিল তিল করে মারতাম ।



আমি, আমি দেখে কে এসেছেন! নূর ব্যস্তভাবে মনিরার ঘরে প্রবেশ করে?

ফিরে তাকায় মনিরা, সঙ্গে সঙ্গে তার দু'চোখে আনন্দ উপছে পড়ে, অস্ফুট কণ্ঠে বলে, এসেছো?

হাঁ মনিরা এলাম। বনহর বিছানার পাশে বসে পড়ে।

নূর দাদীকে ডাকতে বেরিয়ে যায়।

বনহর মনিরার পাশে গিয়ে দাঁড়ায়—আজ রাগ করোনি তো?

না গো, না।

ভয় হয়।

কেনো?

যদি মুখ গোমরা করে বসে থাকো তাই? বনহর অতি লঘু হস্তে মনিরার মুখখানা তুলে ধরে—মনিরা বেশিক্ষণের জন্য আসিনি, এখুনি আমাকে যেতে হবে।

জানি বেশিক্ষণ ধরে রাখতে পারবোনা তোমাকে। তবু ছাড়ছি না সহজে কারণ অনেক কথা আছে তোমার সঙ্গে।

বনহর স্ত্রীর দেহের উপর কিছুটা হেলান দিয়ে বসে বলে, বেশ বলো?

এখন না আগে কিছু মুখে দাও।

তোমার স্পর্শই আমার পক্ষে যথেষ্ট মনিরা। পরশমণির পরশে লোহা যেমন সোনা হয়—তেমনি তোমার পবিত্র পরশে আমার জীবন ধন্য হয়.....

চুপ করো। সত্যি এতোদিন আসোনি বড় একা একা লাগে আজকাল। নূর চলে যাবে কথাটা ভাবতেই যেন একেবারে মুষড়ে পড়ি।

মনিরা কোন চিন্তা করোনা, নূর তো বেশ বড় হয়েছে—কত ছেলে মেয়ে অতি শিশুকালা থেকেই বিদেশে শিক্ষালাভ করে আসছে আর নূর তো এখন সব বুঝতে শিখেছে!

তুমি ওর বিদায় দিনে আসবে না?

হয়তো আসবো কিন্তু তুমি বলো আসাটা কি ঠিক হবে, কারণ জানো সেখানে অনেকেই থাকবেন যারা তোমার স্বামীর সন্ধানে সদা নিয়োজিত রয়েছেন।

তা'হলে?

আসবো দূর থেকে আমি ওকে দেখবো, আশীর্বাদ জানাবো। মনিরা তুমি এখন ওর পাশে থেকো, বলো আমি কোন কাজে আসতে পারিনি।

মনিরার চোখ দুটো ছল ছল করে উঠলো এমন সময় মরিয়ম বেগম সহ নূর প্রবেশ করলো সেই কক্ষে।

বনহর দ্রুত মায়ের পাশে এসে মায়ের ডান হাত খানা তুলে নিয়ে চুশন করে বললো—কেমন আছো মা?

ভালই আছি বাপ, তুই কেমন ছিলি?

দেখতেই পাচ্ছে।

শরীরটা কেমন রোগা হয়ে গেছে তোর।

ও তোমার চোখে অমন লাগবেই। দেখলে নূর, কত মোটা মোটা হয়ে গেছি তবু তোমার দাদীমার কথা শোন।

নূর বলে উঠে—আবু, তুমি কিন্তু আগের চেয়ে বেশ রোগা হয়ে গেছো।

হেসে বলে বনহর—মনিরা দেখো নূরও মার সঙ্গে যোগ দিয়ে আমাকে রোগা করে ফেলেছে.....আদর করে নূরকে টেনে নেয় বনহর কোলের কাছে।

নূর এখন পূর্বের সেই ছোটটি নেই তাই সে পিতার কোলের কাছে গিয়ে লজ্জায় মাথা নিচু করে ফেলে।

মরিয়ম বেগম বলে উঠেন—এতোদিন কোথায় ছিলি মনির?

জানো তো মা, আমার কত কাজ, কখন কোথায় থাকতে হয় সঠিক বলতে পারছি না, তোমাকে। মা, দেশ আজ অনাচারে অবিচারে ভরে গেছে। এতোটুকু শান্তির জন্য মানুষ আজ উন্মাদ। পথে-ঘাটে দুঃখী মানুষের মৃতদেহের স্তূপ.....

মুহূর্তে বনহরের আসলরূপ পাল্টে যায়, দু'চোখে আগুন ঠিকরে বের হয়। বলে বনহর—এক শ্রেণীর মানুষ আজ আমাদের সমস্ত দেশটাকে গোরস্তানে পরিণত করেছে।

বললেন মরিয়ম বেগম—এরা কারা বাবা?

তুমি জানো না মা এরা আমাদেরই দেশে মানুষ নামধারী জানোয়ার। একটু থেমে বলে সে—এরাই দেশের অধিনায়ক কারণ এদের হাতেই রয়েছে আমাদের দেশের দুঃখী মানুষের ভবিষ্যৎ.....

সে তো খোদার হাতে?

আগে ছিলো, এখন এরাই মানুষের ভাগ্যনীয়ন্তা। জানো মা, এই নর পশুরা আজকাল কি করছে? দেশের সম্পদ খাদ্যশস্য তো বিদেশে পাচার করছেই এ ছাড়া এক নতুন কাজে নিয়োজিত হয়েছে এরা।

কি কাজ বাবা?

ষড়যন্ত্র। বিদেশীদের ষড়যন্ত্রের চাবিকাঠি হয়েছেন এই সব ভাগ্যনীয়ন্তাগণ। যারা মুখে বড় বড় বুলি আওড়ায় আর তলে তলে সর্বনাশ করে চলেছে। আমাদের দেশকে পঙ্গু করে দেবার জন্য, দেশের মানুষকে নিঃশেষ করে দেবার জন্য, বিদেশী বন্ধুদের চক্রান্তে সহযোগীতা করে চলেছেন আমাদের দেশের কিছু সংখ্যক হর্তা-কর্তা পশুর দল। এইসব নরাধমদের দ্বারা তারা দেশের সম্পদ তো উদ্ধার করে নিচ্ছেনই—এ ছাড়া নতুন এক কাজে নিয়োজিত হচ্ছেন বিদেশী বন্ধুগণ। সে কাজ কি জানো মা? আমাদের দেশের কল-কারখানা, যার দ্বারা দেশ বাঁচতে পারে সেই কল-কারখানায় কৌশলে বিস্ফোরণ ঘটিয়ে অকেজো করে দিচ্ছে। ফলে দেশ সম্পূর্ণ পঙ্গু হয়ে যাচ্ছে। যারা কল কারখানায় কাজ করতো তারা কিছু সংখ্যক মরছে বিস্ফোরণে, আর যারা বেঁচে থাকছেন তারা বেকার হয়ে খাদ্যাভাবে তিলে তিলে মৃত্যুবরণ করছেন—কারণ তারা না পারছে শিক্ষা করতে, না পারছেন চুরি ডাকাতি করতে। তবে হেঁ অনেক এ সবে বাধ্য হচ্ছেন পেটের ক্ষুধায় শিক্ষা করতে। অভ্যস্ত না হয়েও শিক্ষা করছেন—চুরি ডাকাতি করতে না জানলেও করতে চেষ্টা করছেন। বিদেশী বন্ধুদের সূতীক্ষ্ণ বুদ্ধির কাছে আমাদের দেশের মানুষ খেলনা বনে গেছে। বুঝতে পারছে না বিদেশীদের চক্রান্তে নিজের পায়ে নিজেরা কুড়াল মারছেন.....এ্যা, কি সব যা-তা বলছি, আমাকে ক্ষমা করো মা?

না বাবা, তুই মিথ্যা বলিস নি। জানিস মনির, সেদিন আমি বাহিরে গিয়েছিলাম, দেশের মানুষের যে অবস্থা দেখলাম তাতে আমি কিছুতেই চোখের পানি রোধ করতে পারলাম না.....বাপ্পরুদ্ধ হয়ে এলো মরিয়ম

বেগমের গলা। তিনি চোখ মুছে বললেন—পথের ধারে কঙ্কালসার মানুষগুলো কেউ উলঙ্গ কেউ অর্ধ উলঙ্গ পড়ে আছে। ওদের চাহিবার কোন ক্ষমতা নাই—ক্ষুধার জ্বালায় গলা ওদের গুঁকিয়ে গেছে.....

মা—মাগো, তুমি ক'জনাকে দেখেছো—আজ এই দেশের বুকে লাখো লাখো মানুষের এই অবস্থা। দেশ আজ চরম এক মুহূর্তে এসে পৌঁছেছে। সব বিদেশী চক্রান্তের শিকারে পরিণত হয়েছে। আমাদের দেশের মানুষকে ধ্বংস করাই হলো তাদের একমাত্র উদ্দেশ্য।

কিন্তু দেশের যারা হর্তা-কর্তা তারা কি এ সবার কিছু বোঝে না?

স্বার্থ-স্বার্থ তাঁদের অঙ্গবধির স্ববির করে দিয়েছে। তারা ঠিকই বোঝেন কিন্তু বুঝেই না বোঝার চেষ্টা করেন কারণ স্বার্থ রয়েছে এর পিছনে।

এবার বললো মনিরা—আশ্চর্য, শিক্ষিত জ্ঞানবান মানুষ হয়েও তারা নিজের দেশের সর্বনাশ করছেন কেমন করে!

সব কথার এক কথা স্বার্থ। দেশ চলে যায়, দেশের মানুষ সবাই মরে যাক শুধু বেঁচে থাকবে তাঁরা কিছু সংখ্যক পরিবার।

এ সব তুই কি বলছিস মনির?

হাঁ মা, সত্যি কথা শুনতে বড় নির্মম লাগে। শোন একটা ঘটনা তোমাদের বলছি—কিছুদিন আগে হয়তো শুনে থাকবে দেশের বিভিন্ন জায়গায় সর্ববৃহৎ জুটমিলগুলো একটির পর একটি অগ্নিকাণ্ডে বিধ্বস্ত হতে লাগলো। জানো এই সব মিল কারখানা ধ্বংস অভিযান চলেছে?

তাই তো বাবা আমি লক্ষ্য করেছি সংবাদপত্রের পাতা খুলতেই শুধু নজরে পড়ে অমুক জায়গায় জুটমিলে ভয়ঙ্কর অগ্নিকাণ্ডে কোটি কোটি টাকার পাট ভস্মীভূত.....

শুধু জুট মিল নয় মা, আমাদের দেশের বড় বড় কল-কারখানাতে প্রায়ই অগ্নিকাণ্ড আর বিস্ফোরণ লেগেই আছে। একটু থামলো বনহর তারপর বললো—কলকারখানাই হলো দেশের সম্পদ। জানো মা সব চক্রান্ত আর ষড়যন্ত্র, আমাদের দেশকে পঙ্গু করে দেবার বিরাট ষড়যন্ত্র চলেছে। যাতে এ দেশ সম্পূর্ণ অকেজো হয়ে পড়ে আর দেশের সব মানুষ যাতে নিঃশেষ হয়ে যায় এ ষড়যন্ত্রের মূল উদ্দেশ্য হলো তাই।

বিস্ময়ভরা কণ্ঠে বললো মরিয়ম বেগম—এ সব তুই কি বলছিস বাবা?

সব সত্য মা, সব সত্য। বিদেশী ষড়যন্ত্রের শিকারে পরিণত হয়েছে আজ আমাদের এ দেশ। দেখছোনা মা ক্ষেত-খামারে-কত শস্য উৎপন্ন হচ্ছে তবু দেশে কেমন হাহাকার? আগের চেয়ে চাষী ভাইরা বর্তমানে অনেক বেশি পরিশ্রম করে খাদ্য শস্য উৎপন্ন করে চলেছে, তবু চারিদিকে হাহাকার। দারুণ এক সমস্যার সম্মুখে দেশবাসী আজ মরিয়া হয়ে ভাবছে—পেটে অনু নাই, পরনে বস্ত্র নাই। পথে ঘাটে আজ জীবন্ত কঙ্কালের মিছিল.....হঠাৎ অট্ট হাসিতে ফেটে পড়ে বনহর তারপর হাসি থামিয়ে দাঁতে দাঁত পিষে বলে—এর জন্য দায়ী কারা, জানো মা?

তা আমি কেমন করে বলবো মনির?

ঠিক, তুমি কেমন করে বলবে—এ দেশে বাস করে তুমি যেমন জানো না তেমনি জানে না এ দেশের অনেকেই। দেশকে সর্বনাশের মুখে ঠেলে দিচ্ছে আমাদেরই দেশের মানুষ। নিজেদের স্বার্থসিদ্ধি করতে গিয়ে নিজের পায়ে তারা কুঠারাঘাত করছে। একটি কাহিনী শোন মা—কিছুদিন পূর্বে আমাদের দেশের একটি কারখানা বিধ্বস্ত হয়। কারখানাটি ছিলো আমাদের দেশের মস্ত বড় একটি সম্পদ। এই কারখানা বিধ্বস্ত করবার জন্য বিদেশী চক্রান্ত চলে। তারা আমাদেরই দেশের মানুষের সহায়তায় এই কারখানায় বিক্ষোভ ঘটায়। জানো মা, এই কারখানা বিনষ্ট হওয়ায় আমাদের দেশ কতখানি ক্ষতিগ্রস্ত হয়েছে।

মরিয়ম বেগম অবাক কণ্ঠে বললেন—আমি বুঝতে পারিনা, এতে বিদেশীদের কি স্বার্থ আর বিদেশী চক্রদের সহায়তা করে আমাদের দেশের মানুষেরই বা কি লাভ?

বিদেশীদের স্বার্থ একটি জাতিকে ধ্বংস করে দেওয়া। আর আমাদের দেশের মানুষ যারা এই বিদেশী চক্রান্তে দেশ ও দেশবাসীর সর্বনাশ করে চলেছে তারা হচ্ছে স্বার্থান্বেষী দল শুধু স্বার্থান্বেষী নয় তারা দেশের শত্রু। মা যতদিন দেশ থেকে শত্রুনিপাত না হবে ততদিন দেশে শান্তি আসবে না। বনহর একটু থেমে বললো—দিনের পর দিন দেশ অধঃপতনের দিকে এগিয়ে যাচ্ছে।

মরিয়ম বেগম বলে উঠেন—শোনা যায় এবার দেশে প্রচুর শস্যউৎপন্ন হয়েছে। দেশের জনসাধারণ বহু ফসল পাবে। বাবা মনির আমার মনে হয় এবার দেশে শান্তি ফিরে আসবে।

মা, তুমি কেনো বোঝনা—কোন পাতিলের তলায় যদি ফুটো থাকে তা হলে পাতিলে যত পানিই ভরেনা কেনো পাতিল কোনদিন ভরবে না। তেমনি আমাদের দেশের অবস্থা—ঠিক ফুটো পাতিলের মত। খাদ্য-শস্য দেশে যা জন্মে তাতে কোনদিনই দেশের মানুষ না খেয়ে জীবন্ত কঙ্কাল হতেনা, তা ছাড়া বিভিন্ন দেশ থেকে আসছে কোটি কোটি মণ খাদ্য-শস্য আর বিভিন্ন সাহায্য দ্রব্য? এতো পেয়েও কেনো, কেনো আজ দেশের অসহায় মানুষের এ অবস্থা.....জানো—জানো মা ঐ নর পশুর দল.....

মনিরা এবার কথা বলে—চুপ করো—চুপ করো তুমি। দেশে যা ঘটছে তা কারো অজানা নেই। আড়চোখে সে নূরকে দেখিয়ে দেয়।

বনহর বুঝতে পারে নূরের উপস্থিতিতে হঠাৎ সে যদি তার গোপন কথা ফাঁস করে ফেলে, তাহলে যদি তার আসল রূপ প্রকাশ পায়, তাই মনিরা তাকে সাবধান করে দিলো।

নূর এতোক্ষণ স্তব্ধ হয়ে শুনেছিলো পিতার কথাগুলো, পূর্বের মত সে এখন ছোট নেই, কাজেই দেশ ও দেশবাসীদের দুঃখ-ব্যথা-বেদনা সে হৃদয় দিয়ে অনুভব করতে পারে। জন্মাবার পর থেকেই নূর পিতাকে সব সময় কাছে পায়নি, পায়নি পিতার স্নেহ ভালবাসা। অন্তর জুড়ে তাই একটা অভাব সব সময় তার মনকে কাতর করে রেখেছিলো। পিতাকে পাশে পেলে সবচেয়ে বেশি আনন্দ পেতো সে। পিতার কথাগুলো তার হৃদয়ে স্পর্শ করতো।

নূর বলে উঠলো—আবু যারা দেশের শত্রু দেশবাসী কেন তাদের ক্ষমা করে, কেনো তাদের উপযুক্ত সাজা দেয় না?

দেশের অবস্থা এখন চরমে, ক্ষমার দিনও শেষ হয়ে এসেছে। ঘুমন্ত জনগণ জেগে উঠেছে—আর বেশিদিন নয় যারা দেশ ও দেশের শত্রু তাদের নিস্তার নেই.....কথাগুলো বলে বনহর থামলো।

এমন সময় সরকার সাহেব প্রবেশ করলেন সেই কক্ষে।

মরিয়ম বেগম আঁচলটা ভালভাবে টেনে দিলেন মাথায়।

বনহর দাঁড়িয়ে সসম্মানে বললো—বসুন সরকার চাচা।

সরকার সাহেব আসন গ্রহণ করলেন।

মনিরা বললো—সরকার চাচা নূরের বিদেশ যাওয়ার ব্যাপারে আজ সব কথা শেষ করে নিন। ওর বিদেশ যাওয়ার তারিখ নিকটে ঘনিয়ে এসেছে।

সরকার সাহেব বললেন—হাঁ আমি সেই কারণেই এলাম। মনির তুমি এসেছো ভালই হলো, এদিকে নূরের বিদেশ যাত্রার সবকিছু ঠিক হয়ে গেছে।

আমিও ঐ ব্যাপারে আলাপ করতেই এসেছি সরকার চাচা। বনহর হাস্যোজ্জ্বল দীপ্ত মুখে কথাটা বললো।

এরপর চললো নানা রকম কথা বার্তা।

মরিয়ম বেগম, মনিরা, সরকার সাহেব আর বনহর মিলে নূরের বিদেশ যাওয়া নিয়ে কথা বার্তা চললো।

বিশেষ করে মরিয়ম বেগমের চিন্তা নূরকে বিদেশ পাঠিয়ে তিনি কি করে কাটাবেন। এতো বড় বিরাট বাড়ি নূরের অভাবে খাঁ খাঁ করবে। তা ছাড়া নূরের তেমন কোন বয়স হয়নি বিদেশ গিয়ে কোন বিভ্রাট ঘটিয়ে বসবে কিনা তাই বা কে জানে।

মায়ের কথা শুনে হাসলো বনহর, বললো—মা তুমি মিছামিছি ভাবছো। নূরের চেয়ে কম বয়সেও বহু ছেলে বিদেশে শিক্ষা লাভ করেছে। তুমি ওর জন্য কিছু ভেবেনা।

বিদেশ যাওয়ার ব্যাপারে নূরে আগ্রহ কমছিলো না। সে নিজেও মা এবং দাদীমাকে বোঝাতে লাগলো। বললো নূর—তোমরা আমাকে পূর্বের সেই ছোটটি মনে করেছো। দেখো বিদেশ গিয়ে ওদিকের সব সংবাদ তোমাদের লিখে জানাবো।

সরকার সাহেব যোগ দিলেন নূরের কথায়—দাদু ঠিক বলেছে, এখন সে আগের সেই নূর নেই এখন সে নূরজ্জামান চৌধুরী বনে গেছে। কেমন দাদু সত্যি কিনা?

হাসলো সবাই।

নূরও হাসিতে যোগ দিলো।



কান্দাই এরোড্রামের অদূরে উঁচু টিলাটির নিচে এসে থামলো একটি মোটর গাড়ি। গাড়ি থামিয়ে নেমে এলো গাড়ির চালক, হাতে তার একটি ছোট দূরবীক্ষণ যন্ত্র। চালকটির দেহে সাহেবী পোশাক, মাথায় ক্যাপ। সে টিলার দিকে এগুতে লাগলো।

টিলার আশে পাশে অনেকগুলো পাইন আর ঝাম গাছ নীরব প্রহরীর মত মাথা উঁচু করে স্থির হয়ে দাঁড়িয়ে আছে। টিলার উপরেও রয়েছে বেশ কিছু সংখ্যক ঝাম গাছ।

চালক টিলার গা বেয়ে উঠে চললো উপরের দিকে। ঝাম গাছের গুড়ির আড়ালে গা ঢাকা দিয়ে টিলার উপরে এসে দাঁড়ালো। হাতের দূরবীক্ষণ যন্ত্র চোখে লাগিয়ে তাকালো চালকটি সম্মুখস্থ এরোড্রামের প্লেট ফরমে থেমে থাকা বিমানখানার দিকে।

যাত্রীগণ তখন বিমানের সিঁড়ি বেয়ে উপরে উঠে যাচ্ছিলো।

সিঁড়ির মুখে এসে দাঁড়ালো নূর হাত নাড়ছে সে সবাইকে লক্ষ্য করে। ও পাশে রেলিং-এর ধারে দাঁড়িয়ে আছেন মরিয়ম বেগম, মনিরা আর সরকার সাহেব।

মরিয়ম বেগম আঁচলে চোখ মুছছেন বার বার।

মনিরার চোখ দুটো ঝাপসা হয়ে আসছে কিন্তু সে নিজকে অতি কষ্টে সংযত করে রেখেছে।

সরকার সাহেব হাত নাড়ছেন, তাঁর চোখ দিয়েও পানি ঝরছিলো। মুখে হাসি ফুটিয়ে রাখার চেষ্টা করছেন তিনি। শিশুকাল থেকে নূরকে তিনি অত্যন্ত স্নেহ করেন, আর না করেই বা কি উপায় ছিলো তাঁর। এ বাড়ির সঙ্গে সরকার সাহেব যখন জড়িয়ে আছেন ঘনিষ্ঠভাবে। নিজ নাতির চেয়ে তিনি কোন অংশে কম মনে করেন না নূরকে। আজ সেই নূরকে বিদেশে পাঠাতে গিয়ে মন তার ব্যথা কাতর হবে তাতে কোন ভুল নেই।

নূর যখন হাত নাড়ছিলো তখন দূরে উঁচু টিলার উপরে দূরবীক্ষণ যন্ত্র চোখে লাগিয়ে দাঁড়িয়েছিলো বনহর। এক সপ্তাহ পূর্বে চৌধুরী বাড়ি থেকে বিদায় নিয়ে এসেছিলো বনহর, তখন নূর বলেছিলো আব্বু, তুমি ঐদিন আসবে না, যেদিন আমি বিদেশে যাত্রা করবো?

নূরের কথায় মনটা ব্যথায় জর্জরিত হয়ে উঠেছিলো বনহরের। নূর জানে না তার আব্বু এরোড্রামে তাকে বিদায় জানাতে গেলে তাকে কান্দাই পুলিশ মহল ছেড়ে দেবে না। নূরের বিদেশ যাত্রার সংবাদে কান্দাই পুলিশ মহলে সাড়া পড়ে গিয়েছিলো। গোপন সূত্রে তারা এ সংবাদ সংগ্রহ করেছিলো এবং প্রতুতি নিয়ে প্রতিক্ষা করছিলো। নিশ্চয়ই বনহর আসবে সন্তানের বিদায়

জানাতে তখন তাকে গ্রেপ্তার করার সুযোগ কিছুতেই অবহেলা করবে না পুলিশ মহল।

বনহরের ছবি সহ কয়েকজন গোয়েন্দা পুলিশ অফিসার কান্দাই এরোড্রামে ছদ্মবেশে অপেক্ষা করছিলো।

নূরকে যখন বিদায় দেবার জন্য তার দাদী, মা এবং সরকার সাহেব এগিয়ে এসেছিলেন তখন ছদ্মবেশী পুলিশ মহল চারিদিকে সতর্কতার সঙ্গে টহল দিচ্ছিলো। তারা সবাইকে তন্ন তন্ন করে লক্ষ্য করছিলো, কারণ তারা জানে বনহরকে সহজে চিনবার উপায় নেই কারো। এমন কি পুলিশ প্রধান মিঃ জাফরীও এসেছেন। তিনি এরোড্রামের অফিস রুমের উপরে একটি কক্ষে বসে লক্ষ্য করছিলেন নিচের দিকে।

যাত্রীরা সবাই সারিবদ্ধভাবে বিমানের দিকে এগিয়ে যাচ্ছে। মিঃ জাফরী একে একে সবাইকে তীক্ষ্ণ দৃষ্টি নিয়ে দেখছিলেন। দীর্ঘকাল ধরে তিনি বনহরকে গ্রেপ্তারের জন্য সাধনা করে চলেছেন। পুরস্কারের লোভে বা আশায় নয় তাঁর প্রতিজ্ঞা তিনি বনহরকে নিজ হস্তে গ্রেপ্তার করবেনই করবেন কারণ বনহর তাকে বেশ কয়েকবার নাকানি-চুবানি খাইয়ে ছেড়েছে। জীবনে তিনি বহু দুর্ধর্ষ ডাকাত এবং খুনিকে গ্রেপ্তার করেছেন কিন্তু বনহরের মত দস্যু তিনি কোনদিন দেখেননি। সে তাঁর মত অভিজ্ঞ পুলিশ অধিনায়ককে পরাজিত করেছে।

কান্দাই পুলিশ মহল গোপন সুত্রে জানতে পারে যে চৌধুরী বাড়ির ছেলে নুরজ্জামান চৌধুরী ওরফে নূর বিদেশ যাত্রা করছেন এবং তাকে বিদায় জানাতে তার আত্মীয়-স্বজন সবাই এরোড্রামে আগমন করবেন। এমন কি বনহরও আসবে পুত্রকে বিদায় জানাতে কাজেই পুলিশ মহল সজাগ হয়ে উঠেছেন। পুলিশ মহল ছাড়াও গোয়েন্দা বিভাগও এরোড্রামের আশে-পাশে গোপনে সজাগভাবে পাহারা দিয়ে চললো।

নূর সহ বিমানখানা রানওয়ে চক্র দিয়ে আকাশে উড়ে উঠলো।

সরকার সাহেব রুমালে চোখ মুছলেন।

মরিয়ম বেগম আর মনিরা তখনও তাকিয়ে আছেন বিমানখানার দিকে। মরিয়ম বেগম আঁচলে চোখ মুখে ফিরে তাকালেন মনিরার দিকে।

মনিরার গণ্ড বেয়ে গড়িয়ে পড়ছে অশ্রুধারা।

বিমানখানা দৃষ্টির আড়ালে চলে যায়। সবাই বেরিয়ে আসে এরোড্রাম থেকে।

ওদিকে অদূরে পাইন আর ঝাম ঝাড়ের আড়ালে দাঁড়িয়ে বনহর হাতের পিঠে চোখের পানি মুছে ফেললো। ক্ষুদ্রে দূরবীক্ষণ যন্ত্রটা নামিয়ে রাখলো সে পকেটে। যত পাষাণ প্রাণই হোক না কেনো পুত্রের জন্য বুকটা তার ব্যথায় খান খান হয়ে যাচ্ছিলো। পিতা হয়ে আজ বিদায় মুহূর্তে সে সন্তানের পাশে গিয়ে দাঁড়াতে পারলো না—এ তার কম দুঃখ নয়।

ফিরে আসে বনহর গাড়ির পাশে।



গাড়িখানা এসে থামলো কান্দাই জঙ্গলের পাশে। জঙ্গলের ভিতর তখনও জমাট অন্ধকার বিরাজ করছে যদিও সূর্যের আলোয় আলোকিত হয়ে উঠেছে চারিদিকে। বনহর গাড়ি থেকে নেমে দাঁড়িয়ে শিস দিলো।

সঙ্গে সঙ্গে জঙ্গলের ভিতর থেকে বেরিয়ে এলো তাজ। বনহর তাজের পাশে এসে দাঁড়িয়ে ওর পিঠ চাপড় দিয়ে উঠে বসলো।

তাজ এবার ছুটে গুরু করলো। প্রভুকে পিঠে পেয়ে আনন্দ তার যেন ধরছে না। পশু হলেও তাজ এতো বেশি প্রভুভক্ত যে তার মত অশ্ব সহসা কোথাও দেখা যায় না।

উল্কা বেগে ছুটে চললো তাজ।

নূরী জাভেদকে তীর ছোরা শিক্ষা দিচ্ছিলো, সে শুনতে পায় তাজের পদশব্দ। আনন্দে দীপ্ত হয়ে উঠে নূরীর চোখ দুটো। সে জাভেদকে বুকে টেনে নিয়ে বলে—জাভেদ কে আসছে বলো তো বাপ?

জাভেদ তীর ধনু হাতের মুঠায় চেপে ধরে বলে উঠে—বাপু, আমার বাপু আসছে.....আম্মু আমি যাই দেখে আসি.....

না না, তুমি এখানেই দাঁড়িয়ে থাকো এফুগি তোমার বাপু এসে পড়বে।

জাভেদের চোখে মুখে আনন্দ উপছে পড়তে লাগলো। সে তীর-ধনু হাতে দাঁড়িয়ে রইলো পিতার প্রতিক্ষায়। অল্পক্ষণেই এসে পৌছলো তাজ।

বনহর তাজের পিঠ থেকে নেমে দাঁড়াতেই দু'জন অনুচর তাজকে অশ্বশালার দিকে নিয়ে গেলো।

বনহর তাকালো নূরী আর জাভেদের দিকে।

জাভেদের হাতে তীর ধনু দেখে গম্ভীর হয়ে উঠলো বনহরের মুখমণ্ডল।

নূরী বুঝতে পারলো জাভেদের হাতে তীর ধনু দেখে বনহর ক্ষুব্ধ হয়েছে।

জাভেদ ছুটে গেলো পিতার পাশে জড়িয়ে ধরলো সে বনহরের একখানা হাত—বাপু! আমার বাপু.....

বনহর ওকে আদর না করেই ওর হাতের মুঠা থেকে হাত ছাড়িয়ে নিয়ে চলে গেলো আস্তানার দিকে।

নূরী আর জাভেদ হতবাক হয়ে দাঁড়িয়ে রইলো। জাভেদের মুখখানা করুণ হয়ে উঠলো। নূরী একটু দাঁড়িয়ে থেকে তারপর ছুটে চললো আস্তানার অভ্যন্তরে।

বনহর বিশ্রাম কক্ষে প্রবেশ করে জামার বোতাম খুলতে খুলতে পায়চারী করছিলো।

নূরী প্রবেশ করলো সেই কক্ষে।

বনহর ওকে দেখেও কোন কথা বললো না। জামার বোতাম খুলে জামাটা গা থেকে নিয়ে রাখলো আলনায় তারপর বিছানায় এসে বসলো।

নূরী বললো—হর, তুমি আজ কি পাষণ বনে গেছো। কথাটা বলে সে বনহরের সম্মুখে এসে দাঁড়ালো তারপর বললো—জাভেদের সঙ্গে তুমি আজ অমন ব্যবহার করলে কেনো বলোতো?

বনহর বিছানায় দেহটা এলিয়ে দিয়ে একটি সিগারেট বের করে তাতে অগ্নি সংযোগ করলো। নূরীর কথায় কোন জবাব সে দিলো না।

নূরী অভিমান ভরা গলায় বললো—জানি না কি হয়েছে তোমার?

বনহর আপন মনে তখন সিগারেট থেকে ধূম নির্গত করে চলেছে।

নূরী আড় চোখে তাকাচ্ছিলো বনহরের দিকে। আজ সে বনহরের মধ্যে নতুন এক ভাবের লক্ষণ লক্ষ্য করে মনে মনে বিচলিত হচ্ছিলো। যদিও নূরী বুঝতে পারছিলো জাভেদের হাতের তীর-ধনুই তাকে এমনভাবে গম্ভীর করে ফেলেছে তবু সে না বোঝার ভান করে বললো—কতদিন পর আস্তানায় এসেছো, জানিনা কি অপরাধ আমার? ক্ষমা করো হর? নূরী হাত জুড়ে সম্মুখে এসে দাঁড়ালো।

একটু পূর্বে অভিমান ভরা নূরীর মুখভাব এবং একটু পরেই ক্ষমা চাইবার ভঙ্গী দেখে বনহরের রাগ পড়ে গেলো, বললো—নূরী, আমি চাইনা আমার ছেলে আমার পথ অনুসরণ করুক।

নূরী এবার বনহরের পাশে ঘনিষ্ঠ হয়ে বসলো। ওর চিবুকে হাত বুলিয়ে বললো—হর কেনো তুমি মিছামিছি রাগ করো বলো তো? জাভেদের ধমনিতে যে তোমারই রক্ত কাজেই সে তোমার মত না হয়েই পারে না। তোমার ক্ষুদ্ধ মনভাব ওকে ব্যথা দেয় তা কি তুমি বোঝ না।

নূরী আমার অনুরোধ জাভেদকে তুমি আমার পথ অনুসরণ করতে দিও না।

হেসে বলে নূরী—আমি কেনো, কারো সাধ্য নেই জাভেদকে তার দুর্ধর্ষ স্বভাব থেকে ফেরায়। হর তুমি ওর চলার পথে বাধা দিও না। বলো, বলো হর তুমি আর মিছামিছি রাগ করবে না ওর উপর? বলো?

বনহর নীরব, কোন কথা সে বলে না।

নূরী বার বার বলে—জাভেদের উপর তুমি রাগ বা অভিমান করোনা। বলো রাগ করবোনা আর?

জানি নূরী রাগ করেও আমি পারবো না ওর চলার গতি রোধ করতে—তুমি যা বলছো সত্যি। রহমানও বলেছিলো জাভেদের স্বভাব কিছুতেই পরিবর্তন করা সম্ভব হবে না।

তবে কেনো তুমি না বোঝার অভিনয় করো—বলো তো?

কি জানি, মন চায় না আমার ছেলে আমার মত নরপিশাচ হোক।

.....

নূরী বনহরের মুখে হাত চাপা দেয়—চুপ করো! তুমি নরপিশাচ এ কথা কে বলে? তুমি মহৎ মহান—তুমি মানুষ.....

নূরী! বনহর নূরীকে আবেগে টেনে নেয় বুকে।

স্বামীর বুকে মাথা রেখে বলে নূরী—দেশের প্রতিটি মানুষ যদি তোমার মত অন্যায়ের বিরুদ্ধে সংগ্রাম করতো তা হলে দেশ আজ বেহেস্তে পরিণত হতো। অন্যায় নিঃশেষ হয়ে যেতো দেশ থেকে।

বনহর নূরীর চিবুকটা তুলে ধরে, টেনে নেয় নিজের মুখের কাছে।

নূরী বলে উঠে—এখনও তোমার দুষ্টোমি গেলো না, ছেড়ে দাও কেউ এসে পড়বে।

উঁ হুঁ ছাড়বো না ।

নূরী বনহরের কবল থেকে মুক্তি পাবার জন্য বলে—তুমি শহরে গিয়েছিলে, মনিরা আপা কেমন আছে তা তো বললে না?

নূরীর প্রশ্নে হেসে বলে বনহর—ভাল আছে সে । নূরী একটা সংবাদ আছে যা তোমাকে এখনও বলা হয়নি ।

কি সংবাদ?

গতকাল নূর বিদেশ যাত্রা করেছে ।

তুমি বড় নির্ভুর তাই এতোক্ষণও আমাকে কথাটা বলানি? বিদেশে পাঠাবার পূর্বে আমাকে একবার ওকে দেখতেও দিলে না?

কোন উপায় ছিলনা নূরী ।

জানি তুমি ঐ কথাই বলবে ।

সত্যি বিশ্বাস করো আমি নিজেও ওকে বিদায় জানাতে পারিনি । দূর থেকে শুধু দেখেছি । সমস্ত বিমান বন্দর জুড়ে পুলিশ বাহিনী আমার প্রতিক্ষায় অপেক্ষা করছিলো । ওরা জানতো আমি সন্তানকে বিদায় জানাতে যাবো—খামলো বনহর ।

নূরীর চোখ দু'টো ছল ছল করছিলো । নূরকে সে ভালবাসতো নিজের সন্তানের চেয়েও বেশি । একদিন নূরই তার জীবনের একমাত্র সান্ত্বনা ছিলো, মুহূর্তে ওকে না দেখলে সে বাঁচতো না । নূর ছিলো নূরীর হৃদয়ের ধন, চোখের মনি । শুধু মনিরার মুখের দিকে চেয়ে সে নূরকে ফিরিয়ে দিয়েছে, না হলে সে কোনদিন নূরকে দূরে সরিয়ে দিতে পারতো না ।

নূরী বললো—কতদিন ওকে দেখতে পাবো না । না জানি ও কেমন আছে ।

তুমি দোয়া করো নূরী ওর চলার পথ সুন্দর স্বার্থক হোক ।

নূরী বাষ্পরুদ্ধ কণ্ঠে বললো—দোয়া করি আমার নূর যেন তার শিক্ষা শেষ করে ফিরে আসে । সফল হোক ওর সাধনা.....

বনহর নূরীর ললাট থেকে চুলগুলো সরিয়ে দিয়ে বললো—তোমার আশীর্বাদ আল্লাহ কবুল করবেন । নূরী.....

বলো?

নূরকে তুমি কত ভালবাসো, ভালবাসো ওর মাকে কিন্তু তোমার কথা আজও ওরা কেউ জানে না।একটু থেমে বললো বনহর—হয়তো জানলে মনিরা তোমাকে সহ্য করবে না। নূরী, তাই আজও আমি তার কাছে তোমার কথা গোপন করে রেখেছি।

আমি জানি হর, তুমি মনিরা আপার কাছে আজও আমার বিষয় নিয়ে কোন কথাই বলোনি কিন্তু কতদিন তুমি তার কাছে গোপন রাখবে আমাকে?

যতদিন মনিরা নিজে না জানতে চাইবে ততদিন আমি তোমাকে গোপন রাখবো। তার কাছে। তারপর নূর ফিরে এলে একদিন তোমার সঙ্গে নতুন করে পরিচয় করিয়ে দিয়ে বলবো সব কথা। তোমাকে ওর মার সঙ্গে.....

না, না আমি চিরদিন গোপন থাকতে চাই। মনিরা আপার মনে আমি ব্যথা দিতে পারবো না হর। আমি তা পারবো না.....

নূরী।

হাঁ হর, তুমি মনিরা আপার মাথার মনি.....

আর তোমার?

আমার হৃদয়ের রাজা।

বনহর হেসে উঠলো হাঃ হাঃ করে তারপর হাসি থামিয়ে বললো—কার অধিকার বেশি বলো?

মনিরা আপার?

কারণ?

কারণ তাকে তুমি আগে ধরা দিয়েছো.....

আর?

আমাকে গ্রহণ করেছো অনেক পরে। হর, তুমি মনিরা আপার সম্পদ.....আমার এমন সাহস নাই আমি তোমাকে তার কাছ থেকে কেড়ে নেই।

নূরী তুমি আশ্চর্যই শুধু নও বিশ্বয়কর।

তার চেয়েও বেশি তুমি কারণ তোমার পবিত্র ভালবাসা আমার সব বাসনা পূর্ণ করেছে। নূরী বনহরের বুকে মাথা রাখলো।

বনহর ওকে নিবিড়ভাবে টেনে নিলো কাছে।

ঠিক ঐ মুহূর্তে বাইরে শোনা গেলো রহমানের কণ্ঠস্বর—সর্দার!
 বনহর নরীকে বাহুবন্ধ থেকে মুক্ত করে দিয়ে বলে—রহমান!
 হাঁ সর্দার!

এসো।

রহমান ভিতরে প্রবেশ করে কুর্নিশ জানালো।

বনহর বললো—কি সংবাদ রহমান?

সর্দার.....এই চিঠি কায়েস এনেছে।

চিঠি! কই দেখি? বনহর হাত বাড়ালো।

রহমান একটি চিঠি বের করে বনহরের হাতে দিলো।

বনহর চিঠিখানা খুলে মেলে ধরলো চোখের সামনে, চিঠি খানায় দৃষ্টি
 পড়তেই বিস্মিত হলো সে। চিঠিতে লেখা আছে—

“বনহর, জানিনা এ চিঠি তোমার হাতে পৌছবে
 কি না। চীনা দস্যু—নাংছু-হুয়াং আমাকে বন্দী
 করেছে। আমি এখন হিয়াংছু দুর্গে বন্দিনী। তোমার
 পথ চেয়ে রইলাম।

—আশা

বনহর একবার নয় বার বার চিঠিখানা পড়লো। তারপর রহমানকে
 লক্ষ্য করে বললো—রহমান, কায়েস এ চিঠি কেমন করে পেলো এবং
 কোথায় পেলো সে?

রহমান বললো—কায়েস হিন্দল ঘাটি থেকে ফিরে আসার সময় একটি
 লোক তাকে ঐ চিঠিখানা দেয়। চিঠিখানা দেবার পর সে দ্রুত চলে
 গিয়েছিলো তাই কায়েস তাকে আর দেখতে পায় নি বা কোন কথা জিজ্ঞাসা
 করতে পারেনি।

বনহরের ক্র-কুণ্ঠিত হয়ে উঠলো,। সে পুনরায় দৃষ্টি ফিরিয়ে নিলো
 চিঠিখানার দিকে। বললো সে—আশার চিঠি কি করে সেই লোকটির হাতে
 এলো? লোকটিকে পেলে আমার উদ্ধার ব্যাপার অনেকটা সহজ হতো?

রহমান বললো—সর্দার কায়েস বলেছে, সে চিঠিখানা তার হাতে
 দিয়েই বিদায় নিয়েছে। কায়েস চিঠিখানা পড়বার সুযোগ না করতেই সে
 উধাও। কাজেই.....

হাঁ বুঝতে পেরেছি! একটু থেমো বললো বনহর—যে লোকটি আশার চিঠি বহন করে এনেছিলো সে নিশ্চয়ই নাংচু-হুয়াং এর দলের লোক এবং সে কায়েসকেও ভালভাবে জানে—সে আমার দলের লোক।

সর্দার ঠিক বলেছেন, না জানলে সে কিছুতেই কায়েসকে ও চিঠি দিতো না।

রহমান তুমি হিন্দল চলে যাও এবং সঙ্গে কায়েসকে নিয়ে যাও। কায়েস নিশ্চয়ই তাকে চিনতে পারবে সে সেই লোক যে তার হাতে চিঠিখানা দিয়েছিলো। আমার কাজ এখনও শেষ হয়নি, আমাকে পুনরায় হাজরায় যেতে হবে। হাজরা গ্রামে ভয়ানকভাবে অন্যায় অনাচার চলেছে। হাজরার অধিনায়ককে শায়েস্তা না করা অবধি আমি স্থির হতে পারি না।

কিন্তু আশার যদি কোন বিপদ ঘটে যায়? সর্দার, সে নিশ্চয়ই ভয়ানক বিপদগ্রস্থ.....

হাঁ, আমারও সেই রকম মনে হচ্ছে। তবে আমার হাজরায় একবার যেতেই হবে। হাজরা থেকে ফিরে এসে আমি চীন অভিমুখে রওয়ানা দেবো।

আচ্ছা সর্দার তাই হবে। রহমান বেরিয়ে গেলো।

নূরী এতোক্ষণ নিশ্চুপ দাঁড়িয়ে শুনছিলো রহমান ও বনহরের কথাগুলো। এবার সে প্রশ্ন করে বসলো—আশা! কে সেই আশা?

ভালোভাবে স্মরণ করো ঠিক চিনতে পারবে।

না, আমি কিছুতেই খেয়াল করতে পারছি না। আশা কে সে?

আমার একজন হিতাকাঙ্ক্ষিনী.....বহুবাব সে আমাকে মৃত্যুর মুখ থেকে রক্ষা করেছে। শোন, তার আর এক নাম ছিলো, ঐ নাম হয়তো তোমার স্মরণ আছে—ইরানী।

ইরানী?

হাঁ।

আমি ইরানীকে চিনি, চোখে তাকে না দেখলেও তার নাম শুনেছিলাম রহমানের মুখে।

হাঁ, এই আশাই হলো ইরানী। নূরী পড়ে দেখো এই চিঠিখানা।

নূরী বনহুরের হাত থেকে চিঠিখানা নিয়ে পড়ে ফেললো এক নিশ্বাসে, তারপর বললো—আশা চীনা দস্যু কবলে বন্দিনী। তোমার সাহায্য কামনা করে সে লিখেছে। হাজারার কাজের চেয়ে তোমার কর্তব্য তাকে উদ্ধার করা কারণ সে বহুবার তোমার জীবন রক্ষা করেছে।

নূরী, আশাকে চীনা দস্যু কবল থেকে উদ্ধার করা আমার কর্তব্য জানি কিন্তু তার চেয়ে বেশি কর্তব্য হাজারাবাসীকে উদ্ধার করা। কথাটা বলে বনহুর একটি সিগারেটে অগ্নি সংযোগ করলো। পুনরায় বালিশে ঠেঁশ দিয়ে বসলো সে শয্যার উপরে।

নূরী বললো—হাজারার সব কথা আমি শুনেছি।

শুধু হাজারা গ্রামের নয় এমনি শত শত শহর গ্রাম বন্দর নানা অন্যান্য অনাচারে ভরে উঠেছে। নানারকম কুৎসিত কাজ চলেছে দেশের অভ্যন্তরে। মানুষ হয়ে মানুষের রক্ত শোষণ করে নিচ্ছে একদল রক্ত শোষক.....

রক্ত শোষক।

হাঁ।

সে কি রকম?

ঠিক মানুষের মত।

মানুষের মত তারা দেখতে, বলো কি!

হাঁ, তারা কারা জানো দেশের হর্তা-কর্তা-বিধাতা। তারাই এখন দেশ রক্ষক বলা যায়—মুখে বড় বড় বুলি আওড়ায়, পত্র পত্রিকায় তাঁদের মহত্ত্বের কথা ছাপা হয়, তারা জনদরদী সেজে জনগণের বুকের রক্ত শোষণ করে.....

খিল খিল করে হেসে উঠে নূরী তারপর হাসি থামিয়ে বলে—তুমি যাদের কথা বলছো আমি ঠিক বুঝে নিয়েছি।

সত্যি?

হাঁ—বলবো কারা তারা?

বলো?

যারা তেলায় বসে ফিরনী, পোলাও আর সুধা পান করে। যাদের দেহে ঝলমলে পোশাক পরিচ্ছদ.....যাদের মেঝেতে বিছানো থাকে লক্ষ টাকা মূল্যের গালিচা.....যাদের সদর গেটে রাইফেল ধারী প্রহরী পাহারায় রত.....যাদের পায়ে কাছের বসে জিভ বের করে মুখের দিকে তাকিয়ে আছে বুল ডগ—তারাই হলো জনগণের রক্ত চোষা শার্ভুল।

নূরী! বনহর আনন্দ ধ্বনি করে নূরীর পিঠ চাপড়ে দেয়—সাবাস, তুমি দেখছি সব জানো।

জানবো না, দেশের কে না এদেরে চেনে। সবাই জানে কারা দেশের জনগণের রক্ত শোষণ করে নিচ্ছে। কাদের চক্রান্তে দেশ আজ সর্বনাশের মুখে এগিয়ে যাচ্ছে। কারা তারা, এ কথা দেশবাসীকে কেউ বা কাউকে বলে দিতে হয় না। জনগণের রক্ত যারা শোষণ করছে, জনগণ এবার তাদের রক্ত শোষণ করবে অচিরে সেদিন ঘনিয়ে আসছে বুঝলে হর।

নূরী!

হাঁ হাঁ হর মনে করেছো তুমি একাই সব সংবাদ জানো আর তুমি একাই সবাইকে শায়েস্তা করছো—না তা নয়।

নূরী!

হাঁ হর, দেশের জনগণ যখন মৃত্যুর সঙ্গে লড়াই করে চলেছে, ক্ষুধা পিপাসায় মানুষ যখন উন্মাদ। পথে ঘাটে মৃত্যুর স্তূপ, ডাষ্টবীন আর নর্দমায় যখন কঙ্কাল সার নারী-পুরুষ খাদ্যের সন্ধানে হাতড়ে ফিরছে তখন কি কেউ চুপ থাকতে পারে।

এ সব কি বলছো নূরী?

যাও হর, তুমি আশাকে উদ্ধার করে নিয়ে এসো তারপর দেশে দুটো দমন করো।

কিন্তু.....

কোন কিন্তু নয় যাও।

এ তুমি কি বলছো নূরী?

হাঁ, আমি জানি, আশার জন্য তুমি আজও জীবনে বেঁচে আছো, আশা তোমার প্রাণ রক্ষাকারিনী। তবে আশা নামে তাকে আমি জানতাম না, জানতাম ইরানী নামে। হর, তুমি তৈরি হয়ে নাও চীন অভিযুগে যাত্রা করতে হবে।

নূরীর কথা ফেলতে পারে না বনহর, যদিও তার মনে তখন হাজারা গ্রামের চিন্তা ভাসছিলো। সবচেয়ে বেশি মনে পড়ছিলো গোলাপী বৌ-এর কথা। মাত্র ক'দিনের ছুটি নিয়ে এসেছিলো মালেক মিয়া তারপর কেটে গেছে এক সপ্তাহের বেশি। কত কাজ পড়ে রয়েছে সেখানে। নূরীর অনুরোধ অবহেলা করতে পারে না সে। চীন যাত্রার জন্য প্রস্তুত হয়।



চীনা দস্যু নাংচু-হুয়াং, যেমন তার চেহারা তেমনি সে শক্তিশালী। তার দস্যুতা শুধু চীন রাজ্যেই সীমাবদ্ধ নয়। সে বেশির ভাগ দস্যুতা সাধন করে পৃথিবীর দক্ষিণ পূর্ব অংশে।

চীন রাজ্যে সে বাস করে, বছরের সমস্ত দিনগুলো কাটে তার বিভিন্ন রাজ্যে। দস্যুতা করে নাংচু-হুয়াং পৃথিবীর সর্বশ্রেষ্ঠ ধনী হবার স্বপ্ন দেখছিলো।

নাংচু-হুয়াং যখন পৃথিবীর দক্ষিণ অংশে রায়হান বন্দরে তার জাহাজখানাকে নঙ্গর করিয়েছিলো তখন দস্যুরাণী হ্যানরী জানতে পারে এবং সে গোপনে অনুচরদের নিয়ে প্রস্তুত হয়ে অপেক্ষা করতে থাকে—চীনা দস্যু নাংচু-হুয়াংকে শায়েস্তা করার জন্য।

দু'দিন গোপনে অপেক্ষা করার পর নাংচু রায়হান বন্দর ত্যাগ করে।

দস্যুরাণী তখন সখীদের নিয়ে কোন এক উৎসবে মত্ত ছিলো। দস্যুরাণীর একজন অনুচর এসে জানালো নাংচু-হুয়াং রায়হান বন্দর ত্যাগ করে চলে যাচ্ছে। সে শুধু রায়হান বন্দর ত্যাগ করেই যাচ্ছে না যাবার পূর্বে রায়হান বন্দর থেকে প্রচুর ধন সম্পদ হরণ করে নিয়ে যাচ্ছে।

দস্যুরাণী কথাটা শুনা মাত্র ভীষণভাবে ক্রুদ্ধ হয়ে উঠলো এবং তার অনুচর রহমতকে জানিয়ে দিলো—রহমত তুমি আমার জাহাজ প্রস্তুত করো। নাংচু-হুয়াং আমার এলাকা থেকে সম্পদ নিয়ে পালাবে এ আমি সহ্য করবো না। নাংচুর জাহাজ যখন মধ্য সাগরে গিয়ে পৌঁছবে তখন আমি তার জাহাজ আক্রমণ করবো।

রহমত সসম্মানে জানালো—আচ্ছা রাণীজী, আমরা সেইভাবে প্রস্তুতি নিয়ে রওয়ানা দিবো।

নাংচু-হুয়াং এর জাহাজ রায়হান বন্দর ত্যাগ করে এগিয়ে চললো। হুয়াং এর অনুচরদের আনন্দ আর ধরছে না। হুয়াং নিজেও বোতলের পর বোতল নেশা পান করে চলেছে। রায়হান বন্দর থেকে মূল্যবান সামগ্রি হরণ করেছিলো তারা।

দস্যুরাণী এ সংবাদ জানতে পেরেছিলো এবং এ জন্যই সে বেশি ক্রুদ্ধ হয়েছিলো। তার দেশের সম্পদ বিদেশী দস্যু এসে নিয়ে যাবে এটা সে কিছুতেই বরদাস্ত করতে পারে না তাই দস্যুরাণী তার অনুচরদের নিয়ে রওয়ানা দিলো।

দস্যুরাণীর জাহাজখানা যদিও খুব বড় ছিলো না, কিন্তু তার গতিছিলো অত্যন্ত—দ্রুত। হ্যাং এর জাহাজখানাকে ফলো করে এগিয়ে গিয়েছিলো মাঝ সাগরে এবং সুযোগ বুঝে আক্রমণ করেছিলো দস্যুরাণী হ্যাং এর জাহাজখানাকে।

সুচতুরা দস্যুরাণীর আক্রমণে হ্যাং বেকুফ বনে গিয়েছিলো, শেষ পর্যন্ত পরাজয় ঘটেছিলো তার দস্যুরাণীর কাছে। দস্যুরাণী হ্যাংএর জাহাজ থেকে তার সমস্ত সম্পদ হরণ করে রায়হান বন্দর থেকে যে মূল্যবান সম্পদ হ্যাং লুট করেছিলো ঐ মালামাল দস্যুরাণী ছিনিয়ে নিয়ে চীনা দস্যু নাংচু-হ্যাংকে মুক্তি দিয়েছিলো।

নাংচু-হ্যাং দস্যুরাণীর কাছে মুক্তি পেলেও সে খুশি হলো না। তার ধমনিতে কে যেন আগুন ধরিয়ে দিলো। সে তার দলবলকে আদেশ দিলো দস্যুরাণীকে আটক করার জন্য।

নাংচু-হ্যাং এর অনুচরগণ জাহাজ নিয়ে ছুটলো দস্যুরাণীর জাহাজখানাকে আটক করার জন্য। কিন্তু হ্যাং এর অনুচরদের ক্ষমা কি দস্যুরাণীর জাহাজ আটক করে। কৌশলে সে জাহাজ খানা হ্যাংএর অনুচরদের দৃষ্টি আড়ালে চলে গিয়েছিলো।

দস্যুরাণীর জাহাজের সন্ধানে নাংচু-হ্যাং উন্মাদ হয়ে উঠে, রায়হান বন্দর এবং আশেপাশে সমস্ত জাহাজগুলোতে তারা রীতিমত খোঁজ করে নানা ছদ্মবেশে। তবু তারা দস্যুরাণী বা তার জাহাজের সন্ধান পায় না। নাংচু জাহাজ নিয়ে প্রতিটি বন্দরে সন্ধান চালায়। সাগরের তীরে বিভিন্ন জায়গায় জাহাজ থামিয়ে সন্ধান করে দস্যুরাণীর। এ ব্যাপারে নাংচুর বিস্তর ক্ষতি সাধন হয়। বিভিন্ন দ্বীপে সন্ধান চালাতে গিয়ে জংলীদের সঙ্গে নাংচুর দলবলদের যুদ্ধ হয়। এ যুদ্ধে নিহত হয় নাংচুর বহু অনুচর।

এক সময় নাংচুর জাহাজ ঝাম সাগরে এসে পৌঁছায়। ঝাম রাজ্যে তারা তল্লাসি চালায় দস্যুরাণীর জন্য। চীনা দস্যু হ্যাং ঝাম রাজ্যের প্রতিটি অঞ্চলে সন্ধান করে চলে।

একদিন এক সরাইখানায় হুয়াং জানতে পারে—দস্যুরাণী বাস করে ঝাম জঙ্গলে। বহু টাকার বিনিময়ে তাকে পথ দেখিয়ে নিয়ে চলে এক ঝাম অধিবাসী।

হুয়াং ভাবতেও পারেনি এতো সহজে তারা দস্যুরাণীর সন্ধান পাবে। মনে মনে ভীষণ খুশি হয় নাংচু-হুয়াং। যে দস্যুরাণী তার মূল্যবান সম্পদ কেড়ে নিয়েছে—যে দস্যুরাণী তাকে নাকানী চুবানী খাইয়েছে, সেই দস্যুরাণীকে সে এতো আলগোছে পেয়ে গেলো। ঝাম অধিবাসী বললো—আমি কিন্তু আপনাকে দূর থেকে দস্যুরাণীর আস্তানা দেখিয়ে দিয়ে চলে আসবো।

বলেছিলো নাংচু-হুয়াং—রেশ তাই হবে। তার জন্য তোমাকে পুরস্কার দেবো পাঁচ হাজার টাকা।

লোকটা খুশি হয়েছিলো অনেক, পাঁচ হাজার টাকা সে পাবে তার বিনিময়ে শুধু একটু কষ্ট করে, দস্যুরাণীর পথটা দেখিয়ে দেবে।

নাংচু নিজে ছদ্মবেশে ছিলো আর তার দলবল আত্মপোষন করেছিলো ঝাম শহরে। নাংচু নিজে চললো লোকটার সঙ্গে। ভাবলো, আগে নিজে চোখে দেখে আসবে তারপর অনুচরদের নিয়ে রাতের অন্ধকারে আক্রমণ করবে দস্যুরাণীর আস্তানা।

লোকটা পথ দেখিয়ে নিয়ে চললো।

তার সঙ্গে চলেছে নাংচু-হুয়াং।

নাংচু-হুয়াং এর শরীরে ঝাম অধিবাসীদের পোশাক। কাঁধে ঝুড়ি, হাতে থলে। দেখলে মনে হয় তারা জঙ্গলে ফলের সন্ধানে এসেছে। নাংচু বেটে-সেটে বলিষ্ঠ চেহারা, নাক চেপটা, গৌফ দুটো প্রায় ইঞ্চি তিন লম্বা, ঝুলে নেমেছে ঠোঁটের দু'পাশে। চোখ দুটো ক্ষুদ্রে ধরণের হলেও তাতে শ্যাম পাখির দৃষ্টি। শাদুলের চোখের মত ও বলা যেতে পারে।

নাংচু যতই এগুচ্ছে ততই পথটা যেন আরও স্পষ্ট বলে মনে হচ্ছে। আশ্চর্য হচ্ছে নাংচু-হুয়াং কারণ দস্যুরাণীর আস্তানার পথ এতো পরিষ্কার হতে পারে এ যেন চিন্তার বাহিরে।

সকাল থেকে দুপুর পর্যন্ত একটানা হেঁটে একসময় তারা দু'জন কাম জঙ্গলের অভ্যন্তরে পৌঁছে গেলো। বিরাট জঙ্গলে আত্মগোপন করে হ্যাং-এসে গেছে কিন্তু আশ্চর্য বটে লোকটা মোটেই ভয় পাচ্ছে না। সে হ্যাংকে নিয়ে বেশ ফূর্তি করেই চলেছে।

বেলা কতখানি হলো তেমন বোঝা যাচ্ছে না। ঝোপ-ঝাড়ের আড়ালে ডাল-পালার ফাঁকে-ফাঁকে রোদ এসে মাটি স্পর্শ করছিলো। জঙ্গল হলেও তেমন ভয়ঙ্কর জীবজন্তুও নজরে পড়লো না হ্যাং এর। দস্যুরাণীকে এতো সহজে পাবে এ যেন ধারণার অতীত।

এক সময় থমকে দাঁড়িয়ে পড়লো হ্যাং, সে তার সঙ্গীকে লক্ষ্য করে বললো—তুমি তো আমাকে ভুল পথে নিয়ে যাচ্ছে না।

লোকটা জিভ কেটে বললো—আরে না না ভুল পথ হবে কেনো! এ পথে আমি কি আজ নতুন এসেছি এর আগে ক'বার এসেছি।

আশ্চর্য হয়ে বললো হ্যাং—কেনো তুমি এ পথে এসেছিলে আরও ক'বার?

ও তুমি বুঝি জানো না দস্যুরাণী পূর্ণিমা রাতে দু'হাত উজার করে গরিবদের মধ্যে তার ধন সম্পদ বিলিয়ে দেয়। আমরা তাই পূর্ণিমা রাতে এ জঙ্গলে আসি...।

নাংচুর চোখ ছানাবড়া হয়ে উঠে, বলে তাই নাকি দস্যুরাণী পূর্ণিমা রাতে তার ধন সম্পদ দু'হাত ভরে দান করে?

হাঁ, তুমি জানো না?

না জানি না। জানি না বলেই তো তোমাকে সঙ্গে নিয়ে এলাম পথ চিনে নেবার জন্য।

আরও কিছুটা চলার পর থমকে দাঁড়িয়ে পড়ে লোকটা, সে আংগুল দিয়ে দেখিয়ে দিয়ে বলে ঐ যে কুড়ে ঘরটা দেখছো ওখানেই বাস করে দস্যুরাণী।

নাংচু-হ্যাং এর চোখ জ্বলে উঠেছিলো, আর রক্ষা নাই দস্যুরাণীর, এবার কে তাকে বাধা দেয় দস্যুরাণীর সন্ধান সে পেয়ে গেছে।

নাংচু লোকটাকে সঙ্গে করে ফিরে এসেছিলো আবার সেই সরাইখানায় । লোকটাকে গুণে গুণে পাঁচ হাজার টাকা বখশীস দিলো তারপর রাত্রির জন্য প্রতিক্ষা করতে লাগলো ।

এক সময় রাত বেড়ে এলো ।

পূর্ব হতেই নাংচু-হুয়াং তার অনুচরদের অস্ত্রে সস্ত্রে প্রস্তুত হয়ে নিতে বলছিলো । দলপতির আদেশ মত তৈরি হয়ে অপেক্ষা করছিলো । রাত বেড়ে আসতেই নাংচু-হুয়াং অনুচরদের নিয়ে রওয়ানা দিলো ঝাম জঙ্গল অভিমুখে ।

পথ তার দিনের আলোতে চেনা হয়ে গিয়েছিলো তাই কোন অসুবিধা হলো না । দ্রুত পা চালিয়ে তারা এক সময় পৌছে গেলো সেই দূর থেকে দেখা কুঁড়ে ঘরখানার অদূরে ।

হুয়াং তখন দূর থেকে দস্যুরাণীর আস্তানা দেখে বিস্মিত হয়েছিলো কারণ যে দস্যুরাণীর দাপটে পৃথিবীর বহু অংশ প্রকম্পিত, সেই দস্যুরাণীর আস্তানা একটি কুঁড়েঘর মনে মনে হুয়াং হেসেছিলো কিছুক্ষণ । তবে সঙ্গী লোকটা যেন কিছু বুঝতে না পারে সেজন্য ছিলো সে সচেতন । দস্যুরাণীর কুঠির বা কুঁড়ে ঘর তাকে আরও সাহসী করে তুলেছিলো । দস্যুরাণীকে শ্রেষ্ঠার করা তার পক্ষে মোটেই অসুবিধা হবে না ।

গভীর রাত্রির অন্ধকারে হুয়াং দলবল নিয়ে সেই কুঁড়েঘর ঘিরে ফেললো । চারিদিকে অনুচরদের অস্ত্র-সস্ত্রে সুসজ্জিত রেখে নিজে কুঁড়েঘরে প্রবেশ করলো । সে কক্ষমধ্যে প্রবেশ করে দেখলো—দস্যুরাণী শুভ্র বসন পরিহিত অবস্থায় আসনে উপবেশন পূর্বক নিশ্চুপ বসে আছে । চোখ দুটো তার মুদিত এলায়িত কেশ রাশি ছড়িয়ে আছে পিঠে কাঁধে ।

গলায় ফুলের মালা, বাজুতে ফুলের বালা, সম্মুখে ফুলের ডালায় স্তূপকৃত ফুল । ভালভাবে হুয়াং তাকিয়ে দেখলো দস্যুরাণীর সামনা সামনি দাঁড়িয়ে আছে এক যুবক । যুবকটি জীবিত না মৃত বোঝা যাচ্ছে না । কারণ তার দৃষ্টি স্থির ছিলো, আর স্থির ভাবেই দাঁড়িয়ে আছে সে ।

দস্যুরাণীর দু'চোখ মুদে থাকায় সে দস্যু হুয়াংকে দেখতে পায় না । হুয়াং আলগোছে পিছনে গিয়ে দাঁড়ায় । ধূপের ধোয়ায় কক্ষটা ধুমায়িত ছিলো । সে বুঝতে পারে সম্মুখে দন্ডায়মান লোকটি আসলে জীবিত কোন মানুষ নয়, একটি মূর্তি ।

নাংচু-হুয়াং হাতে তালি দেয়।

সঙ্গে সঙ্গে কক্ষের আশে-পাশে থেকে নাংচুর দলবল প্রবেশ করে কক্ষের মধ্যে।

নাংচু-হুয়াং তখন দস্যুরানীকে আংগুল দিয়ে দেখিয়ে দেয়। দলবল দলপতির আদেশ পাওয়া মাত্র শুভ্র বসনা দস্যুরানীকে ধরে ফেলে এবং তার হাত, পা ও মুখ বেঁধে তুলে নেয় কাঁধে।

শুভ্র বসনা ছিলো রাণী দুর্গেশ্বরী।

যে মুহূর্তে নাংচু-হুয়াং তাকে গ্রেপ্তার করে তখন রাণী তন্ময় ছিলো তার নাধনায়, তাই সে টের পেলো না কিছু। যখন তার হাত, পা ও মুখ বেঁধে কুঠিরের বাইরে নিয়ে এলো তখন আশা সেখানে উপস্থিত হলো। আশা মাঝে মাঝে এখানে আসতো, মিলিত হতো সে রাণী দুর্গেশ্বরীর সঙ্গে।

দুর্গেশ্বরী একদিন দস্যুনেত্রী বা দস্যুরানী ছিলো, তার দাপটে কম্পমান ছিলো ঝাম থেকে হিন্দল রাজ্য পর্যন্ত। আরও বহু জায়গায় ছিলো তার আস্তানা।

দুর্গেশ্বরীর স্বামী মহারাজ জানতেন না তার স্ত্রী একজন দস্যুনেত্রী। মহাসুখে দিন কাটছিলো মহারাজের। রাণী গভীর রাত্রে রাজপ্রাসাদ ত্যাগ করে চলে যেতো তার আস্তানায়। দস্যুতা করতো সে দলবল নিয়ে রাজ্যের বিভিন্ন জায়গায়।

দস্যুতা শেষ করে ফিরে আসতো রাণী এবং রাজ-প্রাসাদে প্রবেশ করে নিশ্চিন্ত মনে ঘুমাতো। পরদিন রাজ-দরবারে মহারাজের পাশে যখন বসতো গিয়ে তখন কেউ ভাবতোনা এই মহারানী একজন দস্যুনেত্রী বা দস্যুরানী।

প্রজারা আসতো নানা নালিশ নিয়ে।

আসতো রাতের দস্যুতা ব্যাপার নিয়ে, কেবা কারা তাদের সর্বস্ব হরণ করে নিয়ে গেছে। তারা অসহায় হয়ে পড়েছে, সব হারিয়ে পথে বসেছে তারা।

রাণী দুর্গেশ্বরী মনে মনে হেসেছে, হৃদয়ে আনন্দ উপভোগ করেছে।

মহারাজ ঘোষণা করে দিয়েছে—কে সেই দস্যুনেত্রী যে তার রাজ্যে এমনভাবে দস্যুতা করে চলেছে। তার রাজ্যে অশান্তির হাওয়া বইয়ে

দিয়েছে। যে দস্যুরাণীকে গ্রেপ্তার করতে পারবে তাকে পুরস্কার দেবেন তিনি তাঁর কণ্ঠের হীরক হার।

এ সংবাদ এক সময় পৌছে গিয়েছিলো বনহরের কানে। হীরক হারের লোভে নয়, কে সেই দস্যুরাণী জানানার বাসনায় সে এসেছিলো এই রাজ্যে এবং রাজপ্রাসাদে সে চাকুরি নিয়েছিলো কর্মচারী হিসাবে।

প্রথম নজরেই রাণী দুর্গেশ্বরীর দৃষ্টি আকর্ষণ করেছিলো বনহর, তারপর ওর হৃদয় করেছিলো জয়। একদিন দুর্গেশ্বরী তাকে প্রাণ দিয়ে ভালবেসে ফেললো।

রাণী দুর্গেশ্বরীই যে দস্যুরাণী বা দস্যুনেত্রী—দু’দিনেই জেনে নিয়েছিলো বনহর এবং তা প্রমাণ করেছিলো রাজদরবারে।

রাণী দুর্গেশ্বরী পরাজয় বরণ করেছিলো সেদিন বনহরের কাছে এবং কথা দিয়েছিলো আর সে দস্যুতা করবে না এবং তার দস্যুতার সঞ্চিত সম্পদ সব সে বিলিয়ে দেবে দুঃস্থ জনগণের মধ্যে। শুধু সে চায় বনহরের ধ্যান করার অধিকার।

বনহর হেসে বলেছিলো, বেশ তাই হোক।

দুর্গেশ্বরী সেই হতে গহন জঙ্গলে কুঁড়েঘরে বাস করতো এবং নিজের ধন সম্পদ সব বিলিয়ে দিতো গরিব দুঃখীদের মধ্যে।

রাজ্যের সবাই তাই জানতো দস্যুরাণী তার দস্যুতা ত্যাগ করে এখন সন্ন্যাসিনী বনে গেছে।

ঝাম অধিবাসী লোকটি তাই দস্যুরাণীর নাম শুনে রাণীদুর্গেশ্বরীর কুঠিরের সন্ধান দিয়েছিলো।

রাণীদুর্গেশ্বরীর সঙ্গে আশার পরিচয় ঘটেছিলো একদিন আচম্বিতে। আশা অশ্বযোগে ঝাম জঙ্গল অতিক্রম করার সময় সে দেখেছিলো সম্মুখে এক কুঁড়েঘর। সে ঐ কুঁড়েঘরে প্রবেশ করে চমকে উঠেছিলো। তার চমকে উঠার কারণ কুঁড়ে-ঘরের মধ্যে সে দেখতে পেলো একটি বিরাট আকার ছবি। ছবিখানা দেখে সে বিস্মিতই শুধু হলো না হলো অত্যাশ্চর্য, কারণ ছবির মানুষটিকে সে যে গভীরভাবে ভালবাসে, কামনা করে। এ ছবি এখানে এলো কি করে। আশা যখন অশ্ব বাইরে রেখে কুঁড়ে-ঘরে প্রবেশ করেছিলো তখন সেখানে কেউ ছিল না।

রাণীদুর্গেশ্বরী তখন বাইরে ফুল সংগ্রহে গিয়েছিলো। ফুল নিয়ে সে ফিরে আসে কুঁড়েঘরে।

পদশব্দ পেয়ে আশা লুকিয়ে পড়েছিলো ছবির আড়ালে।

দুর্গেশ্বরী প্রবেশ করে কুঁড়েঘরে, হাতে তার ফুলের ডালা।

আড়ালে আত্মগোপন করে দেখে আশা সবকিছু।

রাণীদুর্গেশ্বরী ফুল নিয়ে ছবির পাদমূলে রাখে, তারপর সে দু'চোখ মুদে বসে ধ্যান গ্রস্তের মত। সম্মুখে ধূপদানী থেকে ধুম্রাশি কুন্ডলি পাকিয়ে ছড়িয়ে পড়তে থাকে চারপাশে।

আশা অবাক হয়ে যায়।

এরপর থেকে প্রায়ই আশা আসতো এ জঙ্গলে! সে আড়ালে আত্মগোপন করে দেখতো রাণীদুর্গেশ্বরীর কার্যকলাপ, দেখতো তার যোগ সাধনা।

অন্যান্য দিনের মত আজও আশা রাতের অন্ধকারে এসেছিলো এ জঙ্গলে। ছবির আড়ালে আত্মগোপন করেছিলো সে। এমন সময় নাংচু-হুয়াং রাণী দুর্গেশ্বরীকে পিছন থেকে আক্রমণ করে এবং তাকে বেঁধে ফেলে মজবুত করে।

দুর্গেশ্বরী আচমকা আক্রমণে হতবাক হয়ে পড়েছিলো। সে কিছু বুঝবার পূর্বেই তাকে বেঁধে ফেলা হয় এবং কুঠিরের বাইরে বের করে আনে নাংচু-হুয়াং এর অনুচরগণ।

আশা আড়াল থেকে সব দেখছিলো। সে এ মুহূর্তে নিশ্চুপ থাকতে পারে না, আড়াল থেকে বেরিয়ে আসে। অস্ত্র তার সঙ্গেই ছিলো ভীষণভাবে আক্রমণ করে সে হুয়াং-এর অনুচরদের।

আশার শরীরে ছিলো দস্যুরাণীর ড্রেস।

কতকটা শিকারীদের পোশাকের মত। মাথায় ছিলো ক্যাপ, কোমরে পিস্তল।

হুয়াং নিজে আড়ালে ছিলো।

আশার সঙ্গে যুদ্ধ হচ্ছিলো হুয়াংএর অনুচরদের। হুয়াং দেখলো যাকে গ্রেপ্তার করে নিয়েছে সে নিশ্চয়ই দস্যুরাণী নয়, দস্যুরাণী ঐ তরুণী যে তার অনুচরদের সঙ্গে লড়াই করে চলেছে।

রাণীদুর্গেশ্বরী তখন হাত, পা ও মুখ বাঁধা অবস্থায় একপাশে পড়েছিলো, সেও কম অবাক হয়নি কে এই নারী যে তাকে রক্ষা করার জন্য যুদ্ধ করে চলেছে।

আশা যখন নাংচু-হুয়াং এর অনুচরদের পরাজিত করে দুর্গেশ্বরীর বন্ধন উন্মোচন করতে যাচ্ছিলো ঠিক ঐ মুহূর্তে নাংচু নিজে পিস্তল চেপে ধরলো আশার পিঠে।

আশা মনে করেছিলো সবাই পালিয়েছে তাই সে নিজ অস্ত্র কোমরের বেটে রেখে দুর্গেশ্বরীর হাত-পার বাঁধন মুক্ত করে দিতে গিয়েছিলো। কিন্তু সে দুর্গেশ্বরীর হাত-পা এর বাঁধন খুলে ফেলতে সক্ষম হলো না, বাধ্য হলো সে হাত দু'খানা তুলে আত্মসমর্পণ করতে।

ফিরে তাকাতেই হুয়াংকে দেখে মুহূর্তের জন্য কিংকর্তব্যবিমূঢ় হলো আশা। সে হুয়াংএর বিকট চেহারা দেখে অবাক হলো প্রথমে। পরক্ষণেই যেমন সে কোমর থেকে অস্ত্র খুলে নেবার জন্য হাত নামিয়েছে অমনি হুয়াং অনুচরদের ইস্তিৎ করলো—সঙ্গে সঙ্গে অনুচরগণ চারপাশ থেকে ঘিরে ফেললো আশাকে।

হুয়াং নিজ হাতে আশার হাত দু'খানায় শিকল পরিয়ে বেঁধে ফেললো।

আশাকে বেঁধে নিয়ে চললো নাংচু হুয়াং এর দল—দুর্গেশ্বরী মুক্তি পেলো।

আশাকে রাতের অন্ধকারে হাত-পা ও মুখ বেঁধে জাহাজে নিয়ে এলো। ভোর হবার পূর্বেই জাহাজ ছাড়লো হুয়াং ক্যাম বন্দর থেকে।



আশাকে যে ক্যাবিনে আটক করে রাখা হলো সেই ক্যাবিনের পাশেই ছিলো নাংচু হুয়াংএর প্রমোদ কক্ষ বা ক্যাবিন।

ক্যাবিনে বসে ওরা খুব আমোদ-ফুর্তি করে চললো। কারণ ওরা দস্যুরাণীকে খেপ্তার করতে সক্ষম হয়েছে—এটাই তাদের আনন্দের কারণ।

আশা কিন্তু তার ক্যাবিনে বসে সব শুনতে পাচ্ছিলো এবং একটি ফুটো ছিলো। সেই ফুটো দিয়ে সব দেখছিলো—সুরাপান করে সবাই চীনা ভাষায় নাচ গান শুরু করে দিলো।

আশা বুঝতে পারলো এরা দস্যু ছাড়া আন্য কিছু নয় এবং রাগীদুর্গেশ্বরীকে হরণ করবার জন্যই এরা ঝাম জঙ্গলে প্রবেশ করেছিলো। কিন্তু তাকে গ্রেপ্তার করা সত্যও ওরা মুক্তি দিয়ে আশাকে আটক করে নিয়ে চলেছে। ভাবে আশা, কে এরা আর এদের উদ্দেশ্যই বা কি?

জাহাজ তিন সপ্তাহকাল সমুদ্র বক্ষে বিচরণ করার পর একদিন এসে নোঙ্গর করলো। আশা বুঝতে পারলো এটা কোন বন্দর নয়, কোন এক দ্বীপ অঞ্চলের নির্জন স্থানে নোঙ্গর করেছে জাহাজখানা।

আশাকে জাহাজ থেকে যখন নামানো হলো তখন তার মুখ বেঁধে দেওয়া হলো। হাত দু'খানা পিছমোড়া করে বাঁধা কিন্তু পা দু'খানা তখন মুক্ত রয়েছে।

জাহাজের সিঁড়ি বেয়ে যখন লুপ্তিত মালামালগুলো নামানো হচ্ছিলো তখন আশাকেও নামানো হলো লুট করা মালের মত অবস্থায়।

আশা কিছু চোখে দেখতে পাচ্ছে না। তাকে দু'জন চীনা দস্যু নামিয়ে আনলো জাহাজ থেকে নিচে। আশা যে ক'দিন হুয়াংএর জাহাজে আটক ছিলো সে ক'দিন কেউ তাকে বিরক্ত করেনি এমনকি হুয়াং পর্যন্ত যায়নি তার ক্যাবিনে। আশা সেজন্য অনেকটা আশ্বস্ত ছিলো। শুধু খাবার সময় একটা চীনা বৃদ্ধ এসে তাকে খাবার দিয়ে যেতো। খাবারের মধ্যে অনেক খাবার আশা খেতে পারেনি। সাপ, ব্যাঙ আরও অদ্ভুত জীবের শুকনো কাবাব তৈরি করতো তাই তারা আশাকে খেতে দিতো।

আশা ওসব খেতো না, সে শুধু শুকনো রুটী আর শুকনো মাংস খেতো। বৃদ্ধটি আশাকে খাবার দিতে এসে ভাঙ্গা ভাঙ্গা ইংরেজি ভাষায় কথা বলতো। আশা অনেক কিছু খেতো না, পড়ে থাকতো পাতে। বৃদ্ধ বলতো—তুমি এসব কোনদিন স্পর্শ করো না কেনো?

আশা বলতো—ওসব আমরা খাইনা।

বৃদ্ধ বললো—না খেলে বাঁচবে কি করে? ওসব আমাদের প্রিয় খাদ্য।

আশা বৃদ্ধের সঙ্গে বেশ ভাব জমিয়ে নিয়েছিলো। সে তার কাছে অনেক কিছু জানতেও পেরেছিলো কথায় কথায়। যদিও সব কথা আশা বুঝতোনা তবু সে যা বুঝতো তাই তার পক্ষে ছিলো যথেষ্ট।

আমাকে ওরা চোখ বেধে নিয়ে এলো, কোথায় সে জানে না। সুড়ঙ্গ পথে সিঁড়ি দিয়ে নামানো হচ্ছে সে বেশ উপলব্ধি করলো। অনেকটা পথ এগিয়ে গেলো তারপর এক সময় চোখের বাঁধন খুলে দিলো ওর।

চোখ মুক্ত হওয়ায় আশা দেখলো আধো অন্ধকারময় একটি সুড়ঙ্গ পথ। দু'জন বেটে মত লোক তার দু'হাতে ধরে টেনে নিয়ে চলেছে। দু'পাশে পাথরের প্রাচীর। সরু সুড়ঙ্গ পথে চলতে গিয়ে মাঝে মাঝে মাথা ঠুকে যাচ্ছিলো তার।

একটা প্রশস্ত কক্ষের মত জায়গায় এসে থামলো ওরা। আমার হাত দু'খানা তখনও বাধা ছিলো তাই অসুবিধা হচ্ছিলো।

একজন চীনা ভাষায় কি যেন বললো।

অপরজন তার জবাব দিলো।

আশা কিছু বঝতে পারলো না।

প্রথম ব্যক্তি এবার এগিয়ে এসে হাতের বাঁধন উন্মোচন করে দিলো। তাকে সেই কক্ষমধ্যে আটক করে রেখে চলে গেলো চীনা দস্যুদ্বয়।

আশা ইচ্ছা করলে বাধা দিতে পারতো বা পালাবার চেষ্টা করতে পারতো কিন্তু সে তা করলো না, কারণ কোথায় পালাবে এ যে তার সম্পূর্ণ অজানা অচেনা জায়গা। তাছাড়া এটা কোন দুর্গ বা ভূগর্ভ সুড়ঙ্গ কক্ষ। এখানে কোথায় কোন পথ সে জানে না। ধৈর্য ধরে কৌশলে কাজ করতে হবে। আশা বসে বসে ভাবছে রাণী দুর্গেশ্বরীকে বাঁচাতে গিয়ে সে বন্দী হলো। রাণী দুর্গেশ্বরী তাকে চেনে না কিন্তু আশা তাকে জামে। অবশ্য প্রথমে তাকে সে চিনতোনা। সেদিন হঠাৎ তার কুঠিরে প্রবেশ করে তারই আকাঙ্ক্ষিত জনের প্রতিচ্ছবি আশা দেখতে পেয়েছিলো। অবাক হয়ে গিয়েছিলো সে কারণ এখানে এ ছবি এলো কি করে। অসীম ধৈর্য নিয়ে প্রতিক্ষা করছিলো ঐ ছবির রহস্য জানার জন্য, জানতেও পেরেছিলো আশা ছবির মূল কারণটা। ছবির আড়ালে আত্মগোপন করে দেখেছিলো সে সব কিছু। বিস্মিত হয়েছিলো সে প্রথমে তারপর সন্ধান নিয়ে জানতে পেরেছিলো

কে এই পূজারিণী। আশা যখন জানালো—এক কালের দস্যুনেত্রী এখন সন্ন্যাসিনী তাপসী বনে গেছে। ভালবেসেছিলো সে দস্যু বনহরকে। সে জানতে পারলো তাকে সে কোনদিন পাবে না তখন রাণীদুর্গেশ্বরী সন্ন্যাসিনী হলো এবং তার ধ্যান কামনার সামগ্রি হলো ঐ ছবিখানা।—এটাও আশা জানতে পেরেছিলো রাণী দুর্গেশ্বরী নিজে ঐ ছবি ঐঁকেছিলো এবং সে ঐ ছবিকে ধরে জীবন কাটিয়ে দিচ্ছে। প্রচুর ধন-সম্পদ ছিলো দুর্গেশ্বরীর, সব সে বিলিয়ে দিয়েছে দেশের দুঃস্থ জনগণের মধ্যে।

আশা নিজেও যে দস্যু বনহরকে ভালবেসেছিলো। শুধু ভালবাসা নয় অন্তর দিয়ে তাকে কামনা করেছে কিন্তু সব আশা তার ব্যর্থ হয়েছে—বনহর তাকে ধরা দেয়নি কোনদিন। কতদিন আশা নির্জনে বসে ওর জন্য কেঁদেছে কিন্তু সে কান্না তার সফল হয়নি। সে জানতো কোনদিন তাকে পাবে না—শুধু তার কথা তার ছবি মনের পর্দায় ঐঁকে নিয়ে সে ধ্যান করবে, তাই করেছে আশা। বন্দ্য জঙ্গলে বনহরের সঙ্গে আমার শেষ দেখা তারপর কেটে গেছে কত দিন, কত মাস ও কত বছর। বন্দিণী অবস্থায় আমার মনে পড়ে ওর কথা, ও ছাড়া এ দুর্গম বন্দীশালা থেকে তাকে উদ্ধার করে এমন জন কেউ নেই। বৃদ্ধ চীনাটির কাছ থেকে আশা জেনে নেয় দ্বীপটির নাম, জেনে নেয় এরা কারা, কি এদের উদ্দেশ্য আরও জানতে পারে সে কেনো তাকে এরা বন্দী করে এনেছে। বৃদ্ধের কথায় বুঝতে পারে জলদস্যু হ্যাং তাকে দস্যুরাণী ভ্রমে বন্দী করে নিয়ে এসেছে।

চীনা বৃদ্ধের কথায় আশা জানতে পারে তার এক পুত্র হিন্দলে আছে। শুধু শহর নয় তাদের লোকজন হিন্দল জঙ্গলেও বাস করে। কথাটা শুনে অবাক হয়েছিলো আশা, মানুষ আবার জঙ্গলে বাস করে নাকি?

আশার কথায় চীনা বৃদ্ধ বলছিলো, আমার ছেলে যে দলে কাজ করে তারাও যে ডাকাত, কাজেই জঙ্গল ছাড়া তারা কি লোকালয়ে বাস করতে পারবে।

আশা বলেছিলো, তোমার ছেলে কি এখানে কোন সময় আসে?

বলেছিলো বৃদ্ধ—হাঁ, মাঝে মাঝে আসে। এবার এলে ঠিক নিয়ে আসবো তোমার কাছে। আমার ছেলেও ভাল ইংরেজি বলতে পারে।

আশার মনে একটা ক্ষীণ আশা উঁকি দেয়। সে বলে—ঠিক মনে থাকবে তো?

হাঁ থাকবে। বলেছিলো চীনা বৃদ্ধ।

হ্যাং ধূর্ত হলেও তার অনুচরদের সবাই তেমন ধূর্ত ছিলো না। বৃদ্ধ অনুচরটি ছিলো বড় সরল-সোজা লোক। আশার খাবার এনে বসে বসে অনেক কথা বলতো দু'জন মিলে।

নির্জন বন্দী শালায় চীনা বৃদ্ধটিকে পেয়ে আশা খুশি হতো অনেক। সময় কাটতো নানা কথাবার্তার মধ্য দিয়ে। অনেক গোপন কথা জেনেও নিতো আশা ওর কাছে।

একদিন সত্যিই বৃদ্ধ তার ছেলেকে নিয়ে হাজির হলো।

আশা আশ্চর্য হলো ভীষণ ভাবে কারণ বন্দী শালায় কি করে বৃদ্ধ ওকে নিয়ে এলো। সুড়ঙ্গ মুখের প্রতিটি বাঁকে একটি করে অস্ত্রধারী প্রহরী দিনরাত প্রহরায় নিযুক্ত আছে।

আশা বৃদ্ধের পুত্রকে অভিবাদন জানালো চীনা কায়দায় তারপর বললো—তোমার বাবার মুখে তোমার অনেক গুণগান শুনেছি। তুমি হিন্দল শহরে থাকো।

আশাকে দেখে সন্তুষ্ট হয়েছিলো বৃদ্ধের পুত্র কারণ তাকে কেউ কোন দিন অভিবাদন জানায়নি, আশা তাকে অভিনন্দন জানিয়েছে, এটা তার পক্ষে চরম আনন্দ। তাছাড়া আশার সৌন্দর্যও তাকে মুগ্ধ করেছে। আশার প্রশ্নে খুশি হয়ে জবাব দিলো সে—হাঁ আমি হিন্দল শহরে থাকি তবে হিন্দল জঙ্গলেও আমাদের ঘাটি আছে।

আশা বিস্ময় ভরা গলায় বললো—হিন্দল জঙ্গলে তোমাদের ঘাটি আছে? বললো বৃদ্ধ পুত্র—হ্যাঁ।

না বোঝার ভান করে বললো আশা—ঘাটি! কিসের ঘাটি?

আমি সেখানে কাজ করি।

কাজ করো! বেশ ভাল কথা, বসো ভাই তোমাকে আমার বড় ভাল লাগছে। একটু থেমে বললো আশা—ঠিক আমার ছোট ভাইএর মত তুমি দেখতে। আচ্ছা ভাই তোমার নাম কি?

নাম, লিয়ং-লিচু।

হাঁ, সুন্দর নাম তো।

চীনা বৃদ্ধ খুশি হয়ে বলে ও নামটা লিয়ং-লিচুর মা রেখেছিলো। লিয়ং আমাদের বড় আদরের ধন।

আশা বললো—আমিও ওকে আদর করবো কারণ আমার ভাই লিয়ং-লিচু।

বন্দী শালায় বৃদ্ধ ও তার পুত্রটিকে আশা কথায় ভুলিয়ে ফেললো। অল্পক্ষণেই আপন করেছিলো সে বৃদ্ধের পুত্রটিকে। জেনে নিলো আরও অনেক কথা।

বৃদ্ধের পুত্র বনহরের হিন্দল ঘাটির একজন অনুচর এ কথাও আশা জানতে পারলো তার কথায়। আনন্দে ভরে উঠলো তার মন, একটি চিঠি লিখে বললো আশা—লিয়ং তুমি এই চিঠিখানা তোমাদের ঘাটির কারো হাতে পৌছে দিতে পারো কি?

লিয়ং খুশি ভরা গলায় বললো নিশ্চয়ই পারি। আশার ব্যবহার আর মিষ্টি কথায় লিয়ং-এর মন জয় করে নিয়েছিলো তাই এতো সহজ হলো সে ওর কাছে।

বৃদ্ধ পুত্রকে প্রহরীর ছদ্মবেশেই এই গোপন সুড়ঙ্গ মধ্যে নিয়ে আসতে সক্ষম হয়েছিলো। অবশ্য বৃদ্ধ নিজেও আশাকে ভালবেসে ফেলেছিলো নিজ কন্যা সম। আশাকে দেখলে চীনা বৃদ্ধটির মনে জাগতো তার বিশ বছর আগে হারিয়ে যাওয়া কন্যা কুইনের কথা।

কুইন ছিলো লিয়ং-লিচুএর বড় বোন। বয়স যখন ওর পাঁচ বছর তখন সে মারা যায়। কুইন মারা যাবার এক বছর পর জন্মগ্রহণ করেছিলো লিয়ং-লিচু। তাই সে বড় বোনকে দেখে নাই কিন্তু বাবার মুখে বড় বোনের অনেক গল্প সে শুনেছিলো। গল্প শুনে শুনেই সে মনের পর্দায় বোনের ছবি এঁকেছিলো। ভাবতো লিয়ং-লিচু, যদি তার বোন বেঁচে থাকতো তাহলে আজ তাকে সে কত আদর করতো। বড় বোনের কথা মনে হলে আজও লিয়ংএর মন ব্যথায় টন টন করে উঠে।

লিয়ংএর বাবারও সেই অবস্থা, শিশু কন্যাকে হারিয়েছে বিশ বছর আগে। তবু সে কন্যার মুখখানা আজও মনে রেখেছে, নির্জনে বসে বসে ভাবে বৃদ্ধ অনেক সময় কুইনের কথা। আশাকে যখন বৃদ্ধ প্রথম খাবার দিতে

এসেছিলো যখন ওকে দেখেই নিজ কন্যার কথা মনে পড়েছিলো, আজ যদি কুইন বেঁচে থাকতো তাহলে নিশ্চয়ই সে এই মেয়েটির মতো-নিজ কন্যার কথা ভেবেই ভালোবেসে ছিলো ওকে।

আশা সুচতুরা, সে চীনা বৃদ্ধের মনোভাব জেনে নিয়েছিলো তার আচরণে। তাই সেও তাকে আপন করে নিতে চেষ্টা করেছিলো এবং সে ভালভাবেই জানতো এখান থেকে উদ্ধার পেতে হলে এদের একজনকে হাত করতেই হবে। আশার সে বাসনা পূর্ণ হয়েছিলো।

আশা যখন জানতে পারলো চীনা বৃদ্ধের পুত্র লিয়ং হিন্দলে কোন এক দলে কাজ করে তখন মনে তার বিরাট এক আশার আলো উঁকি দিয়েছিলো, হঠাৎ মনের পর্দায় ভেসে উঠেছিলো একটি মুখ যে মুখ তার মনের গহনে আঁকা হয়ে আছে কঠিন পাথরে খোদাই মূর্তির মত। ভেবেছিলো আশা—যদি লিয়ং বনহরের কোন অনুচর হতো তাহলে.....আনন্দে আশার মন দীপ্ত হয়ে উঠেছিলো.....তাহলে তার সেই আকাজ্জিত জনকে সে জানাতে পারতো তার বিপদের কথা। আশা ভাবে আরও অনেক কথা, একবার সমুদ্র বক্ষ থেকে তাকে উদ্ধার করেছিলো সে। মৃত্যুর কবল থেকেই বলা যায়, সেদিন ওকে কাছে পেয়ে আশা নতুন জীবন লাভ করেছিলো। দুর্গম বন্দীশালায় তাকে স্বরণ করে, হেসে বলেছিলো আশা লিয়ং তুমি যে দলে কাজ করো তার দলপতি বা নেতার নাম কি বলতে পারো।

পারি। বলেছিলো লিয়ং।

তবে বলো?

লিয়ং কোন দ্বিধা না করে বলেছিলো আমি যে দলে কাজ করি সে দলের দলপতি বা নেতা হায়দার আলী কিন্তু আমাদের আরও একজন নেতা বা সর্দার আছে...অবশ্য আমি তাকে দেখি নাই কোনদিন—তার নাম দস্যু বনহর.....

এঁ্যা কি বললে? অস্ফুট আওয়াজ করেছিলো আশা, দু'চোখ তার দীপ্ত হয়ে উঠেছিলো মুহূর্তে।

লিয়ং লিচু যদি চালাক হতো তখন ঠিক সন্দেহ করে বসতো আশার কথা বলার ভঙ্গী দেখে। কিন্তু সে বেশ বোকা ধরণের ছিলো তাই আশার আচরণ তাকে কিছুমাত্র বিস্মিত করলো না।

আশা বললো—কেনো সর্দার বুঝি তোমাদের মধ্যে আসেনি কোনদিন?

সর্দার যখন আসে তখন তার বিশিষ্ট অনুচর ছাড়া কেউ তার সম্মুখে যেতে পারে না, নির্দেশও নেই তেমন কিছু।

ও এবার বুঝেছি সব কথা।

চীনা বৃদ্ধ বলে উঠে—আমাদের দলপতি কিন্তু তেমন নয়, আমাদের সবার সম্মুখে সে আসে এবং কথা বলে।

আশা বৃদ্ধকে খুশি করার জন্য বলে—তোমাদের সর্দার খুব ভাল মানুষ।

আশার কথায় বৃদ্ধ মৃদু হেসে বলে—ঠিক বলেছো মা, ঠিক বলেছো।

আশা চিঠিখানা বের করে হাতে দেয় লিয়ং-এর, বলে সে—লিয়ং লক্ষী ভাইটি আমার এই চিঠিখানা তোমাদের দলের কোন লোকের হাতে দেবে।

লিয়ং ইংরেজিতে কিছু কথা বলতে পারলেও সে ইংরেজি শব্দ পড়তে পারতো না তাই চিঠিখানাতে কি লিখা আছে বুঝতে পারলো না।

আশা চিঠিখানা ওর হাতে দিয়ে বলেছিলো—খবরদার এ চিঠিখানা যেন কাউকে দেখিও না। দেখলে তোমার বিপদ হবে, আমারও বিপদ আসবে।

অতো বোঝেনি লিয়ং চিঠিখানা তাই সে গোপনে লুকিয়ে নিলো পকেটের মধ্যে তারপর পিতার সঙ্গে বেরিয়ে গিয়েছিলো যেমন ভাবে এসেছিলো তেমনভাবে।



আশা চিঠিখানা পাঠিয়ে সম্পূর্ণ নিশ্চিত হতে পারেনি, কারণ চিঠিখানা ঠিকমত পৌছবে কিনা জানে না সে। জানে না লিয়ং চিঠিখানা তার দলের হাতে দেবে কিনা, তা ছাড়া আরও একটি সন্দেহ আশার মনে উঁকি দিচ্ছিলো সে হলো লিয়ং সত্যি কথা বলেছে না মিথ্যা বলেছে তাই বা কে জানে? নানা রকম চিন্তায় আশার মন দোদুল দোলায় দুলছিলো।

আশা যখন আপন মনে বনহরের কথা ভাবছে তখন বনহর নীল সাগর অতিক্রম করে হিন্দল এসে পৌছলো। আস্তানায় এসে পৌছতেই অনুচরগণ তাকে অভ্যর্থনা জানালো।

বনহর সবাইকে ডেকে বললো—কে আমাকে এ চিঠি পাঠিয়েছে তাকে আমার সম্মুখে হাজির করো। চিঠিখানা বের করে দেখালো সে অনুচরদের।

একজন অনুচর বললো—সর্দার, আমি এ চিঠি দিয়েছিলাম।

তুমি কোথায় পেলো?

আমাকে দিয়েছিলো আমাদেরই একজন অনুচর।

কি নাম তার?

লিয়ং-লিচু।

সেই চীনা ছোকড়া?

হাঁ সর্দার।

বনহরের মুখমণ্ডল দীপ্ত হয়ে উঠলো, আশার উদ্ধার ব্যাপারে একটা ক্ষীণ আশার আলো উঁকি দিলো তার মনে।

বনহরের অনুচরটি বললো—সর্দার, লিয়ং চিঠিখানা দিয়েছিলো আমাকে, আমি সেটা দিয়েছিলাম কায়েসকে.....

হাঁ, কায়েসই দিয়েছে আমাকে। বললো বনহর।

হায়দার আলী দাঁড়িয়েছিলো পাশে। সে নত মস্তকে অপেক্ষা করছিলো সর্দারের নির্দেশের। না জানি কি হুকুম হয় কখন।

বনহর বললো—হায়দার আলী লোকমানকে নিয়ে হিন্দল শহরে যাও। আমার ২নং ঘাটি থেকে লিয়ং-লিচুকে নিয়ে এসো। আমি তার কাছে সঠিক সংবাদ জানতে চাই।

হিন্দল ঘাটির অধিনায়ক হায়দার আলী সর্দারের কথায় বললো—আচ্ছা সর্দার, আমি আপনার আদেশ মত কাজ করবো।

হায়দার আলী বেরিয়ে গেলো তখন।

সর্দারের আগমনে হিন্দল ঘাটিতে একটা আনন্দ উৎসবের আয়োজন করলো অনুচররা। বনহর অবশ্য অমত করেছিলো এ ব্যাপারে, কারণ সে ইচ্ছা করে এ সময় বেড়াতে আসেনি। নিতান্ত প্রয়োজনেই বনহর এবার হিন্দল এসেছে।

তবু অনুচররা সবাই আনন্দে মেতে উঠলো। তারা নানারকমের বাজী—তামাসার আয়োজন করলো। বনহরের হিন্দল ঘাটিতে কোন নারী ছিলো না তাই পুরুষরাই নারী সেজে নাচগান করলো।

অনুচররা তাকে নিয়ে যতই আনন্দে মেতে উঠুক, বনহরের মনে তখন নানা চিন্তার উদ্ভব হচ্ছিলো। আশার কথাই ভাসছিলো তার কানের কাছে। আশা বন্দিনী অবস্থায় কেমন আছে কে জানে? ..

একটি দিন এবং একটি রাত তার কেটে গেলো।

হিন্দল ঘাটির বিশ্রামাগারে বনহর বিশ্রাম করছে আর ভাবছে, আশার উদ্ধারের কথা। শুধু আশার কথাই নয় আরও অনেক কথা মনে পড়েছে তার। যেমন করেই হউক আশাকে চীন দস্যু নাংছু-হ্যাং এর হাত থেকে রক্ষা করতেই হবে। অনেক ভরসা নিয়েই সে চিঠিখানা দিয়েছিলো। জানে চিঠি পেয়ে বনহর নিরব থাকতে পারবে না। বনহর একটির পর একটি সিগারেট নিঃশেষ করে চলেছে। মাঝে মাঝে পায়চারী করছে সে, ললাটে ফুটে উঠেছে গভীর চিন্তা রেখা।

একদিন এক রাত্রি কেটে গেছে এখনও ফিরে আসেনি হায়দার আলী লিয়ং-লিচুকে নিয়ে। বনহর স্থির হয়ে বসে থাকতে পারছে না, কারণ তার কত কাজ পড়ে আছে। মনে পড়েছে হাজরা গ্রামের কথা, মাতব্বর ইকরাম আলীর ব্যবসা এই দীর্ঘ সময়ে আরও ফেঁপে উঠেছে। সে গ্রামের দুঃস্থ জনগণের মুখের গ্রাস নিয়ে ছিনিমিনি খেলছে। তাকে সহায়তা করে চলেছে গ্রামের কয়েকজন দুষ্ট লোক। হবি মোল্লা হলো তার দক্ষিণ হাত। সে তার ঘোড়া নিয়ে শহরে যায়, দেশের যারা হর্তা-কর্তা তাদের সঙ্গে যোগাযোগ রেখে কাজ করে। শয়তান কর্তাদের সহায়তা পেয়েই তো ওরা এমন দুঃস্কর্ম করতে পারছে.....

বনহরের চিন্তায় বাধা পড়ে। হায়দার আলীর গলার স্বর শোনা যায়—
সর্দার ভিতরে আসতে পারি?

বনহর পায়চারী করতে করতে ভাবছিলো কথাগুলো, এবার সে আসন গ্রহণ করে বলে—এসো, ভিতরে এসো।

হায়দার আলী বনহরের বিশ্রামাগারে প্রবেশ করে কুর্নিশ জানায়।

হায়দার আলীর সঙ্গে একটি সম্পূর্ণ অপরিচিত মুখ।

সেও হায়দার আলীর অনুকরণে কুর্নিশ জানালো বনহরকে।

হায়দার আলী বললো—সর্দার এর নাম লিয়ং-লিচু।

লিয়ং-লিচুর দু'চোখে বিষ্ময় ফুটে উঠেছে, সে অবাক হয়ে তাকিয়ে দেখছে সর্দারকে। বহুদিন সে সর্দারের সম্বন্ধে অনেক কথা শুনে এসেছে কিন্তু তাকে কোনদিন চোখে দেখেনি। আজ সর্দারকে দেখবার সৌভাগ্য অর্জন করে সে নিজকে ধন্য মনে করলো।

বনহর আশার চিঠিখানা বের করে মেলে ধরলো লিয়ং-এর সম্মুখে—এ চিঠি তুমি এনেছিলে?

বললো লিয়ং—হাঁ, আমি এ চিঠি এনেছিলাম।

তুমি কোথায় পেয়েছিলে?

চীনা দস্যু হুয়াংএর বন্দী শালায় এক বন্দির কাছ থেকে।

বন্দির তোমার পরিচিত?

হাঁ, আমার নয় বাবার পরিচিত সে?

কে তোমার বাবা আর তার নামই বা কি?

আমার বাবা একজন.....থামলো লিয়ং-লিচু।

বনহর ওর মুখে তীক্ষ্ণ দৃষ্টি নিক্ষেপ করে বললো—বলো থামলে কেনো?

লিয়ং-লিচু বললো—বাবা চীনা দস্যু হুয়াংএর একজন বিশ্বস্ত অনুচর। বাবার কাজ বন্দীশালায় খাবার দেওয়া। নাম লাং-চুমিং।

বনহর ভালভাবে লক্ষ্য করে দেখছিলো—সে কোন মিথ্যা কথা বলছে কিনা। হায়দার আলী পাশে দাঁড়িয়ে ছিলো, সে বুঝতে পারলো সর্দার লিয়ংকে ঠিক মত বিশ্বাস করতে পারছে না। তাই হায়দার আলী বললো—সর্দার লিয়ং যা বলছে সম্পূর্ণ সত্য কারণ সে জানে এর একটি মিথ্যা হলে তার জীবন রক্ষা পাবে না।

বনহর বললো—আমাকে পথ দেখিয়ে নিয়ে যেতে পারবে?

লিয়ং-কোন কথা না বলে মাথা নিচু করলো।

বনহর বুঝতে পারলো, সে এমন ঝুঁকি গ্রহণ করতে রাজি নয়। বললো বনহর—বেশ আমি একাই যাবো তুমি শুধু আমাকে পথের নির্দেশ বলে দাও।

লিয়ং কোন জবাব দিলো না।

বনহর হায়দার আলীকে লক্ষ্য করে বললো—কাগজ আর কলম নিয়ে এসো।

হায়দার আলী সর্দারের আদেশ মত কাজ করলো, সে কাগজ আর কলম এনে রাখলো সর্দারের সম্মুখে।

বনহর বললো—বলো, এবার পথের নির্দেশ দাও।

লিয়ং-লিচু বলতে শুরু করলো আর বনহর রেখা এঁকে চললো। শুধু মাত্র কয়েকটি আঁচড় মাত্র। বনহর কাগজখানা ভাঁজ করে পকেটে রেখে বললো—হায়দার আলী লিয়ংকে তার জায়গায় পৌছে দাও। যাও এখন তোমরা।

হায়দার আলী আর লিয়ং-লিচু কুর্গিশ জানিয়ে বেরিয়ে গেলো।

বনহর পকেট থেকে সিগারেট কেসটা বের করে নিয়ে একটি নতুন সিগারেটে অগ্নিসংযোগ করলো। রাশি বাশি ধূম্র-কুন্ডলির মধ্যে তলিয়ে গেলো বনহর। যে পথের নির্দেশ সে পেয়েছে তা অতি ভয়ঙ্কর পথ, এই পথ অতিক্রম করতে পারলে তবেই সে পৌছবে আশার কাছে।



হায়দার!

বলুন সর্দার?

বনহর অশ্বের গতিরোধ করে ডাকলো, তার সহচর হায়দার আলীকে।

হায়দার আলীও তার অশ্বের লাগাম টেনে ধরে অশ্ব থামিয়ে ফেলেছিলো।

যেখানে বনহর আর হায়দার আলী অশ্ব নিয়ে এসে দাঁড়ালো সে জায়গা একটি সুউচ্চ পর্বতের পাদমূল। বনহর আর হায়দার আলী তাকালো পর্বতের উপরিভাগের দিকে। আকাশ চুষ্টি পর্বতের শৃঙ্গটির দিকে তাকিয়ে বললো

বনহর—হায়দার, এই পর্বতের শৃঙ্গের মাথায় কোন এক স্থানে রয়েছে সেই সুড়ঙ্গ পথের দ্বিতীয় মুখ। যে ঠান্ডা পড়েছে তাতে আজ আর এগুনো সম্ভব হবে না।

হাঁ সর্দার, বড় ঠান্ডা।

বেলা ডুবে আসছে তাই ঠান্ডা বেশি অনুভব হচ্ছে। আজ রাতে আমরা পর্বতের কোন এক গুহায় কাটিয়ে নেবো।

সর্দার, পুটলি খুলে আপনার শীত বস্ত্র বের করে দেবো কি?

হাঁ, শীতবস্ত্র পরে নিতে হবে কিন্তু তার পূর্বে চলো অন্ধকার হবার আগে কোন এক গুহা খুঁজে নেই, চলো। অশ্ব পৃষ্ঠ থেকে নেমে দাঁড়ালো বনহর।

হায়দার আলীও সর্দারের সঙ্গে সঙ্গে অশ্বপৃষ্ঠ ত্যাগ করে নেমে দাঁড়ালো।

বনহর নিজ অশ্বকে বেঁধে রাখলো একটা আগাছার সঙ্গে। হায়দার আলীও তার অশ্বকে বেঁধে রেখে অগ্রসর হলো।

এখনও পৃথিবীর বুক থেকে সূর্যাস্তের আভা মিশে যায়নি। যদিও পর্বতের পাদমূলে কিছু কিছু অন্ধকার জমাট বেঁধে উঠার উপক্রম হচ্ছে সবেমাত্র। আগাছা আর শালগাছের ডালে ডালে পাখির কলরব মুখর করে তুলেছে।

বনহর আর হায়দার আলী এগুলো সম্মুখে। ছোট বড় টিলার পাশ কেটে কেটে এগুতে লাগলো ওরা। রাতের মত একটি গুহা তাদের খুঁজে বের করতেই হবে।

বনহর বললো—হায়দার, তেমন কোন গুহা যদি না পাওয়া যায় তাহলে বড় অসুবিধা হবে, কারণ এসব জায়গা বড় মন্দ.....কথা শেষ হয় না বনহরের একটা হুস্কার তাদের কানে তাল লাগিয়ে দেয়।

চমকে ফিরে তাকায় বনহর আর হায়দার আলী তারা দেখতে পায় একটি বিরাট আকার গণ্ডার গর্জন করে এদিকে এগিয়ে আসছে।

বনহর মুহূর্ত বিলম্ব না করে একটা গাছের আড়ালে হায়দার আলীকে ঠেলে দিয়ে বলে উঠে—শীগগীর এ গাছে উঠে যাও হায়দার।

সর্দার আপনি.....

আমি দেখি অশ্ব দুটিকে রক্ষা করতে পারি কি না.....

সর্দার। অস্ফুট উচ্চারণ করে উঠে হায়দার আলী।

কিন্তু ততক্ষণে বনহর চলে গেছে অশ্ব দু'টির কাছাকাছি। দ্রুত হস্তে খুলে দেয় সে অশ্ব দু'টির লাগামের বাঁধন।

ততক্ষণে গুণ্ডারটিও অতি নিকটে এসে পড়েছে। মাথার সূতীক্ষ্ম খর্গখানা নিচ করে তীর বেগে ছুটে এসে হায়দার আলীর অশ্বের পেটে বিদ্ধ করে চিরে ফেলে পেটটা।

বনহর ক্ষিপ্ততার সঙ্গে একটি টিলার আড়ালে লুকিয়ে পড়ে।

আহত অশ্বটি একবার আর্তনাদ করে উঠে নীরব হয়ে গেলো।

দ্বিতীয় অশ্বটি ততক্ষণে ছুটে চলে গেছে একটি ঝোপের মধ্যে। জানোয়ার হলেও তার বুদ্ধি আছে, আছে প্রাণের ভয়।

গুণ্ডারটি ক্রুদ্ধভাবে দুই বার নিহত অশ্বের উপরে খর্গের আঘাত করে দৌড় দিলো সম্মুখে। হয়তো বা সে বনহরকে লক্ষ্য করেছিলো।

বনহর টিলার আড়ালে থেকে দেখলো, গুণ্ডারটা ছুটে চলে গেলো তার টিলার পাশ দিয়ে উত্তর দিকে, যেখানে গাছের আড়ালে আত্মগোপন করেছিলো হায়দার আলী। বনহরের মনটা চড়াং করে উঠলো, হায়দার আলী কি তবে গাছে উঠতে পারেনি।

বনহর টিলার আড়াল থেকে বেরিয়ে এলো। সঙ্গে সঙ্গে গাছের ডালে শোনা গেলো হায়দার আলীর কণ্ঠস্বর—সর্দার, বের হবেন না। লুকিয়ে পড়ুন.....লুকিয়ে পড়ুন.....

বনহর তাকিয়ে দেখলো গাছের ডালে পাতার আড়ালে বসে আছে হায়দার আলী। আশ্বস্ত হলো বনহর। সে পুনরায় টিলার আড়ালে লুকিয়ে পড়লো।

ওদিকে ক্রুদ্ধ গুণ্ডারটি তীর বেগে দক্ষিণ দিকে লক্ষ্য করে ছুটে চলে গেলো।

গুণ্ডারটি মনে করেছে ঐ দিকেই বুঝি গেছে দ্বিতীয় অশ্ব এবং লোকটা তাই সে মাথা নিচু করে চলে যাচ্ছে। প্রায় অর্ধ মাইল দূরে চলে গেলো গুণ্ডারটি।

বনহর আবার বেরিয়ে এলো টিলার আড়াল থেকে। গগণরটিকে লক্ষ্য করে তাকালো হায়দার আলীর দিকে। ততক্ষণে সন্ধার অন্ধকার গাঢ় হয়ে উঠেছে, তাই গাছের ডালে লক্ষ্য করে কিছুই নজরে পড়লো না। উচ্চকণ্ঠে ডাকলো বনহর—হায়দার হায়দার,.....

এই যে সর্দার। হায়দার আলী ঠিক বনহরের কাছা-কাছি এসে পৌঁছেছে।

বনহর বললো—হায়দার উপস্থিত বিপদ কাটলো কিন্তু আরও কোনো ভয়ঙ্কর বিপদ আমাদের জন্য ওৎ পেতে আছে কিনা কে জানে। বড় আফসোস অশ্বটিকে গগণ নির্মমভাবে হত্যা করে ফেললো।

হাঁ সর্দার, বড় দুঃখের কথা, বেচারী অশ্বটির নির্মম মৃত্যু হবে ভাবতে পারিনি।

চলো—আর এখানে বিলম্ব করা ঠিক হবে না। পা বাড়ালো বনহর।

হায়দার আলী তাকে অনুসরণ করলো।

ভাগ্য প্রসন্ন বলতে হবে সম্মুখে কিছুটা এগুতেই তারা দেখতে পেলো একটি ছোট্ট আকার গুহা। যদিও ভিতরটা জমাট অন্ধকারে ভরা তবু তারা খুশি হলো মনে মনে।

বনহর পকেট থেকে খুদে টর্চটা বের করে আলো ফেললো গুহাটির অভ্যন্তরে। এবার আরও খুশি হলো বনহর আর হায়দার আলী কারণ গুহাটি বড় পরিষ্কার পরিচ্ছন্ন লাগছে।

হায়দার বললো—সর্দার গুহাটা বড় পরিষ্কার।

হাঁ, আশ্চর্য বটে। চলো হায়দার ভিতরে যাওয়া যাক।

সর্দার গুহায় প্রবেশ করবার পূর্বে আমাদের শীত বস্ত্রগুলো পরে নেই।

হাঁ, তাই করো। বললো বনহর।

হায়দার আলী পিঠ থেকে পুটলিটা খুলে নিয়ে শীত বস্ত্র বের করে সর্দারের হাতে দিলো। ডিসেম্বরের শেষ ভাগ কাজেই প্রচণ্ড শীত পড়ছে। বেশ কুয়াশা পড়ছে।

বনহর গরম কাপড় পরে নিতে নিতে বললো—তুমিও পরো।

হায়দার আলী বললো—হাঁ আমিও পরে নিচ্ছি।

শীত বস্ত্র পরে নিয়ে গুহার মধ্যে প্রবেশ করলো বনহর আর হায়দার আলী। গুহার মধ্যে প্রবেশ করে টর্চ জ্বালাতেই অবাক হলো বনহর ও হায়দার আলী। গুহার মধ্যে এক পাশে কতকগুলো পাতা সুন্দর করে বিছানা আকারে বিছানো রয়েছে। বনহর বললো—হায়দার আমার মনে হয় এ গুহায় কেউ বাস করে।

হাঁ সর্দার, আমারও তেমনি মনে হচ্ছে। ঐ দেখুন কতকগুলো পাতা সুন্দরভাবে বিছানো রয়েছে—তা ছাড়াও কতকগুলো পাতা বালিশ আকারে তৈরি করে এক পাশে রাখা হয়েছে।

নিশ্চয়ই কোন মানুষ এ গুহায় বাস করে। জীব-জন্তু হলে এমন পরিষ্কার পরিচ্ছন্নভাবে পাতাগুলো বিছানো থাকতো না। কথাগুলো বললো বনহর।

হায়দার আলীর চোখে মুখে বিশ্বয় ফুটে উঠেছে। সে বললো—সর্দার ঠিক বলেছেন, যেমনভাবে পাতাগুলো বিছানো এবং লতা দিয়ে জড়িয়ে পাতাগুলো দিয়ে বালিশ তৈরি করা হয়েছে তাতে মনে হয় মানুষ ছাড়া কোন জীব-জন্তু নয়।

হাঁ, তাই মনে হচ্ছে, কিন্তু যে এখানে বাস করে সে এখন কোথায় কে জানে? কেমন তার স্বভাব হিংস্র না ভদ্র তাও বোঝা যাচ্ছে না। চলো ঐ পাতার বিছানায় আপাতত আশ্রয় নেওয়া যাক।

সর্দার একটি অশ্ব গুহারে খর্গের আঘাতে নিহত হলো, অপরটি ঝোপের মধ্যে প্রবেশ করলো। না জানি সে কোথায় কোন দিকে পালালো.....

হায়দার অশ্বের চিন্তা পরে করা যাবে এখন নিজেদের চিন্তা করো। গুহায় যে বাস করে সে কেমন জানি না, যদি সে হিংস্র হয় তবে আমাদের আচরণে ত্রুট হতে কারণ বিনা হুকুমে আমরা তার আবাসে প্রবেশ করেছি.....

আর যদি মহৎ হয় তাহলে?

এমন মনুষ্য বসবাসহীন পর্বতের নির্জন পাদমূলে কোন্ মহাত্মার আশা করো হায়দার আলী?

সর্দার অনেক সময় অনেক মহাত্মা তপসা কারণে বন-জঙ্গলে পাহাড়-পর্বতের গুহায় নির্জন স্থানে যোগ সাধন করে থাকেন।

হাঁ, সে কথা মিথ্যা নয় হায়দার আলী কিন্তু এ গুহা দেখে কোন সাধকের গুহা বলে মনে হচ্ছে না, তবে তোমার ধারণা সত্যও হতে পারে। বনহর কথাগুলো বলে বসে পড়লো পাতার বিছানার উপরে।

হায়দার আলীও বসলো, কারণ সর্দার বসেছে সে না বসে কোন উপায় নেই।

বনহর পকেট থেকে সিগারেট কেসটা বের করে একটি সিগারেট নিয়ে তাতে আগুন ধরালো।

হায়দার আলী বললো—সর্দার পুটলিতে খাবার আছে বের করবো?

বনহর বললো—করো। বেশ খিদে পেয়েছে।

হায়দার আলীরও খিদে পেয়েছিলো। সে পুটলি খুলে খাবার বের করবার আয়োজন করলো কিন্তু গুহার মধ্যে তখন জমাট অন্ধকার থাকায় অসুবিধা হচ্ছিলো। হায়দার আলী বললো—সর্দার আগুন জ্বালাবো?

হাঁ, তাই জ্বালো, না হলে দু'চোখে কিছু দেখা যাচ্ছে না। ঐ ধারে অনেক গুকনো স্তূপ দেখলাম ঐ পাতা আর গুকনো কাঠ দিয়ে আগুন জ্বালো।

হায়দার আলী সর্দারের নির্দেশ পেয়ে আগুন জ্বালার আয়োজন করলো।

বনহর তখন আপন মনে সিগারেট পান করে চলেছে। মনে তার নানা রকম চিন্তা কিলবিল করছিলো। আশাকে চীনা দস্যুর কবল থেকে উদ্ধার করতেই হবে, তাকে যতক্ষণ না খুঁজে বের করা সম্ভব হবে ততক্ষণ স্বস্তি নাই তার।

হায়দার আলী গুকনো পাতায় আগুন ধরিয়ে দিতেই দাউ দাউ করে জ্বলে উঠলো।

কিছুক্ষণের মধ্যেই গুহাটা বেশ গরম হয়ে উঠলো। আরাম বোধ করছে হায়দার আলী। বনহর যদিও একটু দূরে বসেছিলো তবু তার দেহ বেশ উষ্ণ মনে হচ্ছে। বললো বনহর—হায়দার, আগুন জ্বলে ভাল কাজ করেছে। যেমন ঠান্ডা বোধ হচ্ছিলো এখন খুব আরাম লাগছে। তাছাড়া হিংস্র ঐবজন্তু এ মুখো হবে না।

সর্দার আপনি ঠিক বলেছেন, আগুন দেখলে হিংস্র জীব-জন্তু নিকটে আসবে না।

এসো এবার বসো হায়দার।

হায়দার আলী আরও কিছু শুকনো কাঠ আর পাতা আগুনে দিয়ে সর্দারের পাশে এসে বসলো।

আগুনের লালচে আভা এসে পড়েছে তার সর্দারের মুখে। হায়দার আলীর দৃষ্টি সর্দারে মুখে পড়তেই সহসা চোখ দুটি ফিরিয়ে নিতে পারলো না। আগুনের লাল আভায় বড় সুন্দর দেখাচ্ছে সর্দারকে। মুগ্ধ দৃষ্টি নিয়ে তাকিয়ে থাকে হায়দার আলী। ভাবে সে সত্যি তাদের সর্দার সুন্দর সুপুরুষ বটে।

হায়দার আলীকে তার দিকে এক দৃষ্টিতে তাকিয়ে থাকতে দেখে বলে বনহর—কি দেখছো অমন করে?

লজ্জা পায় হায়দার আলী বলে সে—সর্দার কিছু না। মাথাটা সে নিচু করে নেয় আলগোছে।

বনহর সিগারেট থেকে আর এক মুখ ধোয়া ত্যাগ করে বলে—নিশ্চয়ই তুমি কিছু গোপন করছো। বলো হায়দার আমার মুখের দিকে তাকিয়ে তুমি কি ভাবছিলে?

সর্দার ভাবছিলাম না, দেখছিলাম.....

কি দেখছিলে হায়দার?

আপনার মুখ।

হেসে সোজা হয়ে বসে বনহর, আমার মুখ তার মানে?

ও কিছু না সর্দার।

না, তোমাকে বলতেই হবে হায়দার, তুমি কি দেখছিলো বা ভাবছিলে আমার মুখে দৃষ্টি রেখে।

সর্দার, দেখছিলাম আপনার সুন্দর বলিষ্ঠ মুখ.....

হাঃ হাঃ করে হেসে উঠলো বনহর তারপর বললো—এ কথা তোমার মুখে শোভা পায় না হায়দার। একটু থেমে বললো আবার সে—বয়স আমার কম হয় নি, তবু অনেকে আমাকে যুবক বলে। সত্যিই আমার তখন হাসি পায়.....পুনরায় বনহর একটি নতুন সিগারেটে অগ্নি সংযোগ করলো। নতুন সিগারেটে অগ্নি সংযোগ করবার পূর্বে অর্ধ দণ্ড সিগারেটটা দূরে নিক্ষেপ করেছিলো বনহর।

গুহার অন্ধকারের কোণে সিগারেটটির আগুন জোনাকীর আলোর মত মনে হচ্ছিলো। বনহর নতুন সিগারেটে বার দুই টান দিয়ে বললো—তোমরা সবাই আমাকে ভালবাসো তাই আমি তোমাদের সবার চোখে সুন্দর, বুঝলে হায়দার? যাক এবার কাজের কথা শোন।

বলুন সর্দার।

জম্বু, হিন্দল, আর ঝাম এ তিনটি ঘাটির দলপতি তুমি। যদিও রামসিং জম্বুর সর্দার তবু তোমাকে আমি জম্বু ঘাটির তত্ত্বাবধান করার অনুমতি দিয়েছি।

হাঁ সর্দার, দিয়েছেন।

দেখো, জম্বুতে তুমি ফিরে যাও। জম্বুর রত্নাগারে কয়েকজন স্বনাম ধন্য ব্যক্তিকে স্নত্নভক্ষণ আশায় আটক করে রেখেছি, এবার তাদের কান্দাই ঘাটিতে নিয়ে আসবে, বিচার হবে।

সর্দার আপনি.....

হাঁ, আমি এবার একাই যাবো চীন দস্যু নাংছু-হুয়াং-এর সেই ভূগর্ভ দূর্গ মধ্যে। আশাকে উদ্ধার করে তার গন্তব্য স্থানে পৌঁছে দিয়ে সোজা ফিরে আসবো কান্দাই। তারপর যাবো হাজরা গ্রামে। হাজরা গ্রামে আমার কিছু কাজ এখনও বাকি আছে।

হায়দার আলী অগ্নি কুন্ডটার মধ্যে কিছু শুকনো পাতা তুলে দিয়ে বললো—সর্দার, হাজরা গ্রামে আপনি বেশ কিছুদিন ছিলেন।

হাঁ ছিলাম, তবু কাজ শেষ হয়নি, কারণ আমাকে ধৈর্য সহকারে কাজ করতে হয়েছে। হায়দার শুধু হাজরা নয়, সমস্ত দেশ জুড়ে আজ বিরাজ করছে একটা অন্যায়া-অনাচার আর অবিচার.....শেষ কথাগুলো দাঁতে দাঁত পিষে বললো বনহর। একটু থেমে পুনরায় বললো—যতদিন দেশের এই অন্যায়া অনাচার আর অবিচার নিঃশেষ না হবে ততদিন আমার কাজ শেষ হবে না।

হায়দার আলী বললো—সর্দার, দেশ থেকে এ সব কি একেবারে নিঃশেষ করা সম্ভব?

সম্ভব করতে হবে হায়দার। যে দেশ অন্যায়া অনাচার আর অবিচারের রাজ্য সে দেশ কোনদিন টিকে থাকতে পারে না—সে দেশ ধ্বংস হয়ে যায়, নিচিহ্ন হয়ে যায় পৃথিবীর বুক থেকে, বুঝলে? আমি চাই আমার দেশ পৃথিবীর বুকে টিকে থাক, বেঁচে থাক আর সেই কারণেই আমার এ সংগ্রাম.....বনহরের কণ্ঠস্বর কেমন যেন গভীর মনে হয়।

হায়দার ও বনহর উভয়ে নীরব।

অগ্নিকুন্ডটা জ্বলছে।

একরাশ ধূম কুন্ডলি পাকিয়ে পাকিয়ে বেরিয়ে যাচ্ছে গুহার মুখ দিয়ে বাইরের দিকে। জমাট অন্ধকারে ধূম-কুণ্ডলি গুলোকে এক একটা মেঘের চাপ বলে মনে হচ্ছিলো। বনহর সেই দিকে তাকিয়ে ছিলো এক দৃষ্টে আর ভাবছিলো ঐসব শয়তানদের কথা। যারা দেশটাকে সর্বনাশের দিকে টেনে নিয়ে যাচ্ছে।

নিস্তব্ধ গুহা।

কোন সাড়া শব্দ নেই।

হায়দার আলী বললো—সর্দার আপনি এবং আপনার অনুগত বান্দা—আমরা সংগ্রাম চালিয়ে কতটুকু কৃতকার্য হবো জানি না।

আমার চেষ্টা সার্থক হবেই হায়দার কারণ অন্যায়া কোনদিন টিকে থাকতে পারে না। যারা দেশ ও দেশের জনগণের শত্রু তারা কোনদিনই সর্বশক্তিমানের বিচারে রেহাই পাবে না, নিচিহ্ন তারা হবেই।

ঠিক ঐ মুহূর্তে একটা নারী কণ্ঠের হাসির শব্দ ভেসে এলো গুহার বাইরে থেকে। হাসির শব্দটা যেন জমাট অন্ধকার চিরে খান খান করে ভেসে এলো।

এক সঙ্গে চমকে উঠলো বনহর আর হায়দার আলী। উভয়ে তাকালো উভয়ের মুখের দিকে। অগ্নিকুণ্ডটার আলোতে অন্ধকার গুহার সব জায়গা আলোকিত না হলেও বনহরের মুখমণ্ডল হায়দার আলী স্পষ্ট দেখতে পাচ্ছিলো। বনহরও দেখতে পাচ্ছে হায়দারের মুখখানা। সে বুঝতে পারলো সর্দার নিজেও খুব বিস্মিত হয়েছে। এই জন-মানবহীন নির্জন জায়গায় নারী-কণ্ঠের হাস্যধ্বনি আশ্চর্য বটে।

বললো হায়দার—সর্দার.....

হাঁ, আমিও শুনতে পেয়েছি, কেউ লুকিয়ে আছে আমাদের গুহার আশে পাশে। দাঁড়াও আমি গুহার বাহিরটা দেখে আসি একবার।

না সর্দার, এ সময় আপনার বাইরে যাওয়া উচিত হবে না।

হায়দার কোন কিছু ভেবো না আমার হাতে টর্চ আছে।

কিন্তু বাইরে যাওয়াটা.....

বনহর ততক্ষণে বাইরে বেরিয়ে গেছে।

হায়দার আলীও না গিয়ে পারলো না, সেও সর্দারের পিছনে পিছনে বেরিয়ে এলো গুহা থেকে।

চারিদিকে জমাট অন্ধকার।

নিজের হাতখানাও নজরে পড়ে না।

হায়দার আলীও কম দুঃসাহসী নয় তবু তার শরীরটা দুম-দুম করে উঠলো, জমাট অন্ধকারে চারদিকে কেমন যেন থম-থম করছে। সম্মুখে তাকালো সে কিন্তু কাউকে দেখতে পেলো না।

হঠাৎ পিছনে পদশব্দে ফিরে তাকালো—অন্ধকারে স্পষ্ট কিছু দেখা না গেলেও বুঝতে পারলো কেউ এ দিকে এগিয়ে আসছে। হায়দার আলী কিছু বলবার পূর্বেই বলে উঠে বনহর—ভয় পেয়োনা হায়দার, আমি।

হায়দার আলী বললো—না সর্দার, ভয় পাইনি।

চলো, গুহার ভিতরে চলো।

চলুন।

বনহর আর হায়দার আলী গুহার ভিতরে প্রবেশ করলো।

গুহায় প্রবেশ করে বললো বনহর—কোথাও কাউকে দেখলাম না।

সর্দার এমন অন্ধকারে নির্জন পর্বতের পাদমূলে কে এমন করে হাসলো।
তবে কি আশা মুক্তিলাভ করেছে?

বনহর পুনরায় শুকনো পাতার উপরে বসে পরে বললো—আশা এভাবে হাসতে পারে না, কারণ সে মুক্তি লাভ করেনি, করলে আত্মগোপন করার কোন প্রয়োজন ছিলোনা তার।

সর্দার তবে কে এই নারী? যে এমন জায়গায় এমনভাবে হাসতে পারে?

হায়দার, তুমি যেমন অবাক হয়েছো তেমনি আমি নিজেও অবাক হয়েছি, বুঝতে পারছি না কিছু। তবে যে শব্দ আমরা শুনতে পেয়েছি, তা সত্যি সত্যি হাসির শব্দ নাও হতে পারে। ভাগ্যচক্রে একবার আফ্রিকার জঙ্গলে গিয়ে পড়ি আমি এই রকম একটা শব্দ শুনতে পেয়েছিলাম, তবে সেটা হাসির শব্দ ছিলো না সেটা ছিলো কাশির শব্দ, যেন কোন অসুস্থ ব্যক্তি কাশছে।

সর্দার সে কিসের শব্দ ছিলো?

সে শব্দ ছিলো কোন এক জন্তুর গলার আওয়াজ।

আশ্চর্য।

হাঁ আশ্চর্য বটে। আমার মনে হয় যে হাসির শব্দ আমরা শুনতে পেলাম, সেটা কোন জীব-জন্তুর কণ্ঠস্বর হতে পারে। যেমন ধরো বন মানুষ বা বাঘর ও হতে পারে।

সে রাতে আর কোন কিছু নজরে পড়লো না বা কোন আওয়াজ শোনা গেলো না। এক সময় ভোর হয়ে এলো।

ঘুমিয়ে পড়েছিলো বনহর আর হায়দার আলী। হঠাৎ একটা শব্দ হলো।

ঘুম ভেঙ্গে গেলো বনহরের।

চোখ মেলে তাকালো বনহর। গুহার বাইরে বেশ ফর্সা হয়েছে, কিছুটা আলো প্রবেশ করেছে গুহার মধ্যে। গুহার মুখে নজর পড়তেই বনহর চমকে উঠলো ভীষণভাবে, সে দেখতে পেলো একটি মনুষ্য মূর্তি উকি দিচ্ছে গুহার মধ্যে, বনহর চোখ মেলে তাকালেও সে মাথা উঁচু করলো না বা কোন রকম শব্দ করলো না। দেখতে লাগলো চুপি চুপি বাঁক দৃষ্টি ফেলে।

মনুষ্য মূর্তি পুরুষ নয় নারী, বেশ বোঝা গেলো, আরও বোঝা গেলো সে সম্পূর্ণ উলঙ্গ। তার মাথার চুল এলোমেলো হয়ে ছড়িয়ে আছে সমস্ত পিঠে কাঁধে, চুলগুলো অত্যন্ত লম্বা, প্রায় হাটু অবধি ঝুলছে। হাতে বেশ বড় বড় নখ, বাঁকা হয়ে আছে। শরীরের কিছু কিছু লোম আছে বলে মনে হলো তার।

বনছর শুধু অবাকই হলো না। ভীষণভাবে বিস্মিত হলো কারণ এই নির্জন পর্বতের পাদ মূলে বন জঙ্গলে মানুষ এলো কোথা থেকে। তবু সে পুরুষ নয় নারী। বনছর নিশ্চুপ দেখছে তাকিয়ে তাকিয়ে, ওপাশে হায়দার আলী দিব্যি নাক ডাকিয়ে ঘুমাচ্ছে। সমস্ত রাত সে জেগে ছিলো, কারণ সর্দার যখন ঘুমাচ্ছিলো তখন ও ঘুমাতে পারে না হঠাৎ যদি কোন জীব-জন্তু গুহায় প্রবেশ করে তাই সজাগ ছিলো সে সমস্ত রাত। ভোর হবার পূর্বে ঘুমিয়ে পড়েছে হায়দার আলী।

বনছরও ঘুমিয়ে ছিলো, সে একটু শব্দ হওয়া মাত্র জেগে উঠেছিলো এবং ঐ অদ্ভুত নারীমূর্তি দেখামাত্র একেবারে বিস্মিত হয়ে পড়েছিলো। কারণ সে আজ পর্যন্ত এমন বিস্ময়কর নারী মূর্তি দেখে নাই।

বনছর লক্ষ্য করলো নারী মূর্তিটি উঁকি ঝুঁকি মেরে গুহার মধ্যে দেখছে। তাদের দিকে তাকিয়ে লক্ষ্য করছে কেমন যেন তীক্ষ্ণ দৃষ্টি নিয়ে। বনছর বুঝতে পারলো নারী মূর্তি তাদের দিকে ভীতভাবে তাকাচ্ছে।

ঠিক ঐ সময় হায়দার পাশ ফিরলো।

সঙ্গে সঙ্গে অদ্ভুত নারীটি বেরিয়ে গেলো বিদ্যুৎ গতিতে। বনছর এবার উঠে দাঁড়ালো দ্রুত তারপর গুহার বাইরে বেরিয়ে এলো, দেখলো সেই উলঙ্গ নারী মূর্তিটি এক দৌড়ে ছুটে অদৃশ্য হলো ওদিকে ঝোপটার আড়ালে।

বনছর মুহূর্তের জন্য থমকে দাঁড়ালো তারপর গাছপালার আড়ালে আত্মগোপন করে এগুলো সে সম্মুখের দিকে। ভোরের আলোতে চারিদিক ঝলমল করছে।

বনছর দক্ষিণ হস্তে রিভলভার চেপে ধরে অগ্রসর হলো। কিছুটা এগুতেই নজরে পড়লো ওদিকে ঝোপটা বেশ দুলছে। ক্ষণিকের জন্য থমকে দাঁড়ালো বনছর তারপর কি যেন ভেবে পুনরায় ঝোপের দিকে এগুতে লাগলো। কিছুটা এগুতেই হঠাৎ তার দৃষ্টি চলে গেলো ঝোপটার মধ্যে দিয়ে ওপাশে।

বিশ্বয়ে স্তম্ভিত হলো, দেখতে পেলো সেই অদ্ভুত নারী মূর্তিটি মরা ঘোড়ার মাংস কামড়ে কামড়ে খাচ্ছে।

বনহর আরও কিছুটা এগুলো, এবার সে স্পষ্ট দেখতে পাচ্ছে কি বীভৎস কাণ্ড, মরা গোড়াটির যে স্থান গণ্ডারের খর্গের আঘাতে ঘায়েল হয়েছিলো ঠিক সেই জায়গায় থেকে সে মাংস ছিড়ে ছিড়ে ভক্ষণ করছে। বনহর কিছুক্ষণ অবাক চোখে দেখলো, তারপর ফিরে এলো গুহায়।

গুহার মধ্যে প্রবেশ করে বনহর দেখতে পেলো, হায়দার আলী তখনও নাক ডাকিয়ে ঘুমাচ্ছে। বনহর এসে দাঁড়ালো হায়দার আলীর পাশে, চাপা কণ্ঠে ডাকলো—হায়দার.....হায়দার.....মৃদু থাক্কা দিতেই ধড়মড় করে উঠে বসলো হায়দার আলী।

বনহর বললো—হায়দার দেখবে এসো।

বিশ্বয় ভরা চোখে তাকালো হায়দার সর্দারের মুখের দিকে। সে সর্দারকে বেশ উত্তেজিত দেখতে পেয়ে নিজেও বেশ ঘাবড়ে গেলো, বললো সর্দার কি হয়েছে?

সেই কণ্ঠস্বর যার তাকে দেখবে এসো।

সর্দার সেই হাসির শব্দ যার কণ্ঠের তাকে আপনি দেখেছেন?

হাঁ এসো, কিন্তু খুব সাবধান বুঝলে?

আচ্ছা সর্দার।

হায়দার আলী চোখ রগড়ে উঠে দাঁড়ালো। তার চোখে মুখে বিশ্বয় ফুটে উঠেছে। না জানি কি দেখবে কে জানে।

বনহর বললো হায়দার, তোমার কোমরের বেল্ট থেকে রিভলবার খুলে নাও।

আচ্ছা সর্দার।

এসো এবার।

হায়দার আলী রিভলভার হাতে নিয়ে সর্দারকে অনুসরণ করলো। সে ভেবে পাচ্ছে না কি ব্যাপার। রাতে কোন কিছু ঘটলোনা, ভোরে কি ঘটেছে কিই বা নজরে পড়লো সর্দারের। মনে মনে প্রশ্ন জাগলেও মুখে কিছু জিজ্ঞাসা করতে পারলো না। এগুলো সে বনহরের পিছু পিছু।

বনহর সেই ঝোপটার পাশে এসে দাঁড়ালো। পিছনে হায়দার আলীও এসে দাঁড়িয়েছে। বললো বনহর—সম্মুখে তাকিয়ে দেখো হায়দার।

হায়দার সম্মুখে তাকালো, সঙ্গে সঙ্গে অস্ফুট কণ্ঠে বলে উঠলো—সর্দার মানুষ না রাক্ষসী? কি আশ্চর্য মৃত অশ্বের মাংস ভক্ষণ করছে।

হাঁ এবং ঐ রাক্ষসীর কণ্ঠের হাসির শব্দই রাতে আমরা শুনতে পেয়েছিলাম। হায়দার আরও একটি কথা, ঐ রাক্ষসী গুহাতেই আমরা আজ রাত কাটিয়েছি।

সর্দার।

হাঁ, কারণ আমরা যখন ঘুমাচ্ছিলাম তখন ঐ রাক্ষসী আমাদের গুহায় প্রবেশ করেছিলো এবং সে ভীত নজরে আমাদের দিকে তাকিয়ে দেখছিলো।

সর্দার এমন গহন জঙ্গলে নির্জন পর্বতের পাদমূলে মানুষ এলো কি করে? অবশ্য যদিও এখন সে রাক্ষসী বনে গেছে তবে মানুষ তো বটে।

হাঁ, ওকে দেখে মানুষ বলে মনে হয়, শুধু হয় না আসলেই ও মানুষ এবং বহুদিন সে বন জঙ্গলে কাটিয়ে সম্পূর্ণ বন মানুষ বনে গেছে। দেখছে না ও একেবারে উলঙ্গ অবস্থায় রয়েছে।

তাই তো, জংলীরাও পাতা বা গাছের ছাল পরে কিন্তু এ তাও পরেনি।

পরেনি নয় হায়দার, পরতে জানে না।

ঐ দেখুন সর্দার কি ভাবে কাঁচা মাংস ভক্ষণ করছে।

কাঁচা তারপর আমার মরা ঘোড়ার মাংস, তা হলে ভেবে দেখো ও একেবারে রাক্ষসী বনে গেছে।

সত্যি বড় আশ্চর্য।

কিন্তু এখন ওকে নিয়ে ভাবার সময় নেই হায়দার, তুমি ফিরে যাও হিন্দল ঘাটিতে। কিন্তু তার পূর্বে জীবন্ত অশ্বটিকে খুঁজে বের করতে হবে।

অশ্বটি কোথায় গেলো সর্দার?

আমিও তাই ভাবছি, তবে যেমন করে হোক খুঁজে নিতে হবে। বেশি বিলম্ব করা ঠিক হবে না হায়দার—যাও খুঁজে দেখো।

আপনি একা.....

আমি পর্বত বেয়ে উপরে উঠে যাবো, হাঁ সেই ম্যাপখানা একবার আমাকে দেখতে হবে।

চলুন সর্দার আগে আপনার পথ দেখে নি। ঐ দেখুন সর্দার রাক্ষসী মাংস ভক্ষণ শেষ করে উঠে দাঁড়ালো। এদিকে আসতে পারে.....

না, এদিকে এখন আসবে না কারণ সে জানে তার গুহা অপরে দখল করে নিয়েছে, তবে হাঁ, সে সন্ধ্যার পূর্বে পুনরায় তার গুহায় ফিরে আসবে তাতে কোন সন্দেহ নাই। চলো এবার গুহায় বসে ম্যাপ খানা দেখে নি।

হায়দার আলী তাকিয়ে ছিলো, রাক্ষসীটা তখন চলে যাচ্ছে ওদিকে একটি জলাশয়ের দিকে।

বনহর আর হায়দার আলী সে দিকে লক্ষ্য না করে ফিরে এলো গুহার মধ্যে। সেখানে তাদের খাবার ও পানীয় ছিলো আর ছিলো পুটলি টা।

অবশ্য ম্যাপখানা বনহরের পকেটেই ছিলো। বনহর গুহা মধ্যে প্রবেশ করে বললো—এসো, প্রথমে আমরা কিছু খেয়ে নি। না হলে হয়তো আর এমন সুযোগ আসবে না।

হায়দার আলী পুটলি খুলে শুকনো খাবারগুলো বের করলো। সর্দারকে দিলো এবং সে নিজে নিলো।

খাবার এবং পানীয় পান করে বনহর পকেট থেকে বের করলো ম্যাপ খানা। ম্যাপ মানে একটি ছোট কাগজে কয়েকটি রেখা যা তাকে দিয়েছিলো চীনা বুদ্ধের পুত্র লিয়ং-লিচু।

কিছুক্ষণ এক দৃষ্টে কাগজখানা পরীক্ষা করে বনহর পকেটে রাখলো, তারপর উঠে দাঁড়িয়ে বললো—হায়দার, এ গুহায় এটাই আমাদের শেষ দেখা বুঝলে?

হায়দার কোন কথা বললো না।

বনহর আর হায়দার আলী বেরিয়ে এলো গুহার বাইরে।

বনহর আর হায়দার আলী নিজ-নিজ পুটলি তুলে নিয়েছে কাঁধে। পুটলিতে কিছু পানীয় আর খাবার ছিলো।

ভাগ্য ভাল বলতে হবে সম্মুখে দৃষ্টি ফেলতেই বনহর দেখতে পেলো তার অশ্ব দিব্য আড়ালে ঘাস ভক্ষণ করছে। বললো বনহর—হায়দার যাত্রা শুভ হবে, যাও তুমি।

সর্দার আপনি একা.....

আমার জন্য কিছু ভেবো না, আমি আশাকে নাংচু-হুয়াং এর বন্দী শালা থেকে উদ্ধার করে নিয়ে ফিরে আসবো.....যাও আর বিলম্ব করো না। আর শোন গিয়েই তুমি জম্বু যাবে এবং জম্বুর রাত্নাগার থেকে সেই সব স্বনামধন্য ব্যক্তিদের নিয়ে আসবে কান্দাই আস্তানায়, সেখানে আমি ফিরে এলে বিচার হবে তাদের।

আচ্ছা সর্দার! হায়দার আলী কুর্নিশ জানিয়ে চলে যায়। যদিকে অশ্বটি বিচরণ করে ফিরছিলো সেই দিকে।

বনহর পুনরায় পকেট থেকে সেই ক্ষুদ্র ম্যাপখানা বের করে মেলে ধরে চোখের সামনে।



পর্বতের গা বেয়ে উঠে চলেছে বনহর।

যত উপরে উঠছে ততবেশি ঠান্ডা বলে মনে হচ্ছিলো তার। গরম কাপড় ভেদ করে ঠান্ডা যেন শরীরে বিদ্রু হচ্ছে, মাথার পাগড়ি দিয়ে চোয়ালটা সে ভাল ভাবে জড়িয়ে নিয়েছিলো, তবু জমে আসার উপক্রম হচ্ছে তার সমস্ত দেহটা।

পর্বতের গা বেয়ে উপরে উঠেছিলো আর ভাবছিলো ঐ উলঙ্গ নারী মূর্তিটার কথা। এই দারুন শীতের দিন সে কি করে সর্বাঙ্গ উলঙ্গ অবস্থা রয়েছে। ঠিক পশুর মত হয়েছে তার স্বভাব। কে এবং কোথা থেকে এলো সে এই পর্বতের পাদমূলে কে জানে।

অনেকটা উপরে উঠে এসেছে বনহর। সূর্য্য তখন মাথার উপরে, তবু ঠান্ডা হওয়া বইছে। কন-কন করছে বনহরের দেহটা। মাঝে-মাঝে একেবারে খাড়া দেওয়ালের মত পর্বতের গা, এই সব জায়গাগুলো বনহর খুব সাবধানে এগুচ্ছিলো। একটু পা ফসকে গেলে আর রক্ষা নাই। একেবারে গড়িয়ে পড়বে হাজার হাজার ফুট নিচে। আর খাদের মধ্যে চূর্ণ বিচূর্ণ হয়ে যাবে দেহটা।

সম্মুখে একটু সমতল জায়গা পেয়ে একটু স্থির হয়ে দাঁড়ালো বনহর। এতো শীতেও ললাটে ফুটে উঠেছে বিন্দু বিন্দু ঘাম। বনহর গালপাট্টাটি একটু হালকা করে নিয়ে তাকায় উপরের দিকে, এখনও আরও অনেক উঁচুতে তাকে উঠতে হবে। ঐ উঁচু শৃঙ্গটির দক্ষিণ পাশে আছে একটি সুড়ঙ্গ পথ, সেই সুরঙ্গ পথ তাকে আবিস্কার করতে হবে। লিয়ং-লিচু বলেছে ঐ সুড়ঙ্গ পথে কেউ প্রবেশ করলে দস্যু নাংচু জানতেও পারবে না কিছু। কারণ নাংচু জানে এ পথে কেউ কোনদিন তার দুর্গম দুর্গ মধ্যে প্রবেশে সক্ষম হবে না।

বনহর তাই এই পথে আশার উদ্ধার মনস্থ করেছে। যত কঠিন হোক তবু সে পিছপা হবে না।

একটু বিশ্রাম করে নিলো বনহর তারপর পুনরায় সে উঠে দাঁড়ালো। সম্মুখে পর্বতে গা বরফে ঢাকা, মাঝে-মাঝে শেওলা ধরনের উদ্ভিদ দৃষ্টিগোচর হচ্ছে।

বনহর পা বাড়াবার উপক্রম করতেই হঠাৎ তার কানে ভেসে এলো সেই খিল খিল হাসির শব্দ। চমকে ফিরে তাকালো বনহর কিন্তু কোথাও কাউকে দেখতে পেলো না। আশ্চর্য হলো। পর্বতের এতো উঁচুতে কি করে এলো সে সেই উলঙ্গ নারীটি। এ হাসির শব্দ তারই কণ্ঠের তাতে কোন সন্দেহ নাই।

বনহর এদিক ওদিক ভালভাবে লক্ষ্য করে এগুলো। কয়েক পা অগ্রসর হয়েই আবার বেশ খাড়া পথ। এ পথ শুধু বরফে আচ্ছাদিত। সূর্যের আলোতে রূপার মত ঝল-ঝল করছে চারিদিকে।

বেশ ভাল লাগছে বনহরের। শরীরটা অনেকখানি গরম হয়ে এসেছে। আপন মনে এগুচ্ছে সে। যদিও উঠতে কষ্ট হচ্ছে তবু তার মনে নতুন উদ্যম। আশা তার পথ চেয়ে আছে, আশার মুখখানা মনে পড়তেই একটা হাসির ক্ষীণ রেখা ফুটে উঠলো তার ঠোঁটের কোণে। আশার সঙ্গে দিনগুলোর কথা মনে পড়তে লাগলো তার।

আপন মনে এগিয়ে যাচ্ছে বনহর। এমন সময় হঠাৎ তার কানের কাছ দিয়ে সাঁ করে চলে গেলো একটা পাথরে লুড়ি। ছোট্ট একটা পাথরখণ্ড বলা যেতে পারে। বনহর সজাগ হতে গিয়ে একটু সরে দাঁড়ালো। টিক তখনই আর একটা ঢিল চলে গেলো তার পাশ দিয়ে সঙ্গে সঙ্গে সেই হাসির শব্দও ভেসে এলো।

বনছর যেমন পিছন ফিরে তাকাতে গেছে অমনি টাল সামলাতে না পেরে একেবারে গড়িয়ে পড়লো। কোন মতেই সে নিজকে আটকে রাখতে পারলো না।



যখন সংজ্ঞা ফিরে এলো তখন সে চোখ মেলে তাকাতেই দেখতে পেলো কঠিন ভাবে তার হাত-পা পিছমোড়া করে বাঁধা আছে। একটা অন্ধকারময় কক্ষে সে বন্দী।

মাটিতে পড়েছিলো সে, এবার উঠে বসলো অতি কষ্টে। বুঝতে পারলো মাথায় চোট লেগেছে এবং মাথা দিয়ে রক্ত গড়িয়ে পড়ছে। কিছুটা রক্ত জমাট বেঁধে আছে কপালে, কেমন চট্-চটে লাগছে কপালটা।

কাঁধের পাশেও ব্যথা করছে, মনে হচ্ছে কাঁধটা মচকে গেছে ভীষণভাবে। অন্ধকারে কিছু দৃষ্টিগোচর হচ্ছে না তবু বনছর তাকালো নিজের দেহের দিকে কিন্তু নিজের দেহখানাও নজরে পড়লো না। মনে করতে চেষ্টা করলো সব কথা। একটু একটু করে সবই স্মরণ হলো। কেমন ভাবে পিছনে একটু সরে দাঁড়াতে গিয়ে গড়িয়ে পড়েছিলো তারপর নিচে আরও নিচে গড়িয়ে চললো.....আর মনে নেই কোন কথা।

এখন ধীরে ধীরে সব খেয়াল হলো, বুঝতে পারলো সে নিচে গড়িয়ে পড়ার পর কে বা কারা তাকে বন্দী করে ফেলেছে। কিন্তু কারা তারা? আশার কথা মনে পড়লো, আশা দিনের পর দিন তার পথ চেয়ে আছে। না জানি এখন সে কোথায় কেমন আছে।

বনছরের হাত দু'খানা পিছমোড়া অবস্থায় বাঁধা থাকায় বেশ কষ্ট অনুভব করছিলো। কপালের জমাট রক্তগুলো কেমন যেন চট্‌চটে লাগছে। পিপাসা বোধ করছে সে অত্যন্ত। অন্ধকারে ভালভাবে তাকালো বনছর চারিদিকে, কিছুই দেখতে পাচ্ছে না।

হঠাৎ একটা আলোর ঝলকানি ভেসে এলো গুহার মধ্যে।

ঠিক বনছরের মুখে এসে পড়লো আলো ছটা। চোখ দুটো যেন বাধিয়ে ফেললো মুহূর্তের মধ্যে।

বনহর একবার চোখ দুটো বন্ধ করে আলোক ছটার দীপ্ত রশ্মি সহ্য করে নেয় তারপর চোখ মেলে ধরে সম্মুখের দিকে। বনহর বুঝতে পারলো যে আলোক ছটাটা তার মুখমণ্ডলে এসে পড়লো তা দেয়ালের কোন এক ঠাঁট্টো দিয়েই ভিতরে প্রবেশ করেছে। এবং সেটা কোন তীব্র টর্চের আলো তাতে কোন সন্দেহ নেই।

আরও বুঝলো বনহর, দেয়ালের বাহির থেকে কেউ বা কারা তাকে লক্ষ্য করেছে। বেশিক্ষণ ভাবতে হলো না বনহরকে। হঠাৎ এক পাশের দেয়াল ফাঁক হয়ে গেলো। এবার সেই কক্ষ মধ্যে প্রবেশ করলো দু'জন এলিষ্ট চেহারার লোক।

কক্ষ মধ্যে তখন আলো ঝলমল করেছে। সব স্পষ্ট দেখতে পাচ্ছে সে। লোক দু'জন অত্যন্ত বেটে এবং মোটা সোটা। চোখ দু'টো ক্ষুদ্র হলেও তার দৃষ্টি অত্যন্ত প্রখর তীব্র বলে মনে হলো বনহরের কাছে। লোক দু'জন কথা বললো বনহর তার এক বর্ণও বুঝতে পারলো না। তবে এটুকু সে বুঝতে পারলো এই দু'জনার একজন দস্য নাংচু-হুয়াং তাতে কোন ভুল নেই।

বনহর ভালভাবে তাকিয়ে দেখলো। মনে মনে ভাবলো যাক তাকে আর কষ্ট করতে হলো না। আপনা আপনি পৌছে গেছে গন্তব্য জায়গায়, তবে ঠিক জায়গায় পৌছতে পেরেছে কিনা তাই বা কে জানে।

নাংচু-হুয়াং তার সঙ্গীকে কি যেন বললো।

সঙ্গী বনহরের হাত দু'খানার বাঁধন পরীক্ষা করে দেখলো তারপর সেও কিছু বললো নাংচু-হুয়াংকে। নাংচু-হুয়াং এবার পা বাড়ালো দরজার দিকে।

তার সঙ্গীও তাকে অনুসরণ করলো।

বনহর বুঝতে পারে তাকে ওরা লক্ষ্য করলো এবং পরীক্ষা করে দেখলো সে কোন রকমে যেন পালাতে না পারে। এবার ওরা নিশ্চিত হয়ে চলে গেলো। বনহর ভাবছে, কি তার ভাগ্যে আছে কে জানে।

হাত দু'খানা পিছন দিকে বাঁধা থাকায় খুব কষ্ট হচ্ছে বনহরের। তবু নীরব থাকা ছাড়া কোন উপায় নাই। ক্ষুধাও বোধ হচ্ছে ভীষণ ভাবে। বহুদিন বনহর ক্ষুধার্ত অবস্থায় দিন কাটিয়েছে তবু এমন অসুস্থ বোধ করেনি। আজ যেন কেমন লাগছে তার।

বনহর দেয়ালে ঠেস দিয়ে পা দু'খানা সম্মুখে ছড়িয়ে দিলো। চোখ দু'টো বন্ধ করলো নীরবে।

ঠিক ঐ মুহূর্তে দেয়ালটা আবার সরে গেলো এক পাশে। গুহায় প্রবেশ করলো এক বৃদ্ধ। বনহর লক্ষ্য করলো তার হাতে কিছু আছে।

বৃদ্ধ গুহায় প্রবেশ করে ভাঙ্গা ভাঙ্গা ইংরেজিতে বললো—বাপু কে তুমি? আর কেমন করেই বা তুমি পর্বতে উঠেছিলে আর গড়িয়ে নিচে পড়লেই বা কেমন করে।

বৃদ্ধের চলার ভঙ্গী দেখে হাসি পেলো বনহরেরও। তার ভরসাও এলো মনে এতোক্ষণে যেন সে একটা পথ পেলো খুঁজে।

বৃদ্ধের হাতে কিছু রয়েছে, কিন্তু তা কি, এখনও বোঝা যাচ্ছে না। বৃদ্ধ বক বক করছে তখনও। বাপু, যে এদিকে আসে সে আর কোন দিন ফিরে যেতে পারে না। নাও, এগুলো এবার খেয়ে নাও দেখি।

বনহর বুঝতে পারলো খাবার এনেছে বৃদ্ধ। মনে মনে খুশি হলো, যাক বাঁচলো এবার তবু। বনহর এতোক্ষণ নিশ্চুপ ছিলো, এবার সে ইংরেজি ভাষায় জবাব দিলো পথ ভুল করে এদিকে এসেছিলাম বাবা, হঠাৎ পথ চলতে গিয়ে পা ফসকে পড়ে যাই।

বৃদ্ধ তার সম্মুখে খাবার রেখে বললো—তুমি বড় অসাবধান বলে মনে হচ্ছে।

হাঁ, ছোট বেলা থেকেই আমার এ বদ অভ্যাস ছিলো।

ছিলো নয় এখনও আছে বলো।

ঠিক তাই, বদ অভ্যাসটা কিছুতেই ছাড়তে পারিনি।

এবার তাহলে উচিৎ শিক্ষা লাভ করো।

হাঁ, বড় উচিৎ শিক্ষা পেয়েছি।

নাও এবার খাও দেখি।

কিন্তু খাবো কি করে? হাত দু'খানা তো আমার পিছমোড়া করে বাঁধা।

তাই তো.....বৃদ্ধ বেশ ঘাবড়ে গেলো, ব্যস্তও হলো সে ভীষণ ভাবে।

বনহরের যদিও কষ্ট হচ্ছিলো তবু সে বৃদ্ধের ব্যস্ততা লক্ষ্য করে বললো—এখন তুমি খাইয়ে দাও তারপর আমার হাত দু'খানা মুক্ত করে দেবার চেষ্টা করো।

বৃদ্ধ খুশি হলো তার কথা শুনে। এবার সে নিজ হাতে বনহরের মুখে খাবার তুলে দিতে লাগলো। খাবার খেতে খেতে একবার চমকে উঠলো বনহর, বললো—এ তুমি কি খাওয়াচ্ছে বাবা?

বৃদ্ধা বললো—আমাদের সবচেয়ে ভাল খাবার।

কি এটা?

সাপের মাংস।

বলো কি বাবা?

হাঁ।

বনহর থু থু করে ফেলে দিলো মুখ থেকে, যা তার মুখে তুলে দিয়েছিলো বৃদ্ধ।

এবার বৃদ্ধ অবাক হলো, বললো সে—তোমরা আশ্চর্য মানুষ বাপু।

কেনো?

ভাল খাবার তোমরা খাও না।

ভাল খাবার কাকে বলছো বাবা, ঐ সাপের মাংসগুলোকে?

হাঁ, ওগুলো আমাদের প্রিয় খাবার। জানো বাপু, তোমার পাশের গুহায় একটি মেয়ে আছে—সেও তোমার মত ওঁসব খায় না।

সত্যি! বৃদ্ধের কথাটা যেন বনহরের মনে একটা আনন্দ উৎস বইয়ে দিলো। বললো—কে সে মেয়েটি বাবা?

বন্দী। ঠিক তোমার মত বন্দী নয়, তাকে দলপতি ধরে এনেছে অনেক কষ্ট করে বুঝলে?

হাঁ বুঝলাম, কিন্তু কি তার অপরাধ ছিলো?

অপরাধ।

হাঁ, কি অন্যায় সে করেছিলো?

সে আমাদের দলপতির জাহাজে হানা দিয়েছিলো এবং আমাদের বনহর ধন সম্পদ কেড়ে নিয়ে গিয়েছিলো তাই.....

তাই তাকে তোমরা আটক করেছো?

অনেক কৌশলে করে তবেই তাকে দলপতি আটক করতে সক্ষম হয়েছে। জানো বাপু, মেয়েটি বড় ভাল, আমাকে সে কত ভালবাসে।

তাই নাকি?

হাঁ! ঠিক আমার মেয়ের মত সে।

সত্যি বলছো?

মিথ্যা আমি বলি না, বলার অভ্যাস আমার নেই। কি জানি বাপু, মেয়েটি দেখার পর থেকে আমার খুব ভাল লেগেছে তাই তাকেও আমি ভালবাসি।

বনহর বুঝতে পারলো বৃদ্ধ যার কথা বলছে সে অন্য কেউ নয়—আশা।
যাক, মস্ত একটা কাজ হলো, পর্বত থেকে গড়িয়ে পড়ে। হয়তো ক’দিন
লেগে যেতো ওর সন্ধানে.....

বৃদ্ধ বললো—কি ভাবছো?

ভাবছি তুমি বড় ভাল মানুষ, এমন লোক না হলে নয়। আচ্ছা বাবা
তোমার কি কোন ছেলে আছে?

আছে।

তার নাম লিয়ং-লিচু নয় কি?

বাপু! তুমি কেমন করে তার নাম জানলে? বৃদ্ধ অবাক কণ্ঠে প্রশ্ন
করলো। অবশ্য অবাক হবার কথাই বটে কারণ এই অন্ধকার কারা কক্ষে
তাদেরই বন্দীর মুখে তার সন্তানের নাম শুনে থ’হয়ে গেলো যেন সে।

বনহর বললো—সে আমাদের লোক।

বলো কি বাপু?

হাঁ বাবা।

বনহর বুঝতে পেরেছিলো—এই সেই বৃদ্ধ। লিয়ং-লিচু ম্যাপখানা তার
হাতে দেবার সময় বারবার বলেছিলো—সর্দার আমার বাবা নাংচুর দলে
আছে। সে এখন বৃদ্ধ, কোন কাজ করতে পারে না, সে শুধু বন্দীদের খাবার
দেয়। প্রথম বৃদ্ধকে দেখেই বনহরের মনে লিয়ং-লিচুর কথাটা উদয়
হয়েছিলো। এখন বুঝতে পারলো এই বৃদ্ধই সেই ব্যক্তি লিয়ং-লিচুর বাবা।
চোখ দুটো আনন্দে দীপ্ত হয়ে উঠলো বনহরের, যাক এবার তা হলে আশাকে
উদ্ধার করা মোটেই কঠিন হবে না।

বৃদ্ধ খুশি হয়েছে, বললো সে—বাপু, তুমি বুঝি আমার ছেলের সঙ্গে
কাজ করো?

হাঁ।

তবে এখানে কেনো এসেছিলে মরতে?

ঐ তো বললাম পথ ভুল করে।

কিন্তু এখন পা ফসকে পড়ে গেলে আর ঠিক এসে পড়লে আমাদের
দলপতির সম্মুখে.....

তাই তো দেখছি। বাবা তোমাকে তোমাকে একটা উপায় করতে হবে,
যেমন করে হোক আমার হাত দু’খানা মুক্ত করে দিতে হবে। পারবে না
তুমি?

পারবো কিন্তু.....

বলো থামলে কেনো।

একটু সময় লাগবে।

কি রকম?

এই ধরো যে বা যার কাছে তোমার হাত কড়ার চাবি আছে তাকে হাত গরতে হবে, না হলে তো কোন মতেই তোমার হাত দু'খানা মুক্ত করতে পারছি না।

বেশ তাই করো। বাবা তুমি এতো মহৎ ভাবতে পারিনি। যাও আজ যা খাইয়েছো অনেক, আবার আসবে তখন চাবি আনতে ভুলো না।

বেরিয়ে গেলো বৃদ্ধ।

বনহর একটা তৃপ্তির নিঃশ্বাস ফেললো। এতো সহজে আশার সন্ধান পাবে সে ভাবতেও পারেনি। ভাবতে পারেনি তার পাশেই কোন এক বন্দীশালায় আছে সে।



নাংচু-হুয়াং এর প্রহরীরা সতর্কতার সঙ্গে পাহারা দিচ্ছে। যেন কোন বন্দী তাদের বন্দীশালা থেকে পালিয়ে যেতে না পারে। হুয়াং-এর এ দুর্গ পর্বতের গভীর তলদেশে কাজেই বন্দীগণ সহজে পালাতে পারবে না এ ব্যাপারে নিশ্চিত ছিলো নাংচু-হুয়াং ও তার দলবল। তবু প্রহরী পাহারা দিতো নিয়ম অনুযায়ী।

হুয়াংচু দুর্গের প্রবেশ পথে রয়েছে, চীনা দৈত্য হিং হুকং। যেমন বিরাট তার দেহ তেমনি ভয়ঙ্কর তার চেহারা, তেমনি শক্তি তার দেহে। কতকটা নাংচু-হুয়াংএর মতই ছিলো সে। তাই তার নামের পূর্বে দৈত্য ব্যবহার করা হতো।

হিং-হুকং-এর গর্জন ছিলো গরীলা রাজের হুঙ্কারের মত, তাই ভয় পেতো সবাই ওকে। যদি সে রাগ করে ডাক ছাড়তো তা হলে সমস্ত পর্বত যেন কেঁপে উঠতো থরথর করে।

বন্দীশালার সমস্ত চাবি থাকতো ঐ দৈত্য রাজের কাছে।

বৃদ্ধ চীনাটি জানতো, চাবি নিতে হলে দৈত্যরাজ হিং-হুকংকে খুশি করতে হবে। বৃদ্ধ তাই করলো, এক পাত্র চীনা মদ নিয়ে সে হাজির হলো দৈত্যরাজ হিংহুকং এর সম্মুখে। তাকে মদ খাইয়ে তার কাছ থেকে বৃদ্ধ আদায় করে নিলো চাবির গোছা, তারপর সে আলগোছে চলে এলো বনহরের কাছে।

অবশ্য সে খাবারের থালার মধ্যে চাবির গোছাটা লুকিয়ে নিয়ে এসেছে।

বনহর বসেছিলো দেয়ালে ঠেঁশ দিয়ে।

হাতের ব্যথাটা আজ আরও বেশি, তা ছাড়া মাথায় ক্ষতস্থান টা টন—টন করছে যন্ত্রণায়। একটু হাতখানা বুলিয়ে নেবে তারও উপায় ছিলো না।

বৃদ্ধকে দেখে খুশি হলো বনহর। কারণ সে জানে বৃদ্ধ যা বলেছে তা সে না করেই পারে না। অবশ্য বনহরের মনে এ বিশ্বাস জন্মেছিলো লিয়ং-লিচুর কথায়। সে বলেছিলো বাবা বড় নীতিবান লোক, যা বলবে তা সে করবে। বনহরের কানে সেই কথাগুলো আটকে ছিলো আঠার মত।

বললো বনহর—বাবা চাবি এনেছো?

বৃদ্ধা খাবারের থালা তার সম্মুখে রাখতে রাখতে বললো—এ বুড়ো যা বলবে তা কোনদিন মিথ্যা হবে না। এই দেখো চাবি নিয়েই এসেছি।

সত্যি!

হঁ।

বৃদ্ধ চাবির গোছা বের করে এগিয়ে এলো—দেখি আগে তোমার হাত দু'খানা মুক্ত করে নেই।

বনহর উঠে দাঁড়িয়ে পিছন থেকে হাত দু'খানা বাড়িয়ে দিলো বৃদ্ধের দিকে। বৃদ্ধ চাবির গোছা নিয়ে খুলে দিলো বনহরের হাতের হাত কড়া।

হাত দু'খানা মুক্ত হতেই বনহর নিজের হাতের উপর হাত বুলিয়ে নিলো। বেশ আরাম বোধ করছে সে এখন। বনহর বৃদ্ধকে জড়িয়ে ধরলো বুকে।

বৃদ্ধ নিজেও খুশি হয়েছে।

বললো এবার সে—নাও বাপু এবার নিজের হাতে খেয়ে নাও।

হা, আজ তাই খাবো। তুমি আরাম করো.....বনহর নিজ হাতে গো
মাগ খেতে শুরু করলো।

গুরু বললো—তুমি ততক্ষণ খাও আমি ওর ঘরে খাবার দিয়ে আসি।
ক'র ঘরে?

আমার মেয়ের ঘরে। আমার মেয়ে বন্দীশালায় বুঝলে?

মেয়ে! কে তোমার মেয়ে?

ঐ তো কাল যার কথা বলেছিলাম।

তাকেও তুমি খাবার দাও?

ওধু তাকে কেনো, এই হিয়াংচু দুর্গে যত বন্দী আছে সবাইকে আমি
খাবার দেই। তবে কয়েকজন বন্দীকে খেতে দেওয়া মানা আছে।

কেনো? কেনো খেতে দেওয়া মানা আছে?

যারা দলপতির অবাধ্য তাদের শাস্তি না খেতে দিয়ে শুকিয়ে মারা।

গেমন আশাকে খেতে দেয়া মানা আছে.....

আশা!

হাঁ আশা ওর নাম।

কেনো, কেনো তাকে খেতে দেওয়া মানা আছে? আর তুমিই তো
গললে—তাকে খেতে দিতে যাচ্ছে?

হাঁ, মানা আছে কারণ আশা দলপতির কোন কথাই শোনে না, সে তার
অবাধ্য তাই ওকে দলপতি খেতে দেয় না। আর আমি বললাম খেতে দিতে
যাণো। তোমাকে বললে তো কোন দোষ হবে না, তাই বলছি।

বলো?

আমার নিজের খাবার থেকে চুরি করে ওকে খেতে দেই।

সত্যি!

হাঁ বাপু, সত্য।

শোন, আমার খাবার থেকে ওকে তুমি খেতে দিও। তুমি বুড়ো মানুষ,
না খেয়ে কাবু হয়ে যাচ্ছে যে?

ঠিক বলেছো বাপু, আমি রোজ না খেয়ে আশাকে খেতে দেই অবশ্য সে
জানে না, জানলে কিছুতেই খেতো না।

আজ থেকে তুমি পেট পুরে খাবে আর আমার খাবার থেকে তাকে তুমি
খেতে দিও।

তোমার কষ্ট হবে না তো?

না না, আমার একটু কষ্ট হবে না। যাও, এই খাবারগুলো নিয়ে যাও।

বৃদ্ধ শুকনো রুটী, মাংস আর দুধ নিয়ে বেরিয়ে গেলো।

বনহর হাতের পিঠে মুখ মুছলো।

বৃদ্ধ বেরিয়ে যাবার সময় দরজা বন্ধ করবার কথা ভুলে গেলো।

বনহর সেই সুযোগে বেরিয়ে এলো গুহা বা কক্ষটির বাহিরে। ঝাপসা আলোয় অস্পষ্ট দেখা যাচ্ছো চারিদিক। বৃদ্ধ যে পথে এগুলো, বনহর আত্মগোপন করে সেই পথে চললো।

এদিক সেদিক করে কিছুটা এগুনোর পর একটা গুহার মুখে এসে দাঁড়ালো বৃদ্ধ।

বনহর দেখলো, গুহা বা সেই দুর্গের মধ্যে বহু বন্দী আটক আছে। সবার চেহারা ই কঙ্কাল সার, মুখে খোঁচা খোঁচা দাড়ি গোফ আর লম্বা চুল।

বন্দীদের দেখে বুঝতে পারলো—তারা নতুন আটককৃত ব্যক্তি কার কি অপরাধ কে জানে।

বৃদ্ধ ঐ বন্দীশালার দরজায় দাঁড়িয়ে একটি সুইচে চাপ দিলো—সঙ্গে সঙ্গে খুলে গেলো সেই গুহার কপাট।

বৃদ্ধ ভিতরে প্রবেশ করলো।

আশা উন্মুখ হয়ে বসেছিলো, বৃদ্ধ কক্ষ মধ্যে প্রবেশ করতেই বললো—
বাবা তুমি এসেছো? কই সে এলো না তো? গুহার মুখে তুমি গিয়াছিলে আজ?

আগে খেয়ে নাও তারপর সব বলছি। নাও মা, খেয়ে নাও দেখি। বৃদ্ধ কাপড়ের তলা থেকে খাবারের থালা বের করে আশার সম্মুখে রাখলো।

আশা কান্নার সুরে বললো—না আমি আর খাবো না।

তা হলে মরে যাবে যে মা?

বেঁচে থেকে কি লাভ হবে বাবা। যার প্রতিক্ষায় ছিলাম সে এলো না। আমি বাঁচতে চাই না আর।

কিন্তু তোমাকে বাঁচতে হবে মা। আমি জানি তুমি একজন অসাধারণ মেয়ে।

এ বিশ্বাস তোমার কি করে হলো বাবা?

আমি প্রথম দিন তোমাকে দেখেই বুঝতে পেরেছি—তুমি মেয়ে মানুষ
কোনও তোমার মধ্যে আছে বিরাট একটা প্রতিভা।

হাসলো আশা, ম্লান নিশ্চিন্ত সে হাসি।

বৃদ্ধ বললো—নাও, খাও মা খাও।

আগে বলো, তুমি গুহার মুখে গিয়েছিলে?

হ্যাঁ, গিয়েছিলাম।

কেউ আসেনি বা কারো দেখা পেলে না?

না, কেউ আসেনি, কারো দেখাও পেলাম না। শোন আশা সে আসবে
না, তুমি তার জন্য আর ভেবো না।

আমি জানি সে আসবে। তবে তোমার ছেলে যদি.....

না না, সে মিথ্যা বলে না, নিশ্চয়ই সে তোমার চিঠিখানা তারহাতে
পৌছে দিয়েছিলো—আমি নিজে তার মুখে শুনেছি।

কিন্তু চিঠি পেলে সে না এলেই পারে না। জানি না কেন সে আজও
আসছে না।

তুমি জানো না, এ দুর্গের পথ কেউ আবিষ্কার করতে সক্ষম হবে না।

না, তার অসাধ্য কিছু নেই বাবা, তুমি তাকে দেখোনি—দেখলে বুঝতে
সে কেমন মানুষ।

তার নাম কি মা?

নাম তো তুমি জানোই বাবা, সে নাকি তোমার ছেলে—লিয়ং-লিচুর
সদর।

হ্যাঁ, এবার মনে পড়েছে, বনহর.....দস্য বনহর তার নাম।

আশার চোখ দু'টো ছল ছল করে উঠলো।

বৃদ্ধ বললো—নাও, এবার খেয়ে নাও দেখি। জানো এ খাবার তোমার
জন্য কে দিয়েছে?

তা কেমন করে জানবো?

তোমার মত আমার এক ছেলে। জানো মা, বড় ভাল লোক, বড় ভাল
সে। নিজে না খেয়ে তোমার জন্য দিয়েছে।

বলো কি বাবা?

হ্যাঁ মা, বড় ভাল সে। তোমার কথা শুনেই সে নিজে না খেয়ে তোমার
জন্য খাবার রেখে দিলো। খেয়ে নাও মা.....

আচ্ছা খাচ্ছি। আশা খাবার খেতে শুরু করলো। ভাবছে—কে এমন ব্যক্তি তার মনে এতো দয়া?

আশা খাবার খাচ্ছে আর ভাবছে কত কথা। নাংচু তাকে বন্দী করে নানা ভাবে উৎপীড়ন করছে। তার কাছে জানতে চায় আড্ডাখানার সন্ধান। নাংচু জানে সেই দস্যুরাণী কিন্তু আসলে সে যে দস্যুরাণী নয় বা সে রাণী দুর্গেশ্বরীও নয়। আশা নাংচুকে অনেক বার বলেছে—তুমি ভুল করছো, আমি দস্যুরাণী নই, কিন্তু সে বিশ্বাসই করতে চায় না তার কথা। বিশ্বাস না করার জন্যই নাংচু-হ্যাং আশার উপর চালিয়েছে নির্যাতন।

আশা পালাবার চেষ্টা করেনি তা নয়, কিন্তু সে পালাতে পারেনি। নাংচু ভীষণ কড়া পাহারা নিযুক্ত করছে যাতে দস্যুরাণী এই দুর্গ থেকে পালাতে সক্ষম না হয়।

তাই হলো, আশা বিফল হয়েছে।

বৃদ্ধ বেরিয়ে যায়।

ততক্ষণে আশার খাওয়া শেষ হয়ে গিয়েছিলো। সে নীরবে উঠে দাঁড়ায়। বৃদ্ধ কক্ষে অসহ্য লাগে, তবু কোন উপায় নাই। একটু মুক্ত হাওয়া আর সূর্যের আলোর জন্য প্রাণ ওর আকুলি-বিকুলি করে।

ঠিক ঐ মুহূর্তে একটা ছায়া এসে পড়ে তার সম্মুখস্থ দেয়ালে। কক্ষটার মধ্যে একটা আলো জ্বলছিলো, সেই আলোর ছায়া এসে পড়েছে। চমকে ফিরে তাকালো আশা, সঙ্গে সঙ্গে অক্ষুট শব্দ করে উঠলো—বনহর তুমি! এসেছো?

বনহর একটু হেসে বললো—না এসে পারলাম না। আশা ভাবতে পারিনি এতো সহজে তোমাকে দেখতে পাবো। আশা আর মুহূর্ত বিলম্ব করোনা এসো বেরিয়ে এসো আমার সঙ্গে.....

কিন্তু.....

না এক দণ্ড আর দেরী করো না।

নাংচু-হ্যাং-এর প্রহরী বাইরে অপেক্ষা করছে যদি তুমি ধরা পড়ে যাও? তাতে মৃত্যু হবে।

আমার জন্য মরবে তুমি?

আশা কথা বলার সময় নেই, চলো।

বুড়ো বাবাকে বলা হলো না।

সে সময় আর নাও আসতে পারে চলো। বনহর আশার হাত ধরে টেনে বের করে নেয় তার বন্দীশালা থেকে।

যেমন সে বন্দীশালার বাইরে বেরিয়েছে অমনি একজন প্রহরী অস্ত্র উদ্যত করে ছুটে আসে।

বনহর বিদ্যুৎ গতিতে আশাকে পিছনে ঠেলে দিয়ে প্রহরীর লক্ষ্য থেকে সরে দাঁড়ায় এবং খপ করে ধরে ফেলে প্রহরীর অস্ত্র সহ হাতখানা।

প্রহরী হুমড়ি খেয়ে পড়ে যায়।

বনহর ওর হস্তস্থিত অস্ত্রখানা নিয়ে সজোরে বসিয়ে দেয় ওর বুকে।

একটা আর্তনাদ করে উঠে প্রহরী।

সঙ্গে সঙ্গে অন্যান্য প্রহরী সজাগ হয়ে উঠে। ঘন্টাক্ষনি শুরু হয়। চারিদিক থেকে প্রহরীগণ ছুটে আসে দিশে হারার মত।

বনহর তখন আশাকে নিয়ে অন্ধকার সুড়ঙ্গ পথে ছুটতে শুরু করে দিয়েছে। ওদিকে প্রহরীগণ এসে দেখতে পায় তাদেরই এক প্রহরী নিজ অস্ত্রের আঘাতে নিহত হয়েছে। পড়ে আছে সে ভুতলে রক্তে ভিজে উঠেছে মেঝেটা।

তাজা লাল রক্তের ধারা বয়ে যাচ্ছে। প্রহরীর দেহটা নীরব হয়ে গেছে। বিপদ সংকেত ধ্বনি শুনে নাংচু-হ্যাং তার বিশ্রামাগার থেকে বেরিয়ে আসে। সবাই দেখতে পায় নিহত প্রহরীকে কিন্তু কেউ বলতে পারে না কে তাকে নিহত করলো।

সমস্ত বন্দীশালায় ঘন্টা ধ্বনি হচ্ছে। প্রহরীরা ছুটা ছুটি করছে। সব বন্দীশালা পরীক্ষা করে দেখা শুরু হলো।

বনহর আর আশা এসে আব্বাগোপন করলো সুড়ঙ্গ মধ্যে এক ছোট্ট খুপড়ীর মধ্যে। পথ তারা চেনে না কেউ, কাজেই কোন পথে অগ্রসর হবে বুঝতে পারে না। ইঠাং যদি ওদের সম্মুখে পড়ে যায় তা হলে বিপদ অনিবার্য তাতে কোন ভুল নাই।

বনহর আর আশা দেখছে তাদের সম্মুখ দিয়ে রাইফেল উদ্যত করে ছুটে যাচ্ছে নাংচু-হ্যাং-এর অনুচরগণ। এক একজন ক্রুদ্ধ জানোয়ারের মত হয়ে উঠেছে।

শোনা গেলো দৈত্য প্রহরীর সজাগ কণ্ঠস্বর যেন মেঘের গর্জন বলে মনে হচ্ছে। কেঁপে কেঁপে উঠছে পর্বতের পাথরগুলো। তার সঙ্গে শোনা যাচ্ছে সেই বিপদ সংকেতপূর্ণ ঘন্টা ধ্বনি।

বললো আশা—বনহর আমার জন্য তোমার কোন বিপদ না ঘটে। তার চেয়ে আমার মৃত্যু ভাল ছিলো।

আমার জন্য যদি এতো চিন্তা তবে কেনো চিঠি দিয়েছিলে?

জানতাম তুমি আমার চিঠি পেলে চুপ থাকতে পারবে না।

তাই তো এসেছি।

কিন্তু তোমার যদি কোন অমঙ্গল হয়.....

ক্ষতি নেই।

বনহর!

আশা বিচলিত হবার সময় এটা নয়। আমি জানতাম নারী হলেও তুমি যারপর নাই সাহসী, কিন্তু.....

তোমার জন্য আমি দুর্বল বনহর। তুমি বিপদে পড়ো এ আমি চাই না.....

চুপ করো, এদিকে কারা আসছে। ভারী বুটের শব্দ শোনা যাচ্ছে।

আশা চুপ হয়ে গেছে।

বনহরও নিশ্চুপ রইলো।

ভারী বুটের শব্দ ক্রমে এগিয়ে আসছে, সঙ্গে সঙ্গে তীব্র কণ্ঠস্বর—অবশ্য চীনা ভাষায় কিছু বলছে নাংচু-হুয়াং। বোঝা যাচ্ছে বন্দী পালিয়েছে এটা তারা টের পেয়ে গেছে।

ওরা চলে গেলো সম্মুখ দিয়ে।

বনহর বললো—আশা, এস আমার সঙ্গে।

আশা আর বনহর পিছন দিক দিয়ে নেমে এলো নিচে। অন্ধকারে হামাগুড়ি দিয়ে এগুতে লাগলো ওরা দু'জনা।

কিছুক্ষণের মধ্যেই বনহর এসে পড়লো একটা নির্জন খুপড়ির কাছে। আশাও আছে তার সঙ্গে। এখান থেকে কিছু নজরে পড়লো না। একদিকটা বেশ অন্ধকার। এবার ওরা কতকটা নিশ্চিত হলো।

বনহর বললো—আশা, জানি না সুড়ঙ্গ পথের গোপন মুখ কোন দিকে? তবে আমার মনে হয় এই দিকেই হবে।

বনহর আর আশা অন্ধকারে এগুতে লাগলো। বার বার হোচট খাচ্ছিলো আশা তবু সে কোন রকম কষ্ট অনুভব করছিল না। একটা অপূর্ব আনন্দ উৎস তার সমস্ত মনকে অভিভূত করে তুলেছিলো। যার ধ্যান, যার সাধনায় সে নিজেকে উৎসর্গ করে দিয়েছে আজ তাকে সে পেয়েছে কাছে। যুগ যুগ যদি সে এমনি করে ওকে কাছে পেতো—সব ব্যথা, সব দুঃখ ভুলে যেতো আশা।

বনহরের মনে তখন অন্য চিন্তা, কেমন করে নাংছু-ছ্যাং এর বন্দীশালা থেকে তাকে মুক্ত করে নিয়ে যাবে, কেমন করে তাকে পৌছে দেবে তার গন্তব্য জায়গায়। সুড়ঙ্গ পথ খুঁজে বের করতেই হবে তাকে।

বনহর আর আশা এক সময় পৌছে গেলো একটি গর্তের মত জায়গায়। বনহর বললো—আশা, ভয় পেয় না, এই গর্তটি কোন গোপন পথ বলে আমার মনে হচ্ছে। তুমি গর্তের মুখে দাঁড়াও আমি ঐ গর্তের মধ্যে প্রবেশ করছি।

আশা বনহরের একখানা হাত মুঠায় চেপে ধরলো—না আমি তোমাকে একা ঐ গর্তের মধ্যে প্রবেশ করতে দেবো না।

বনহর অন্ধকারে মৃদু হেসে বললো—এতো ভীতু তুমি?

না, আমি যাবো তোমার সঙ্গে। যদি বিপদ আসে দু'জনার ভাগ্যেই আসবে।

বেশ, এসো।

বনহর আশার হাত ধরে গর্তের মধ্যে প্রবেশ করলো। বনহরের অনুমান মিথ্যা নয়, গর্তটি ছিল একটি সুড়ঙ্গ মুখ এবং ওই সুড়ঙ্গ মুখটাই উঠে গেছে উপরের দিকে পর্বতের শৃঙ্গ অভি মুখে। যে শৃঙ্গ লক্ষ্য করে বনহর সেদিন উপরে উঠে এসেছিলো তবে শেষ অবধি পৌছতে পারেনি পড়ে গিয়েছিলো নিচে একেবারে অজানা পথে।

বনহর আনন্দধ্বনি করে উঠলো—আশা, পেয়েছি এই সেই পথ যে পথের সন্ধান আমি লিয়াং-লিচুর কাছে পেয়েছিলাম।

এ পথ অতি দূর্গম তাতে কোন সন্দেহ নাই। হয়তো অনেক ভয়ঙ্কর জীব জন্তুর বাসা বনে আছে এ পথে। কেউ কোনদিন নিতান্ত প্রয়োজন বোধেই এ পথ ব্যবহার করতো।

বনহর আর আশা এগুতে লাগলো ।

জমাট অন্ধকার ।

বনহর পকেট থেকে বের করলো খুদে টর্চ লাইটটা । সব সে হারিয়েছে পর্বত থেকে গড়িয়ে পড়ার সময়, শুধু চোরা পকেটের কোনে ছিলো খুদে টর্চখানা ।

এই অন্ধকার পথে দুঃসময়ে টর্চটা হলো তাদের পরম বন্ধু ।

কিছুটা এগুতেই একটা শব্দ কানে এলো তাদের, কেমন যেন ঘস্ ঘস্ আওয়াজ হচ্ছে ।

বনহর পা বাড়াতে গিয়ে থমকে দাঁড়িয়ে পড়ে বললো—এ কিসের শব্দ?

আশাও বেশ ভয় পেয়ে গেছে বললো—তাই তো শব্দটা আশ্চর্য ধরণের ।

বনহর টর্চএর আলো ফেলে তাকালো সম্মুখে না, কিছু নজরে পড়ছে না, শুধু জমাট অন্ধকার । তবু না এগিয়ে উপায় নেই, আশার হাত ধরে এগুলো বনহর ।

কিন্তু বেশি দূর অগ্রসর হতে পারলো না, শব্দটা আরও তীব্র মনে হচ্ছে ।

বনহর আশার হাতখানা মুঠায় এটে ধরে বললো—কোন জীব-জন্তু গলার আওয়াজ হবে! কথাটা বলে টর্চের আলো ফেললো বনহর সম্মুখে এবং আশে পাশে । সঙ্গে সঙ্গে চমকে উঠলো ভীষণ ভাবে একটা বিরাট আকার ড্রাম গড়িয়ে গড়িয়ে এদিকে আসছে । ভালভাবে লক্ষ্য করে আশা ভয়ে আঁকড়ে ধরলো বনহরের জামার আস্তিন ।

ড্রামটির কোন হাত বা পা ছিলোনা । ড্রামটি গড়িয়ে গড়িয়ে আসছে সম্মুখে । দুটি গোফ গোল চোখ, যেন আগুনের দুটি বল । বনহর আর আশাকে দেখে ড্রামটি বিকটা শব্দ করে উঠলো-ঘস্-ঘস্-ঘস.....সঙ্গে সঙ্গে ড্রামটা হা করলো ।

সে কি ভয়ঙ্কর জীব, হা করতেই ভিতরে দেখা গেলো বিরাট বিরাট দাঁত সাদা ধপধপে যেন এক একটি ধারালো খর্গ ।

আশা দু'হাতে চোখ ঢেকে ফেললো । বনহর নিজেও বেশ ঘাবড়ে গেছে । এমন ধরণের অদ্ভুত জীব সে কোনদিন দেখেনি । জীবটি দেখতে ঠিক ড্রামের বা জালার মত । ড্রামটার সম্মুখ ভাগে দুটি চোখ, এবং বিরাট একটি মুখগহবর ।

ড্রামটা গড়িয়ে আসছে ধীরে ধীরে আর শব্দ করেছে ঘস্-ঘস্-ঘস্.....

বনহরের কাছে কোন অস্ত্র ছিলো না তাই সে একটু ঘাবড়ে গেলো। বার নাগ টর্চের আলো ফেলছে জীবটার দিকে।

বনহরের ক্ষুদ্রে টর্চের আলোর তীব্রতা ছিলো অত্যন্ত প্রখর। বনহর ড্রাম নাগের জীবটির চোখ দুটি লক্ষ্য করে আলো ফেললো।

আশ্চর্য, যেমন জীবটির চোখে আলো পড়েছে অমনি সে গড়িয়ে চললো নিপরীত দিকে।

বনহর আনন্দ সূচক শব্দ করে উঠলো—আশা, এবার আর কোন ভয় নেই জীবটা পালাচ্ছে।

যতক্ষণ জীবটা দেখা গেলো ততক্ষণ বনহর টর্চের আলো ধরে রাখলো সেই দিকে।

জীবটা সুড়ঙ্গ পথের কোন এক ফাটল দিয়ে বেরিয়ে গেলো বাইরে অথবা কোন গর্তে সে আত্মগোপন করে ফেললো।

আশাকে লক্ষ্য করে বললো বনহর—এবার দ্রুত পা চালাতে হবে। এসো আশা.....

বনহর আর আশা সুড়ঙ্গ দিয়ে উপরের দিকে উঠতে লাগলো।

পর্বতের শৃঙ্গ অভিমুখে উঠে গেছে সুড়ঙ্গ পথটা, কতটা খাড়া সিঁড়ির ধাপের মত। বনহর মাঝে-মাঝে আশাকে সাহায্য করছিলো। এ ছাড়া কোন উপায় ছিলো না কারণ হাজার দুঃসাহসী হোক তবু তো সে নারী।

বনহর একসময় আশা সহ সুড়ঙ্গ পথ অতিক্রম করে উঠে এলো উপরে। তখনও রাত ভোর হয়নি, আকাশে তারার মালা পিট-পিট করে জ্বলছে।

এতোক্ষণ সুড়ঙ্গ মধ্যে তেমন শীত বোধ হয়নি, এখন বেশ ঠান্ডা লাগছে শরীরে। হীম হয়ে আসছে শরীরের রক্ত বিন্দু। বনহর বললো—নিকটে কোন গুহায় রাতের মত আশ্রয় নিতে হবে। না হলে শৃঙ্গ থেকে নিচে পড়ে যাবার ভয় আছে।

তাই চলো—বললো আশা।

বনহর টর্চের আলো ফেলে দেখছে নিকটে কোন গুহার মুখ আছে কিনা।

না, কোথাও কোন গুহা নজরে পড়লো না।

চারিদিকে শুধু বরফের স্তূপ।

আশা ঠক্ঠক্ করে কাঁপছে।

এমন ঠান্ডা তার সহ্য হচ্ছে না। বনহর বললো—আশা তোমার খুব কষ্ট হচ্ছে?

না, আমার জন্য তুমি অনেক কষ্ট করছো বনহর।

এ ছাড়া কোন উপায় ছিলো না। চলো আর একটু নিচে নেমে যাই, যদি পর্বতের গায়ে কোন গুহা পাই তাহলে রক্ষা, না হলে হয়তো বরফ হয়ে যাবো আমরা দু'জন।

চলো বনহর তাই চলো।

আশা বনহরের হাত ধরে নামতে লাগলো নিচের দিকে। অতি সাবধানে নামছে ওরা, যদি পা ফসকে পায় তা হলে আর রক্ষা নাই। অতি সতর্কতার সঙ্গে পা ফেলছে ওরা।

বনহর বাম হস্তে আশাকে ধরে আছে আর দক্ষিণ হস্তে টর্চের আলো ফেলছে।

বললো বনহর—আশা এখনও আমরা নিরাপদ নই। হঠাৎ আমাদের টর্চের আলো যদি নাংচুর কোন অনুচরের দৃষ্টি গোপন হয় তা হলে তারা হামলা চালাতে পারে। তবে আমি জানি তারা আমাদের কিছুই করতে পারবে না।

হঠাৎ আশা বলে উঠলো—সম্মুখে একটি গুহা মুখ আছে বলে মনে হচ্ছে। ঐ দেখো বনহর।

তাই তো! খুশি ভরা কণ্ঠে বললো বনহর।

বনহর আর আশা এসে দাঁড়ালো সেই গুহার মুখে। টর্চের আলো ফেললো বনহর ভিতরে। সুন্দর ছোট্ট একটি গুহা। বনহর আর আশা গুহা মধ্যে প্রবেশ করলো। কিন্তু এক গুহায় ওরা দু'জনা কি করে বাস করবে এই হলো সমস্যা। অবশ্য বনহর এটা ভাবলো না, ভাবছে আশা এবং যে লজ্জা ভরা কণ্ঠে বললো তুমি ভিতরে গিয়ে বিশ্রাম করো, আমি.....

আর তুমি বাইরে থাকবে?

কোন কথা বললো না আশা, মাথা নিচু করে দাঁড়িয়ে রইলো আশা বনহরকে ভালবাসে সত্যি তাই বলে একটা ছোট্ট গুহায় দু'জন কি করে রাত্রি যাপন করবে ভেবে সঙ্কোচিত হলো।

বনহর বুঝতে পারলো আশা দ্বিধা করছে তাই সে বললো—এ মুহূর্তে এমন সঙ্কোচ করা উচিত নয় আশা। জীবন রক্ষা সব চেয়ে বড় কাজ।

আশা অগত্যা গুহা মধ্যে প্রবেশ করলো।

অন্ধকার গুহা মধ্যে পাশাপাশি বসলো ওরা দু'জন। উভয়ের শরীরের তাপ উভয়ে অনুভব করছে। একজন আর একজনের নিঃশ্বাসের শব্দ শুনতে পাচ্ছে।

বনহর ভাবছে ভোর পর্যন্ত তাদের এমনি ভাবে কাটাতে হবে কিন্তু আশা গড় সঙ্কোচিত হয়ে পড়েছে। ওর ঘুমানো একান্ত দরকার।

আশা ভাবছে বনহরে কথা, এমনভাবে ওকে যে পাশে পাবে এ যেন তার কল্পনার অতীত ছিলো, ওর দেহের উষ্ণতা তার হৃদয় মনকে এক অনাবিল আনন্দে ভরিয়ে তুলেছে, বড় খুশি লাগছে। সব কষ্ট সব ব্যথা ভুলে গেছে আশা। অতীতের কতগুলো কথা তোলপাড় করছে তার মনের গহনে। সেই জাহাজ থেকে সাগরে পড়ে যাবার কথা। বনহর তাকে উদ্ধার করেছিলো—বরফের চাপের উপরে তারা ভেসে চলেছিলো বেশ কয়েকদিন পরে। আজ সেই সব পুরোন স্মৃতি ভেসে উঠে মনের পর্দায়। আশা চুপ করে ভাবতে থাকে।

ঠাভায় ঘুম আসে না বনহরের চোখে, সে এতোক্ষণ নিশুপ ছিলো, এবার বললো—বড় কষ্ট হচ্ছে তাই না?

না। বললো আশা।

জানি তুমি স্বীকার করবে না, যে ঠাভা দেহের রক্ত জমে যাবার উপক্রম হচ্ছে। আমার জামাটা তুমি দেহে চাপা দাও আশা।

না না তা হয় না, আমি বেশ আছি।

আশা তুমি নারী আমি পুরুষ, কিন্তু এ মুহূর্তে আমরা উভয়ে মানুষ এটাই মনে করতে হবে। তোমার দেহের সঙ্গে আমার দেহ স্পর্শ হলে সেটা অভিশাপ মনে করো না কারণ আমাকে ভয় পাবার কিছু নেই তোমার।

আমি জানি বনহর তুমি মানুষ নও, মহান। তোমার কাছে আমার কোন ভয় নেই, আমি তোমাকে সম্পূর্ণ ভাবে বিশ্বাস করি।

হাঁ, এ বিশ্বাস যেন তোমাদের অটুট থাকে আমি এই কামনা করি দ্যাময়ের কাছে। একটু থেমে বললো বনহর—জীবনটা আমার বড় রহস্যময়

আশা। জানি না বার বার কেনো আমি এই রহস্যময় অবস্থায় এসে পড়ি। যে রহস্য আমার জীবনে সমস্যা হয়ে দাঁড়ায় যেমন আজকের রাত। থামলো বনহর।

আশা বললো—আমি সব জানি। তুমি সবার প্রিয়জন। সবাই তোমাকে ভালবাসে তোমার সঙ্গ পাবার জন্য কামনা করে কিন্তু তোমাকে স্পর্শ করার স্পর্ধা কারো নাই। বনহর, জানি না তুমি কি.....থামলো আশা।

ঠিক ওই মুহূর্তে সেই অদ্ভুত হাসির শব্দ হলো, নারী কণ্ঠের হাস্য ধ্বনি।

আশা সজাগ ভাবে কান পাতলো। সঙ্গে সঙ্গে তাকালো সে গুহার দরজার দিকে। তা স্পষ্ট ভাবে দেখতে পেলো একটি উলঙ্গ নারী মূর্তি দাঁড়িয়ে আছে গুহার মুখে।

আশা ভীতভাবে বনহরের জামা চেপে ধরে মুখ লুকালো তার বুকে, একটা ভয়াতুর শব্দ করলো সে।

নারী মূর্তিটি তখনও হাসছে খিল্ খিল্ করে। তার এলায়িত চুলগুলো ঝুলছে হাটু অবধি।

পরবর্তী বই
রহস্যময়ী নারী